

萬 有 文 庫

第 二 集 七 百 種


王 雲 五 主 編


西 河 文 集

(二 十)

毛 奇 齡 著

商 務 印 書 館 發 行





西河文集

(二十)

毛奇齡著

國學基本叢書

西河文集

排律目

卷一

金谷園花發懷古得春字

送襄舍人歸湖觀省

寒食夜集施公就亭分得湖字同陳二上善高四詠徐大崇倫麻二乾齡諸子

賦得秋日懸清光換韻

大將軍西伐詩

宿東明寺十二韻

梁園感懷

寄大舜徽之桐音南士大敬憲臣代書

吳宮教美人戰試體旅閔效作

夜到眞州

登汴城卽事

認嵩嶽

廬山

憩華嚴寺後院

蔽山寺

南嶺

黃甫及鴻臚書院前竹

憲臣招飲曙寅園萬李樹下

紀使君生日

贈何仍炎舉秀才入軍

二

殘月如新月試體

賦得秋菊有佳色

宿玄妙觀書范道士榻

西山黃菴主下小尼師

聞蟬

贈夏牟王弘昌

何橋驛遇阿眞詩

元日登淮陰城樓眺望同黃大世貴劉二漢中蔡二爾趾童大衍

經姑蘇作

潤州橋懷古

舟泛金華潑溪界至桐江道中

重由南浦達湖至貴溪途中懷徽之涵之昌其憲臣大摩大敬井山

陰張五杉董三籬商大命說吳二卿植姜十七廷梧姜大兆植金二蘂史大在朋呂四洪烈

飲陳石麟進士

飲丘象升學士賦贈

同王侯服進士歸宿下城賦贈

過禹州呈史廷桂使君

春暮飲湖西署同陳二舍人沈二徵君卽席

李大司馬生日

卷二

同任明府赴張弘軒州守牡丹飲席和明府韻

和待菴看牡丹南園原韻

二

霍縉雲之官有贈

平津宅九日

天寧寺

同諸公游豎相寺

戲聯白傅題東武丘寺詩

二

賦得宿烟含白露示旅寺童兒

江樓望月分賦

詠春雲聯句換韻

送兩浙臬憲移任江南

郡守憲朱公行敝縣枉問并召舟集呈贈

奉送張方伯遷少司空赴都

上浙撫軍詩

入塞曲

宮中樂詞

吳調昭君詞

河亭妓席有贈得遲字

雪

奉祝馳黃尊大人生日

登宣城徐司寇山樓眺望

徐徵士初度之作

吳二太保初度

同南士訪愚山寺寓作

次楊州八韻

送淮安僉使君遷禮部赴都

陳虹縣席上作

登取亭

旅主人好射每邀觀飲以舒孤悶因吟爲贈

贈夏丞

寄贈姜京兆一首

單學博七十有贈

沈九祕書典試江南子撤闌日邀予過敘率爾有贈

書家兄門下今三君皆先後通籍而予獨黜遲于此徘徊諸觀遂有斯詠

黃母生日

卷三

從大江口將入石頭作并寄金二公子敬啟

贈曹爾堪學士

呈郡司馬孫使君

奉贈來十五集之給事

贈汾州董司馬六十初度

施公視學山左歸過湖上有寄

奉和姜太翁虞部東池別業原韻

渡瓜州次宿明到高郵將達淮先呈朱禹錫明府

國朝雅集贈劉昌言進士二十韻

謁于廬陵作

楊園聯句

奉贈嚴都陳賢母江孺人壽

題汝南郡西堂牡丹

聯續元稹詩三十韻一首

來母孫太君初度

重過任四辰且書館因憶王十六先吉韓十七日昌竄于此館同受

來母孫太君初度

來母孫太君初度

來母孫太君初度

汝南金太守席書事一十二韻不揣下里同座上諸公和得東字

奉送張使君之任和韻

過訪無錫縣吳興祚明府有作時已遷行人將次赴都

別閔衍

透夏明府之任西和

呈郡別駕張公

沈彙明府治西平有名欲往從之不果值予南還以縑紵見貽因寄

并謝 十二韻

奉題孫藩處士卷子

郡太守平寇有贈

大敬宅牡丹

少與包 秉德蔡五十一 仲光沈七 禹錫爲鄉遊道古論文視若兄弟今包二死十四年沈七死十八年矣獨蔡五十一與予

居人間世予又瀕死道路曩時交游文章悉亡兵災憶包二尙存集數卷未行世予泊舟餘干城下爲賦此詩

亡劍篇哭姜坦

閩中春曉得量字

賦得起晚誦經遲

賦得烏散餘花落聯句

空梁落燕泥聯句

杜陵杜杜若會宴駱明府別業

同施參藩王使君溫別駕張司刑屈明府暨諸公游慧力寺

宿雲門廣孝寺呈三公與南士分得灰字

題宿道林山寺兼贈離上人

途中喜從丁儀曹得周侍郎亮工分藩覆書感紀成篇

奉送姜侍御起復還臺

山樓對雨同南士桐音暨姜生兆熊得絲字

秋晚新晴登桐音山樓飲宿聯句

甬東李岷源西渡有贈

贈江清屈明府

贈張法曹

集臨江黃氏園用佳字

遠懷詩

游仙詩

擬豔詩聯句

定交詩爲胡以寧方中通堵鳳蒸

宛陵汪節母詩

月身牟尼羅漢詩

贈蔡山人岳陽

贛州周司理令樹回任舟次

卷四

楊州金太守修復平山堂讌集和曹侍郎韻

從湖口入彭蠡舟次登覽書事

行次左蠡放船出南康已來舟中寄蔡五十一仲光姜十七廷梧張五杉并呈施湖西趙司馬駱崇仁何奉新諸公

彭蠡湖達南昌將適廬陵訪施湖西途中有寄凡三十二韻

自南昌踰峽江入廬陵界再寄施湖西并諸幕府四十三韻

投寓天衣寺謁乾公和翁同張五杉用宋之問韻

送蔡漢舒北游

早春殘雪

奉贈嚴都諫十韻

擬讌詩

哭沈生功宗詩

送邑明府韓公纘歸遼陽

蟹聯句

秋雨聯句

奉贈萊陽宋公分司寧紹十韻

壽李翰林母太君商夫人十六韻

將遠行時賦得復堂堂曲一百二韻有杜陵蔣生白魚潭張五城南

蔡五十一夙喻我意可寄觀

卷五

送周儀曹奉使安南冊弔一十四韻

賦得拈花如自生觀內家所製翦綵花作

上寶坻相公

滿洲中堂生日作

上巳申江修禊和任明府韻

送梁京兆之任奉天兼訊姜少京兆

賜筆紀恩和韻

夜飲施少參邸舍同諸徵士作

張通政初度八韻

恭送——仁孝——孝昭兩皇后哀詞

翰林院掌院學士生日

甘霖應禱恭頌二十韻

寄祝董太史尊人七十

秋夕周金然編修招諸名士集張氏園分賦得銀漢

又賦得白榆

喜遇王二光祿有贈

上李相公

集閩縣方京池亭同鄭宮坊前輩高兆陳日浴定國卽席分韻得花

字

賦得紅藥當階翻

過汪二檢討新居和馮三郡丞韻

陳開府生日

八月三十日上賜翰林院諸臣御河鮮藕恭紀一十八韻

何使君紀績詩

幕中丞起湖北巡撫有贈

春晚曹顧菴學士過天中署夜飲卽席和見贈原韻

十月朔午門頒曆侍班恭賦

駕幸溫泉恭賦

題耕隱卷子

卷六

聶明府生日

雙壽篇贈餘姚諸徵君

遙同淮上諸公九日遊——裕親王園林登高限韻得徒字

寄祝同年汪編修尊人雙壽

奉酬董公子致平貽贈十六韻

許使君詩

題傳經堂詩

蒙孫國公徵灑請召西園讌集有贈時予將南歸舟次奉答

寄祝劉母王太君

看菊聯句

送任生北遊

贈胡少宗伯八韻

寄祝王匡廬先生七十初度

吳楷招會湯餅聯句

禹陵

郡太守許公遷寧紹兵巡副使賦贈

丘大參年伯七十初度

奉謨通政楊公林居感贈一十四韻

葉使君六十

贈副都御史金君

康熙乙丑予奉使分校會闈得士一十二人竣事恭紀兼呈同考諸公三十韻

鏗院簡王編修同考兼呈雜弟侍郎主文十韻

過劉少參宅有贈

趙弟舉茂才書扇志喜

送家僉事提學雲南

丹陽別羅坤

胡副憲生日

二

寄吳制府廣東

吳門喜遇郭囊圖飲次留贈并謝所貽聯句

挽陸母

觀徐昭華畫幃作

西河文集

蕭山毛奇齡字齊于稿

姜苴汝高較
姜梭汝長

排律 卽長律。又名聲律。唐取士用此體。祇六韻耳。一

西河自抄稿。名空居日抄。蓋取長卿傳。時時著書。人又取去。卽空居也。出游後。家人又毀之。它人有存者。則匿之矣。故已刻未刻多未合。且有爲人更篡移易者。惟七律排律二卷。不甚缺略。但別稿舊有靈隱寺詩。有春雪詩。皆膾炙人口。今又不存。則遺落可知也。排律爲五古沿變。晉宋以來。排體之漸也。五古拗之排。排體調之古耳。然則排以六朝初唐爲歸。可多酌耶。此鴻路堂論詩語。

近體聲律。盡于對偶。不能爲排。則諸體可知矣。特初唐無多韻。自試體六韻始。至多二十韻耳。少陵增韻。且多徑露之色。他惟白傳頗充容。餘不逮矣。西河增韻減韻。皆風華流軼。洋洋自得。嘗曰。排體難精融。唐人試體。最不易到。以此爲思。則多寡輕重瞭然耳。西河論詩。嘗曰。詩必能盡其才爲妙。能盡其才。則歷情盡理。如登高臨深。難粹竟矣。古來能盡其才者三人。梁簡文。杜甫。白居易而已。李白勿與焉。李雖如神虬獨行。超然踔儻。然能語大。不能語細。亦知能之憾也。予擬論註簡文子美香山三家詩。而時與會。竟不暇逮。悲夫。將以俟後之知予言者。又曰。簡文篇法不高。長慶七律五古。眞調卑格陋。然就其佳處讀之。幽微驚詫。光怪萬端。非發物理之祕。開人情之精。何以有此。世必襲宮體爲簡文。做打油爲樂天。俗父也。舊評曰。大可律詩。如金市騁。風輝滿前。

金谷園花發懷古得春字

桂澤迴朝日。花林發上春。誰爲臨澗客。思殺墮樓人。長阪迷紅藥。連珠散綠蘋。霜條捎幔錦。露葉落車茵。讌飲追王翽。風流想季倫。繁華餘豔影。顧盼最傷神。查曰金谷詩波激連珠揮

送龔舍人歸湖覲省

朝雨灑行車。春江送伯魚。斑衣看外着。銀詔自中書。勝里方迴轍。高堂正倚閭。帔分清禁出。羹上太官餘。湖橋將花發。湘蘭帶露舒。黃香江夏士。孝行有誰如。

寒食夜集施公就亭分得湖字同陳二上善高四詠徐大崇倫麻二乾齡諸子

高讌同金谷。清宵啓玉壺。餚盤存令節。榆火散平蕪。對酒傷春暮。裁詩及夜徂。賓閒交履舄。宦達似江湖。磬筦沉官閣。鞦韆記客途。梨花留醉看。莫聽樹頭烏。

賦得秋日懸清光換韻

何堂曰換韻非題中韻也他做此

帝顛司秋肅。陽鳥啓曙新。三竿懸有象。萬里淨無塵。炤壁融丹粉。流波蕩水銀。孤光迴暑氣。涼影動蕭晨。但得清時取。金天一轉輪。

大將軍西伐詩

萬里絕塵埃。將軍天上來。聲名驚外域。節鉞授中台。司闢三軍命。分符七校才。熊旗收勅勒。猿臂射輪臺。日暗刀如雪。沙空鼓似雷。巡山宵擊斗。度隴晝銜枚。戰急前軍集。行遲後命催。霜高兵氣肅。風落陣雲開。紫塞秦城遠。黃河漢使迴。西征看略馬。定爲取龍媒。

顧茂倫評曰。結撰超卓。排遣精緻。行跌蕩于密麗之中。凡意境氣調。深淺開闔。無不從容入妙。此等詩謂非沈宋不可也。又曰。西河排律。篇篇精警。真絕人之事。

宿東明寺十二韻

寶地棲靈異。香臺枕翠微。龍銜秋雨過。客共暮雲歸。一鉢留殘篆。雙松曳落暉。蓮開太子座。草長遠公扉。秋老蟲爭響。烟寒鳥自飛。塔前翻貝葉。樹裏掛僧衣。寺古鐘鳴早。林深人到稀。楊懸新莞簟。燈暗舊紗圍。鐵杵時誰舉。金裝夜有輝。尋真思未冥。入道志多違。潮湧來仙梵。霜空得妙機。可憐漂泊久。暫此一皈依。

梁園感懷

才子蕭條甚。乘春游大梁。草青連日暮。不見舊賢王。荒甸傾朱榭。長陂秀綠楊。天寒剛灑雪。人去幾經霜。上館開樽冷。平臺射兔涼。諧文跨漆吏。雅賦待鄒陽。汴水開河淺。鄴陵去路長。曜華宮首望。何處不蒼茫。

寄大聲徽之桐音南士大敬憲臣代書

避地家千里。懷人思百端。鄉關春邈邈。郡閣夜漫漫。馬走時依棧。鴻飛敢漸磐。貧交投趙勝。曼語報任安。却載辭秦使。操兵謝漢官。舟車窮兩越。書信斷三韓。謂塞外諸君旅婦縫衣綻。江漁解劍寒。東亭悲聚散。北斗望闌干。海關從垂釣。河清好伐檀。授詞當尺素。反覆道加餐。

吳宮教美人戰試體旅悶效作

名將觀兵略。賢王試女戎。陰符先闔內。祕計定宮中。金甲擐衣紫。瑠旗捲汗紅。攢眉羞畫戟。錯步笑彎弓。魚貫看難列。梟刑豈待終。軍前娘子隊。端賴霸圖雄。

史曙寅評曰。倚事轉合。唐人有之。若陰符錯步二聯。虛實前後。幾乎擅天孫之巧。則唐詩具在。似遜此矣。破能點闕。固作主句。更見高手。

夜到眞州

旅泊驚銷夏。江行入早秋。涼風吹甃社。夜月上眞州。露白沙俱淨。潮來水自流。燈檣圍翟賈。酒市記秦郵。瓜蔓橫江步。攀花映石頭。女郎歸浣浦。太子去書樓。野鷓棲前渡。飛龍過此洲。只憐亡楚客。吹笛尙悠悠。

登汴城卽事

不作名王客。徒深公子情。烟花三月暮。一上大梁城。舊苑樽盤合。繁臺歌吹榮。春隄紛繫馬。午樹敞啼鶯。世鮮捐虞相。時無救趙兵。賓師淹孟子。關吏困侯生。亭戍層烟晚。河沙壅地平。九門新浩蕩。四術故縱橫。士女看都雅。金錢在市贏。繁華追往事。重與說東京。韋曰。譙周云。虞卿食邑于虞。非氏也。

陸蓋思曰。一起風流慨慷。太白梗概。接入流麗。如駢珠繁露。雖密練而氣實高。景龍以後。鮮有此調。

謁嵩嶽

太室開天表。崇丘奠土中。主名高四域。受秩比三公。日月環區宅。陰陽割渾濛。歌嶽揚峻極。望祀體昭融。華蓋標方嶺。金壺啓上宮。翁河承漢禪。卜洛載周工。別觀翔修鶴。層城倚大熊。藏書憑玉女。過澗遇青童。洞閉能圍雪。梯長恍御風。羣山咸拱嶽。萬歲自呼嵩。槐弟封堯爵。萑羊採少翁。浮丘閒駕羽。子晉妙吹筩。石酒龍精白。崑花鳳首紅。烟霏春渺渺。水滴午淙淙。虛壑涵深鑿。空梁拔斷虹。天關應再闢。帝座儼相通。

險塞分河內。靈祇屈岱東。神京懷舊服。終古賴攸同。

廬山

嶮嶂東崑勝。蒼茫南斗間。倒傾彭蠡浪。雄出豫章山。駭谷驚難度。奇峰秀莫攀。星光流電閣。日影上天關。石鏡懸孤照。屏風疊九環。蓮花開社白。杏子墜林殷。雁陣迷遙渚。鵬垂暗大寰。分流遮七澤。越嶺控諸蠻。雙闕游來迥。三宮望去閒。陶潛真邂逅。匡氏本仙班。赤豹司金鎖。青猿獻玉環。危梁跨兀兀。飛瀑下潺潺。剌轉金輪扇。巒封錦石斑。清颺迴一氣。散岫簇雙鬢。吳楚區分大。乾坤到處艱。幽棲能託跡。應見白雲還。

憩華嚴寺後院

既入三摩地。還尋不二禪。長林分化域。高閣會諸天。橘壠成香徑。松門倚翠田。龜趺留篆小。龍女抱花妍。紅網穿殘日。黃金布昔年。臺端翻覺藏。湖外恍迷川。龕石瘞唐祖。廬峰景晉賢。無心常擊磬。得語自忘筌。衣敞猶懷寶。盤空不施錢。開垣看綠樹。赤地長紅蓮。南郡饒新剌。西林續舊緣。晚鐘相繼起。歸路夕陽邊。

叢山寺

東晉千秋宅。吾嘗思右軍。南朝四百寺。汝以奉龍君。灑墨飛花雨。清談起佛雲。名門成雁塔。道士戀鵝羣。白社前賢散。烏衣隔巷曛。此山嘗採叢。歌苦不堪聞。

黃刻知評曰。對起峭宕甚。只十二句。已備極風流之致。

南鎮

古鎮封東越。名山表會稽。周官頒令冊。夏禹錫元圭。丹殿憑嵩迥。紅墻入路低。天關懸畫額。地勢控雕題。代遠圖書杳。雲深竹箭迷。春還尋秘蹟。長望草萋萋。

黃甫及鴻臚書院前竹

修竹映虛堂。菁蔥入座涼。筍多緣砌隙。枝曲避檐長。日影移紅幔。風梢出畫墻。連苞如洗露。剝粉類彫霜。近榻繙書靜。穿林度酒香。徵歌宜夜色。高嘯動秋光。葉密藏鳩雀。花開待鳳凰。由來江夏郡。清絕勝瀟湘。

憲臣招飲曙寅園萬李樹下

萬李白皚皚。雙樽啓白醅。地從瑤海入。人似雪園來。樹密盤根遠。花繁帶葉開。彌天遮作幔。點地便成堆。綺勝隋堤絮。光浮庾嶺梅。霧深剛五里。風舞必千迴。過鶴憎裙黑。拖鷗愧色灰。坐迷雲母榻。持晃水晶杯。觸席傾烟粉。沾茵襯土苔。日明斜欲炫。暮色緩堪猜。衣晚添綿着。賓稀待月陪。香隨銀甕倒。影共玉山頽。漢將綠蹊集。王公棄道栽。華林能夜宴。應見謫仙才。

紀使君生日

良牧驅熊旆。仙郎授虎符。檐帷襄上郡。竹馬候當塗。星曆迴珠斗。春冰飲鑑湖。百城尊巨守。八邑啓鴻圖。假節平戎莽。揮錢減榷酤。豐年饒比屋。佳日洗行廚。介壽函公酒。傳籌玉女壺。庭鸞翔獸檻。車鳳綴魚珠。家擅千秋雋。仙留九節蒲。攜將生甫誦。聊用當歌呼。

贈何仍炎舉秀才入軍

玉靶角弓弦。終童正妙年。一人安用敵。萬里竟爭先。投筆驅戎莽。披圖識陣田。風號雙躍劍。雲滿五花韉。

用世書生貴。趨庭孺子賢。茂才因國舉。燎曰晉書逸少國舉驃騎是家傳。朝氣能懷組。秋期早着鞭。蓮花開處舞。楊葉望中穿。秀士思稽穆。從軍憶仲宣。他時隨定遠。攜我記燕然。

二

少年懷大志。慷慨事橫行。弱冠羞垂帶。乘時願請纓。鳳雛分片羽。驥子起長鳴。納履聞三略。傳經諳五兵。張良如好女。杜預本諸生。淬劍流波動。彎弧睡石驚。樽前飛正練。花下解重英。矍相曾觀射。輪臺早勒名。贈鞭豪士氣。貽珮故人情。率土非忘戰。遙天尙輟耕。烏衣兒輩在此。去定專征。

殘月如新月試體

仄景連晨發。幽光類夜闌。女驚粧罷拜。人似醉歸看。雞唱重栖埭。烏飛尙繞竿。升階宵讀永。出渚曙吟寒。鉤曲懸相比。弦虛上轉難。羈人無早暮。一樣凭闌干。

程杓石舊評曰。只弦虛五字。殘月與新月分處。劃然精確。唐人府試作。遜此遠矣。况語語研密。譬妙耶。

賦得秋菊有佳色有序

九日雲起閣。各賦陶句。其不得秋字。從險也。唐人試是題。有唱得佳字而承以花者。豈誤佳爲嘉與。抑佳嘉本同。今不然。與好學者稽焉。

九日東籬菊。三秋色自佳。金英開藥屋。玉露滴花塔。細碧攢幽幹。圓黃掛采牌。白衣暫把袖。青女笑留釵。味汎龍山酒。香盈彭澤懷。今朝良燕會。燦燦在高齋。

宿玄妙觀書范道士榻

借宿上清家。松壇日影斜。白歸天際鶴。紅掩洞門花。羽駕留雙節。玄經貯五車。春星排玉豆。晚飯進胡麻。海嶠丹砂遠。函關紫氣賒。相逢仙室秘。爲我授瑤華。

西山黃菴主下小尼師

十四小尼齡。蓮花貯雀瓶。衣裁桑眼綠。眉掃佛頭青。禮懺蹲還立。迎人進復停。供盂盛苧績。齋板斷葷腥。身長撩幡帶。聲清僧閣鈴。問家心憶姓。無字口傳經。荒圃迷春草。閒房閉曙星。六時山磬響。愁轉化王庭。

曾退公貽西河詩曰。東寺鐘鳴後。西

山月上時。比來嘗失笑。爲誦小尼詩。

聞蟬

雨歇驟聞蟬。南園欲暮天。影藏青葉裏。聲出綠楊顛。羣噪當殘日。孤吟曳晚烟。互聽疎復密。接響斷還連。韻促從風急。音遙帶露遷。長鳴綠白縵。暫咽下紅泉。嘒嘒勻如節。調調沸欲煎。侍中喧墮珥。齊女嘆遺鈿。隔唱頻相應。餘嘶靜自延。鳥銜拖淚去。蟲網抱暗牽。枵腹歌難繼。遺形語並傳。秋山悲去國。空賦蠅蛄篇。

贈束牟王弘昌

王子東牟士。能吟西塞詩。貧依漂母飯。閒過楚王祠。妙技柯亭篠。新書蠶白詞。聯吟秋水暮。把酒雪花時。方國推新譽。天涯似故知。同來覺汝儁。別去繫人思。芳甸抽青草。遙波汎白陂。登樓纔賦罷。不忍贈將離。河橋驛遇阿真詩

晚驛聽殘瑟。停船問阿真。十年深巷柳。一夕異鄉人。櫓楫迎難定。衫構認轉親。波流縈睇遠。燈火炤愁新。石路滋紅草。天河瀉紫辰。雞鳴開榜去。相望滿江春。

陸叢思評曰。不覺有冶情。祇覺疎疎落落。一往情深。

元日登淮陰城樓眺望同黃大世貴劉二漢中蔡二爾趾童大衍

首旦招同契。乘城眺遠空。淮流千里逝。楚服八州雄。曲磴搖星閣。城有魁星樓。在角樓左。層臺控帝宮。烟花同滅裏。形勝去來中。萬瓦飛鱗脊。諸圻錯繡叢。橫欄虛隱霧。高鐸響迎風。隔岸烽墩合。前樓戍鼓通。天連平楚白。日射遠波紅。繞郭迴橋櫓。翻雲翳雁鴻。丹牀憐斗粟。食邑重良弓。魯地原迤北。吳關宛在東。升垣誰屬耳。劃界笑重腫。栢酒留時令。椒盤驗歲豐。登臨能賦詠。端的藉羣公。

經姑蘇作

舊苑長洲路。依然澤國東。我來秋正好。看到館娃宮。梧葉經霜白。蓮衣覆水紅。帆開婁浦月。舟趁洞庭風。鶴市憐吳女。皁橋想伯通。經年流浪意。羞向綠波中。

潤州橋懷古

落日南徐晚。秋風北固遙。連岡橫繞堞。溟海漲通潮。鐵甕鈴三楚。金陵界六朝。江關吳后暫。軍府晉時標。謝朓吟清句。桓伊弄洞簫。淒其河右子。俯仰潤州橋。

舟泛金華澱溪界至桐江道中

三年思故國，二月下新都。歌詠曹顏遠，山川孫伯符。錦沙迴細浪，繡嶺接平蕪。地闢仙關險，天標女宿孤。涇澗紆短棹，涕淚迸修塗。七里悲遷客，雙臺訪釣徒。赤亭淹處少，玄暢詠來無。漂似縈溪穀，傷如負土烏。青春隨境變，白日與波徂。那得留江郭，終當蹈海隅。

重由南浦達湖至貴溪途中懷徽之涵之昌其憲臣大聲大敬并山陰張五杉董三隘商大命說
吳二卿楨姜十七廷梧姜大兆禎金二鑾史大在朋呂四洪烈

南浦逢梅雨，東行及麥秋。康郎來暴漲，病客下孤舟。白浪粘紅岫，青天挂碧流。晴霞升似錦，曉月墜如鉤。貫酒停津館，鳴鉦度戍樓。前灘初上險，舊地屢經愁。節近懸江艾，村深見海榴。無家雙漿逝，續命一絲留。採藥迷遙磧，分瓜想故侯。羣傾蒲瑔熱，定集竹林幽。河朔遠光祿，山陰隔子猷。連年同契闊，終歲媿沉浮。伍相空憑弔，三閭尙遠游。窮途鄰午日，引領遍芳洲。

飲陳石麟進士

名士推陳寔，留賓識孟公。良遊追洛社，好酒瀉郛筒。檻外楓林白，盤間柚子紅。山雲歸漢北，江月下巴東。客思迷前磧，君才簡上宮。相逢饒意氣，不盡玉杯中。

飲丘象升學士賦贈

藉甚瀛臺侶，忻逢楚水陽。清樽開晚露，甲第啓朝陽。良讌同王粲，豪游過杜良。西園羅廣鳥，東井汲寒漿。伊昔金閨秀，曾跨翰苑郎。起家由粉署，幾葉授青箱。玉字傳書古，珠崖使路長。丹花尋翡翠，紅酒醉桃榔。嚴助還東越，王褒稅故鄉。書成前席語，金散橐中裝。侍寢勞三問，隨行是五常。名高枚氏里，宅近廣陵王。

幸解陳遵轄。管披荀令香。淮流千載興。鐘鼓最難忘。

同王侯服進士歸宿下城賦贈

結轡踰河水。從君到黍丘。村前分野醞。馬上共乾餿。問道經睢口。看山繞宿州。風號開鹿鞞。霜冷借貂裘。歸國勝王粲。窮途惜馬周。登龍酬昔願。驚蟄起春愁。紅甲花將坼。黃枝柳暗抽。懸竿逢社首。迎旆見庄頭。連坂家相比。平橋路轉幽。到門林日墜。開閣晚雲留。滿座來羣玉。盈盤接庶羞。繩牀安別檻。畫燭映重樓。繫客煩葛束。憐予似水流。繁臺思遠吹。京洛想同遊。地主羈難住。天長去未休。臨岐繾綣意。爲我贈吳鉤。

陶拜玉評曰。村前馬上。黃枝紅甲。

寫途中景。到處開秀。真是神筆。

過禹州呈史廷桂使君

南渡元公裔。西京國士雄。分符來穎上。領郡出天中。騶蒞韓王國。屏高汴帝宮。瞻君如岱北。贈我自山東。史曾令山東有所貽。十載音書闊。三年夢寐通。游梁追漢馬。過闕效童鴻。古署雲天碧。平臺花樹紅。客因公子重。禮以孟軻隆。攬舊慚秦賈。匡時識禹功。采山人比玉。加節虎垂銅。桑甸飛神爵。芝圖負有熊。弘才方入用。廉吏豈終窮。上秩需黃霸。徵車到郭公。平津饒布被。且與故人同。

春暮飲湖西署同陳二舍人沈二徵君卽席

春色壓江來。招攜上署臺。青峰雲外出。紅藥雨中開。過燕迴書幔。繁英簇酒杯。遷筵如宛洛。有客擬王裴。望眼鄉關暗。驚心節序催。相逢花滿樹。不醉肯言回。

李大司馬生日

上秩兼三事。中臺重五兵。文章呈象緯。軍政在機衡。業以山河著。人從海岱生。鷹揚猶北峙。虎拜卽南行。節鉞縱橫見。甌蠻次第平。地看支半壁。國倚作長城。講幕閒彌肅。戎車過不驚。蒼頭三舍捷。赤手一天擎。樞策煩中制。徵書返上京。金輿新就駕。銅柱舊來銘。詩列申侯頌。鄉留羊祜城。衣襦猶戴德。草木盡知名。何意楓階列。仍通蔀屋情。如山驚昨愕。于水見滄溟。仙李承家遠。綏桃出洞明。千秋安用祝。史冊正增嶸。

西河文集

蕭山毛奇齡

字初晴
又名姓稿

何倬炎卓人較
何任炎先民較

排律二

同任明府赴張弘軒州守牡丹飲席和明府韻

潘令丹花宴。裴家綠野堂。春袍青似草。午飯白于霜。是日先飯後酒故云。錦石遮修幔。瑯欄倚靚粧。叢多揚鳳彩。苞淺露蜂黃。上客題雲錦。佳人散國香。時有妓在坐。當筵愁易起。惟有醉爲鄉。

和待菴看牡丹南園原韻

別院移芳宴。叢臺簇異葩。樽傾若下酒。人坐午橋花。淺暈含朝旭。分紅鬪暮霞。葉添官綬縷。瓣翦妓衣紗。翠幄香偏遠。硃竿影易斜。醉來裁麗句。誰得似任華。

霍縉雲之官有贈

仙都新作宰。蒼嶺遠之官。桃樹分三隘。蓮花折九盤。縣符星瀨急。民力蔗塘寬。地僻聯甌越。山虛抱井榦。驅鯨頑白化。種秫課仍完。妙令稱強項。收人貴挈肝。才名羞短馭。家世重長安。郡本開嚴助。人如望李繁。王程方峻切。努力渡河干。

平津宅九日

高館成良宴。閒堂靜舉觴。清秋逢九月。佳節是重陽。地煖全開日。天寒早降霜。遙山楓葉紫。對檻菊花黃。茵菖裁爲幘。茱萸結作囊。登臨追峴首。蕭灑過柴桑。隔歲依淮郡。連年滯楚鄉。芳亭懷內史。戲馬憶前王。返國鷹猶擊。還林艾復張。孫嵩留屋壁。漁父掩壺漿。詎意茹荼苦。重聞漉酒香。違時乘短景。度難逐長房。座盤龍岡帽。歌迴江夏牀。醉餘生感激。只爲戀平當。

天寧寺

香刹倚岩巖。瑤壇聳碧霄。石龍環勝地。鐵佛認前朝。閣岫憑闌豁。江雲到座遙。齋鐘縈野竹。禪榻覆甘蕉。榜復先賢蹟。門停過客鑣。登臨懷未極。春雨正瀟瀟。坡曰閣岫閣皂也。

同諸公游豎相寺

出郭尋初地。高原隱法堂。三車懸寶樹。一徑入幽篁。竺閣圍龍象。山門繫驢驢。天神長捧鏡。佛獸自銜香。清淨眞名利。圓通古道場。唐咸通中更名圓通寺。江山連楚豫。興廢歷齊梁。妙偈祛先劫。殘碑誌太康。傳衣從善子。豎相得空王。倚錫登金檻。翻經到石牀。四禪留塔影。八水動湖光。華蓋炊烟繞。幡竿食鳥翔。籤投支遁室。酒載遠公房。灌莽簾俱碧。瞿曇面正黃。甘蕉高向日。苦菜軟經霜。萬象成虛觀。諸賢散上方。孤鐘催晚色。歸騎帶斜陽。白霧穿林迥。青山夾路長。何年捐世網。重與載慈航。

戲聯白傅題東武丘寺詩有序

閉旅寺孤游。一日如一歲。寺僧童妙喜。敏姿而效吟。傲初學八比法。舉粘壁白居易題東武丘寺六韻。

回互起對爲上下偶。雖稍訂童句。故亦童粉本耳。武丘、虎丘也。

香刹看非遠。自呼白句靈丘到自遙。童對龍蟠松矯矯。童呼白句虎去路蕭蕭。自對怪石千僧坐。自呼白句寒峰

七級搖。童對海當亭兩面。童呼白句池以劍圍腰。自對酒熟憑花勸。自呼白句臺荒恨草銷。童對寄言軒冕客。

童呼白句勿忘此招邀。自對

二

化徑行還近。童起祇園入始深。自對白句金生蓮片片。自起玉立竹森森。童對白句寶殿三車會。童起靈池一

劍沉。自對白句塔懸天外目。自起山在寺中心。童對白句講下呼龍聽。童起詩成倩鳥吟。自對白句慢尋蓬島去。

自起此地好抽簪。童對白句

徐武令曰：海當亭兩面，山在寺中心。虎丘名句，與朱延清樓觀滄海日門對浙江潮題靈隱正同。虎丘去海遠，尙可曰當亭。靈隱去

江近，猶有疑門對者何也。楊巨源詩：曾過靈隱江邊寺，正指今地耳。或謂靈隱舊臨江，至有易對爲聽者，俱不然。蓋對是活字，與觀

異，且古人見得大，今人見得小，陋者不解耳。

施時雨曰：每讀諸翻載唱和詩，

便想見羈旅失職，無聊可憐。

賦得宿烟含白露示旅寺童兒

湛湛籠烟滴，霏霏墜露涵。清光隨練合，白影散珠含。夜氣蒙瀟瀟，山滋夾彩嵐。長林迷警鶴，隔葉臥冰蠶。

望去思原上。行多畏召南。朝陽旋欲起。瑞藹莫忘探。

江樓望月分賦

試眺雲間月。還登江上樓。波光頻映壁。簾捲似垂鈎。暮鵲當牕度。寒星入浦流。憑欄愁鏡破。拂水見刀頭。吹笛關山道。清歌胡渭州。涼秋明永夜。俯仰思悠悠。

詠春雲聯句換韻

春至占天景。雲開見物華。自來從緱氏國。行過楚王家。寺童移草如馳蓋。綵花似障紗。自浮車翻羽翼。噓蟄起蝦蟆。童日暖同烟散。風輕帶雨斜。自陽和方布氣。輪囷望無涯。童

送兩浙臬憲移任江南

聖代推司臬。周官念準人。東南稱要地。觀訪重台臣。外輔承三獨。中朝遣四巡。豸庭江上啓。驄馬路傍新。夙衛思羊祜。雄藩借寇恂。行郊曾露冕。當道早埋輪。遙海清鯨鱗。荒城剪棘榛。四時分雨露。八越淨烽塵。玉節移廉省。金笳起畫麟。九霄翔鳳肅。十道使星神。祖席搖青旆。迎舟轉白蘋。舊時需似歲。此際感如春。下澤淪丹轂。鴻名動紫宸。暇游如有興。幸待武湖濱。

郡守憲朱公行敝縣枉問并召舟集呈贈

良牧光天寵。分藩澤國春。內廷需侍史。出使是王臣。舊德傳東海。華文挾北辰。褰帷行郡縣。憑軾渡江津。方岳三丘麗。陽和一道新。里先徐穉訪。人喜賈琮巡。隔巷迎干木。同舟並角巾。遙來珪璧映。那棄薜蘿紉。牛鼎仁人粟。鯨紋上客茵。自憐長附驥。不敢避懸鶉。

奉送張方伯遷少司空赴都

蕃服三年最。台司八座雄。旬宣勞牧伯。綱紀賴共工。民賦東南重。王居中外崇。蕭何停轉餉。神禹作司空。上夏遷屏翰。冬官宅會同。南行留召父。北部返毛公。時轉蒼龍宿。身歸玄武宮。督郵需驛傳。賓從滿艤艫。車騎臨江潁。旌旗閃道中。離筵人似雨。別賦氣如虹。廷馭卷阿鳳。家懷中澤鴻。尙書元凱績。宰相李筠功。繡脫犀盤綠。工裁雉尾紅。願從舟楫便。早爲濟江東。

上浙撫軍壽

至德生乘運。元功體應辰。司麾咨北護。把鉞授南巡。要地兼吳越。名都壓海閩。殿邦需大使。開府重親臣。召虎分藩遠。岑彭建節新。廟中方制筴。闢外暫推輪。妙術安江甸。真心與浙人。股肱來岳牧。嘯詠淨烽塵。戟纛行營簡。戈船下瀨神。六幘齊引玉。雙鬢尙無銀。上齒期師望。中原藉寇恂。願言隨獻醴。長得似茲晨。

入塞曲爲陳左軍作

薊北新班旅。關東早陷圍。秦城金鑰啓。漢將玉門歸。龍旆朝雲捲。狼山秋草腓。沙塵埋馬勒。風雪滿戎衣。左顧遮鵬落。前行指雁飛。開疆舊地闊。返道故人稀。全節還平樂。論功拜武威。普天饒戰事。暇日定邊機。西塞呼鷹疾。南山射兔肥。封侯知不遠。相與俟春暉。

宮中樂詞

璿臺興悅豫。瑠瑯起巡游。粉黛三千女。金銀十二樓。秦封增式廓。漢主富春秋。西海張波幔。南山轉霧旒。銅鳥棲殿桷。玉樹夾宮溝。爪士嚴鸞衛。神仙指鳳洲。諸王隆慶第。方士樂通侯。甲館排瑤帳。靈池集翠舟。

殿前新射覆。花裏舊藏鈎。五柞紛馳獵。三郎醉打毬。舞裙雙帶子。歌曲六么頭。監御傳供奉。才人換點留。射生懸虎韞。宜賜出雞裘。宸輿隨時發。皇恩浹露流。昭陽同進幸。團扇莫辭秋。

吳調昭君詞

詔遣良家子。更衣自下朝。征行威塞域。寵禮賚宮僚。關吏開邊驛。單于叩渭橋。甘泉花滿樹。灞曲柳垂條。玉輦看辭豹。金鈿勅賜貂。寒蟾遮鬢薄。去馬抱鞍嬌。沙裏隨鳴雁。雲中逐射鵰。臙脂顏色改。烽火黛烟銷。北度踰甌脫。南看負斗杓。星稀通夕落。草短及春燒。苜蓿宮名遠。葡萄帳影遙。愁逾當日侍。形減舊時標。上舞三朝奏。閒絃七曲調。吳聲纔一弄。雙淚落灑灑。

舊評曰。昭君詞寫邊愁耳。卽作惜詞。亦惜其紅顏淪落耳。近以詞曲烏有入詩。誤矣。是詩可謂以古調飭舊法。又曰。寒蟾去馬。仍然圖畫也。至北度星稀二聯。豈圖畫可得。

河亭妓席有贈得遲字

柳氏茱萸女。王家菡萏池。秋星迷渚鵲。夜色動河麋。叢鬢撩雲幔。雙瞳瀉酒卮。鈿銜山竹葉。裙裏石榴皮。善舞勝饗姐。能歌似雪兒。桐絲牽腕帶。箏孔拭脣脂。屏短眠難穩。杯深飲較遲。花欄偷照鏡。暮鼎醉翻匙。五斗聞蕪澤。千條爛燭枝。玉釵明似雪。知掛阿誰綫。

雪

朔氣銷寒日。同雲合暮天。亂鴉鳴集樹。野牧凍歸田。村旆搖風急。簷絲有霰先。梁園方作賦。郢下擬調絃。枯柳驚飄絮。遙山儼帶烟。林虛低舞蝶。衣冷細裝綿。點地融還濕。飛空斷復牽。撒鹽時密密。浹水故濺濺。

閣敞填鏤瓦。牕高綴綺錢。映奩憎粉潔。貼鬢助花妍。崑玉爲岳秀。齊紈布土鮮。不憊常歲月。頓改舊山川。放眼增遐曠。渾身似洗滌。清光舒短晝。結溜挂長檣。枝弱鳩巢折。塗荒馬跡穿。層柯交愈晰。棄笠覆終圓。壁削時傾糝。篷摧屢扣舷。平沙疑炤蠟。遠塞且吞氈。候近青雲呂。歌傳黃竹篇。愁吹關隴笛。思泛剡溪船。好景懷童齒。長貧願瑞年。酒傾三雅外。裘敝數冬前。望隰欽劉繪。登臺愧惠連。蕭條窮巷裏。誰與共高眠。

奉祝馳黃尊大人生日

杖國諸宗父。閒居百歲翁。教兒聞海內。垂老避牆東。江橘承筐碧。園花插鬢紅。倒探金簡字。時憩玉津宮。至德師鍾皓。祁年重鬻熊。崧高原有誦。長此播清風。

登宣城徐司寇山樓眺望

同張荀仲、施次仲、海古愚三先生作。

傑閣成高眺。名園接勝遊。天低宛水暮。風落敬亭秋。丹嶂橫欄聳。青溪繞郭流。雙橋飛練合。萬井亂烟浮。翠竹迷南圃。寒花映北樓。玉臺徐氏業。高郡謝公州。洞壑棲雲志。鄉關落日愁。登臨傷極目。揮涕滿滄洲。奉贈來十五集之給事

東省推司諫。西垣重議郎。攀龍歸舊服。鳴鳳起朝陽。獻納開青瑣。艱難引皂囊。船軍規武事。帳殿坐文昌。赤堠淪官渡。丹函反帝閭。角巾申浦楫。故第午橋莊。好遯祠黃石。尋眞爚紫房。秋蘭遺楚士。暮雨詠吳娘。張湛辭朝馬。陳登對客床。談經隋五庫。作隸漢三倉。焚草鱸皆白。懸冠鬢未蒼。傳家躡七郭。有子邁諸王。庭煖花絲細。門高柳線長。屢從看鑑錄。長得近衣香。

徐徵士初度之作

陶令嘆歸去。正當五十時。偉長今著論。又歷九秋思。繞室栽叢桂。登山賦紫芝。干雲開意氣。烈日炤鬚眉。久擅南州譽。羞傳左衛詞。百年纔得半。努力紹前期。

贈汾州董司馬六十初度

授節膺南服。驅車轉介州。百年方外辟。六十薛城侯。岸幘開金鎖。移床泛玉舟。刀傳王覽珮。琴向子牙求。渭幕緋魚曉。汾關白雁秋。蘆花生九月。三節爲公留。

吳二太保初度

中府推三事。南司近九重。青宮環衛虎。黃綺護真龍。竣曰。鎗禁旅戟門也。一本作綺。神策留丹禁。天兵罷紫墉。金魚垂野葛。繡被臥山松。甲第連雲遠。雕盤拂露濃。秋堂懸桂子。朝日豔芙蓉。石匱經辰啓。金書異代封。鴻文貽顯嗣。開烈肇神宗。門映三千履。歌傳十二鐘。弟兄齊列戟。少小獨追鋒。負氣卑田叔。前籌過耿恭。違時嘗磊塊。杖國正從容。小鳳庭前下。名花谷口逢。百城圖畫裏。長對舊壚峯。

施公視學山左歸過湖上有寄

三物開齊地。雙旌返敬亭。迎恩需北闕。假沐過西泠。歲序逾人日。春船載使星。鵬來雲路碧。龍到海潮青。城郭連蕭寺。樓臺出晚汀。水邊聞錦瑟。花裏集朱駟。擬過黃金利。同傾白玉瓶。高天迴馬首。小雨阻鴉翎。望眼遮羣岫。傳心有六經。幾時從泰岱。爲爾賦滄溟。

同南士訪愚山寺寓作

爲訪施夫子。因尋古戒壇。高雲橫海上。新水漲湖干。把袂風塵苦。登樓雨氣寒。五經游自載。雙鬢醉還看。

佛寓分龍藏人逢盡鷓冠題詩抽玉簡別燭換銅槃暮鵲驚喧客春鶯待使官只愁明夜月相憶在長安
奉和姜太翁虞部東池別業原韻

金谷分花礪殊亭下水關空簾啼鳥靜曲渚散鷗閒朝日穿林迥春雲繞座還環橋牽紫幕倚檻見青山
綠野行吟外蒼生想望間幸逢開閣便及爾一躋攀

次揚州八韻

八月隋堤柳三秋揚子波南朝曾作鎮大業舊開河瑩苑銷花草瓊臺尙綺羅雷塘宮北舞水調竹西歌
高旆京漕粟長船蜀估艤重圍如合璧交堦勝連珂京口雲生晚淮南木落多蕪城吾有賦騁望意如何
渡瓜洲次宿明到高郵將達淮先呈朱禹錫明府

北涉蕪城路前逾瓜步州晚雲移古驛朝日到高郵湖鶴翔烟淼風鱗蹙浪流楛榆村堦闊秔稻水鄉浮
露重沾牕幔烽多間戍樓撈魚童子留賣藕女郎舟蓮渚翻黃梗蘆花辨白頭勞歌增客思土語亂方愁
茂宰安淮服神君動楚謳橫琴鳴素節深閣臥高秋地以蟻珠重人因桂樹留登臺林下友乞食漢時候
余亦千秋士來從八子遊涼颺衰柳內誰識過邗溝

徐伯調評曰連讀七八韻恍置身

于淮揚道中詩之神于標境乃爾

送淮安俞使君陞禮部赴都

淮水開鐘鼓河橋解驢驢五年司讞吏四十客曹郎綬映林花綵詞成山桂黃仙門將戛玉官邸早含香

驛騎搖旌旆。湖民餞鯉魴。客途無所贈。相送在朝陽。

閩園雅集贈劉昌言進士二十韻

八月正良辰。閩園集上賓。平臺張翠幙。阿閣展朱茵。過楚隨狂客。依劉作主人。敦盤貽好遠。凡席見情親。踏徑通窠細。憑欄摘樹新。星枰沙嵌玉。花甃水流銀。作伎飄華瑄。圍棋俯角巾。西垞銷陌柳。南汜響風筠。度曲縈三疊。飛觴轉數巡。孝標思饜臠。公幹語恂恂。促座聯瑤壁。趨庭賦鳳麟。二合嗣皆孝廉有名。名材跨二陸。下食驗諸荀。石甕開重釀。晶盤貯五辛。烹將錫作澳。炙以蠟爲薪。鼎熟寧濡指。羹翻恐滅脣。擊鮮如陸賈。投轄過陳遵。絳燭環瓊砌。青油卻畫輪。銅籤驚短漏。繡被笑平津。啓讎曹公子。裁詩石季倫。頽然徒醉倒。只有一毛甡。

陳虹縣席上作

陳海士先生以別業延客。

甲館重筵客。高門駟馬來。幽欄花影動。叢樹桂枝開。楚甸聯豪客。淮南集賦才。熊羹浮鼎鼐。蟻跡滿樽罍。簫舞屏環轉。歌翻燭樹迴。月華移別席。露氣釀新醅。仲舉三宗譽。元龍百尺材。鳳城搖彩筆。虹縣有琴臺。暫把中林臂。長留北海杯。通家延李郭。外苑盡鄒枚。銀漢縈中夜。黃星映上台。主賓歡既醉。吾欲味薑萊。

謁于廬陵作

既攬名山勝。重聞茂宰賢。文章行海內。花樹滿庭前。江雨長隨轂。山雲自拂絃。孟嘉從事日。劉竺入官年。縣譜方垂楚。家聲本在燕。傳經踰魯郡。獻賦重甘泉。綵筆雄千古。高門啓再傳。分毛跨鳳沼。飛鳥繞螺川。荒郭皆留芟。他鄉願受廛。每懸孺子榻。喜泊越人船。水落烹魚釜。霜枯釀秫田。西遊雖浪蕩。東道借遷延。

劍合交爲氣砂成令是仙柴車真趙壹懷刺豈無緣

登取亭并序

沂贛江揚帆到廬陵。城下有亭翼然。亭下瀏水泠泠。施使君碣云。前二年使君酌泉而亭之。是之取爾。乃名取。又據鄴元水經注。贛水經石陽。有金井水。廬陵晉石陽也。俗名金牛泉。井牛形譌耳。或云有仙人騎牛渡水。謬矣。乃亭瞰螺川。川畔白鷺洲橫。亭勝處妙矣。予登亭。慨然念使君。因爲賦詩。

落日秋風裏。悠然登此亭。到來雙澗白。看去萬峯青。粉堞環高嶂。香山映翠屏。章流方浩蕩。金井故清泠。引興迴江郭。探奇問水經。千秋從倚檻。薄暮喜揚舲。野寺橫天起。寒花帶露零。騎牛知渺漫。采藻想淵渟。枉渚浮螺子。芳洲濯鷺翎。此中攜不盡。因見使君馨。

楊園聯句有序

毛姓與淮南名士作晨夕游。臘月游楊園。亭臺雅勝。友朋好合。因請聯句。環相限韻。頃刻而成。

策杖尋幽壑。攜尊渡野塘。張初禕堤開楊柳幕。徑轉薜蘿牆。周巖良會追金澗。名園是辟疆。姓步方通草

閣香已拆梅房。劉漢中合屐迴山徑。抽琴到石牀。童衍懸崖留墜雪。枯樹落寒霜。戴金瀨淺魚全伏。天空

雁自翔。黃世貴平臺虛掩幔。曲閣靜飛觴。施有光對酒耽思僻。看山引興長。蔡爾趾遐心遁埤垸。高韻起

簷簷。世貴飲勝杯浮羽。歌豪曲遶梁。金開欄調野鶴。汲水煮河魴。衍峯轉流雲碧。亭銜落日黃。初禕歸

人爭晚渡。夕鳥下斜陽。爾趾客藉應劉美。詞凌鮑謝香。有光閒堂分履舄。暝吹起笙簧。金一水橫烟鎖。千

村帶霧藏。漢中驪駒方待駕。明月早相望。姓

旅主人好射每邀觀飲以舒孤悶因吟爲贈

四海媿懸弧。閒看按綠蕪。銀翎拖筦笛。金鏃綴芙蓉。暗響星流急。紅標日暈孤。專礪河朔將。穿嶂子南夫。偶發皆停鵠。單棲莫射烏。平郊還燕飲。何必繼投壺。

奉贈嚴都諫賢母江孺人壽

華閱多賢母。黃門善養親。曾參真令子。嚴助本親臣。夏日丹花茂。朝霞綵袖新。麟孫東壁顯。鳳誥北堂春。仙女餘杭酒。嘉賓丞相茵。張筵懸錦帙。千載重茲辰。堯曰時方貽在弘文院故有東壁句

贈夏丞

才子方趨府。仙郎舊請纓。家聯梅福市。人在白公城。綠草當廳長。青雲拂綬生。客投金錯麗。官比玉壺清。遙海推龍臥。空壇聽鳥鳴。潁陽春色轉。同有故鄉情。

題汝南郡西堂牡丹

官閣分朱檻。名花長綠叢。深房含曉露。修榦怯春風。薄粉勻綿白。輕衫疊縠紅。苞藏金瑣屑。瓣剪玉玲瓏。簇葉同雲護。留香待日融。重英欲宿蝶。曲蒂小懸蟲。傾國來宮裏。姚家擅洛中。自傷流漫甚。不敢近墻東。

寄贈姜京兆一首

首善稱三輔。雄圖啓八垓。須知天府重。應借月卿來。地轉高丘黍。庭安夾道槐。訟田留傳舍。走馬過章臺。主爵分中尉。清都接上台。張王如可繼。賴汝救時才。

聯續元稹詩三十韻一首并序

汝南蔣亭閱唐元稹會真詩。深鄙其事。并笑樊川所續不足。因謂元稹非續詩也。卽其詩耳。杜則真貂之末矣。擬晚食外重戲續之。會張杉尋子蔣亭。與金公子敬敷共留倡偶。故知所偶必愈不足。私慶生平既無此事。而古人遭逢乃不幸偶類于是。可以爲恨。或曰其友人有索爲之者云。

夜色隱虛櫳。杉 春星度遠空。人搖牆外杏。姓 燭畫水中龍。暗理雙纏錦。敬敷 曾挑百尺桐。長鑿拋鏡鑿。姓

小語隔屏風。擷珮思公子。杉 裁詩付伎童。柿奩香襲襲。姓 花路影濛濛。鸚鵡窺金鎖。杉 鴛鴦繡綺籠。慵粧

疑宿蝶。姓 拾帶儼垂虹。欲度迷蕭寺。杉 相期在上宮。似曾邀代北。敬敷 原未嫁湘東。翠鈿殷勤卸。姓 瑤環

宛轉通。愁聞金釧落。杉 嬌藉錦衾蒙。皓月穿丹楹。姓 香雲散綠叢。橫波流枕纈。杉 微火住薰籠。怯甚衣頻

攬。敬敷 啼時粉自融。馨含江芷細。姓 葢拆露桃豐。靚飾方留臂。杉 朱欄宛在躬。河流猶灑灑。姓 曙影漸籠

蔥。桂樹停輪久。敬敷 蓮花下漏窮。窓鷄號不斷。姓 園繭緒難終。何計酬良會。杉 無言是隱衷。褰回簾額淺

姓 結去縷。心同寶篆消。寒獸杉 明螺觸暗蟲。高唐風乍霽。姓 遙海日初曛。帝女還湘浦。杉 靈妃返岱嵩。庭

莓御履碧。姓 溝水墮脂紅。泪滴徒滋草。杉 腸迴似轉蓬。填橋思渡鵲。姓 別曲有離鴻。夢斷知難續。敬敷 波

長豈易冲。綿綿千載恨。杉 長在此宵中。姓

吳平露評曰。按之則鑠心刻骨。揚之則驚魂動魄。豔體至是。入神矣。試平心諦觀。

元尙在頡頏之間。樊川敢望肩背乎。世人貴遠賤近。必謂今人不如古。直自絕耳。

童閱石評曰。西河與南士諸聯句詩。大率相借銷旅寂耳。然能開闢排宕。備極長律變化之妙。不知當時何以得此。如此詩似有爲而作。雖不專以角抵取勝。然其相比益上處。真是絕事。

單學博七十有贈

至德標荀里。高名著鄭鄉。徵車花滿路。書帶草垂堂。鳩女安瑀杖。蛇魚象繡裳。諸生虛李謚。有子對陳亢。七十稱中壽。三公憲上庠。自今蒼舊傳。不獨在襄陽。

來母孫太君初度

南牖朱鷄啓。西王綵鳳飛。母儀傳錦帙。官誥出金扉。篋理樞臣疏。庭披柱史衣。八龍皆令子。七誠踵賢妃。叢樹羅青桂。新枝插紫薇。其孫曹秋薦。季子新受舍人。忝隨榆舞後。稱祝敢言違。

沈九秘書典試江南于撤闈日邀予過敝率爾有贈

聖主求賢詔。名都選士場。人間朱雀里。天上紫薇郎。盛事追嘉祐。高文領建康。方山占地氣。斗野辨星芒。棘舍軍旌赤。風簾官燭黃。鑲成監試局。判就至公堂。置酒楊家第。栽花陸氏莊。先茅酬白季。上駟賴孫陽。獨是淹蓬壘。曾經共板床。多年忘撤幕。無計誦阿房。執意裴君舊。能憐劉子狂。樽前疑夢寐。宦後惜參商。是地逢龍躍。彌天看鳳翔。後車涼日度。別幕錦雲張。綵筆披南國。朱衣戀帝鄉。暫將邀笛處。私挹令公香。重過任四辰。旦書館因憶王十六先吉韓十七日昌並于此館同受書家兄門下今三君皆先後通籍而予獨羈遲于此徘徊睹觀遂有斯咏

楊子居猶在。黃公壚已非。故人通籍久。游子到家稀。幾度移書幌。重來訪釣磯。花前低置榻。竹裏暗藏扉。綠水圍丹竈。青苔繡石畿。時乘爭獻策。夜讀記添衣。北面師盧植。東頭坐陸機。回看著書處。唯有暮雲飛。

任千之評曰。思前憶後。如許綿邈。宛然瞻昔。連床時景。至當境精神。抒寫不汎。一何雋也。

黃母生日

山鳥飛烏鵲。河魚躍鯉魴。中閨生左妹。有婦比周姜。攝佩湘東碧。從夫江夏黃。起家膺隼羽。入陛擊貂璫。黨錮成王國。靈均返帝閭。黃忠端公死瑤離。覆巢餘破壘。漆室置懿筐。窺壁知名士。張帷助小郎。最憐懸帨節。猶得傍端陽。

西河文集

蕭山毛奇齡字齊子行十九稿

莫春園東怡
蔣 樞星旋較

排律三

從大江口將入石頭作并寄金二公子敬敷

北瀆新軍府。南維古帝鄉。波濤連楚越。形勝在齊梁。紅寺浮江闊。青山出岸長。磯搖飛燕子。風便逐龍驤。鉦鼓來吳會。宮臺入建康。曉雲生海谷。秋雨過帆檣。吹笛邀桓叔。揮兵想顧郎。石頭方在望。對此轉芒芒。

汝南金太守席書事一十二韻不揣下里同座上諸公和得東字

別幕連雲起。高軒傍晚通。樽開官舍北。客至日華東。飲勝追河朔。游歡過鄴宮。瑀欄翻藥紫。整井墜榴紅。葵煖烹臍汁。漿寒漱馬醢。行廚藏竹裏。置席在花中。几潤衣沾露。槃欷燭有風。翰林清作聖。太守醉爲翁。弦下開新照。臯成得故雄。時曹學士博投得六緝興能追庾亮。序已讓王融。擇木飛宵鵲。談冰愧夏蟲。當筵無好句。空道和儀同。

贈曹爾堪學士

鄴下曾傳賦。淮西始御車。視餘金殿草。載滿玉除書。過日看華省。浮雲蔽直廡。夜郎流李白。茂苑病相如。

慢世悲持戟。隨時避接輿。東堂猶喚鵲。北海定遷魚。紅藥吟真好。黃童記不虛。學士強記。一過終身不忘。如何相對晚。此地詠茹蕙。

奉送張使君之任和韻

皂蓋江城守。青衫水部郎。手攜工市劍。腰有會稽章。旌遠翻逾赤。堂高望正黃。蠻鄉需教化。漢制重循良。馬竹遮秋嶺。鞭蒲出晚塘。使君千騎去。從此向東方。

呈郡司馬孫使君

才子生虞阜。郎官使越州。家垂吳地志。名在晉陽秋。岸幘爲司馬。操刀佐解牛。高牙分建隼。廣路待鳴騶。綵筆題江館。青山映郡樓。辟來書笛葦。詔下賜緹油。宦蹟先甌末。鄉思近石頭。治中雙驥足。身外一狐裘。鳳德原卑攬。魚珠豈暗投。避讒遠衆女。遊說及諸侯。就道時觀海。還鄰暫首丘。孫陽纔一顧。何以慰驂騑。過訪無錫縣。吳興祚明府。有作時已遷。行人將次赴都。

上宰當初試。延陵第幾傳。起家由北海。劇邑近南天。人地踰彭澤。君才過潁川。銅章新長吏。綺里舊神仙。客履懸珠日。軍儲散錫年。種花官道裏。流水縣門前。吳女爭桑訟。參軍賣蔡眠。校開通市塾。稅起傍湖田。碧鳥長啣綬。青蒲好製鞭。鄉亭方執板。廳事早揮絃。徐穉南州榻。袁生下渚船。宴修單父鱸。俸割沈郎錢。天子神爲眷。行人命稍遷。題名金柱右。典謁玉階邊。求友會遺紵。懷君似攪綿。愛餘申浦樹。清乞慧山泉。過艇留吳芮。登堂拜薛宣。井桐看翥鳳。溪葉笑懸蟬。坐列尙書席。馳觀太子牋。只憐華省彥。對客尙烹鮮。

別閔衍

官舍聯吟早。閒堂對酒濃。汝陽歸未得。安邑去何從。過市偕仙尉。尋山到麗農。青裙縫薜荔。錦柙繡芙蓉。日下迴鳴鶴。天邊老臥龍。別君淮蔡路。愁思轉重重。

送夏明府之任西和

結綬遷龍峽。除書出鳳城。家人留傳去。縣吏到門迎。遶郭春田坼。前關曙鼓鳴。彈琴邀子賤。酌酒送淵明。餉婦攀車輓。翔禽擁旆旌。橫雲飛鳥過。就道典衣行。隴水天邊杳。淮山雪後晴。未昏官堦靜。到日印床成。亭下辭孫楚。筵前醉禰衡。秦州回首處。應看柳條生。

呈郡別駕張公

寵命銜方國。雄詞播海溟。人間推別乘。天上見張星。驥足方行地。龍門恍建瓴。題名來鑑曲。載酒過蘭亭。畫幟朝看下。嚴關夜不扃。銅符分作瑞。玉海著成經。攬德同威鳳。希光及暗螢。萬間垂棟宇。一道倚篔簹。赤日堪藏簡。黃絲待勒銘。錢投江水白。案繞郡山青。龐統多聞望。王祥富典刑。大臣親吏事。強半在僉廳。沈棻明府治西平。有名欲往從之。不果。值予南還。以縑紵見貽。因寄并謝一十二韻。

每念郎官重。因思陶令賢。長人唯省事。出宰已多年。舍樹平鄉訟。收茅作稅錢。香分樂社酒。清聽武城絃。鼓角弛亭下。兒童戲縣前。閒看飛雉過。病籍落花眠。君治雄淮服。吾行去楚天。將尋青草渡。願賦木瓜篇。望去雲山隔。貽來縑紵鮮。感深螺翅澤。思殺灑陽田。故國鱸方美。高枝鳥自遷。他時稱八友。應附隱侯傳。

譚開子曰。藕庵以撫字致疾。其在西平。畢力休育。民賦未完。卽肩茅束。苧纈悉收抵。詩中所稱實錄也。昔人以拙科政拙爲能事。今不得矣。能于此際勞心。便成撫字。此實今人勝古人處。不可不察。

奉題孫藩處士卷子

偃臥方遵渚。風流似過江。家居推第五。國士竟無雙。草際藏珠璣。花前啓玉缸。千秋垂卷軸。三十棄旌旂。履宦兄如渾。其兄爲孫沂水使君。躬耕人姓龐。學成王佐器。何必待爲邦。

郡太守平寇有贈

畫戟開中府。朱旗展外隍。威行三郡藁。兵勵九秋霜。杲日橫江浦。妖星隱暨陽。牙官環綵幕。田馬耀金裝。露冕專師祭。單車典教場。股肱營地遠。黼黻陣雲長。虎翼交鸞彩。魚鱗擁雁行。紅巾朝授幘。斗米夜舂糧。東海依滄薛。西堂紀穎黃。干城眞足寄。慎固在封疆。

大敬宅牡丹

江上棲賢里。城南處士家。春風三月雨。晚日一欄花。覆地垂枝重。當堦散影斜。叢苞含粉絮。卷蘂蹙衣紗。葉潤沾黃蝶。臺空落紫霞。早涼丹蒂合。晝煖碧油遮。清興同欣賞。閒情任麗華。誰言招隱地。定爲詠蒹葭。少與包二秉。德蔡五十一。仲光沈七禹。錫爲鄉遊道。古論文視若兄弟。今包二死十四年。沈七死十八年矣。獨蔡五十一與予居人間。世予又瀕死。道路曩時交游文章悉亡。兵災憶包二尙存。集數卷未行。世予泊舟餘干城下爲賦此詩。

向呂游河內。陶劉散澤濱。十年生死路。萬里去來人。抱痛同沽酒。虛懷薦負薪。繁花孤館暮。宿草隔江春。司馬無書上。黔婁到死貧。一吟懷舊賦。涕泗滿青蘋。

亡劍篇哭姜坦并序

姜公子珪買兩劍牝牡。以一佩弟坦。比神物也。予出游。公子珪攜寶刀并一。西入晉陽。坦年少爲天帝召去。悲乎哉。莫邪安在耶。予傷公子之死。有似亡劍。二月初九日。泊舟南昌府豐城城下。感華事。卽傷公子之佩一劍以死。亡鐵英也。著亡劍篇。

越國有神物。干將與莫邪。霜鋒飛毳羽。寶鏹泛蓮花。龜縵爭三楚。龍阿聚一家。陰陽分日月。水陸斷蛟蛇。坐見飄揚近。行隨拂拭加。百年開地氣。一劍失天涯。薛燭臨鑪慟。風胡抱器嗟。鐵英傷魍魎。玉柙掩泥沙。漁父江流遠。徐君墓木賒。清霄思蜿蜒。終夜哭蒹葭。函石銷牛斗。溪銅涸若耶。豐城投汨裏。何處問張華。

閩中春曉得量字

有敘

墟婦早起。村夜所縫衣。有裁衣句。棟唐試題成之耳。

五夜金微塞。三春玉洞房。梁間飛宿燕。花下理朝粧。拋瑟方收拾。裁衣再付量。星芒銷太白。日影射流黃。昨歲收疎勒。今年徒樂浪。早行知漸近。切勿誦東光。

賦得起晚誦經遲

調小尼師也

西院女沙彌。春眠曙不知。聽迷傳板候。起失誦經期。幔捲身還倚。壇深步懶移。漱唇看上口。開卷立多時。記慢成篇少。心慵下字遲。偶然思夜夢。坐弄念珠兒。

賦得鳥散餘花落聯句

暝鳥分飛後。張杉春園返炤初。枝空搖未定。姓花落漸無餘。散毳連英下。杉零紅逐翅虛。喧停飄去靜。姓踏久墜來徐。點絮曾銜雀。杉鋪鱗似鱸魚。芳華誰不惜。姓流盼轉踟蹰。杉

張南士曰。此係啞題。境隘而象窄。對舉易離。合拈易複。且二平韻無一實腳。予與大可擊鉢爲此。頗訝棘手。暨揀唐人詩無一語及格者。因知佳題易生暗也。世多作者。或當一雪此言耳。

姜之璜識曰。此與宿烟

含白露詩俱出浮江錄。

王叔道評曰。鳥散在境前。故使花落俱

無實境。似此摹畫精刻。所謂抽空矣。

空梁落燕泥聯句

翠幕辭春燕。張杉雕梁墜宿泥。罇花長不掃。姓文杏舊曾棲。草腐懸絲細。杉塵銜剩點迷。墮看銀豆碎。姓

行污繡裙低。故國盧家女。杉空房竇氏妻。雙飛何日返。姓夫婿在遼西。杉

杜陵杜杜若會宴駱明府別業

杜曲舊名家。相逢在若耶。風生欄外馬。水濯劍頭花。翠幕看紅藥。金尊泛紫霞。春遲三月暮。日落半輪斜。澤畔吟陶令。丘中戀子嗟。醉歸應秉燭。莫問早棲鴉。

同施叅藩王使君溫別駕張司刑屈明府暨諸公游慧力寺

幕府乘春出。琳宮攬勝遙。山川開法地。賓從滿僧寮。騶馬同獅舞。珠幡夾旆搖。樓臺橫碧嶂。歌管遏青霄。瑞竹籠烟靄。仙芝似火燒。築亭依壠樹。瘞鶴表山椒。寺山名瑞筠。後更名紫芝。築亭是日。施公瘞鶴亭側樹。銘刹映銜林日。江流別浦潮。霞翻紅隔塢。花落碧垂條。嬌鳥從人語。飛絲接地飄。道心來對境。慧力想前朝。洛下追

游淺人間歲月銷。蓮生棲竟晚。草長隱誰招。遁室陪殷史。他鄉寓鮑昭。雲深歸路杳。還上使君橈。

宿雲門廣孝寺呈三公與南士分得灰字

東晉標靈刹。西王豎法臺。山環雙樹入。門傍五雲開。丹檻連峰落。清溪逐路迴。竹房懷舊蹟。蓮葉得新栽。林下尋支遁。橋邊遇辯才。安禪聞不住。妙義見如來。石乳傳甘露。金堂認劫灰。晚風吹擊鉢。秋月濯浮杯。佛課稱三寶。吾生賦七哀。離家還楚豫。入社羨宗雷。五術超凡諦。諸緣盡聖財。鑪烟分渺漫。燈影共徘徊。齋椀粲黃葛。經筵坐綠苔。宵深鐘磬寂。相對果悠哉。

題宿道林山寺兼贈離上人

紺殿開丹壑。金臺敞碧梯。人來支遁室。虎界遠公溪。雙樹晴林迥。三天曉閣齊。龕花閑鳥雀。旛影掛虹霓。峻澗盤檐曲。明河到地低。心迴空磴外。目極大江西。講啓祥龍下。神藏怖鴿棲。香壇縈白氣。佛壁畫青泥。鐘動飛龜組。經馱散馬蹄。雁王留寶塔。魔女墜珠笄。九品分華藏。諸門斷壁題。付衣聯杼柚。掬水呪闍黎。入夜迴廊靜。尋春出洞迷。道場雲寂寂。仙嶂草萋萋。蓮葉擎獅口。松苗養麝臍。餅深闔貝粟。紗暗罩玻瓈。方井規裁柄。橫梁款杖藜。瑠孟供石飯。甘露洗山蠶。玄義非關解。黃拈欲止啼。殷源籤未下。願得叩招提。

途中喜從丁儀曹得周侍郎亮工分藩覆書感紀成篇

尺素來千里。雙金授八行。丹雲披海郭。白雁度江鄉。置驛丁儀部。裁書周侍郎。高函分四庫。妙牘並諸王。起草連鈎軸。安花押篆牀。懷人從漢隴。譽我過齊梁。地隔形驕馭。天高朱雀桁。吳臺空繫練。蔡澤未持梁。羈客逢殷羨。司農念鄭莊。三年懷袖裏。漫滅可能忘。

奉送姜侍御起復歸臺

漢制優方進。蒼生望謝公。直情完讀禮。移孝可成忠。棄繡踰鑽柳。含毫似轉蓬。思親淄水縣。釋服竟陵宮。拔棘應驅豸。無廬合避聰。恩沾春草綠。淚滅暮花紅。卜子推琴縵。山濤擲土籠。巡天看擊隼。獵地待非熊。持斧三臺厲。鳴鞭一道通。星軺回薊北。祖轍遍江東。轡攬鄉關外。詩題驛路中。後車隨澤豹。下客逮梁鴻。自分漂流苦。難追行步工。送程攀細柳。書刺摘新桐。已見徵桓傳。無須憂阿戎。公還多廟建。我輩且途窮。鶴發逢春雨。烏飛逐曉風。長安應近日。從此望瞳矐。

山樓對雨同南士桐音暨姜生兆熊得絲字

黃菊濕東籬。高樓對酒卮。窮交來魏相。賢主是姜維。幔捲侵寒早。林深入午遲。重陰垂埤垠。細雨亂罽毼。合坐秋霖唱。遙山夏后祠。登臨愁思起。時繞玉壺絲。

堯曰。楚詞。網戶朱綬。卽罽毼也。城闕俱有之。見考工記。舊誤註作屏。遂有疑宮殿獨用。非也。

秋晚新晴登桐音山樓飲宿聯句

高閣快登臨。姓憑欄敞積陰。斷雲歸遠岫。張杉斜日漏疎林。近郭驅沙馬。姓橫塘散水禽。山青絲霧斂。姜兆熊砌紫繡苔侵。濕竹流寒碧。杉叢花簇碎金。牕晴光卷帙。姓絃燥急鳴琴。鑑水浮霞動。兆熊宜城待月斟。暗催雙樹蟻。杉響起萬家砧。避俗迴青眼。姓論文愜素心。趨庭慚孔鯉。兆熊開觀啓劉歆。養澤成玄豹。杉耽書類白蟬。逢時違北轍。姓待價重南琛。道洽寧分席。杉途窮賴盍簪。頻年遲好會。姓一夕待清吟。蘆

葉吹筩斷。兆熊蓮花下漏沉。歌生披別緒。杉醉去理塵襟。雁過秋聲杳。姓星迴夜色深。山樓還似昔。兆熊
應共伯淮衾。杉

雨東李岷源西渡有贈

十載蓬山隔。三秋桂樹前。裁留關令史。又送李膺船。倒榼呼金液。輕裝載玉篇。才名摧虎豹。家世本貂蟬。
交謝填門轍。貧無負郭田。幽尋豪士鍛。醉共酒人眠。羽服來員嶠。香壇訪竺乾。將車元季美。獻紵友朋賢。
遠道班荆楚。清江採木蓮。行頻愁驪馬。歌苦頽烏鳶。爾達爲廣武。吾懷是謫仙。相期棲息遠。分手倍悽然。

贈清江屈明府

百里郎官治。千秋茂宰情。嚴關雙鳥迴。古縣一江清。歲課增遙服。春田勸耦耕。揮絃存子賤。漉酒似淵明。
人誦黃門賦。天分都尉城。綬連芳草結。車碾落花行。邂逅承嘉顧。周旋識令名。誰言荒邑小。已兆泰階平。
贈張法曹

特簡出彤庭。秋官一使星。子房真有學。張釋本明刑。授第升三策。成家在一經。龍媒驚廣步。駿服負修翎。
曉日涵冰鏡。春花映玉餅。神羊游外廐。屈莢指當廳。西倚曹爲法。南行訟可聽。高才分竹傳。佐郡接籛簋。
羈旅難投李。清江偶聚萍。聞聲來茂郡。招飲過芝亭。藉草連身碧。看山到眼青。天高雲自合。春去雨初零。
好客傾醞釀。尋仙採茯苓。曠懷如可共。吾欲望滄溟。

集臨江黃氏園用佳字

夏雨歇山齋。清樽倚樹懷。丹花飛曲牖。碧水上空階。地僻無常客。風生動遠懷。高歌殊自遣。小住最爲佳。

樓隙雲如嶂。盤中酒似淮。馳箋呼趙璧。謾語雜齊諧。遷坐踰龍澗。新莊彷彿柴。誰憐黃叔度。把臂在天涯。

遠懷詩

織錦經營短。從軍道路長。懷人傷晚歲。思伯怨朝陽。地隔新烽火。天低古戰場。閒房收鏡冷。深井墮釵涼。有字排鴻雁。無書致鯉魴。寒風催擣素。落月射流黃。蒼水稽秦使。青陵謝宋王。城南秋草斷。隴首暮雲翔。絕寒依玄菟。空村徒白狼。深閨徒有夢。只解渡江湘。

游仙詩

避地追遐隱。登山訪列仙。重門五府外。方駕十洲邊。蓬島環宮闕。茅君有洞天。海波傾紫液。石火燒丹鉛。授冊三門訣。分符六甲篇。雲車推曉霧。羽蓋散春烟。芝籙長懸肘。松喬可比肩。靈童占藥好。姪女勝花妍。四序如三月。終朝竟百年。家藏釀酒甕。人佩剪刀錢。華頂成閭里。淮南鑿井泉。母來桃作饌。虎守杏爲田。驅日將投杖。乘虹甫着鞭。辭家憑野鶴。遺世共秋蟬。東望招徐福。南行挾稚川。帝鄉千萬里。一舉遂翩然。

擬艷詩聯句

畫閣綠楊邊。張杉東牆度日妍。花明上巳候。姓人在艷陽天。簾捲翹紅袖。商徵說粧成壓翠鈿。重奩函寶鏡。杉雙帶結金錢。遙竊籠修黛。姓輕雲作半肩。香生緹縵舉。徵說影動步搖偏。壁煖塗椒粉。姓牕虛撲柳綿。博山時起麝。姓深院乍聞鶯。凝望移雕檻。徵說含情理素絃。朱杼閑握擲。杉紅版墜鞦韆。遠道思盧女。姓離宮貯絳仙。幽懷應比玉。徵說皓質詎施鉛。楚國愁窺宋。杉陳王賦感甄。最憐貽菜日。姓長憶破瓜年。徵說蕩子曾留玦。徵說從軍久控弦。聯鑣依勅勒。杉徵曲到于闐。海燕棲懸穀。姓蟠螭隱甃磚。王孫歸未得。徵

說 春草又芊芊 杉

樓曰。楚人懸穀囊子梁。
故梁名懸穀。見廣州記。

定交詩爲胡以寧方中通堵鳳蒸

異地聯車轂。雙江對酒尊。班荆逢國士。獻紵識公孫。龍劍蟠星斗。鸞吟起谷門。擔簦同汗漫。戴笠自寒溫。木落求鳴鳥。冰澌值化鯤。舊游三俊譽。端賴數君存。

宛陵汪節母詩

高節標南國。賢名擅北堂。碑封新炤日。冰鏡舊流霜。兩鬢詩堪矢。千秋人未亡。銅羹蘋葉紫。庭樹桂枝黃。著誠追鳧弋。傳經貯蟹筐。最憐誰國裔。猶上報劉章。
汪爲文節。誰國公後。其孫觀進士。燦孝廉。通乞詩誌。

月身牟尼羅漢詩 并序

西域伽毘羅國。月身牟尼羅漢者。趺坐大航頭。夜行從寧波歸。遇姓暨從子遠公並舟。自稱羅漢菩薩。華音朗然。時苦蒸鬱。罕風羅漢仰視。言是當有風。從東南向來。已果來。又言月爺將有闌。已果有紅闌。闌月邊。且言伽毘羅國。西竺國稱大西天。多羅漢菩薩。結果者。能驅山填海。掣風雷雨。騎獅象豺虎。衣火蹈浪。不食生熟物。卽食勿禁也。其不爲羅漢菩薩者。爲王爲卿相士官民賈商。其所居有金樓銀闕。銅鐵瑤石諸宮臺殿堂。一由旬外。望見金光明色。耕畚六穀。巨米顆碩。具紅黑黃白四穀。稌黍薺菽。無較量賈。車渠瑪瑙琳碧。瓊瓏瑣伏。金剛刺蜜珊瑚琉璃諸物。鉛錫赭堊桑漆麻紵等等器仗。珍怪鳥

獸。鳳凰獅象。翔行道路。有芬花異果。丹青普徧。一由延外。便聞香氣。且多李蓮。羅漢發願進中土。經歷百餘國土。凡一十萬八千零里。虎棲狼役。踰闕賓蔥嶺。經小西天。回回哈密。入伊吾。慮度婆息足。涉流沙界。朝五臺山。屠去首髮。其未屠者。繞華鬘頂。有似黃雲。唐世呼菩薩鬘矣。已屠羅漢結束。肩胡孫藤。搯臂鑲鐵兩環。金剛寶念珠子。三匝于頂。所衣名達磨衣。今所衣繡偏袒。則大都統爺所供矣。懸一鏤金瓢子。挹水。自諸王公卿貴人下。皆有供養。曾賜息椒園。蒙賜金錢。施與行路與牒。勿受一絲一縷。隨地更易。本國所居名雷音寺。其進中土時。日十五歲首矣。朝華二室岱。所謂朝四大名山者也。偕華卑狹。西域入天。不可望矣。今朝海。不得渡。緣禁海也。都統以下軍府。遣兵士護渡江。設菜菓烝饈。人各饗軍府所齋耳。指所坐航頭曰。國亦有之。其道西洋。淳泥者用此舟。或詢羅漢菩薩到天童。見今國師耶。不應。羅漢菩薩何耶。屈右足。跖上指。右手拄右頤。立跖上。作觀世音像。又屈右手。從脊拽右耳環。云。羅漢像。復大笑。作梵語數千言。皆不解。姓曰。姓請從羅漢菩薩游耳。曰。予識子。子不識予矣。再請。笑曰。汝不從襄陽靈炤女兒游耶。終不解。後撇然負藤去。

佛國名天竺。胡僧號跋陀。百年來內地。數歲見恆河。鉢有黃龍繞。經無白馬馱。偏衣裝七寶。番語誦三摩。坐向尼拘律。行爲悉達多。周天踰海谷。踏雪上岷峨。挈履隨雲度。懷輒作鏡磨。但留獅守塔。那用鳥爲窠。妙羽思雕鷲。新花記曼羅。趕將行地牯。送去聽經鵝。持咒能移物。安心便伏魔。錫飛分瘴癘。杯渡偃蛟鱓。入世三洲遍。還鄉萬劫過。中原希德士。是處有檀那。未示西來意。仍看東逝波。神州吾欲往。負杖意如何。

贈蔡山人岳陽

金匱傳神術。青囊揀祕書。桑公池上鵲。涪父漢時漁。斲藥歸林莽。懸壺向市閭。五金權造化。九鍊到清虛。杏廩朝司虎。銅盤夜置魚。橫梁依鳳堰。小卷是蝸廬。爾邁淳于後。吾尋華子餘。膏盲符晉夢。湯熨去齊墟。丹訣從羅絡。黃熊快剪除。橘躡三樹鶴。蒼破五門豬。蟾杵憐長動。蛇珠媿未儲。那堪司馬疾。時御濟陽車。

贛州周司理令樹回任舟次

上洛名材馭。清江司讖船。孤心懸北闕。薄宦返南天。好客追梁苑。移家去廩延。賜錢周舉詔。力學少卿篇。黃鶴憑高羽。朱絲鮮曲絃。初銷刑鼎日。重命甫侯年。郡樹螭峒外。官臺章貢前。金灘留信宿。皓月向誰圓。

西河文集

蕭山毛奇齡

字僧彌
又初晴稿

郭光第湛思較
李日焜次暉較

排律四

楊州金太守修復平山堂讌集和曹侍郎韻

東閣人何在。蕪城賦未傳。每游隋苑去。只愛蜀岡前。地擅江都勝。堂成慶曆年。風流聞舊守。登覽挹前賢。山遠平如掌。牆低甫及肩。折荷分四座。種柳並三眠。漸覺春風度。還看歲月遷。重來送原父。三過憶坡仙。廣牖通樵爨。空壇傍竺乾。賓閒競社酒。妓散廣陵船。何幸文章牧。方從汝穎旋。乘時聲籍甚。懷古意悠然。行部朱旂繞。尋幽錦纜牽。雲樓恢佛地。月俸解官錢。文杏安瑤檻。團花隱甃磚。龍蛇遺字古。魚鳥近人憐。翠甸宜圖畫。紅橋度管絃。同舟攜郭泰。開館得田駢。我本平臺友。忻觀鄴下篇。淮西三歲別。江介一星躔。未乘陪常晚。長筵醉不先。旌麾開北府。烽火阻南天。良會他時少。高風此地偏。到來追賦詠。何似杜樊川。

從湖口入彭蠡舟次登覽書事

水國秋程澹。江舟曉樹涼。晴霞滿溢浦。破浪入潯陽。碧水葭初老。青天雁正翔。廬峯橫九嶂。星渚並三湘。擊磬聽鐘阜。懸花繡石梁。閒僧太子寺。神女大姑塘。斷壁開連塢。流雲過近橋。洲平浮菡宅。瀨淺折蓮房。

鼓角驚殘戍。琵琶惜異鄉。褰衣吹薜荔。酤酒對柴桑。高詠慚吳客。名山重楚疆。臨流隨騁望。我欲誦滄浪。
行次左蠡放船出南康已來舟中寄蔡五十一仲光姜十七廷梧張五杉并呈施湖西趙司馬駱

崇仁何奉新諸公

流浪還齊地。蒼茫向楚隅。何時經夏口。此去是洪都。鄉信淹江雁。生涯寄水鳧。仲宣思故國。阮氏泣窮途。
早歲棲中露。頻年詘負塗。書曾降故將。行獨後諸儒。才淺人爭忌。貲貧志亦愚。山其書有罪。梁燕語當誅。
張儉將歸塞。童鴻反去吳。相君真解綬。浣女果捐軀。走險胡全跋。昂霄尾畢逋。有家憐季布。易氏識陶朱。
讌序傾金澗。詩成博錦綸。宅猶留鮑照。壻欲贅淳于。北顧空馭驥。南行覓湛盧。浮名偕草木。放跡在菰蘆。
彭澤宵經縣。鄱陽曉渡湖。清秋涼襲袂。白日醉提壺。避地依五老。環波洗二孤。籃輿邀栗里。宮錦謝當塗。
每念同袍士。還思舊酒徒。探書登夏穴。修禊遠春蕪。不見三秋艾。相思兩地萑。風舫時轉側。霜柳暗凋枯。
虛羨雲間鶴。恆隨檣上烏。懷人難命駕。無道但乘桴。綠水愁徒涉。青天想共呼。高峰追白社。寒浦泣蒼梧。
妄踞洪崖室。還尋卓氏壚。無端依水馬。何處憶蓴鱸。去國曾捐冕。通關不棄繻。歸裝輸陸賈。游仕愧秋胡。
最恨生多劣。仍憐世善誣。涼才宜別石。暗地豈投珠。嫉翠連殘羽。摧翹及棄樗。狂書焚蒯子。遺論毀潛夫。
分鮮金箱秘。情甘溷廁污。張蒼三曆盡。司馬一書無。質買忘榮落。悠悠度曉晡。拂龜亡決策。借箸昧前圖。
愁聽歌商女。驚看秀木奴。荒城頻鼓角。末技厭吹竽。抱璞思俱寂。書空手自摸。羈棲同燕雀。輾轉似蜘蛛。
海闊從浮泊。天高趁遠徂。留情追沅澧。投老近番禺。市舶諮梁賈。仙山訪藐姑。過車需載輔。相替賴匡扶。
猶幸逢知己。先經宦此區。剝魚跳幸舍。漉酒濫軍廚。兔苑嘗裁賦。龍門願捧樞。蕪文煩嘖嘖。汎愛首區區。

南楚應過眼。章流久浹膚。固將憑永久。且復倚斯須。飄蕩迴蓬荻。遭逢任轆轤。時方捐苧葛。節又採茱萸。率曠知依棧。穿林念守株。草留寒蝶翅。波逐細魚濡。多淚啼猿狖。難行喚鷓鴣。孤懷誰告語。長望起躊躇。

姜之琦曰。西河惘然。略見此詩。

王農發評曰。整而不積。錯而不覆。長律神境。

彭蠡湖達南昌將適廬陵訪施湖西途中有寄凡三十二韻

久念廬陵勝。還爲彭蠡遊。湖天迴遠日。山葉動高秋。星子聯迎櫂。康郎曲上舟。溪吟過栗里。野泊近椒丘。烟寒拋魚罩。霜醴醉酒簫。風生朝解箬。水冷夜添稠。赭岸尋遺堞。青山榜舊郵。橋看三峽雨。亭瞰百花洲。玉筍懷丹牘。珠泉掛碧旒。檣鈴遮鷓浦。旅笛傍龍湫。漢將城臺迥。秦人洞壑幽。峰前紅嶂合。江畔綵螺浮。鼓柁橫章口。攜書到石頭。虛名傳白社。浪跡剩烏裘。鐵轆翔雲鶴。干將望斗牛。故人今節度。分守舊諸侯。重鎮雄蠻服。嚴關控上游。陳蕃推豫郡。陶侃在江州。但借印亭宿。無需禰刺投。入吳忻見導。避楚故依劉。浙右曾分袂。淮南值稅輟。經冬陪飲讌。首夏約過求。歷覽慚靈運。相思負子猷。因探梅尉岫。始憶庾公樓。何處鳴葭鼓。先將釋網維。楊緣徐穉設。坊定范逵留。興到開仙室。文成寫吉流。層臺閑繡棨。後幕捲青油。我放同安道。君廉過褚裒。草堂賫有待。蠟屐計安週。西上呼黃鶴。南行駕紫蚪。此間何路達。爲我一諮諏。

自南昌踰峽江入廬陵界再寄施湖西并諸幕府四十三韻

清江猶曲泝。溜水幾回沿。甫入章中路。旋踰峽口船。回颿知幾日。看桂又經年。時轉青山外。朝行綠水邊。周郎雄鎮下。漢尉舊城前。虎踞橫洲險。鸞吟舞岫聯。無書藏玉筍。有驛住金川。廬阜難回首。洪崖未拍肩。

前程逾浩渺。上浦正遷延。疎葉穿楓塢。寒苗映蔗田。秋高雲度煖。冬近日行偏。宿草紅晞露。平沙綠浸天。石攢飛鳥盡。渦曲斂蛟涎。枉渚難齊榜。層灘只上牽。礮封猶疊壁。浪碎恍連錢。妙景紆還望。忘機醒亦眠。長征鄰去馬。偶詠效衰蟬。篷暖衣從晾。罍飲酒更煎。霜棲尋蓼雀。水食進槎鱸。捲簾抽蒲莞。添衾愛木棉。琴聲浮浦藻。劍氣解冰蓮。寂莫匡君隱。昭靈屈子篇。丹虛慚羽服。賽起恨神絃。高德屏藩業。才名幕府賢。安危煩重鎖。優暇卽神仙。地已成維服。民猶解倒懸。羣方追嘯咏。我亦誦句宣。獻瑟羞膠柱。割刀痛着鉛。自當依謝尙。敢曰寄劉焉。寓擇郗公舍。披餘謝眺甞。逢迎隨浪蕩。奔走任風烟。特是忘歸矢。天涯縱轉旋。未知誰稅駕。江畔漫流漣。風急愁來雁。波澄看下鷺。年華空冉冉。流水自濺濺。此處祠梅福。吾行媿魯連。孤游標鹿豕。健舉負鷹鷂。汎梗憂中斷。枯花憶故妍。天章徒似錦。菱影笑如椽。規我曾遺榼。隨時悔佩弦。寧終浮玉桂。逝欲採香荃。洲鷺漂逾白。川螺轉最圓。懷人兼寄志。游泳自蒼然。

投寓天衣寺謁乾公和尚同張五杉用宋之問韻

祇苑開山峻。王城入路遐。層臺連萬壑。到寺識三車。中藏遺金葉。前人誦法華。南朝傳聖果。東渡守毘闍。化雨飛千界。神天感六牙。國王呈瑞像。太子賜袈裟。代革燈彌煥。巖空覺未賒。十峯環處聳。雙澗度來斜。寶誌重飛錫。曇摩又泛槎。龍潭融佛乳。珠樹散天花。下士行多劫。非時害有瑕。周顛來不意。張儉返無家。翹首瞻獅象。甘心逐麝臙。忍將同草屣。羞復道蘭奢。詎悟依孤獨。居然啓七遮。隨時聽梵籟。是地見恆沙。蓮室仍栽竹。桑門暫獻瓜。山田過夏雨。林洞臥朝霞。勝蹟標秦望。同游在若耶。相逢留白社。去住兩無涯。

送蔡漢舒北游

我厭東歸轍。君搖北去裝。渡江梅雨暗。入夏柳條長。寶帶蟾蜍白。金臺駿馬黃。乘時開韞櫝。利物重干將。綠草愁南浦。青雲羨帝鄉。只憐流蕩久。不忍上河梁。

早春殘雪

麗景春偏早。閒庭雪尙殘。風微融地濕。日薄過林寒。柳絮沾還墮。梨花落自乾。碧流波底凍。白見草頭癢。興盡山陰久。吹停黍谷難。陽和窮巷起。應有問袁安。

奉贈嚴都諫十韻

高座入文昌。天官駁正郎。開函勤對闕。起草靜焚香。翠殿春搖珮。青娥曉近牀。題詩留籞宿。諫獵過長楊。國士稱堯闕。家聲在禹航。燕臺新讌會。吳地舊文章。別計開南粵。前身事孝王。依蒲通禁鎖。連葉誦齋房。讓士逾劉寔。邀賓類鄭莊。木門天上路。誰不望倉琅。

擬艷詩

東井匏瓜爛。西鄰棗樹完。苦心經麩塢。無力度桑乾。黃鵠翻雲遠。青溪得路難。秦家愁織錦。班氏怨裁紉。莞蕩承牀薄。芙蓉掩鏡殘。食禾根可共。結膝履膏單。白帽門前杏。烏頭樹裏寒。曉關如得返。辛苦望燕丹。

哭沈生功宗詩

時事有長短。交情無死生。同君埋草澤。先我返蓬瀛。器大如顏子。才高過禰衡。登臨迴北顧。詞賦本西京。早歲方懷策。終年竟請纓。人間金殿阻。天上玉樓成。鵬爲長沙至。麟來曲阜行。痛心君鳥逝。轉眼我驢鳴。庭有雙親養。田無一子耕。桓譚多緒論。朱穆但空籛。屬誌羞孫綽。臨尸負子荆。今朝發哀次。何似武昌城。

姜垓曰。字先病中。囑其弟乞西河誌。又貽書西河云。能如王武子哭孫楚否。故末云。

送邑明府韓公楸歸遼陽

蕭縣花齊落。樟亭草正凋。楸歸遼海月。魂斷浙江潮。化鶴思華表。飛魚戴石橋。桓伊哀引曲。周勃泣吹簫。河北迎長旆。江南賦小招。如何薤上露。不與泪俱消。

瑩聯句

古寺見秋螢。姓流輝映晚庭。向明還澹澹。僧成瑛入暗更熒熒。點亂因風轉。張杉光疑似火停。拽來投竹路。姓旋去觸蓮屏。拂塵侵衣袂。瑛黏絲綴甌瓿。散縈花底露。杉添作水中星。每恨臨開卷。姓翻宜炤誦經。上方千個白。瑛後夜一林青。布彩連行燭。杉微文媿負螟。那堪同腐草。終歲但飄零。姓

秋雨聯句

高閣雲初合。姓平林雨乍齊。聽來松葉上。張杉吹滿竹橋西。密灑當牕暗。姓斜飛入戶低。冰繩懸急溜。杉瀑布下回溪。沾翅牆留蝶。姓梳毛檻聚雞。珠銜花底泣。杉碧瀉草頭泥。烟斂微峰露。姓湍翻故道迷。斷雲斜漏日。杉複彩曲成霓。濕鳥飛還住。姓風蟬暗復嘶。罽開含篆獸。杉欄捲壓簾犀。晚炤移梧整。姓秋陰間稻畦。攜尊重待月。杉何事轉栖栖。姓

奉贈萊陽宋公分司寧紹十韻

北極中垣啓。東藩左轄開。旬宣膺八命。節鉞近三臺。漢使分章出。汾王上考來。通侯符顯秩。重地授雄裁。

繡轂臨江滸。金牙控海隈。丹書懸宛委。紫氣滿蓬萊。廟佇巖廊器。庭輸竹箭才。龍門留到陸。兔苑共鄒枚。朝鳳翔雲表。春風動草萊。南行懷郇伯。頽首重徘徊。

壽李翰林母太君商夫人十六韻

大海環銀嶠。遙天種白榆。崧高連北斗。婺彩耀東隅。仙李函關遠。生商景命殊。前庭吟柳絮。雅會乞蜘蛛。閨閣逾騶馭。門闈啓豸塗。李大父爲都掌院。母儀班孟範。女史郝鍾模。案舉同鸞躍。塔陳繞鳳雛。花塲開錦繡。粉署布氍毹。舞列金闈彩。籌添玉女壺。漢官驚曼倩。吳苑笑麻姑。萱草搖蘭渚。薰風起鑑湖。絨麟遺繪縷。食鱸是菖蒲。端午後初度。夜露仙人掌。朝陽帝子梧。畫屏懸雉蕝。綵繭動魚須。東觀延新錄。南山有令謨。誰傳三祝語。獻作九如圖。

將遠行時賦得復堂堂曲一百二韻有杜陵蔣生白魚潭張五城南蔡五十一夙喻我意可寄觀堂堂復堂堂。當歌祇自傷。曼聲來北部。掩面似西涼。折竹吹生簞。燒銅作熟簧。烏鹽新世曲。紅子舊時粧。紅子一抄作丹的。鄴下哀盧女。閨門住秦娘。佳人稱絕代。有堵早專房。篋底菱花鏡。江邊竹子箱。堂深棲紫

燕。車左繫烏羊。刈葛牽蘿薦。餐魚重鯉魴。青衣爲鳥使。黃粉貯蜂糧。宅傍丹鷄井。人歸朱雀航。秦家多種桂。蕭巷有垂楊。三豔推中婦。雙綉美孟姜。斑斑通玳殼。扣扣致香囊。聘出鳴珂里。燈纏碎錦坊。渡江迎晉媵。入月見吳剛。夾路煎龍腦。連盃注鹿腸。纖腰懸苣珮。洗手進桃湯。假髻如盤捧。眞珠用斛量。百枝分菡萏。比翼坐鴛鴦。獸纈葡萄錦。龜擎翡翠床。金莖盛露乳。玉草縮天漿。帖展三花樹。籌餘五木香。搜鈿裝鳥毳。翦葢落蜂芒。織貝剛縈脾。裁瓊似截肪。貴官彈錦瑟。賤妾獻明珠。蛾翅塗膏白。鴛衣寫額黃。螺紋闔幃

柱。璣粟綴釵梁。扇裏齊紈小。襦閑魏尺長。拋毬花剗帽。度埒紫游韁。豐草迴修帶。明霞絢下裳。流蘇雙宛轉。絲履五文章。擗合三千縫。釵隨十二行。金鸞啼錦陌。銅雀起清漳。碾玉安重轡。雕楹飾兩廂。承塵浮井藻。剗土樹沙棠。雲滿留裙沼。風生響屣廊。交歡聯屈戌。避影入清防。壁帶銜多寶。庭懸墜八琅。牽鈴翻拒鵠。擗管叶求凰。拊馬羞張敞。雄雞鬪賈昌。穿鍼朋桺啓。博珥一鉤藏。技士偷宮譜。神君授禁方。春花延四炤。午食近三商。窈窕還京洛。繁華過建康。定情河內相。好色汝南王。橘實垂遙岫。蒲生拔野塘。山螢徒炤炤。溝水漸湯湯。平虜將軍去。廬江小吏亡。才人隨養卒。嫖女背尊嫜。口苦茹成蓼。顏醒醉似糖。子難藏蔓草。余竟處幽篁。渺目問波漫。攀髯類戟張。丹湖遺宓氏。白芷怨娥皇。東素魚誰剖。張羅鳥自翔。南行饒夜露。東望失朝陽。寶袜拋三暈。銀河罷七襄。漢宮無史嬾。越俗擗毛嫱。巷有妃春黍。家留叔食糠。服將巾藉履。色以白爲蒼。獨鶴憎羣蹠。諸鳩嫉衆芳。涼颺閒暑帳。遲日寘懿筐。閣下悲鸚鵡。車前泣驢驢。歲華渾未駐。歌豔亦何嘗。騰壤全無臭。裙刀不用鋼。約衿譏好楚。緩髻笑迎唐。餅墜繩難續。珠燒灰易揚。同心分縷結。割體判珪璋。鐘鼓捐傍舍。蠟蝟布近場。送郎黃蘗塢。辭母白雲鄉。門幾留單闔。舟無刺兩檣。登車思壘碌。唾井顧滄浪。相見中書苦。驅來司馬狂。徐娘睽上郡。宋玉絕東牆。箔鮮同功緒。缸遺四壁光。杼投機絞下。器碎酒壚傍。脂藥傾新甕。衫構掛舊桁。獻夫存旨蓄。爲客羨彫牆。草碧勝荷粉。萱紅奪蕙纒。善懷方襞積。宛步卻銀鐙。履畏擎奴子。衣嫌捉小郎。畝維張四角。詩句讀中央。頰尾游離篔。玄禽去頰頰。棄妻疑得路。春主痛沈湘。暮雨迷神女。天星墮樂娼。寒房瞻顧兔。側室聽鳴蜩。結綺園中柳。彈箏陌上桑。懷金調故隴。蘇玉會空倉。黃鵠追陶寡。青陵謝宋康。旅葵從穀熟。苦李代桃僵。鳳失生何匹。熊來死可當。持門行自

健。夾。穀。問。難。忘。去。故。悲。搖。落。尋。真。暢。杳。茫。絳。芝。紛。外。苑。紫。葦。折。中。溇。鈿。覓。元。妃。合。酥。空。長。史。觴。扶。搖。翻。北。嶽。妖。麗。入。西。荒。羅。郁。裾。成。霧。麻。姑。髻。有。霜。三。神。方。汗。漫。九。寡。重。徬。徨。紉。結。終。雙。度。升。輪。且。對。望。采。蓮。逢。阿。子。撲。棗。返。王。陽。上。調。區。遙。促。中。工。辨。苦。良。可。憐。千。萬。歲。持。此。誦。無。疆。

西河文集

蕭山毛奇齡字初晴
又大可稿

鍵綸中園較
易元

排律五

送周儀曹奉使安南册弔一十四韻

星使頒雙節。春官駕一軺。恩綸綏異域。册弔出中朝。嶺嶠飛蘭旆。關樓見柳條。賜麟金作繡。坐馬玉垂條。銅鼓迎山驛。香船渡海潮。宅居羲仲古。地拓季犛遙。瘴薄開泓淪。風炎近沃焦。國王行饗重。蠻女拂塵嬌。靈祝陳方譯。神歌引洞簫。饌盛瓊海貝。酒縮荔江蕉。奠幣霜鋪紙。傾珠泪織綃。還朝酬浩蕩。歸路記招搖。沛國華文在。都鄉舊蹟超。他時歌四訖。誰敢後南徼。

賦得拈花如自生觀內家所製剪綵花作

何事深閨巧。能傳舊苑名。花從心裏發。香傍指頭生。柳線非搓就。荷衣豈織成。春風吹不定。曉蝶撲還驚。散葉聞多氣。飛絲絆有情。翻嫌枝葉上。裁剪費經營。

上寶坻相公

坐論安公府。平章啓聖朝。開疆逾漢鼎。致主並唐堯。殿借山爲棟。樞隨斗建杓。身紆丞相紱。世插侍中貂。

宅俊區三事。班行絕百僚。才名張道濟。器識李文饒。金筭籌還直。彤弓賜轉昭。璿臺燧玉燭。土戍息銅鑼。階峻依辰極。門閒近午橋。登龍爭曳裾。走馬亦啣鑣。好士同三吐。寬人滅八條。量能容海嶽。言且詢芻蕘。寶籙傳千禮。祥鸞下九霄。祈年諸誥在。應使勒青瑤。

滿洲中堂生日作

上宰乘元會。台司領百官。帝圖開景亳。相業邁貞觀。地接三階遠。天擎八柱寬。進銜跨殿右。正色立朝端。在昔需楨幹。先時奮羽翰。鍾靈當五際。作德兆三韓。位陟行前省。名高柱後冠。裴遵頌誥紫。尙父受書丹。日馭排雲動。星文射斗寒。雌裳加綠綬。貂錦賜黃盤。坐見諸荒闕。真成一德歡。開疆踰鹿海。通貢到烏丸。社稷彌安衽。江山似奠磐。四征恢賅渡。一日下瀧湍。宣力舒肱股。推誠見肺肝。修鱗游善下。行馬出常單。衡直知輕重。羹和辨苦酸。憐才收駿骨。赦過傍鷄竿。鑄鼎鎔成鉉。鑲圭秉作桓。勤能移苑甓。儉且節堂餐。劍重今皇錫。門弛漢相闌。生當箕尾度。歲值昂星攢。甲子週方始。箕疇衍正繁。觴傳衣弄綵。絨絳矢垂緇。旭日躔南陸。秋花發上蘭。三青如寄祝。好傍帝臺鸞。

上巳申江修禊和任明府韻

久惜春過半。剛逢日在三。湔裙雙檜里。放槳百花潭。碧浪將螺寫。紅桃似酒酣。觴傳流水曲。歌擬望江南。雨歇烟逾斂。雲開日向含。迴車沙漫漫。觸屐草毵毵。寶瑟當胸豔。香錫入口甘。隔花逢姹女。採藥笑童男。近郭生寒火。遙山障彩嵐。當筵雙進舞。非復舊何戡。

送梁京兆之任奉天兼訊姜少京兆

峻秩遷京尹。高名過趙張。青雲連北鎮。赤伏兆南陽。居重安如石。官清凜似霜。玉麈新作篆。銀菟舊爲章。地入三屯勝。軍從九衛防。渾河迴障遠。澄海度遼長。屬國踰平壤。降番處兀良。城垂荒徼路。廳傍故宮牆。朝日沙間白。秋花雪後黃。通關持虎節。候吏着熊裳。王駿留三輔。韓維置八廂。端寮吾友在。好爲寄芸纒。

賜筆紀恩和韻

黃紙傳深禁。丹毫賜上宮。文章三館賚。願賚九霄崇。前史修方始。尙書給未終。時以修明史。月給筆札。牀聯雙櫺下。帕用五絲籠。綵鳳題名重。筆有文犀。綵鳳。赤刀綠字諸名。青羊作被豐。跗含膠似石。頸截竹爲筩。析穎堪垂露。吹毛擬旋風。澤研桃洞碧。鋒透衍波紅。久負簪疏劣。長慚荷橐工。編摩難按實。感慨但書空。誰望衣裁紫。翻教珥是彤。班僚封薛稷。牆壁置王充。嬪御頻呵凍。兒曹未發蒙。銳頭靈壽伯。禿髮管城公。起草依簾外。生花憶夢中。敢言金玉飾。三品贈湘東。

夜飲施少參邸舍同諸徵士作

論學申公邸。銷愁阮氏扃。烹魚設饌早。射雉應聲遲。觸幔驚槐葉。燒鑪揀桂枝。案間文似繡。小參有上宰相書。極言諸徵士寒苦。座間索讀。欄際雨如絲。禁苑鐘傳後。天街人靜時。徘徊紅燭下。何處不堪思。

張通政初度八韻

北斗轉珠輪。南山倚殿新。班聯親帝座。出納羨王臣。珮委看皆玉。臺高望似銀。受書開畫掖。司命出丹脣。雲闕爭扳翼。冰廚善劈鱗。百年忻得歲。四坐喜同春。平子名逾盛。張憑論有神。長庚秋正煥。莫問柳邊辰。

恭送仁孝昭兩皇后哀詞有序

康熙二十年二月十九日。仁孝皇后。孝昭皇后。兩梓宮。啓自沙河。將遷葬于遵化陵園。羣臣送之者。齊集于寶家莊之西塋。惟時龍輻乍移。鑾衛先發。曉月未落。悲風斯起。皇帝親臨祖饋。躬奠殯階。六衣在筵。雙轡載道。啓鸞軒于宿隧。擁蜃輅于新沙。將欲使八神警引。五校戒跡。宮執數十。列于仗內。閤器百雙。載之馬首。自親王滿漢諸大臣。暨福巾公主格格。奉恩將軍之妻。皆俯伏輿傍。哀號道左。天慘地裂。山鳴雷動。咸思仰攀黃帷。俯挽朱紉。盼翬楡而莫逮。駐鸞蹕以何由。因祇送縞輜。私抽彤管。下述悲情。上頌懿德。恭惟我仁孝皇后。位正宮闈。教先嬪婉。絃綆既組。種桂是親。乃以璇宮。啣燕之姿。當茲畫棟盤龍之日。六駟馬上。長輪繭御。筐箱百子池邊。早帶高謀弓韜。迺生殷于癸乙。人望流星。暨誕啓于辛壬。母先化石。飾椒塗于天上。展蘭殿于雲間。亦越我孝昭皇后。進承璽玉。繼賜綈衣。重看貫月之輪。真是倪天之妹。長秋宜配。有司將玉輅迎來。皇夏堪聽。命婦用璫衡佩入。聽鷄鳴而警旦。馭翟衛以朝元。崑山和麗水。頓見前碑。璧帳與金根。竟成晏駕。兩度皇情之創痛。六年臣庶之哀思。雖揚雄之誅漢后。麗筆難傳。卽錢起之挽貞懿。徽章未罄。恩留府事。無須莊憲慈仁。化起宮人。不數長孫節儉。遂于上軫旋幽之際。抒此左言敷善之情。敢曰黼筵在御。仍修念詞。庶幾旒旒當前。還同振鐸云爾。

梓禁分行。杏椒塗引去。輅祖成雙殯。啓后出百靈從。壺德無先後。喪儀備吉凶。鳴鑾頌五校。拂翟謁諸宗。鹵簿迎朝旭。陵園建上冬。連年停纜紵。一旦轉碇礮。路饌唯三獻。泉臺尙九重。靈幃遮展飾。禮服覆驚容。扇導當乘鳳。車臨儼濯龍。環山圍畫髮。配地捧黃琮。寶獸如雲擁。金鸞向日鎔。朝官呼械械。命婦泣淙淙。妣喪真堪痛。嫫賢豈易逢。人方師儷淑。史已誦借雍。纘女承先妣。生商賴有娥。脫簪弛髮鬢。鳴珮聽琮琤。

曉月移蘭殿。悲風起桂茸。姚墟餘舊德。華渚式前蹤。兩組傳旒旒。雙函闕册封。笳開金蕙葉。鑑掩玉芙蓉。藻輦終辭載。桑壇久罷供。渭橋哀舉紼。長樂厭聞鐘。虎衛嚴中馭。蟾光掩下春。心纏河畔草。目斷道傍松。製策踰齊敬。題碑羨蔡邕。諫詞謔未盡。歌挽痛安庸。林露銷青薤。軒星入紫墉。英皇齊駕去。盼煞九疑峯。

翰林院掌院學士生日

丹地掄才子。朱衣引近臣。天威嚴咫尺。師表動班鄰。位列槐廳長。人從香案親。百年昭黼黻。早歲掌絲綸。鷺集堂皆玉。螭盤印是銀。錄裁時政切。史總大綱陳。祕記唐司馬。微文漢獲麟。寰中瞻海嶽。柱下見星辰。北苑黃花發。前關紫氣新。集賢能祝歲。安數曲江春。

甘霖應禱恭頌二十韻

四月分龍少。三農望歲長。汗邪曾未溉。雲漢久爲章。少女吹難定。司巫舞欲狂。天無升墜意。人鮮賣雷方。聖德同於穆。精心感顯蒼。爲壇供太乙。酌酒禮東皇。郭北祛燔幣。街頭禁暴戾。朱絲縈漢帝。金鼎告殷湯。雩祖分瓊碧。祈官入幌黃。甫看浮蜥蜴。頓見舞商羊。有淪啣衣起。流雲作蓋張。衝泥成吠澮。鞭石勝江湖。仗濕甘泉潦。盆傾洞府漿。不稂歌帝力。多黍祝神倉。洗甲傳荆楚。停囚在洛陽。春秋曾誌喜。宵旰已如傷。忝御諸司齋。言觀古太常。雨來慚束皙。菑去笑京房。林翳遙山色。花漂上苑香。須知畿甸廣。從此慶茨梁。

寄祝董太史尊人七十

東國衣冠在。西堂几席連。千秋雲伴侶。七十地行仙。肇氏來千乘。通儒繼廣川。晚能遺世寵。早爲領時賢。遠道迴車轍。長橋理釣緡。才名齊顧劭。干請卻任延。庭有三珠樹。園藏九疊泉。膝前看鳳翥。物外得鸞鸞。

花石新探乳。蓬池遠獻蠡。數從金簡發。書以玉杯傳。嶽降逾良月。林居獲大年。羣瞻華髮曜。屢舞綵衣鮮。家餉餘杭酒。門停甫里船。一觴遙寄處。敬誦白雲篇。

秋夕周金然編修招諸名士集張氏園分賦得銀漢

做唐試體以題爲韻

顥氣經秋肅。衡潢入夜新。周天雲作冱。倒地水無垠。風逐蟾車度。波從鵠路堙。低垂千尺練。斜嵌一條銀。輦下星辰合。筵前瓜果陳。南皮高會去。何減汎槎人。

又賦得白榆

商節司青女。秋山下白榆。月中看去靜。天上種來無。蔭久門成列。鑽還火在膚。危巢飛赤鷁。夾巷壅青蚨。赴社歡俱集。眠牀嬾未扶。鄉心千萬樹。總向酒中據。

喜遇王二光祿有贈

我愛王光祿。同居幸比肩。學成荀況日。策獻買臣年。石匱家如寄。金門吏是仙。大官留熟釜。好客散饔錢。歲共登朝履。人懷入剡船。他時醉春酒。相待鑑湖邊。

上李相公

相室開三運。師臣總庶官。紫薇長啓曜。仙李舊能蟠。天子尊伊陟。蒼生倚謝安。鴻文標正始。嘉績邁貞觀。位極平章府。名通泰乙壇。君臣同德易。父子上公難。韋笥傳來久。虔刀佩去寒。迓衡真穆穆。尙父自桓桓。職衰將絲補。堤沙共黍搏。山河排作繡。日月捧如丸。麟擾黃扉外。鸞迴綵筆端。引經千佛會。押字百花攢。綬曳圭恒輯。金鐙印豈剗。招攜開閣邸。吐哺罷堂餐。九宇遮成幃。三街望似磐。明心垂寶鑑。密語傍金鑾。

鐘傳驅車小。蕭何賜第寬。年纔臻葛恪。學已過甘盤。論語行將半。丹青寫未完。他年靈壽杖。會作應龍看。

集閩縣方京池亭同鄭宮坊前輩高兆陳日浴定國卽席分韻得花字

良讌千秋勝。方塘十畝賒。飛飛天際雨。的的水中花。古荔蟠雙磴。空亭枕一涯。壺冰傾醴酪。甕醢雜魚鰕。香繞雕欄直。牙翻縷字斜。時戲翻詩牌行酒。呼盧驚浴鷺。出燭及棲鷓。客盡來蓬島。人如汎海槎。女螺纔咫尺。何必問兼葭。

賦得紅藥當階翻

曉日穿朱網。春風拆絳房。重臺方漸啓。兩屺正相當。翠發年前種。紅添午後粧。繡芭疑婦繡。落葉帶官黃。洧水貽香遠。邗江舞袂長。孰憐偏反意。留詠在東堂。

過汪二檢討新居和馮三郡丞韻

履道坊仍僻。安仁宅不譁。閒官植紫陌。逸興繞丹霞。市隘門逾靜。庭虛徑自遐。近牆新種竹。隱篔舊安家。劍買秦王寶。文祛左氏誇。屏風排紀亮。書乘載張華。擊筑娛心意。啣杯漱齒牙。高談時據檻。下直當歸家。禁裏分題秘。籬前起草賒。蘭臺聯柱下。何用達南衙。

陳開府生日

出處原乘運。安危久繫身。十年膺節鉞。六度轉星辰。海國存元老。方州憶重臣。孤懷如執玉。兩鬢未垂銀。頌起桐鄉近。碑傳峴首真。殊方猶戀主。軫念爲生民。日出浮雲散。時迴大地春。翟公門下士。誰是報恩人。

八月三十日上賜翰林院諸臣御河鮮藕恭紀一十八韻

曉日瀛臺敞。秋風水殿涼。賞花開寶幔。收蕊薦銀塘。敕使宣中秘。分甘出上方。宮僚皆受賜。翰苑獨先嘗。
種獻蓬山遠。根蟠太液長。紅衣銷紫漫。細酌墜青房。塚去如堆雪。橫來似截肪。蒲枝聯作帶。菰葉織成筐。
嚼入冰淘冷。烹疑茗粉香。慢剗包筍白。且掩覆蠶黃。洗骨迴仙島。虛心答昊闔。纏深知節苦。折處見絲颺。
鼎俎堪呈質。汙泥不染腸。量材逾七棗。挫滯得三漿。不畏相如渴。何愁孔凱狂。盤傾金掌露。匕割玉臺霜。
華井誰含片。天池甫佐觴。願將千歲碧。早晚進西王。西王母進千年碧藕。

何使君紀績詩

秦望羣峰峻。耶溪萬壑流。專城居刺史。千騎擁諸侯。望族鍾洪澤。聲華冠鬱洲。才非平叔下。名與敬容儔。
振筆翔鸞鶴。摛文射斗牛。起家由祕省。出守監炎州。五玉桓蒲寵。三山鼓角愁。憑忠歸漢節。含笑佩吳鈎。
重簡東南牧。長寬社稷憂。清風吹畫鹿。甘雨拂鳴鳩。井邑桑麻潤。宮牆桃李收。蒲鞭裁綠梗。花冢沁紅油。
虎自江流渡。魚從廳事留。餘波沾鮒輟。砥柱宅龍湫。邁德傳經遠。昌岡錫祚優。盈巢皆鸞鷲。當道見驂騑。
河畔桃花發。淮南桂樹秋。門高容上駟。庭敞列行驄。進秩褰帷出。匡時借箸籌。子牟懷北闕。嚴助闢東甌。
自愧龍丘老。曾陪兔苑流。微文當紀績。聊備史官搜。

慕中丞起湖北巡撫有贈

東海珠仍合。中天日自開。謝公真再出。寇氏喜重來。敕自皇恩下。裝憑使者催。建牙襄鄧表。移鎮楚江隈。
半壁恢雄建。長城仗鉅才。民皆思雨露。帝用感風雷。嶽勢蟠南盡。湘流至北迴。萑苻看驟輯。魍魅敢還猜。
馬識前時路。烏飛舊日臺。思君何所似。江漢水滌洄。

春晚曹顯菴學士過天中署夜飲卽席和見贈原韻

侍從維東觀。才名擅北宮。與君遠越嶠。過我在天中。華省書仍祕。長沙賦轉工。清缸新釀綠。古署暮花紅。把臂憐時逝。談心及漏終。羣游懷鄴下。三篋記河東。每望天垂斗。相逢月似弓。賜緋真熠熠。時學士投瓊得六緋結珮莫匆匆。合座皆枚叔。空罇媿孔融。陽春纔有和。切勿笑巴童。

十月朔午門頒曆侍班恭賦

鳳律開平朔。鸞輿啓未史。祭時歸太廟。是日以時祭太廟迎駕。頒曆坐明堂。道夾珠旛轉。庭開寶籙長。司常將舞鸞。掌籩不供羊。疊冊裝縑麗。關車覆畱黃。用人輿十餘乘載曆覆以黃帝背封籀押小。面記印泥方。殿上呼三壽。階前奏八琅。五官陳夏令。百辟奉春王。數合軒轅紀。班隨星宿行。授書馳赤縣。開卷遇青陽。葉向窠塔折。花含黍谷芳。敬天方嗣服。歷數正無彊。

駕幸溫泉恭賦

羽肅句陳外。波開帳殿中。咸池長浴日。華渚自流虹。曉度榆關遠。春從黍谷通。慈寧扶葆馭。時太皇太后坐湯神策駕豐隆。幣溢銅仙露。臆含玉女風。青泥分太液。紫氣接居庸。淨可捐煩慮。溫能養聖躬。醴源逢處合。仙井鑿來空。衣藻淞渦碧。巖花入照紅。瀛塔將赴壑。聽水似呼嵩。鐘乳浮銀椀。松雲鎖玉權。起居長樂輦。扈從華清宮。舜德時存坎。湯田歲轉豐。甘泉徒有賦。未敢擬揚雄。

題耕隱卷子有序

邑前進單能重先生名瑞。隱居西山下。自明洪熙。至成化。杜門絕仕進。別號耕隱。同志並爲詩贈之。迨

今幾三百年矣。康熙戊辰，其裔孫廣宗爲修其遺卷，示予，予捧而誦之。中有二洪先生，一名鐘，一名鏞，皆洪宜間詩人。其詩類元和長慶諸名家，而其字不傳，并不識住何所。其子姓于今，誰似，惜前人輯詩家不能旁搜，而邑有前進如是，不能一表微爲可憾也。因取仲洪先生名鏞者長律一首，依其韻和之。雖慙續尾，顧私喜一日附兩賢後，乃應廣宗請而復爲識其大略如此。

舊氏傳江表，前賢住郭西。此山曾豹隱，深巷有烏棲。地僻難迴轍，春陰自洗犁。隨時觀塞馬，翫世等醯雞。但辨麻和菽，能忘筌與蹄。壇邊松障合，門外柳枝低。乳犢啣芻出，新鶯繞樹啼。商歌留白石，叢話記青溪。奕代存風節，居家鮮傲倪。川迴魚汕藻，堂改燕巢泥。筆篋餘花譜，衣形想稻畦。閒看三徑菊，貧授一莖齏。茂族開於越，高風著會稽。詩題王霸友，隱並老萊妻。故老行堪式，賢孫卷自攜。遺文追往哲，流譽滿中閩。

附洪鏞原詩

吾邑西山下，君家住更西。百年忘寵辱，終歲樂幽棲。沃壤資三熟，生涯在一犁。呼兒勤飼犢，戒僕早聽鷄。高棟縣龍骨，衡門絕馬蹄。來牟連屋近，桑柘覆簷低。花外提壺語，林間布穀啼。沾濡天雨澤，灌溉水分溪。托蹟堪鄰鄭，窮經合並倪。不辭身滴汗，寧憚足塗泥。曉摘蔬盈圃，秋收稻滿畦。甌香炊白飯，甕澹釀黃齏。禮讓誇淳朴，經營笑滑稽。相親多野老，主饋有山妻。靜裏詩還覓，閒邊杖復攜。優游太平世，何必慕金閨。

西河文集

蕭山毛奇齡字春庄
又名姓稿

平士杰漢三較
田得名網卿較

排律六

聶明府生日

荀貌來榆次。言游在武城。愛將花自種。操與水兼清。飛鳥瞻鳧近。圓扉見草生。亭邊三老約。指下五絃聲。楚戶全輪版。甌蠻尙用兵。賣刀同虎渡。懸鼓中鷄鳴。白望聞俱斂。黃巾戒勿驚。仙郎真列宿。神父比長庚。棠舍千秋意。桑弧四射情。登堂無可獻。折取早梅馨。

雙壽篇贈餘姚諸徵君

丈人稽郢後。垂老舜江邊。自昔稱三俊。于今踵七賢。占爲鴻漸卦。註就馬蹄篇。隱向梧中據。閒來柳下眠。銀牀穿碧磬。寶鼎發丹田。藜杖鄉初設。桑弧牖自懸。庚寅皇覽日。甲子義熙年。物外餘幬帙。閨中喜繡絃。龐公偕伉儷。鮑女本神仙。河鼓牽朱輞。初度在七夕後江魚列綺筵。想思何所寄。唯有綵霞篇。

遙同淮上諸公九日遊裕親王園林登高限韻得徒字有序

予于九日過舒南宮舍人邸舍植淮上丘學士兄弟李明府張孝廉諸公車馬四集將以是日游裕親

王園林作題糕之會。呼予共載。予適以他集不能從。既而諸公各有詩。卽席分字。限一十二韻。彙錄見示。昔梁孝王闢兔園。召客自睢陽爲複道。屬之平臺。凡四十餘里。而河間王德嘗築日華宮。置客館。二十餘區。以待學士。今親王爲帝室賢冑。肺腑枝葉。其開園築館。原足爲賓從。廂足而諸公以鄒枚之才。偶接蘭坂。卽能啣盃抽牘。以當獻頌。此在鄴宮讌集。所稱良辰勝地。賢賓盛主。莫過于是。而予以無分不預。則其爲悵恨可勝道哉。嘗讀韋學士和唐主九日詩。知學士亦未嘗預會。強顏作和。而李白九日不與崔侍御同遊敬亭。然猶有寄侍御詩。見之本集。予效贖附和。亦請限韻。顧未知其與古人何如爾。康熙戊午重九後一日某識。

九月入皇都。秋高海雁徂。將車來舊邸。懷刺向當塗。紅藥頻年憶。黃花滿地鋪。宋公方戲馬。陶令正提壺。期赴尙書遠。筵陪侍御無。賢王開碣石。豪士進雕葫。積善坊邊柳。高廳館後梧。留題雲作牘。分佩水爲符。帽落遠江夏。巾摧記義烏。登臨還倚樹。附載豈編蒲。梁苑饒詞客。燕臺盡酒徒。相逢能唱和。清興未曾孤。寄祝同年汪編修尊人雙壽。

三壽函金冊。雙星轉玉繩。裔傳汪仲舉。兒似柳吳興。天上絲綸展。人間歲月增。桑弧懸鵠血。門戟絳龍縉。國老扶來罕。閑閑得未曾。登朝惟齒尙。舉案與眉凭。鼓瑟歌方並。開樽酒是朋。千年桃實結。庶品蕙香蒸。鳳喜翔新竹。鳩看集古藤。傳經貽碧檢。染紙用青菱。瀛海濤千頃。丹梯路幾層。一觴慚寄祝。頰首誦岡陵。奉酬董公子致平貽贈十六韻。

紅杏園初啓。青槐路未遙。高門逢勝集。公子踐佳招。碧浪迎人醞。紅泥坐客寮。車迴攀柳候。茵藉落花朝。

誼以雷兼鮑。名如董共鼂。文章橫蓋代。意氣上干霄。八斗才無敵。三餘工不佻。虛懷嘗抑抑。玄著本超超。東閣張筵遽。南皮發興饒。庭聯天廐馬。世插侍中貂。衣染牆葵汁。書縈帶草苗。琴心傳鳳曲。劍鼻刷犀膠。酒榼頻添漲。薰鑪欲上潮。邀朋皆黼黻。投我是瓊瑤。道在雲嘗合。詩成星暗搖。雙飛看鷺羽。不忍度河橋。

許使君詩

聖代推觀察。雄藩重列候。雙旌開鎖鑰。千里藉懷柔。勵治咨良牧。平情簡督郵。巡軍星照海。行部雨隨輈。碑接山陰道。屏高甬上樓。句宣踰八越。保障近東甌。鑑遠無疑牘。刑寬省要囚。廉辭原憲粟。儉着晏嬰裘。勸稼乘羸馬。耽書臥小舟。亭遺黃絹字。道鮮赭衣偷。入市攜刀賣。當筵借箸籌。捐金輸士困。貸粟賑民流。自媿樗材劣。曾經藥籠收。宮牆傳五教。稷下關三鄒。絳帳依南郡。青雲起道周。微文難紀績。聊以代方謳。

題傳經堂詩

至德聞荀里。高名著鄭鄉。人方垂繼世。家本住橫塘。門對新花嶼。經傳舊草堂。青山迴幔檻。綠帙滿巾箱。書帶牽隄遠。垣衣繞砌長。生徒閒授几。賓客靜傳觴。詞業延中祕。忠言肇侍郎。其先侍郎公爲靖難建言有聲一門追顧陸。四世見袁楊。駿烈遙堪誦。清芬久自揚。橫舟停下去。豈是戀滄浪。

蒙孫國公徵灑請召西園讌集有贈時予將南歸舟次奉答國公係義王之子

西邸恢前緒。東吳紹世修。標名同燕頤。覲面在螭頭。爵過平原秩。人如康樂侯。田猶頒鄠杜。文已駕曹劉。家自傳盧矢。門無詠蒯緱。張錢長卻會。繡刺竟先投。突室琴蹲靜。閒園竹樹幽。高談驚遠聽。散帙恣冥搜。醴向晴軒設。車從智井留。鼎脣沾雀蛤。褥縫對犀牛。憑袂先王几。觀銘舅氏卣。當陽襄武庫。弘正醉書樓。

宴比東堂勝。詩方南面優。公詩名擁書堂集見示。天才傾八斗。國士感千秋。金券文難紀。銀泥緘未酬。柳城相望隔。思煞潞河舟。

寄祝劉母王太君

錦輓開雲縵。朱門對水澄。清罇傾綠醕。峻節著青菱。晚歲能餐桂。當年重飲冰。硯澐提甕水。書照辟繡燈。身是陶貞烈。庭趨劉孝陵。笄珈頰錯落。棹楔表峻嶒。甲子人間換。初陽地上升。環葭飛玉瑄。覆斗絳珠繩。衣舞新縞綬。堂鋪舊毳毳。桃花開有日。坐見歲時增。

看菊聯句 爲楊雲士菊圃作

北苑尋幽鞠。姓東籬見治蕪。佳名渾不辨。張杉妙植想多方。種集伊川盛。姓泉通酈縣香。銅鑲鋪處白。杉金盃鍍來黃。龍腦蟠銀罍。姓獨絲旋錦囊。輪啣千幅廣。杉鏡取五銖良。蠟采紅兒髻。姓檀窩青女粧。苞沿舒茗中。杉瓣底綴瓜瓢。敵類仙盤舉。姓圓同佛面張。微紅名馬齒。杉小吳似蛇牀。塢關辛椒外。姓園鄰苦竹傍。穿鶯疑住久。杉報雀欲啣將。高士裁爲佩。姓夫人染作裳。分花餐屈子。杉釀酒送長房。合密團松餌。姓和英煮桂漿。翻叢祛蛺蝶。杉啄蕊妬鴛鴦。暫吸枝頭露。姓潛窺葉上霜。候遲猶猗猗。杉風動自低昂。重疊排成幃。姓離披布近墻。記時存小正。杉遣興在重陽。賜鄰悲將老。姓橫汾誦有芳。秋葩應晚歇。杉爲我罄餘觴。姓

送任生北遊

春草初碧。朝雲欲馳。集江上之離亭。送樂安之公子。千里名高。遠度黃金之館。三洲歌苦。同啣綠玉之

扈趨庭須早計。但作方遊。卽席有貽言。不拘句韻。
客路饑驅遠。離筵酒上微。關山方漫漫。楊柳正依依。市劍吹花鏢。征衫換葛衣。燕臺需駿久。塞館度鴻稀。
薦引思嚴助。遨遊重陸機。高堂頻慰去。勿使傍柴扉。

贈胡少宗伯八韻

南省推常伯。東華景從臣。披雲常見斗。有嶽必生申。祕閣專詞翰。崇班領搢紳。典從三禮貴。賓與四門親。
伯始才無敵。蘇湖學更醇。名標仙闥上。家在射湖濱。秩序追前哲。文章獎後人。升堂纔咫尺。相望轉逡巡。
寄祝王匡廬先生七十初度卽新城王禮吉東亭阮亭三先生之父也

甲地開華閣。高筵啓玉壺。人間瞻岱嶽。天上見南弧。第五名偏重。無雙譽不誣。孝思懷牧伯。至德紹司徒。
書繫塔前草。冠栖城上烏。交遊同郭泰。論議近潛夫。皂帽龍垂尾。丹山鳳有雛。卻宮成八俊。教子得三珠。
賜饌長遺贈。徵車好載蒲。鸞書天外錫。鳩杖國中扶。奕世多傳寶。羣賢有繪圖。一觴隨獻遠。未敢效吹竽。
吳楷招會湯餅聯句

湯餅傳瑤席。張杉金錢壓綺襦。石麟摩外士。姓河鯉饋中廚。主爵催浮白。杉寶衣有拭朱。試啼知大器。姓
占慶見充閭。九子烏生好。杉三羸馬相殊。高虹天半玉。姓滿月夜來珠。父子吳中復。杉階庭謝幼輿。他年
詩禮貴。姓看汝早追趨。杉吳氏又氏謝。故有幼輿句。

禹陵

夏后南巡日。茅山啓闕宮。九川方灑滌。萬國已來同。宛委藏書古。衣冠輯瑞隆。羣侯遵會計。江漢底朝宗。

祀重陪方鎮。功成抑下鴻。層欄迴綠鳳。畫地有黃龍。藻染梁紋綠。花啣碑字紅。千秋新貢賦。八越舊登封。頽首滄江外。摳衣饗殿中。翹瞻明德遠。去此欲何從。

郡太守許公遷寧紹兵巡副使賦贈

中巡加八使。上秩賜通侯。控地連滄海。開轅在越州。金茄吹外幕。玉箸借前籌。民事關心切。兵行錫命優。專城原倚重。治郡早推尤。草檄憑馬首。封書裹箭頭。盜因虞翮息。人願賈公留。攀軾同蟻附。遷枝相鳥求。碑橫刻上路。靴掛郡東樓。俗凡留官者脫其靴掛于庭。神武調軍騎。星文割女牛。寇恂需歲月。杜預註春秋。公註左氏傳付刻。自愧編遙服。深蒙顧弊裘。釋冤開蔀屋。解澤到荒丘。會諭治先壠最切。茂樹陰方接。高天戴未休。江湖千萬頃。誰敢賦涪瀾。

丘大叅年伯七十初度

南極分樞久。東山屬望專。名高公路浦。家近射陽田。雲閣青齊舊。星垣碧漢連。司民延世澤。叅岳領時賢。漢署常紆紱。淮流自理緝。井公六博戲。韋氏一經傳。玉樹園瓊砌。金英燦綺筵。座中朱履集。階下彩衣翻。蓬島依兄弟。槐廳入後先。看雲還棘寺。曙戒先生以學士左補大理。愛日度花罇。謂季貞檢討也。佳氣浮簾幕。輝光照里廛。門楣揚鳳翮。地胄引蟬聯。共有稱觴慶。寧忘授几虔。相隨羣從後。敬誦白雲篇。

奉謁通政楊公林居感贈一十四韻

上闕標雲路。高門啓道鄉。詩書傳百代。名德冠諸楊。臺出金銀表。官居喉舌傍。天書垂左掖。卿月照東堂。假沐還泉石。因閒問梓桑。往來申浦楫。偃息午橋庄。自愧紆三策。曾經泝九方。予讀卷舉主出公門下。袁公四

世植陸氏一田荒。種杞孫枝詘。傳衣祖製亡。到門慚舊主。開宴謝新昌。爲仰千秋鑑。來窺數仞牆。一時依斗曜。三日接衣香。人望年來屬。天星曉自張。徵車應在道。執策敢相忘。

葉使君六十

會見黃星燦。長疑紫氣連。應鍾方啓籥。甲子又周天。族是諸梁裔。家藏虞仲篇。論文誇魏晉。對策入幽燕。製錦潛江曲。專城桂水邊。郡留黃霸蹟。人謂寇恂賢。音問三秋隔。相思兩地懸。誰知遠俗久。頓使杖鄉旋。設矢逢初日。稱觴祝大年。金門邀曼倩。同望赤城烟。

贈副都御史金君

北闕推司憲。中臺肅準人。兩京傳舊族。三坐見親臣。上殿呼張緬。諸曹拜邵詵。朱衣長拂面。蒼珮儼垂身。抽簡如凝雪。驅車總避塵。五花堂上列。六軍御前陳。道可孚中極。清能救外巡。時君有以清廉救外臺疏文緣章奏重。治驗紀綱新。在昔瞻雲切。于今披露親。埽門徵典客。觀國利來賓。啓署通南省。依垣近北辰。槐廳慚後起。還展舊絲綸。

康熙乙丑子奉使分校會闈得士一十二人竣事恭紀兼呈同考諸公三十韻

試士開三省。徵書下九重。名標文德殿。宴列武成宮。同考班行盛。諸房領去崇。翦金花插帽。浴鐵馬安籠。魚貫先開闈。蜂攢後捲蓬。座如聯宿上。堂以聚奎雄。內簾中廳名聚奎堂布棘藏知雜。垂簾示至公。硯分

新醴液。題拜小黃封。是科上頒書題用小黃封硃書接出上寫御封二字使席供旃細。官廚煮桂濃。吹鏡來堦北。

擊檮在牆東。畫壁皆麟鳳。標籤類蝓螭。卷排千字蹟。闈限五經通。到晚門符赤。中層燎舉紅。九龍天上現。

萬蟻穴中攻。啓簿覘多例。未閱卷時。先檢科場條例。焚香矢寸衷。主司愁失實。進士苦雕空。韓闥深鑿武成

宮談天進士雕虛空。係黃魯直詩。文獻都堂內。神枯號舍中。有蕉難覆鹿。人牖敢窺龍。所藉千秋鑑。曾無五色

椽。三呈皆白璧。萬選得青銅。勒帛藏雙管。收囊曾九纒。草編時有次。花判月將終。編號次第。即草榜也。每日各

房判紙封卷篋。北斗魁爲首。南宮禮是從。人方安夏課。長安舉子落第者。率淨坊度暑。曰夏課。誰敢道冬烘。進錄盛

箱窄。題名散炬融。書吏填榜名。圍以萬草。闌開雲葉葉。榜放日曛曛。宿館祛輒斃。升鑿伐鼓鐘。賜袍披絨綺。

開宴舞尋橦。放榜後。賜宴禮部。教坊奏伎樂。賜花賜綵段表裏。因謝同荀誼。翻慙獲狄功。井亭深鑿處。長盼隔牕

桐。

鑿院簡王編修同考兼呈難弟侍郎主文十韻

龍並雲間躍。人同馬氏良。弟方司主校。兄反作參詳。舊以房校名參詳官。禮序迴鸞列。溫言下鳳章。時院中接

旨。令勿嫌避。隔屏分上座。授尺首東廂。四闢優三館。羣空賴九方。同臨戰蟻穴。忝受獲麟房。宋嘉祐倡和詩。有萬

蟻戰酣春晝永。句予以領房官。闥閱春秋。故云。藍汁文千點。樺烟燭幾行。位因同考近。分以後塵相。館規。予與兩公相爲

前後輩。海闊容流細。天空任羽翔。聚奎堂畔月。相對意難忘。

過劉少叅宅有贈

北海標通德。東田返近臣。百雲仍在望。絳節舊曾巡。賭墅非閒地。歸湖有上賓。擣茶花院靜。讀易草堂春。

丹鼎招仙客。金魚付酒人。題詞俱咳玉。封册總泥銀。禁闥思嚴助。台階讓賀循。長干初置輦。白下慢垂綸。

跡共潯陽隱。交從北府親。有誰司國舉。唯汝秉人倫。納履龍門峻。帷披燕賀新。思深猶望歲。游滯已兼旬。

霜雁飛黃浦。秋楓動紫宸。欲因徵詔切。從此捧車輪。

趙弟舉茂才書扇志喜

雅度如寧芷。晴江賦采芹。父爲晉成子。兄卽趙觀文。珠玉方呈彩。驂騑迥出羣。開襟飛紫電。跬步上青雲。佩重搖金穗。衫疎映繡紋。平原佳子弟。知向武陵分。

送家僉事提學雲南

司命開南詔。除書下建章。經傳宣聖里。名冠鄭公鄉。久列螭頭仗。曾含鷄舌香。縹箱疑武庫。珠斗見文昌。比士昆池外。衡文洱澤傍。傑聞垂甫掖。聲裏判干將。八代唐文重。諸生段氏良。國書傳杜佑。家學本毛萇。東壁舒光遠。南溟得路長。雁行迴復處。相憶在瀾滄。

丹陽別羅坤

作客鄉關遠。懷君歲月深。過江逢管仲。入幕見陳琳。代北方馳騁。茗南久滯淫。未懸腰下印。長散囊中金。入俗饒玄度。憐予得素心。烏衣人共訪。白下酒同斟。世已嗤求駿。吾將效展禽。天低垂去轍。雲滿未分襟。龍跳難爲友。鴉栖不擇林。丹陽重惜別。相對起沉吟。

胡副憲生日

烏府垂標峻。青陽感氣新。藏書柱下史。執法殿中人。入陞長連臂。居官善逆鱗。週天剛六甲。練日及三春。指直冠如鐵。風清簡似銀。明時無可誦。但願作良臣。

二

憲長垂三坐。端公擅外臺。春風吹海甸。曉日近蓬萊。使作儀同貴。生占宰相才。程琳饒氣節。王儉著風裁。珮有蒼龍繞。門呵驄馬迴。祇因留柱史。紫氣滿東來。

寄吳制府廣東

妙略雄南服。鴻恩賚上京。五年專檠戟。獨坐在簪纓。册授金監勝。兵摧玉洞平。三門新壁壘。八克舊家聲。重地深分履。前轅早樹旌。詔從雙鳳闕。節授五羊城。谷轉枕榔暗。旗翻翡翠明。趙佗終北拜。馬援且南征。操得貪泉厲。名因裹石成。朱方行處樂。白雉貢來輕。磬石詛茅土。河山倚保衡。八行難盡意。長使寸心傾。

吳門喜遇郭襄圖飲次留贈并謝所貽聯句

作客當三伏。姓懷人在一方。姓啣鑣逢茂苑。張杉把酒對金閭。意氣干雲上。姓追游度日長。高名通宛洛。杉近歲返炎荒。藥探安期潤。姓金攜陸賈裝。賢王驚賦彩。杉時或以詩百韻贈俺答公。每一字酬一金。蠻女授衣香。家隔鴛湖遠。姓山看虎阜良。歌迎桃葉渡。杉居近百花坊。金屋嬌還貯。姓瑤山讌未忘。尋仙同許邁。杉結客過吳光。何幸貽歐冶。姓兼之贈楚纓。峰前瞻縹緲。杉亭下詠滄浪。座愛林宗友。姓行陪郭伋觴。臨岐垂報諗。杉爲我□河梁。姓

挽陸母

萱草移金闥。蘭旌返玉樓。太君如湛母。孝子是王修。機織恩難斷。杯棬澤自流。塔前黃鶴去。天際白雲浮。至德傳閭訓。餘哀減巷謳。只憐赴吊晚。假蹇愧南州。

觀徐昭華畫障作

吾郡闈房秀。昭華迥出塵。書傳王逸少。畫額管夫人。紫水和泥染。青山帶露皴。蝶衣聯繡褶。花片滴朱唇。
閣上烟雲曉。階前草木春。祇愁頻對鏡。圖作洛川神。

西河文集

七言古詩目

卷一

巫山高

擬古意贈襄陽李調鼎明府過訪

涪川楊花歌

棧挪行二首

入少林書事

桃源圖

朱明府禹錫生日作

採蓮曲

登白鷺洲高樓值施使君留蕭江有懷

憶昔寄華亭吳山人懋謙到武林并憶沈翰林

卷二

飲王大參邸舍有感

明河篇

奉贈蔡二爾趾并爲誦別

七夕曝衣篇

集東書堂卽事兼呈神五神六兄弟

奉贈吳金吾七十初度

打虎兒行

游石淙

九月十九日登淮陰城東程將軍塚

臥龍山太守歌

和戴花船詩

夜分聽江聲浩然有故鄉之思

短歌

蓬池篇

西樵山人歌

放歌爲劉二漢中留別

吳二卿頌頤大有孝

陳州村人或賦上陽白髮人者毛姓過聞而感焉

再食熊蹯口號

弟華葉大雷生祝弘坊金齋諸孝廉作

睡石避兵上塲作

山有石翁軀

山霧引

閉門行

飲祁中丞東書樓同張四梯張五杉姜十七廷梧蔡五十一仲光觀祁五理孫藏輿書事并呈祁禮部彜佳姜別駕韓

寓高家亭子午日後黃大世貴蔡二爾趾舒四起鳳戴金劉二漢中舒章周麟童衍劉三瑄移尊過飲率賦兼呈黃二翰樂大

六舞高儀淑光淑

放歌酬王孫晉詒別

卷三

上巳與故人二首

夜飲倪之焯一草亭放歌并示劉二漢中王二弘昌

白雲樓歌

飲廣陵舊城酒壚同胡五舍人張十四判官醉後作

結交行贈卞生利南

渡河寄大敬徵之憲臣并呈張五杉張七梧姜十七廷梧丁五克振

觀滄海歌讀愚山觀海集作

食熊蹯口號呈姜黃門

卽席贈安陽許三禮進士南華山庄讌集全朱大士曾沈九胤范令

寶刀歌送姜莛遠行

浦陽江南五十里仙人當與百藥山相對峙毛姓登陟之慨然成詠

題倘湖讀書圖爲來十五集之給諫初度

擬古曲聽商生徵說彈琴作四首

草堂花枝詠

同王徵士聽楊太常彈琴篇

遺侍兒歸舟江口午日相待

會川吟

登天門山望江

贈隴西羅生

攜條兒宿謝墩書感

重集閩閩醉宿賦贈劉昌言進士暨始大始恢二令君

灌湖聞笛

宴秦郵逢故人將歸

豔曲

投寓長橋蘭若聽竺蘭上人彈琴

集淮陰舊城醉中送白門任金吾北行

洛州寒食二首

河隍司馬吟贈王司馬

彭城行送倪大之煌之徐州

卷四

黃浦午日作

抱鵝出門行答王兵曹

題吳興唐解頭畫贈四明周廣文山水幃子

鞦韆辭

與朱山人飲

和張公子花驪嘆

喜逢南安趙司馬開雍入京率贈

古意

小補陀畫幃子歌

上浙撫軍東巡詩

秋風來辭寓居吳陵後遷九龍岡作二首

江行感懷

集宋中卽席贈梁園諸子

桂樹謠爲劉進士謙吉尊人雙壽

春日同史使君遊潁上過張良洞作

於黃申光祿宅豪飲

楊童子歌

秋潦接友紀事二首

題周昉畫楊妃調笙幃子

畫竹歌

又鞦韆辭

送駱復且明府補任崇仁

淮上逢施少參閻章自京邑還任抒意

人日途中登高作

柳花歌寓蕪城作

游西施山園亭將歸題壁

錢生行

錦筵桃花歌爲周公子玉忠初度

湘湖採蓴歌

李日耀日焜同解省試有感

壽王將軍

壽邗上王夫人

單廣文初度

赤毛行贈姜之琦公車

青雀吟爲祁中丞德配商夫人壽

卷五

樂府新歌

維揚贈姜侍御圖南巡鹽并祝初度百詩

將渡江贈日者過訪

宿山寺書壁

試茶歌

桐江王生長身幹一丈餘二尺遇于城東里有長句

惜哉作蓮子

湟川詞贈別

送姜二承烈之都門

看月書事

句書感卻示

汝陰蕭大行將赴闕東渡過訪杼筆贈別

集曲水卽事

金鑑冰壺吟爲張推官作

宋憲使雪中飲席

須邪行

陳黃門台孫病中招飲賦贈

黃姑取妻詞四章

逢姜九飲

山居庄家女種蓮子許粒小鉢歷日五銖隱然有鉢底忽花鴨去

鎌麥詞

長歌送額泰颺北征

訥齋詩題史四廷柏南園新居

雨中聽三絃子適女士王玉映將之吳下過宿蕭城西河里因作長

半面將軍歌贈陳左府

書意贈西昌蕭伯升白鷺洲高樓

送任雲蛟公車

讀荔裳集安雅堂集感賦

別王恆

毛姓將行張公子祢禱贈姓踏冰行率筆酬之

卷六

題畫

和理椽杙歌

羅三行

題秋山讀書圖送舊京鄒山人還紫微兼詢沈耕堂徵君

題抱甕丈人濯足圖爲顧有孝徵君

譙胡東宮被竊詩

留別劉瑄兄弟

別戴大金黃大世貴

古歌譙贛南嚴撫軍過訪

寄孝子荃以使者行促授筆煩亂無所次序

舒城黃母胡太君輓歌詞

古薊門行二首

卷七

泛舟過秦園留贈秦翰林松齡有作

詩

射獵歌爲金公子敬敷作

將歸贈丘四參隨

奉和葉掌院夫子亭下雜花原韻

雙珠篇

題螺川胡推官虞胄過訪因贈

醉歌行同周司理令樹飲于盧陵作

雨夜斷橋聞笛聲和丁起曹

贈商繪

送沈九胤范同姜啓赴都

仲秋既望得蕭行人嗣奇計適向陽將歸過別各拔泪哭以長句并

黨太守挽詞

爲商生贈吳太保詩

爲商生贈吳太保詩

爲商生贈吳太保詩

鴛湖黃子錫自號麗農住蒼南癸亭種瓜自給予在淮西道遙題此

息縣阻雪同諸公集何景韓梅花書院有作

金公子射虎詞

送史尙轍進士過夏口兼寄丘學士

丹陽城下作簡郡司馬

過江南奉謁周侍郎值其行部留詩代訊

楊將軍美人試馬請賦

飲巴亭放歌并謝朱三驩元馮大之京王十文鼎王二漢

巴山酒壚送王十孝廉北行

將出巴城道寄徐十五緘

春夜飲就亭花下見施二公子彥慈當筵賦詩有贈

紫芝山歌

陳柱國將軍期宿鎮山遂汎舟集南塘同張杉平津李章姜琰商命說徵說兄弟作

西江送春曲

漫歸復行書孔雀行關縷謝趙明府

沈華席上同張杉王鎬錢霍王元愷平津祝弘坊并憶沈九祕書時九月八日

予累歸不得釋冗屢過湖西施公苦相留日留日刻留刻適就亭鸚鵡三脫三復返予刺傷子心因爲賦鸚鵡還詞

姜蕤招登香鑪峯絕頂同姜十七廷梧商二徵說

霖臣招予汎舟三日夜

聽流鶯歌

和張夫人拜新月詩

卷八

杜陵蔣梧游淮曾讀予淮上舊詩有感今過在不值蒙留長句見寄詞旨哀酸予適滯海濱率賦酬意兼示淮上故人以當一

慨

中秋山寺作

天馬行送崇仁吳孝廉公車

奉贈顧將軍七十并呈嗣君澄

守歲姜掌諫宅值太翁虞曹公上日初度酒酣有感因即事成句并呈掌諫君書兩幃末

將遠行曲

王元愷將之巴山有贈

訪劉息縣并讀周櫟園侍郎所詒文序因爲書贈

過息夫人粧樓遺址有感

游濮公山作

飲郭將軍竹下

定情歌飲秦二保寅醉後作

廣文先生歌贈張學博

湖上贈何生倬炎

淮康行贈別

汝南郡亭飲次贈譚八吉韓

將過松江先寄朱大用礪使君

送李生

潼川歌

卷九

寒食直史館奉和同年李漁村太史兼呈同館諸公

送同年尤侗南歸

予向渡湖時更名王士方宿竺蘭聖宣二上人房去今二十年後予過上海聖宣貽書兼索書舊日所題詩句感生于心賦此

志謝并呈蘭公代訊

宣德密青花脂粉箱歌爲萊陽姜仲子賦

汪主事以藍羅裙子束纖腰畫卷索題

錢編修所藏司馬相如玉印歌

雪中陪益都相公請沐善果寺卽事和原韻

題袁孝子負母看花圖

葉主事歸黃州有贈

陪益都夫子游怡園假山奉和原韻

寄祝興化李映碧先生廷尉初度

題方田伯躬耕養母圖

相逢篇爲李公子

題曹石庄滌硯小影

送同年范太史還吳門

書馮二世兄學正卷子

翁司馬之任黃州以詩留別有贈

詔觀西洋國所進獅子因獲遍閱虎圈諸獸敬製長句紀事和高陽

相公

玉瑋篇爲黃母作

醴雞篇贈蓋漣

山中再宿

中秋後風雨連日蒙馮老夫子賦苦雨吟見懷依韻和答

奉贈李公鄉舉入試長句

又和益都夫子雪中游園口號原韻

奉和益都夫子雪中游祝氏園林原韻

戴公子生兒適大理君遷京兆信差

過宗藩輔國將軍邸第留飯兼蒙賜詩賦謝長句

夜飲梁尙書宅有贈

卷十

戲贈徐曼倩畫扇

紫庭簾奉贈張庶子史館總戎初度

贈王舍人赴常州幕

奉和崑山葉堂院夫子題翰林院壁用東坡清虛堂韻

輓歌詞送盛廣文懋旒還里

金匱仙人歌贈陳子太士

送吳農祥徐林鴻二徵君南歸戲徵宋人體詩兼示王二內史徐二布衣

何蕙藏書詠

送吳明府超遷觀察之閩

慰尤司法喪婦作

項學士招沐益都相公萬柳園同諸公卽席

冬日過上海署故人任明府製衣衣我感賦

答贈湯右曾長句

孫侍讀初補學士復將還養于其生日歌以贈之

寄黃州向君

送趙郎中權使揚州

題暢心閣冊子

蒙內府席學士高軒見過隨于報謁時留飲感賦三十五韻

送趙棠溪歸西江

益都師相請召同館生西堂講集用陳檢討卽席原韻命和

西堂講畢仍用前韻擬宮怨詩益都師相時先成命予授筆立和其後

膠東道中寄周生六十初度

宛平相公初度奉贈七月八日

卷十一

吳興太守行

昔日篤送任令南還上海兼示王十六舍人

夏抄集宋大司馬宅觀諸名伎偕同館諸子卽席

上高陽相公詩

飲次書梁陶侃世兄便面

徐母邵夫人壽詩

題文待詔誓圖奉送高少司寇還般山

一人給寫信口占叶不許停刻時王二舍人胡徵君在旁知狀後舍人亦有和詩紀其事

寄贈淮安王君七十并示令子文學

寄祝姚少保六十初度

題董都護記年圖兼送其軍鎮萬州

陳明府選之遇于長安街飲次索贈

陸生赴蘇州蘇

啣魚篇贈廣文盧先生

卷十一

題松下芝萱圖

同馬廣文朱郡丞周孝廉楊生絃索女較書玉烟陳婉

答和沈東園贈別作兼示王西園

春夜飲趙舍人宅同諸公作

淮陰李貞女詩

雪中梅庄主人何使君邸第有贈

題松窩撫琴圖

題燕市酒人圖歌

西臺先生行奉送臨海馮少司寇菴親請假露里

徐二將歸暫寄湖南周開府里第過別有贈

大雪陪益都夫子游蕪果寺歸燈下同夫子和陳檢討詩一人呼韻

此日行寄祝益都夫子八十

烏棲篇爲晉江范貞姑作

送梅庚赴江南田使君幕和其留別原韻同陸大卽席

送林使君督學河南

送家太史假歸新安

暮春三月六日張弘軒刺史宅牡丹初開預作催花小集歡讌竟日

紅橋酒散別曹明府

青雲辭奉呈益都相公書事

覆山畫松歌和施學士

題喬侍讀侍直圖

題松鶴圖爲一聞師壽

留別張中憲錫懌有感

西河文集

七言古詩目

甲寅九月二十七日同任青崑張百修訪放筭蛤庵兩和尚復過楊雲士齋看菊漫賦

何使君壽

過益都相公三世兄弟雙賦贈

雲間張公孫伎席作

馮守同四十索贈

入春庭梅未開偶爲桐城姚士重字廉作畫梅蒙以畫梅長歌見贈中憶西園看梅事率筆賦答

視來叔荀王夫人夫婦六十偕壽

送同年陸義山編修歸當湖

林官歌喜趙待衛弟還里

越州太守行爲許使君夫子作

過張吳曼草堂兼讀其所著梅花詩集有贈

客吳門喜遇金副使巡驛感贈

輓甬上齊士虎

讀何使君夫子渡曹娥江哭父卷子書後

烏菟歌爲雙壽作

雙壽詩

爲沈表兄題夫婦行樂圖

李太夫人大壽

卷十三

飲金十四娘園看草花同姜九廷幹呂四洪烈羅大坤吳大棠禎張二鯤卽事

奉謝分巡許元功使君夫子薦舉抒意

別馬廣文作

桐城姚孝廉文焱見贈感賦

介丘吟爲姚明府師作

湖西將軍歌

戊申三月旅亭夜讀東原宗元牖所著新柳堂集中有三詩專賦予

瀨中事觸境生感因爲長句寄去隨筆無敘

陳掌院夫子生日作

南山篤奉祝平太翁年伯七十初度

李方伯生日

一聞上人寶觀索題

金學使曾陷賊中歸命途次感寄

暮湖行別朱公子潛原

奉謝何使君夫子有感

桂樹生玉芝歌爲姜憲庭京兆作

贈襄平李廣憲司馬赴兗州

王二光祿生日夜飲有作

題書

王生之雲中

送孫孝廉還里

人八十遂預製扁額臨二字于堂以爲慶案此爲歌

范母錢夫人輓歌詞

天姥詞祝吳夫人生日

崑山徐母顧夫人壽

相望篇送陸少參督餉江南

甬上段長史在瀾關候值其初度奉寄此詩

題周斗垣先生探芝圖

寄祝江南方伯生日

汪算選郎善事母值典試關中得壽萱二字碑洞摩勒以歸時太夫

桐城方栲舟又中父子在贈簡和

依韻答徐生我剛見贈長句兼送其客益州

西河文集

蕭山毛奇齡

字大可

又字子稿

遠公阿蓮較
士霖曰作較

七言古詩一

西河七古較他體易輯。大抵鴻路堂抄本十之八。諸選刻本十之二。特諸刻互異參錯不合。以選時爭相改竄故也。今悉從原稿改正。

七古空居本尙有存逸者。如駿馬行、柳橋行、江東游女歌、冬青樹歌、神堯皇帝大閱圖歌、從軍行、軍中行路難、隴頭吟、樹中草、燕歌行、哀江南諸詩。

舊選評曰：齊梁長句，爲三唐濫觴。每嫌其理不勝情，氣不勝辭，不知理過條哲，氣過衍曳，皆屬近今。彼徑行疏率者，無論耳。西河以沈鮑高致，發三唐正調，蘊氣調詞，詳雅婉愜，骨節駢邁，畢入神矩。雖流離時故，而風致靡然。當時品其七古詩，如蜀江春泛，或云似花林上日，非虛謬也。

巫山高

君不見、巫山叢叢高插天。前臨蜀道迴長川。君不見、巫山窈窕似好女。朝見行雲暮行雨。朝朝暮暮坐水濱。碧蘿紅樹荆門春。幽窟生風吹雨色。迷卻當年夢裏人。夢裏迢遙渡三峽。十二峯頭暗雲葉。風起難留

巫氏家。山前那遇荆王獵。荆王巫氏相遇稀。春禽暮蝶爭飛飛。天半無雲粧綠髮。風中有雨濕羅衣。羅衣綠髮等閒變。誰語荆王使相見。若爲淫瀆蕩人心。判作琵琶蔽君面。琵琶峯畔雲影長。湯湯淫瀆流瞿塘。共言臺下棲神女。共道丘中伴楚王。楚王宮裏細腰女。爭望陽臺起歌舞。不惜高峯化作神。但恨春雲變。成雨。春雲蕩蕩流滿山。椒花紅映青苔間。南行若箇知才子。空使春雲江上還。遠公曰。若爲誰爲也。崔仲方巫山詩。亦有若爲數月夜。長短聽猿吟句。唐人盡如此。近誤用。

七夕曝衣篇

明雲初起芙蓉殿。半月將開五明扇。青女當秋看又來。黃姑此夜期相見。璇車自出絳河濱。芝蓋遙迎紅粉人。錦石拋時通錦字。鍼樓啓處有鍼神。星橋熠熠百枝動。雲路迢迢七香擁。夜半秦王欲捲衣。天邊蕭史先乘鳳。六宮羅綺張玉臺。千盤錦繡開雲堆。暗香略動知風發。好影頻移待月來。千頭飛雉壓花綉。九子盤龍帳中覆。珠帳垂將露滴餘。仙裙留向烟飛後。此時穿線最難成。此夜乘槎最有情。幾看鍼孔雙絲度。裁問支機百思生。支機載去連太液。幾處衣樓耀寒碧。不疑綵女夜能舒。翻似天孫曉來織。別有豪華富貴家。金箱玉篋寶鈿車。爭道紅綃如閃電。爭言紫幔似輕霞。紅綃紫幔不曾變。遠公曰。變一抄作孽。誤。不曾變。言不曾摺也。王勃詩。錦衾夜不變。更有娼樓望靈匹。玉指冷冷展素衣。翠帶盤盤迴錦瑟。重有佳人怨秋暝。雖鵲填河暗通徑。只將雲錦連七襄。只將月帳爲五詠。七襄五詠處處新。錦雲帳月家家春。誰憐畫閣懸衣外。復有長竿標布人。霖曰。變字不用韻。凡換韻首句做此。

擬古意贈襄陽李調鼎明府過訪

大江日夜綠。春草日夜滋。美人渡江來。正值花開時。花開灼灼滿江渚。白舫青簾舊明府。載得襄州郭外雲。吟來秦望山頭雨。東京元禮本是仙。孟亭歌曲襄陽船。恨無明月真珠佩。解送春風大道邊。

集東書堂卽事兼呈祁五祁六兄弟

棲鳥遯遯起高樹。大星落落流通波。平船刺河冷著曙。早來如此良會何。晨光滿檐花滿谷。窈窕虛堂映修竹。牙籤三萬甲乙殊。仍列中丞舊書軸。當軒進酒羅綺黃。朱花夜池華燭光。苦吟哀嘆愁人腸。銅筆玉琯藏曲房。東山高洞久傾謝。新墅難迴紫庭駕。春日曾彈市閣問。落月誰歌墓林下。相看每惜良會稀。庭前又見朱花飛。冰卮清接露□墜。蠟槃橫繞珠繩低。鳥棲未棲鳥欲啼。

涪川楊花歌

洛城東行涪川裏。簌簌楊花墮流水。不似龐湘送我時。西園但折綠楊絲。涪川渙渙採蘭去。不見蘭花見飛絮。垂楊十里春晝陰。驪馬驕嘶不能住。春船三月涪水多。下江千里行難過。漫天撲地楊花落。馬上躊躇空若何。霖曰龐湘洛中妓西河又有詩見五絕。

奉贈吳金吾七十初度

霖曰吳元素先生爲吳大司馬家孫傳襲錦衣。

朱榴花發紅藕香。鳴珂舊第薰風涼。彤庭遺老俯崧嶽。絳紱始知麟綬長。殿前夙昔重環衛。天子親臣執金貴。鳳轂嘗憑仗下符。鸚冠時埽關頭彗。鈞陳肅肅位望尊。六閑八舍如雲屯。虎官爪士盡奇傑。當街食艾愁王孫。天心日月正陽午。久指山河誓鐘鼓。內府丹書螭首新。滿牀赤芾貂蟬古。悠悠時事不可期。角巾徑自還烏衣。瑠弓旣抱玉髯墮。空留珠靶長相隨。清江藏龍霧藏豹。七十年來並漁釣。隱吏誰傳紫氣

來避秦剛值桃花笑。蓬萊高閣近東澗。揜舞揚觴進蘭茝。自憐顯晦年歲殊。眞見桑田變滄海。君家世胄不可當。東京楊鄧西金張。弟兄三戟喜重見。蘭臺御史翊衛郎。况兼膝下有令嗣。交友四海多文章。君不見君家司馬事神廟。坐略西戎靜邊徼。市馬輸來老上金。擐刀搏得賢王鞘。紅山墩前錦靴窄。忠順三娘款關譯。燕支萬騎齊解降。毳幙千年少顏色。先生七十眞古稀。高勳世世留常旂。只今司馬邊頭月。猶照尊前舊錦衣。

搓挪行

秋高夜明天雨霜。黃河水流水湯湯。丈人暮年戍疆場。家中老妻夜徬徨。小兒三十羽林郎。丈人去時呼阿唐。黃河水邊倒枯楊。根株垂萎枝葉颯。行人撫枝徒增傷。好枝無根安用長。

白日澹澹沉黃河。清霜入水同流波。行人早行過滹沱。心思故鄉悲如何。馬足凍折車凍淒。辛勤慰悅徒旅多。前飛鶩鶩後鴛鴦。荒城投汨愁網罔。城邊當壚雙綠螺。入門便酌金叵羅。秋風野池吹朱荷。酌酒不飲當聽歌。歌成一曲新陽阿。聽之雙泪同沿渦。少年苦貧但搓挪。何爲遠行心煩苛。

打虎兒行

有序

禹州民朱兒救父打虎。史使君廷桂獎勞之。予識之禹署。

打虎兒。乃在汴梁之禹州。禹州城外朱家樓。小兒十一隨父耕。深林有虎斑毛成。颯颯黑風吹草根。乘風攫人誰敢攫。小兒不識虎。乃亦聞虎名。虎來小兒怖欲啼。掀唇見虎銜父肢。咆哮草際風來吹。兒啼向風不得父。把杙打虎截虎路。三尺童子五尺杙。打虎落毛傷虎臆。虎驚顧兒舍父逃。深林風草皆無色。禹州

刺史呼小兒。裹之以帛。飽以糜。予時在署。識兒面耳。髮禿弱真兒嬉。問兒打虎虎何似。舉手張齒作虎勢。假虎隱幔恐小兒。小兒復怖將啼歸。當時見虎得無怖。此事我亦昧其故。禹州刺史省得知。是日小兒知有父。男兒七尺傷父心。天寒辭墓行求金。安得棄缺抱長杙。與之同日還深林。我所思。打虎兒。

入少林書事

嵩陽宮前山翠濃。西行墊馬金牛峯。新鶯啼歇綠楊裏。潦水倒入清溪中。春寒衣袖晚來薄。細雨濛濛灑幽壑。林杪高穿雙樹行。巖前時見三花落。崔嵬紺宇本金布。上界鍾聲出雲霧。殘碑萬塚讀未成。暝色空廊坐來暮。山深寂靜鮮人語。松頂微聞住春雨。深廚野葷供晚餐。竹牕新月明前塢。老僧趺坐爲我言。北朝舊是祇陀園。精藍落下總稠雜。此中絕壁無攀援。蒿丘相峙藏貝葉。列祖持衣寡言說。阿闍翻經降露華。中亭斷臂飛寒雪。聞言愷然動我心。恍對秋潭臥冰冽。夜夢胡僧折予指。不記前身迦葉子。難尋澗底三味泉。且飲當前八功水。蘧蘧卻枕蝴蝶飛。晨光養樹看熹微。滄滄赤日上瓊壁。太室少室爭光暉。出門欲問來時路。策馬悠悠何處歸。霖曰五律中有宿少林寺夢跋陀飲予水詩夜夢一段意指此。

游石淙

游石淙。石淙不可渡。倚翠屏兮有雲。躡流泉而無路。流泉激激。上有臺。叢崑壘石。嶂中開。崑前合。杳流霞起。石上玲瓏瀉水來。玲瓏細水瀉危石。絕壁參差望來隔。觸溜微牽莎草紅。翻瀾似覆蘋花白。當年侍宴碧澗隅。金輿玉漏開雲衢。離宮祕苑游仙女。石畔窟邊到帝姝。儼流泉之調瑟。比鳴鳥于吹竽。今來獨上雲錦闕。俯瞰長河跳流沫。碧草薰開帳殿烟。青蘿捫待珠宮月。珠宮帳殿不復留。青蘿碧草綠溪流。望美

人兮何處。恨獨立兮山之幽。山之幽兮水之曲。春色芊眠兮水波淥。看蝶舞兮中林。聽鶯啼兮深谷。鶯啼深谷柳暗催。銜衣蛺蝶及春來。只有流泉無旦暮。年年石上自滌洄。

桃源圖

桃花灼灼開千樹。不記當時問津處。明霞一片連白雲。中有漁人捨舟去。捨舟欲入志未違。桑麻千頃迎朝暉。武陵溪上東流水。時見桃花片片飛。

九月十九日登淮陰城東程將軍塚

程咬金塚在紫雲宮南

層雲盪晴空。涼風薄枯草。我登淮陰城。秋衣振縹緲。淮陰城東有高阜。九日初過又重九。閻君父子好探奇。閻修齡若璩父子邀我登高共飲酒。籬頭黃菊堆酒卮。風前重把茱萸枝。雙攜銀榼墜鸚鵡。頻開鏤碗燒蟲螭。飄飄千里試一望。射澤鹽陂滅秋漲。烟浮蒼藹到海平。日湧黃河向天上。紫霄高闕凌貝宮。霓裳羽節吹長風。圮橋再見赤松下。淮王自坐丹霞中。前臨巨塚近千尺。半倚城根半葦陌。水落難知壬氏墳。道傍猶睹滕公宅。閻君本屬唐相餘。稱言此是將軍墟。神堯定鼎畫麟閣。程氏高勳析珪爵。曾留淮海鎮徐方。因釋金龜壅繁弱。千秋甲冑掩黃土。猶抱旌旗走風雨。介馬嘗隨龍虎號。銜花近見牛羊舞。秋風酌酒瀉玉餅。幽思還視飛鴻翮。昭陵西望久寂寞。鼎湖南去愁青冥。銅筆一曲倚鞞竹。戲馬臺空散黃鵠。把酒頻看琥珀紅。拂盡殘碑不堪讀。

朱明府禹錫生日作

梧桐生朝陽。不與槭棘羣。鳳凰翥高岡。燕雀徒紛紛。我行淮陰謁朱博。正值朱絲絃鱗角。關令長看柱下

書。幽民自奏公堂樂。當年束髮珮玉珮。皎如初日開芙蓉。行文皓軒薄江海。結交磊落填車輿。須臾挾策動天子。一旦聲名滿燕市。買駿時登百尺臺。懸鼻竟下雙飛履。臨淮百里著奇績。前邁于公後師伯。雨後甘城疊翠錢。花開射浦臨瑤席。嗟予自視四十年。長途索食蒙君憐。崩緜不唱苦寒月。絮袍解贈嚴霜天。此地有漂母。向曾飯韓信。君豈一飯恩。淮流本無盡。淮流蕩蕩到海闊。種樹忻能解人渴。況有含桃墜宿紅。真藉臨卽買消渴。醴醴錦段要素情。方春爲汝聽啼鶯。持杯欲勸山陽酒。只看東流淮水清。

霖曰。西河出游。以揆敘先生爲當塗令。故感之最深。中云含桃消渴。則指曲江奉觴人也。見五絕卷。

臥龍山太守歌

臥龍山前春草肥。臥龍山頂秋雲飛。不知太守是何氏。唱殺臥龍山下兒。臥龍山高起東越。上有黃堂過天闕。云是當年句踐亭。望若雄虹駕雌蜺。高門鎧仗排虎獅。有人坐中如母慈。摩頤撫頂善鞠育。一顧三復千回思。去年官兵戰東海。白日蒼黃徙軍壘。嬰兒奔走哭上城。慈母從容爲分解。今年官兵鎮海嶺。日負長刀走如簣。慈母週全最苦辛。旦出舖糜祗安夕。嬰兒無知乃有心。口能作語還能吟。龍山井頭掛銀綆。綆絲知淺尤知深。君不見井邊枯魚苦搖尾。竟入井中食井水。

採蓮曲

採蓮花。花高葉復遮。誰家採蓮女。移舟徑入葉中去。不見採蓮人。但聽葉中有入語。葉中語。不可聽。水漫聲將斷。風多響易停。欲將花紅比花頰。欲將翠袖聯花葉。可憐葉溜珠欲傾。可憐藕斷絲難接。絲難接。珠

欲傾可憐蓮蒂並頭生。竝頭花蒂根中出。比翼鴛鴦水上行。鴛鴦飛自遠。荷柄曲還擎。擎將荷柄出荷浦。何處相逢採蓮女。蕩槳難教水鏡明。分房不道花心苦。亦有江邊解佩人。蘭棹桂楫傍江春。折荷恐刺手。澆水畏沾茵。逢人如照影。連榜似比隣。不愁風起湖難度。只恐江高堤易湮。更有堤邊游蕩子。揮鞭搖曳垂楊裏。一時菱唱逐堤遙。幾處蓮歌向風起。蓮歌菱唱起江沙。蕩子歸來近若耶。爭向堤邊馳玉馬。何如江上採蓮花。蓮花復蓮花。花葉何葳蕤。花搖知手摘。葉動識舟來。花紅豈可染。葉碧詎須栽。栽花不採摘。花葉自摧隕。採蓮須語蓮舟伴。及此蓮花江上開。

蔡大敬評曰。大可採蓮曲。繁妙可結。鮮滿欲流。舊評曰。初唐七古詩。大抵本之江淹西洲。沈約八詠諸篇。優無定委。按多散緒。信陽所謂調之流轉者是也。王子安劉希夷諸君後。惟太白近之。西河于王劉得其佳要。故一往神妙。近爲初唐者。徒以纂組稱之。此蘇誤讀長安帝京耳。水漫聲將斷。風多響易停。一作雨洗紅將落。風多響易零。非是。今改正。

和載花船詩并序

渭南令張萬青納青谿姬美。其旣姬疴。屬女弟以迎將。望來舟而瞑目。令爲之神傷。作載花船篇。闕里孔孝廉示予。并屬和章。

勸君莫唱楊柳枝。楊花飄落無還期。勸君莫上桃葉渡。桃葉青青在何處。君游渭陽值春月。遙望江南柳如雪。誰家城角種石榴。不見平船住花埭。白楊深巷野鷗曙。十字南頭小樊素。門前脂石解箜篌。花插文魚駕船去。鬱金香汗染絳雲。瓦棺玉樹埋紅裙。綠珠井上冰初結。紫玉湖邊日漸曛。昭陽女弟死相屬。眼

見花間繞銀燭。鸞弦既絕難再牽。幸有蠻絲細能續。漳河銅雀飛復飛。大姨既嫁娶小姨。只今張君作新壻。清江重載花船歸。我行江南望江路。舊日烟花在何處。西陵松柏風雨來。但見青驄繫江樹。涼秋月沒星代時。遠公曰李義山詩日月沒數星替句星代恐即星替也珠房多擘秋蓮枝。君能載花對花語。道子曾和花船詩。

登白鷺洲高樓值施使君留蕭江有懷森曰施愚山先生分守湖西

石陽城邊白鷺洲。萋萋碧草環洲流。層樓百尺俯寒潦。有客獨登樓上愁。樓前寂歷衆山暮。萬里江流自來去。天半橫吹贛浦帆。雲中恍辯虔陽樹。我來眺望九日餘。芳洲猶採紅茱萸。遙山不斷故鄉雁。沿流時羨清江魚。故人乘興久舒嘯。千載南樓鮮同調。看月寧分佐史牀。臨風空着參軍帽。相思渺渺縈素波。秋花開映波中螺。凭欄欲作登樓賦。不見夫君奈若何。

夜分聽江聲浩然有故鄉之思

我家住西陵。慣聽西陵潮。涼秋八月江關高。西陵潮上時。巨如波底長鯨號。細若寒風來。落葉相飄颻。西行渡江不聞此。曾宿嵩山少林寺。寺傍長松踞溪水。千樹萬樹香閣邊。夜來聽聲不得眠。宛如秋潮耳間落。坐起行空林。但見露華薄。山頭月弦清。漠漠月弦漠漠清。欲流此時思鄉生暗愁。迄今渡湖涉江水。去家已是四千里。江水滔滔向東去。涼秋水削流不住。日行無潮夜有風。侵舷透幕吹漂漂。水波欲瀉不得瀉。搏激持回卒難下。中流起溇泝。圻岸忽頽蕩。孤舟本已在波浪。到此那得避衝激。橫流溢洲渚。直下礙沙石。遠公曰孤舟句綴蕩約復起激約初駭驚飄動地來既道鴻雷向天圻狼頭鹿角相迸奔白月初落天星昏

天星欲墜雨颯颯。推篷仰天星。仍見水嗑嘈。洪波雖斂水尙躍。舟中徹夜聽水落。又如溪邊松。習習響萬壑。不疑身在大江裏。萬里波濤去無已。望中方擬過瞿塘。夢裏忽憐歸故鄉。歸故鄉聽江水。江水有時轉。故鄉何日返。故鄉欲返不得遂。夜聽江聲忽流淚。

憶昔寄華亭吳山人懋謙到武林并憶沈翰林

憶昔華亭翰林夜。飲吳山堂。滿堂灼灼華鏡光。豐縵巨壘排巒疊。妖絲脆竹分兩傍。嚴城伐鼓下魚鱗。高雲沉沉墮烏鵲。把酒論文四座傾。薪槃蠟樹交花落。東飛羈雉鵠。西避今來已是十年事。君游京洛我自還。羨君辭賦留燕關。翰林久作大梁使。霖曰沈蕙庵以翰林分守大梁。至今尙滯銅陽山。羨君獨登黃金之臺。搥鼙鼓。左集漁陽右檀土。挾鳳扳龍恣往來。展劔遵銅並歌舞。遠公曰陸機赴洛詩撫劔遵銅鼓。劉生意氣不可說。司馬文章更奇絕。君今貽我尺素書。自數詩篇滿車篋。吳山童童吳水深。君來仍宿吳山岑。渡江無楫兼無櫓。還憶當年沈翰林。

西河文集

蕭山毛奇齡

字初晴
又春庄稿

郭鍾機石城
沈宗熹師尹較

七言古詩二

飲王大叅邸舍有感

越東節度瑯琊公。赤幘曲蓋紅鬣驄。皎然清白不可犯。二十州縣爭承風。時當北府徙軍鎮。部騎牙官擾民峻。公嘗執簡拄虎門。夜草封章曉馳進。彤廷震怒驅短狐。直聲藉藉驚階除。誰知民命甫休息。反遣賜車去海隅。今逢天子重儒術。束帛元纁召公入。東堂進士推卻詵。西漢諸儒薦王吉。自慚六論不一通。微車礮碌空相從。多公獎譽溢齒頰。令我感激填心胸。春宵月出勸杯杓。坐聽宮門下魚鑰。鑪火圍來炭餅紅。山屏遮處燈花落。芳菰精稗肴核鮮。大梁之黍華池蓮。高文雄眎絕流輩。坐客縱譚驚四筵。啣觴脈脈念夙昔。十載相逢苦相憶。何期此地得追陪。一見裴公舊顏色。人生聚散會有時。都亭高會真堪思。獨憐垂老東華客。醉裏騎驢何處歸。

短歌

廣陵城下波粼粼。吳家少女名阿真。桃花爲面日爲影。當軒一顧愁行人。春桑初發采桑去。五馬城南使

君住烟絲漠漠吹碧林。前路踟躕日將暮。鴛鴦雙飛江水傍。蓮枝已折蓮絲長。他時自有連根藕。莫道空聞蓮子香。

明河篇有敘

毛甡游淮陰。查繼佐孝廉並轡過張吏部曲江園。觀百戲。時秋八月十四日。江南北名士。十百來集。凡水亭當湖樓臺館舍。刺史諸王軍府伎樂畢出。驚見妙幻。目不及瞬。自曙起烏啼。迨夜漏盡。日初出。兩竿迭呈絕藝。如灌河接魚。勿得已矣。絲竹綺羅。一抄作鼓鐘。霏微幼眇。自傷淪落。未易遣此盛會。樂極哀生。易于感慨。又當烟竿熱。層墨遞上狀。城郭宮宇。人物狗馬。簾幃鉅幃。士女觀者。填塞渚港。亦有簫管燈紗相間映。水烟模糊。奉觴女郎。從烟霏中。載它舟去。亦又淒已。蹋鞠者閤生。擲箏王生。有清歌絕妙。錫山朱生。吳門孫生。皆一時絕技擅場。幸一遊觀。明當散去。聊從諸君後。賦詩三篇。一樂府。一律。一此題也。時賦詩者十之二。甡與張公子祜。煒詩先成人。誦之。劉漢中贈甡詩曰。詞人罷唱曲江樓。王孫晉曰。賦傳明月夜。詩動曲江樓。張慕曾曰。今來同上曲江樓。崔顥題詩衆莫酬。餘載東山釣史集中。蘇曰。查伊璫號東山釣史。時西河詩成。一時好事者爭相傳寫。凡閱二十日始還稿。遂有他本。小異十許字。見倪天章序。又施愚山先生入質道淮。題其篇曰。繁絲雜吹。靡靡傷情。若大可者。真是才子。

明河潔潔秋夜長。草頭露白生微霜。淮陰客子感秋節。愁坐各言衣帶涼。東山釣史臥淮浦。私喜涼秋及三五。蹈海誰牽八月槎。臨淮須伐三洲鼓。三洲鐘鼓淮水濱。八月乘槎好問津。邀得江南流浪子。迎將河朔冶游人。江南河朔兩相望。河水星光兩搖漾。西園冠蓋翔綠池。東第簫簫啓華帳。張家舊院倚水陂。珠

湖千頃漾琉璃。

霖曰珠湖一名東湖在張園傍。

紅橋碧柳通油幕。叢臺複樹繞金羈。緋紗籠蠟安花裏。綵幔懸

毳似霞舉。漢代名王久愛山。曲江吏部今開墅。初開湖墅接湖蓼。重起烟樓布烟燎。將立星竿火樹枝。將貯三硝五花爆。懸竿貯爆俟斜日。列艇分燈晝如漆。但留幻舞到庭看。待駕明河泛槎出。斯時濯燕稱最輕。此際投竿舊有名。絙懸傀儡戲東郭。鈎藏神秘來西京。誰翻竹簡弄漁史。誰聽皮靴拂絃子。巾角彈碁四座驚。花門蹋鞠三郎喜。別有秦箏老朔客。曼節長吟變促拍。何事哀彈塞上聲。使予翻動江南情。江南一畝欲起舞。前亭又打闔門鼓。內部新分刺史家。明童盡出諸王府。晚風乍起烟滿湖。月輪推湧湖中珠。明雲薄霧繞河漢。蘭橈畫槳環菰蘆。燈前紫幔開杯罌。水面紅粧照綺疏。紅粧紫幔兩相映。水面燈前看。不定。明河將月蕩爲烟。皓月連湖瀉成鏡。明河皓月午流沒。彷彿天星墮天末。吹將星籥燎花生。看到烟樓火竿發。烟樓星籥繞搓轉。中燭鱗釭散珠遠。祇因畫舫隔烟多。翻使紅龍踏波緩。香燼銀葉炭迸添。箭下銅盆滴將滿。別浦還營曼衍場。重城已下葳蕤管。大舸小艇歸不歸。霜寒月白烟霏霏。吳謳越唱本超絕。靜對流波一聲徹。繞屋驚翻桂樹烏。滿船涼浸冰壺月。只有傷心小樊素。看繫榴裙坐花路。不識初從何處來。幡然忽入烟中去。明河垂垂露華澁。良會何時再能得。賦就明河夜未闌。皦皦東方又將白。

蓬池篇

蓬池渺渺耶溪邊。耶溪美人齊種蓮。蓮花蓮葉何田田。風前日下長暄妍。東江節度文且賢。朝來招我尺素箋。時朱介庵分憲招飲。紅欄屈曲初張筵。圓方遞代羞新鮮。嬾童皎皎垂帶年。滿堂拂舞愁管絃。銀陂倚欄坐欄前。宛如身在荷花船。伊昔蓬池多列仙。朱顏綠髮青嬋娟。荷珠作珥荷鏡圓。風衣雨鬢淨可憐。今來

侑酒眞茫然。微波著襪飛朝烟。蓬池如盞酒如泉。醉時欲踢蓬池穿。誰聞鄉澤碎珠鈿。晚來灑雨荷花邊。
奉贈蔡二爾趾并爲訓別

淮陰蔡子嘗負奇。鴻名將使侯王知。鬣鬣白皙美鬚髮。有時出語驚人兒。我來淮陰問奇士。日探懷中繡
衡刺。首謁城東蔡子廬。恍若長途造騏驎。西風斜日同酒醑。流霞灼灼抽冰壺。汝南黃憲漫相媿。只言江
左生夷吾。相從晨夕惜歸去。願作浮雲繞江樹。秋雨裁飛圯上花。春冰又滿臨淮渡。蔡子矯蹇莫自疑。遭
堯舜禪非無期。黃金築臺久相俟。況當冀北長驅馳。君不見淮陰故侯釣淮水。渺渺流波散花蕊。一日能
驅西楚王。頓挾千金散閭里。又不見淮王好文作奇句。只詠淮南桂之樹。後園汲水得寒漿。白犬丹雞不
知處。方今蔡子世所聞。黥彭絳灌難同羣。只應高語爲秦相。不羨明堂是漢文。

西樵山人歌

馬生自號西樵子。家住東湖藕塘裏。朝雨看沉屋角雲。春風吹上塔頭水。閒來著書還種花。隣園日聽啼
慈鴉。長鏡短鏤置不用。自名樵者眞浮誇。西樵大笑爲我說。曾夢羊城見高闕。青螺壁絕抽紫霞。黃木灣
深瀉紅雪。羽衣前度指一山。山高與汝同難攀。西樵名山亦名爾。自今爾是西樵子。我思南中有奇嶼。萬
仞羅浮障春霧。夢裏長從嶺徼尋。醒來仍在江村住。西樵何幸得此名。此名竟與名山爭。騎鯨欲去不得
意。枕柯將爛非無情。念爾東湖濱。日日放船好。隣園有泉亭。西樵有聽山堂在黃岡左。西河黃家亭子詩。西樵山人隔
巷居。幽清似瑤島。前堤採蒲根。中流滌蘭草。就君長向東湖路。時聽流泉不能去。今來翻作西樵歌。恍倚
空崑桂之樹。西樵今亦名鶴樵。新烟蘇雨當凌霄。西山縹緲不可見。翱翔爭比他山高。南還將上匡廬嶺。

看爾西飛一羽毛。

放歌爲劉二漢中留別

王孫來時桂花發。王孫去時春草生。問君何以久居此。只言爲有劉生情。劉生意氣邁碌碌。好我逾于好金玉。解褐頻酤市酒紅。剝牀不用霜芻綠。我本羈旅人。天涯任奔走。驛店聽曉雞。旗亭折秋柳。彈鋏辭里門。吹簫渡江口。渡江潛作瀨上行。驚翔之鳥傷予心。何意君能好我摯。且深令予忘卻蘆中吟。朝來共葦糜。前廡無用梁生炊。晚來共紅燭。街鼓沉沉倒醞醪。一日不見亂心曲。祇有倪寬相對坐牛角。謂倪之煌也。此際驩歌樂相樂。自此勿言淮水長。濁泥數斗淤難量。勿云淮城有千仞。當此高懷不堪準。我今將住劉伶臺。寒風斗酒長徘徊。不然攀爾桂枝樹。且與劉安共晨暮。無如唧唧鄉井情。方春竟逐王孫行。臨行不識中心苦。試看萋萋春草生。

渡河寄大敬徽之憲臣并呈張五杉張七梧姜十七廷梧丁五克振吳二卿禎顧大有孝

河水將流漸。東行渡枝津。寒風吹襟裾。使我思故人。故人在何所。云在舊鄉縣。炎天三伏時。送我走江甸。晝行蘆中遲。夜行瀨上淺。三吳舊知予。故呼我王彥。渡江旅集燒燭枝。前楹歌發如流絲。酒酣銜泪不能下。低頭自弄黃金卮。座中有客向予指。此是江東小毛子。張祿更名識被袍。梅生變姓詳居市。直前把袂勸疇昔。賓客盈堂盡前席。銀餅高瀉傾一時。金管豪吹快終夕。自此至江介。車轂日來諗。渡江一百日。九十就人飲。就人飲酒可奈何。他鄉歲月眞蹉跎。渡江王彥今仍在。曉日寒風又渡河。

霖曰。西河出游時。指壁間東漢人名曰。當名王彥。字子方。他日天涯相問訊者。王彥耳。故云云。按詩中事。西河渡江。飲湯明府宅。忽座中羣起慰勞。遂不能諱。西河別有詩云。陶朱游子姓。毛遂野人名。李遷民贈詩云。名在何愁范叔寒。皆謂是也。

觀滄海歌讀愚山觀海集作

我欲登天孫。俯視踏滄海。躊躇志不決。展卷發愧悔。展卷忽讀觀海集。滄海蒼茫水波溢。前開岱嶽捫天關。下撼洪河蕩奔日。魯源村北闕里開。聖門觀者難爲才。巴西作傳詎仁術。田何受易無文裁。愚山慷慨董絕學。朝發魚臺暮姑幕。斗柄千年指玉衡。龍門萬丈飛銀鱗。觀于海。弄海水。只有鴻流亘天起。浮雲瀉其中。星漢簸其裏。前臨海嶠自凌躡。那用江淮理舟楫。青天泛浮槎。片片似落葉。浮槎一過海鏡亭。還看响嘯蒼苔青。女郎山下丹花發。驛使詩邊紅泪零。集有禹廟碑海鏡亭記登女郎山歌和磁陽驛女子題壁詩獨憐此地李歷下欲倒滄溟向天瀉歌成白雪好名樓題卻黃金豈無價宣城浩蕩不可數自有文章變齊魯渡海何須漢將船驅潮不用秦皇弩宣城好我如好璞鼠魄還題卞和玉我知宣城知其深滄海滔滔涌浦陵谷當年刺舟還海中成連既逝波濤空今來我亦望洋去隨君觀海乘長風乘長風渺以漫但知觀海易不悟爲水難奔濤瀕洞震星嶽微流浩渺揚波瀾我欲從之水潺潺瑯琊並歷下盡作臨崖觀不信但觀觀海曲躊躇浩嘆蒼烟寒

陳州村人或賦上陽白髮人者毛姓過聞而感焉

河南河北不種麻。上陽宮中無好花。玉溝流水載花出。從此宮墻不能入。宛丘東路桑落村。漂流近在村東園。黃門持鶴晚歸寂。公主望鄉朝負暄。西山盜賊走春電。花落重飛舊巢燕。舞鷺翻垂籜宿衣。漚麻添作西宮線。金輿入蜀未得歸。道傍不用傷蛾眉。上陽白髮誰家賦。能使傍人雙泪垂。

食熊蹯口號呈姜黃門

坐我兩木亭。飲我五雲館。中庖出熊蹯。鮮濃滿螺盃。青栝花發桐樹涼。紅魚刺尾游銀塘。南風吹吹拂巾袖。下箸一食神氣揚。主人告我是難熟。澳釜燦蠟三書長。晉侯枉咎宰夫暴。老龜須用千年桑。

再食熊蹯口號

易牙調苦辛。伊尹負鼎俎。熊掌亦我欲。食之快起舞。翩躚舞罷雙泪流。舖藜含菹肝腸羞。爭刺夏后兩龍肉。未厭君夫六駿牛。清絲嘈嘈酒滿鐘。食熊并食熊蹯菘。何時借宿長楊館。更向山頭一射熊。

卽席贈安陽許三禮進士南華山莊讌集同朱大士曾沈九胤範令弟華葉大雷生祝弘坊金齋

諸孝廉作

鄴城才子東揚客。新着單衫棟花白。因尋神禹治河經。遂跨秦皇纜船石。當年獻賦意氣雄。奇文驚動明光宮。夷門結客滿河朔。蘭亭高會來江東。炎風六月雨初歇。澹日熹微障雲集。樓船出郭柳港涼。遠聽啼鶯駐輕櫂。紅箋曾約西曲人。油車空返東城闌。船牕四啓信流發。大山小山如錦鱗。南華山莊石橋裏。句踐傳來照龜址。叢英茂木深滿園。獨立空青一亭子。紅蓮落蒂挂石槎。長竿曲上交藤花。清漿凍酒雜瓜李。高欄曲檻生雲霞。雲江許掾思如髮。魯國朱家髯似麻。葉公好龍有奇氣。中酒清譚更超詣。杜秋有約恨未來。蓮衣水面空相裁。風流沈郎善吹笛。倩我爲歌古惜惜。幾番涼氣襲袂生。一片流雲滿山白。江東王謝未易期。奏觴疊鼓稱南皮。菰蘆吳兪一何幸。重逢鄴下黃鬚兒。藤花初落日初暮。畫機還尋若耶渡。湯賦漳河銅雀詞。但飲前山炤龜處。

寶刀歌送姜垚遠行 并序

姜垚公子游晉陽挾寶刀以隨

橫刀千金裝。梓若朝芙蓉。攜之入晉陽。翼翼驚游龍。晉陽古地負朔易。簫鼓汾川動春色。砥柱峯高竹箭橫。天門關外楊花白。翩翩公子裘馬新。幡然願作西都賓。奇文準擬拔河嶽。灑氣直欲凌雲津。春風二月固陵渡。九坂羊腸太行路。古署從教倒屣迎。前途莫怨班荆暮。我登君榻歲兩朝。夜譚新史傾洪濤。徘徊忽縮柳絲別。令我醉酒心醅醜。我不能爲雲君。已能爲龍追君。那得隨長風。去年曾買兩刑劍。揚華一辨雌與雄。雄者自佩儼星列。雌以與弟同追鋒。垚二劍以一與弟坦今持寶刀漫嘆喏。但使揚華似冰釋。從容麾示晉鄭間。西去何人不相識。

睡石避兵上塢作

毛姓睡石石如馬。漂漂水聲走背下。豫章葉密風四來。葉搖隙開日灑灑。老人釣水跪雙膝。石穿膝穴釣不待。北山山頂有白雲。早歸好避鴉頭軍。

浦陽江南五十里仙人窟與百藥山相對峙毛姓登陟之慨然成詠

十三始登山。見山如見鬼。十五見山久。踏之似牛豕。仙人之窟對百藥。驟見猶然起驚愕。魃頭顙足何處來。頓使窟前倒行脚。當年策彊執神鞭。欲驅此窟神山前。彊項不得卒到海。仙人就居近有年。四圍削琢作門闕。轟騰煖燼窟闕攢空岿。崿起萬焰燒出丹砂紫。花片在旁有石類鴛鴦。前當巨石窟將逃。修鱗入溪淹鼈足。昂首絲絲細噴玉。或傳此鼈腹虛空。仙人產兒坐當中。八月水枯穴溪底。硃旗石竿羅青葱。枯查倒海插石罅。十年海生石山下。祇恐此鼈負窟去。黑風驟雨駭秋夜。楓橋山人老蓮子。曾畫富春江。

山水一日畫得一幅成。當此一月不得似。我今勉強攀天關。仙人作歌留樹間。向前倚樹和歌去。西呼茅狗聲斑斑。

山有石翁嫗

樸父不死東南隅。千年老病無衣裾。黃河不清父不死。卻在前山綠蘿裏。綠蘿垂坐兩石。石裏生成有骨格。世傳老父好此山。挈嫗同來作家宅。早間洗頭玉女盆。晚偷鬼火燒松根。紅杉紫紗藉衣履。乳麝餵雀成兒孫。琵琶灣頭有少女。紅裙猩猩對風雨。黃姑卻上天漢邊。日盼流黃最心苦。老翁宴坐絕朝夕。春花滿頭秋月白。天吳欲牽老嫗去。只挽崑頭桂枝樹。山有翁嫗桂有枝。羨君婀娜長無知。

題倘湖讀書圖爲來十五集之給諫初度

倘湖先生讀書處。幾疊湖山繞春樹。綵幟初爲錦汧游。隱囊高踞繩牀暮。皖江司讞曾守城。登陴註易退賊兵。還歸青瑣頓辭去。封章七十留筐箠。湖山盤盤築書塢。臨湖幾度清明雨。碧柳朝開彭澤樽。紅衫夜伴香山舞。前年居我此湖北。檜槳蘭舟蕩鷗瀾。月朋水靜語有聲。日上岡寒炙成色。先生晨夕湖水濱。披圖恍對滄洲春。羨君原有藍田筆。寫出山中唱和人。

山霧引

并序

予自江上還。避人樓家。杳上塢之石橋莊。早起觀霧。初泛絮海中。旣爲霖雨。劃然裂響過。滂洒而畢。則早食後矣。日涉山中境。不能悉記。寫此寄與舊游故人。用代敍語。

山中大霧暗高閣。咫尺不辨閣前竹。朝光初上欲破難。蒼茫如在環瀛間。須臾日色拔松頂。將破松枝漏

光景忽聞一響裂萬壑。大霧驟斂如雨落。我來關中觀素書。窗紗几漆疑水濡。竹根初青日初出。此時已及數竿日。入山數載恐不深。大霧欲破驚人心。我將深隱共玄豹。藏入霧中誰得尋。

擬古曲聽商生徵說彈琴作

太傅府中銀燭光。永恩樓上月輪涼。珠徽璧軫甚的皦。新聲舊韻何悠揚。年少商公子。彈成夜度娘。欲踏園頭雙蝶。蝶恐驚門左兩鴛鴦。

金烏薄栖墮翠林。公子披衣拂綺琴。梅花調發春月起。楊柳渡暗暮潮深。名姝妖女判不寐。聞聲銜恨獨相尋。子期真善弄。田連猶知音。

颺颺關中風。脈脈絃上語。海鳥汨綠波。野鴨翻清渚。銅壺咽咽流春聲。玉馬轆結生夜情。手指攢捩不終曲。心想寂寞難爲聽。春花已靡爛。春月又分明。莫將卓氏屏間意。寫作雍門道上行。朱絃七條琴上絲。白石一闕口中悲。楚妃愁坐久無主。王昭望鄉不得歸。從君一唱復三嘆。坐令春草生繁滋。

閉門行

湖南風生湖北涼。買酒湖北吹酒香。湖中女兒渡湖去。船頭雙載黃竹箱。前湖荷花蔽湖路。誰唱蓮舟買荷度。紅船看入荷葉中。欲採荷花恨遲暮。明朝伏日須閉門。莫行荷路傷荷根。後漢令伏閉盡日。

草堂花枝詠有序

避人後七年。暫得歸城東草堂。睹見花枝爛然。不能哭泣。乃爲之詠。

草堂三月花枝紅。東風細雨春濛濛。夜來燈影動花葉。炤見棲花綠蝴蝶。牆東高閣翳紫霞。隔牆一樹紅梨花。隣家少婦捲燈幔。坐對梨花起長嘆。幼時北里看鞦韆。梨花吹落衣帶前。今來拾花。花子又是花開碧牆裏。

飲祁中丞東書樓同張四梯張五杉姜十七廷梧蔡五十一仲光觀祁五理孫藏畫書事并呈祁禮部彖佳姜別駕轅

清江細雨暗遙郭。浮雲杳靄居上頭。銀餅美酒瀉行客。招我車壁藏書樓。樓頭遍插李侯架。玉軸金籤滿前絳。嘗餘幃子寫丹青。更見屏開舊圖畫。滕王蛺蝶銜綠苔。江都駿馬飛黃埃。龍驤欲點風雨下。虎頭落筆滄溟開。憐子書理本未晰。金錯三過頗疑惑。遠公曰宋唐希雅畫學李後主金錯刀書有一筆三過法此是以書法入畫者故云疑惑

張杉同我快指觀。恍若洪濤盪胸臆。于今只愛陳老蓮。蘇州待詔吳興錢。烏程關思亦超絕。君家尙有祁蟬仙。我欲雨中摹一幅。姜九西游賦黃鵠。主人便起經且營。細拂鷺溪柳條綠。酒清肉美催飲頻。檐前驟雨傾盆餅。畫成相視頓開霽。生綃捲出秦峯青。

寓高家亭子午日後黃大世貴蔡二爾趾舒四起鳳戴金劉二漢中舒章周麟童衍劉三館移尊過飲率賦兼呈黃二翰樂大六舞高儀淑光淑

天妃宮南一窪水。前有高家小亭子。女牆青草環曲沙。幾疊紅欄傍沙起。水光如鏡千頃多。風來吹縹波中羅。波心一徑似裙帶。橫橋結束分沿渦。橋邊野花夜棲鶴。此地曾經種靈藥。白日昇仙舊得名。湖中有昇仙橋綠鬟姪女今難索。我來亭中值夏初。菰菱接水生紅魚。開欄移榻近沙岸。沙邊一望真清虛。黃梅未

過又重五。空亭尙對黃梅雨。珠傾艾葉垂碧波。血濺榴花墮遙渚。良朋好我移酒尊。烟雲萬疊迷黃昏。斜陽暫啓炤東壁。明霞遠映迴孤墩。酒酣鐘鼓寺中發。野火前堤乍流沒。清歌幾曲聲滿湖。隄吹蛙吟一詩歇。東湖深處黃氏園。鳧亭依倚園東軒。樂六舞所居名鳧亭雨餘嘗就野鳧飲。亭中蕭灑誠難言。此亭縹緲有奇趣。亦在南湖最深處。良朋四坐皆盡歡。恨不同留野鳧住。清明上巳醉裏過。他鄉今日還高歌。酒酣起望南湖水。欲泛輕舟奈雨何。

同王徵士聽楊太嘗彈琴篇并序

毛姓未識楊太嘗。亦未聽太嘗彈琴。江西王徵士每稱太嘗通明音律。尤善彈。崇禎十六年。用軍功轉爲太嘗官。使令正樂。嘗曰。五聲乃亡角。民流至耳。所攜有二賜琴。一爲唐開元年供奉樂器。祕保勿彈。時取他琴操數章。或出涕。徵士有詩十篇。和曰。同也。遠公曰。和亦稱同。如盧照鄰同紀。明府孤雁。王維同崔傳容賢

弟張說。遙同蔡起居。偃松篇。崔泰之。同日知光祿弟冬日。述懷類。可見。時以沈佺期。遙同杜審言。溫嶺。解作同過之同。甚誤。

成連入海不復返。人間尙有雍門周。呼天捨地抱焦木。一鼓再彈雙泪流。晉侯清徵召禋禴。楊氏宮亡失行在。五音升降得喪殊。何事民流角聲敗。蕭郎左衛本戎伍。能定明堂五行舞。誰憐故器抱殷遺。遽使新聲寫淇浦。開元供奉燒尾琴。上皇賜比雙南琛。梨園旣散海青死。但留篋底空沉吟。當年大合駕象輅。尙對皇娥鼓瑤素。鼎湖龍去竟不還。自抱烏號哭晨暮。毛姓家畜潞國絃。諸王頒在崇禎年。欲貽太嘗共搏招。天涯修阻思茫然。從今大雅日淫漫。莫遣風流使中斷。他日相逢袁孝尼。願得先傳廣陵散。

放歌酬王孫晉詒別

東行不得觀滄海。策馬復至南昌亭。將浮沅湘入衡嶽。悠然萬壑踰青冥。南風五兩泊河渚。酒酣日落將揚舲。忽言欲別王子去。中酒起坐醉復醒。王子當今一人傑。少小能文過江薛。十五彎弓射浙潮。二十裝金返南越。無端見我喜我狂。傲我黛筆書堂堂。千秋知己莫過子。他日青雲藉君爾。此間好友倪與劉。霖

日指倪之悼劉萍中。

憐予詩句時追游。小弟戴金更多事。日訓兒童使彊記。龍質錄西河詩授子弟。爭知心雜指

爪枯。錯應紛酬總非意。那如王子八斗才。落筆滔滔等閒視。君不見。毛牲策馬濟上來。夜涼獨上韓王臺。車裝暫稅小亭子。亭下周遭蔽泥水。朝亦渡水出暮亦渡水入。車轂不得通。褰裳坐相失。猶然方幅滿几案。蘸墨濡毫日揮汗。可憐貧賤不自繇。役思勞精受人慢。逝將西上黃鶴樓。先遣樊素迴江州。仙人天上不可待。白雲足下還悠悠。憑君送我千秋意。瀉作舟邊新水流。

遣侍兒歸舟江口午日相待

王郎自迎桃葉船。我今送汝還江邊。水芹如帶曳艇子。波面晴帆共霞起。宜男花發紅滿枝。深江莫理絃。鞦絲渡頭喚買豆娘子。正是我來江上時。

西河文集

蕭山毛奇齡

字子又稿
字大可稿

遠公阿蓮較
士霖曰作較

七言古詩三

上已與故人

他鄉既度清明節。客裏重逢上已天。當此暮春將盡日。不知歸國是何年。可憐修禊蘭亭侶。正值流觴洛水邊。

洛城游騎行春晚。曲洧晴沙盪日曛。客子採蘭紆紫珮。女兒贈藥洗紅裙。途中製得甄神曲。讀與陳王不忍聞。

會川吟

濟寧會通河也。

君不見。會川滌滌東南行。千艘萬艫輓漕粟。朝光未動鉦鼓鳴。滎澤既已堙。沈河不可量。通塞寧有分。浩嘆會川上。會川樓觀雉堞高。前臨闔閭穿長壕。平欄斜抱濟上橋。欄邊紫蒂花千朵。橋上青絲柳萬條。千條萬朵花共柳。狂客樓頭舉杯酒。紛紛車馬爭水流。疊疊芻糧過丘阜。樓中有女貌似花。長裙八幅裁朝霞。持杯善唱採蓮弄。能使江南客心動。大官駕舸。球樓捲珠箔。巾車并明駝。幪紗映雙目。鳴鉦伐鼓上

都去滿目川光起烟霧。更有東西估客豪。鈿篋金箱不知數。娥娥紅粉最可憐。朝朝暮暮娉樓邊。酒酣雜坐理瑤瑟。斜陽散落紅簾前。令我舉首心茫然。君不見東會川。

夜飲倪之煌一草亭放歌并示劉二漢中王二弘昌

十日九過草亭坐。一日不過思殺我。檐前況復梅花開。啾啾鳥雀啄葉來。鐵盤燒燭閉柴闥。駙馬巷南街鼓發。廳鑪着火淹酒紅。菜瀝菘羹下匙滑。蕭蕭風起知袂寒。醉歌一曲那呵灘。屏前積水見星墮。暗中孤雁號雲間。罇浮琥珀燭光度。起看梅花繞涼露。東邸賓筵恍舊時。南鄰主第今何處。相過莫使相見稀。劉生斗酒能忘機。只憐王子清江去。三過草亭人未歸。遠公曰倪先將軍多座客。又彭城行亦有先人李廣諸語。筵賓句想指此。

登天門山望江

晨登天門巔。俯瞰大江渚。江流浩浩環石根。細激富花散成雨。富花灼爍當水關。秋棠石隙青苔斑。盤旋曲磴越叢莽。峭壁直下波濤間。峨嵋山亭倚博望。與此東西屹相向。世人相視稱天門。我來已據天門上。天門巖崑朝日開。峨嵋窈窕烟霏迴。小鬢十五共追陟。前凌縹緲超塵埃。青天萬里瀉空闊。欲上天門躡天闕。憑將峯巔看浮雲。不向波間捉明月。橫江江館千古愁。蠓磯牛渚思悠悠。振衣獨上天門望。惟見長江不斷流。

白雲樓歌有序

游飲禹州州署楊花飛飛望白雲樓爲嘆興

白雲樓。高接天。雕甍玉柱相鈎連。上看挾飛鳥。漠漠翔雲烟。下看垂溜懸飛泉。憑欄欲數城外山。臥聽隸水流潺潺。郡王夙昔居其間。啓禎之際藩府稠。郡王十七留禹州。當時各請建飛樓。敕地命名巨細分。博聞爲最次白雲。白雲者誰懷慶君。仙人樓居饗王孫。嶒岷金碧日月昏。鈞天之樂歌管翻。青娥紫袖抱瑟彈。迥若細雨吹雲間。聽者若寐欲寤難。天陰晝晦歡宴促。蕩蕩城門烏啄肉。一從流寇亂中州。萬瓦千楹總陵谷。白雲樓。今尙存。下有斷垣上有軒。土中金絲怨井邊。玉絲琰一絲直萬錢。萬絲十千貫。摧碎棄井邊。土澁石錢滿。闢樓植瓦作州署。重鑿青天入雲住。山頭日出揚曙光。風裏楊花落飛絮。使君拾楊花。飲我樓外亭。通池引曲溜。激激樓前鳴。持觴一望樓頭絮。幾欲登樓百感生。霖曰此詩作于史書寫使君飲次聞書寫觀西河落筆。至迥若細雨吹雲間二語。亦曰迥若細雨吹雲間。風裏楊花落飛絮。眞神筆也。

贈隴西羅生

金城河北飛黃雲。隴西豪士天下聞。結交意氣重然諾。令人不數平原君。白臚赤鬣騁寒磧。卻到徐方作賓客。許汜難同下邳樓。羅侯舊有東川宅。涼風吹劍水一行。南遊莫宿陽平娼。四維原是雷塘侶。只問塘西十八娘。

飲廣陵舊城酒壚同胡五舍人張十四判官醉後作

黃花開盡朔風起。買酒揚州舊城裏。沿城數里有狹斜。十五當壚對梧子。溝頭水淺不炤衣。開元才子旗亭稀。江南雁歸不識路。日暮且來江北飛。

攜條兒宿謝墩書感

謝郎東墅春融融。春鳩日啼高柳中。小蠻朝粧裹花葉。開箱自揀春衫紅。烏衣桁南綠波繞。簫鼓盈船度春曉。不惜聽歌都護哀。但道彈箏貴官好。過江遊客遊且吟。草堂無復留山陰。小蠻空上江南路。欲賦江南傷客心。

結交行贈卞生利南

結交亦已遍。那知有若卞利南。洛陽劉生騎黃驄。當此匿影不敢前。毛甡居都亭。鬱鬱抱足眠。東鄰有阿侯。十二學得彈箏篴。酒徒載酒挾雙枕。將買箏篴誘我飲。先期桑下逢金夫。踟躕那得石氏珠。卞生利南未識面。驟雨衝泥似銀箭。白驪羶蓋油桶襠。奪卻黃金擲珠串。爾時在座酒未巡。忽攜鴉髻來如神。毛甡素矯蹇。詎敢當此情。酒徒相顧喜。且驚毛甡辭讓不得成。平明相約訪卞生。乃在南城之南曲巷裏。前對市門後臨水。水亭深深出水底。水波浮動嘗有風。四顧乃在菰菱中。橫欄復閣水面通。閣中紅袖千芙蓉。生平與少年相逢白鼻騮。不意歷此都。乃過卞生家。君家最易知。易知復難忘。但唱結襪子。莫歌團扇郎。結襪當結君。團扇徒自傷。自傷仍欲渡江去。謝爾要予種桃樹。白魚總駕蓮藕船。且醉城南狹斜路。

霖曰。西河避人時。爭爲作室家計。丘季貞千里爲覓妾。卞生其一也。曾詢卞生事。云生實奇。債弃營家婢。爲金夫所有。西河之約。稍爭後先耳。謀諸陳給事。思挽之。未決。生于暴雨中。着油桶襠。策驪奪弁金。擲還挈其婢來前。衆大驚。翻以嫌意多未便。西河亦諱讓。至再。復辭之。然生誼不可少也。聞是詩成。或錄之粘秦郵旅亭。閩張孝廉元夫。豪士也。吞嗟曰。是何時人。復泣曰。是吾友詩耶。久之。去。然是詩則已傳江北久矣。周計百先生評曰。此詩與白雲樓歌花驪嘆諸篇俱本之樂府。唐人惟少陵有此綜變。青蓮有此轉調換約。他不能也。此詩妙在前一截。敘得緊。訪卞以後。乃遂飄蕩無際。

重集園園醉賦贈劉昌言進士暨始大始恢二令君

去年來此園。荷根出水枯葉寒。今年來此園。雨餘又見荷珠團。此園久別亦可念。況復園中主人面。春風送我入洛陽。上已清明不相見。新禽啼遍蝴蝶飛。畫梁乳燕捎紅泥。蒲葵滿徑草花落。執手慰勞還歔歔。坐我桃竹茵。飲我木瓜酒。西亭懸葛巾。東廚滌梁斂。石枰分踞恣酬酢。樹裏斜陽散幽壑。暝霧初開華燭明。留我溪南最高閣。閣邃翳月光。燭明炤深樹。我念主人情。流連不能去。流連高閣月。樹涼捲簾欲倒黃。金牀主人本是金閨客。將赴長安曉馳驛。有子承明獻賦還。同向天衢展飛翮。我念主人不能去。主人好。我且還住。空園寂靜溥露華。落月幽清滿江路。園花開盡當復開。江南歸客猶能來。夜深相對情無已。更盡亭前酒一杯。

灌湖聞笛

灌湖西路風蕭蕭。湖心晚來生晚潮。孤舟回泊漣下橋。橫橋枯柳垂長條。忽聞橋畔笛聲發。遠趁風吹乍幽越。入耳疑聽塞上鴻。回頭不見關山月。我今將上黃鶴樓。烟波渺渺思悠悠。樊山再啓謝生宴。蘋溪重汎洪崖舟。此時一聽桓伊笛。能起千年江漢愁。

秋風來辭寓居吳陵後遷九龍岡作二首

秋風來兮吹客衣。芙蓉閣邊秋蝶飛。我行吳陵不得歸。故園八月荷花稀。荷花有紅又有綺。可憐不作游子衣。秋風吹吹墮流水。衣與稀韻綺與水韻此是倒調。

秋風來兮吹客裳。九龍岡邊桂樹香。我行海陽過江陽。廣陵八月秋濤揚。秋濤雨來漲官閣。可憐不得還

故鄉。日上西陵看潮落。

宴秦郵逢故人將歸

膠西廟前見新燕。秦郵亭邊折野桃。相逢故人解黃綬。可憐細草抽青袍。孟城幾曲假行幔。甓社一湖橫小舫。北來寓客有王謝。南皮佳賦推劉曹。高館尙縈紅叱撥。美人正抱紫檀槽。飲酣促坐倚酒樹。氣合欲行遺寶刀。白晝翳雲翻碧落。春風吹水漲紅濤。仲宣避地登樓好。枚叔爲郎去郡高。今朝聽歌不盡醉。明日看花空自豪。

江行感懷

石帆山下秋風起。燕子低飛渡江水。越客乘舟趁上潮。倒泝江陵幾千里。龍江關微下水遲。可憐五馬浮江涯。江南王氣總銷歇。山前幕府空逶迤。我將浮江拾蘭葉。西上峨眉看飛雪。夜汎長江無限情。獨坐江波望秋月。

豔曲

爲友作。一抄作感寓。似寓言也。然當如駱賓王豔情。代郭氏答盧昭鄰。王靈妃贈李榮頰。

吳姬二十粧正濃。橫江甲第葡萄宮。鬢垂倭墮鬢雲黑。天開曼臉新花紅。屏前屏後不相見。欲顧還憐掩團扇。翠黛遙分雨後山。湘裙低捲風中練。金張家世五侯宅。大者侍中小執戟。門左鴛鴦飛未連。坐中桃李看成碧。陽春麗日韶階屺。曲幕重簾兩相啓。錦瑟斜牽寶篆明。銀牀背樹銅盤紫。夜來明月海底珠。江魚尺素天邊書。五都密意投宋玉。茂陵多病懷相如。沉沉夜漏發魚鑰。先遣雙成恣驩謔。赤鳳青鸞婉婉。殊女師太傅。然疑作烏啼。曙火螭黃。風吹雨霽愁山陽。喟音宛轉屢哀歎。歡情失據還高唐。瑤柱綵服

九華帳。不是人間是天上。漢女燒珠滅怨思。曹王撫枕增惆悵。扶桑有木西有枝。雙鷓到死猶相思。竹竿
嫋嫋溝頭會。挾得錢刀當對誰。

集宋中卽席贈梁園諸子

夏城西望春雲輕。大蒙小蒙花欲生。晚來飛雪灑寒兔。誰著梁園舊時賦。茅堂風細酒復香。江東才子還
遊梁。故園賓客久寂寞。魏生雖老猶康強。謂魏徵也。東過太丘里。曾訪練公子。公子亦遠遊。空看鄴橋水。
我今將上商丘驛。一宿侯生著書宅。四憶堂前吟未成。無數松楸繞南陌。當年侯氏嬪耆舊。更羨忠貞練
司寇。中原遺跡總草萊。况復微文落人後。善花破地蘼葉開。座中猶是梁園才。茫茫一望傷心處。只有梁
王舊雪臺。遠公曰。練公子。石林司寇子也。四憶堂。見侯朝宗詩集。

投寓長橋蘭若聽竺蘭上人彈琴

我行太湖傍。不見太湖水。長橋蜿蜒如斷虹。橫臥青茅白茅裏。天風騷騷吹客衣。我行不住增心悲。湖邊
蘭若種蓮葉。中有竺師作蓮說。香氣吹開一片雲。涼陰堆作千年雪。飄飄攜我入深處。湖口相逢宛如素。
笑彼漁郎花底來。憐予窮士蘆中去。秋庭日落當夜陰。竺師爲我彈鳴琴。青天澹澹湖水深。秋躋初作玄
鶴舞。唼唼再起蒼龍吟。我聞黃華子。秋風生古道。客子時一聽。日夕傷懷抱。又聞走馬引。躑躅荒山曲。草
根纏其魂。蕩蕩傷其足。豈如竺師之琴。悠以閒。上有千仞之高山。下有萬里之波瀾。客子聽之心連連。竺
師爲我記其然。須知我意千重遠。只在君彈一掉間。

遠公曰。叔氏之投竺公。由顧茂倫也。時竺公
以彈琴截叔氏瘡。另有一詩謝之。今不存。

桂樹謠爲劉進士謙吉尊人雙壽

射陽湖畔清淮陰。團團桂樹環深林。大枝駢幹翔綠禽。小枝千葢千黃金。大枝小枝高雲深。高雲熠熠滿庭戶。前列層城後玄圃。葛葉裁裙拜木公。桃花醜面隨王母。木公垂老髮未皤。西來王母能高歌。歲星掩映動瑤闕。紫光燦爛縈青螺。雙雙相對矐如何。君不見劉伶臺下有劉子。七十高堂共甘旨。舞袖新披宮錦袍。稱觴況挹仙廚醴。人生有子貴如此。君不見劉家桂樹漢代栽。淮南千載猶花開。

集淮陰舊城醉中送白門任金吾北行

鳳凰臺上金吾子。醉藉寒風臥淮市。列綺曾扶春殿前。幽居近在秋花裏。蕭蕭蘆葦徹夜鳴。悲歌一上韓王城。黃河倒浪赤鯨動。青天曳日孤鴻驚。茲方卑濕不可住。欲看燕臺築金去。短舫還羈一飯亭。長帆竟掛三洲路。我同衆客解佩刀。攜鱗共餞青龍橋。花宮百八總寂靜。胡姬十五猶妖嬈。我欲勸君酒。漫歌折楊柳。楊柳垂細條。霜花着人手。霜花撲簌淚滿裾。相思嘗寄加餐書。竹竿篋篋任公子。莫向長安只釣魚。春日同史使君遊穎上過張良洞作

鈞州官署曉日紅。披衣騎馬遊城東。環溪斜度石橋闌。春風吹入幽窩中。窩前有花下有水。巢父由來此洗耳。當日張良未報韓。側身學道長居此。玲瓏破壁啓雙洞。旁有訾仙抱醯甕。金時訾且仙居洞旁。洞閉長留碧海雲。窩傾不下丹山鳳。使君慷慨起開鑿。重見幽棲舊丘壑。二月良辰天氣新。士女同來種紅藥。我慚巢父對水流。使君立志需封留。烏啼花發水漠漠。山空日靜春悠悠。流連雜出酌酒醕。將共使君返州府。女伎能爲楚漢吟。且向窩前再歌舞。

洛州寒食二首

洛州城東李花白。遊子他鄉遇寒食。晴絲百丈罨馬蹄。留滯嵩陽歸不得。道傍欲折楊柳枝。手把長條三歎息。

洛州寒食柳葉明。春衣駟馬城東行。遙天風息鳥啼緩。薰人日暖蟲飛輕。女兒欲上鞦韆板。愁煞江南瓜客情。

於黃申光祿宅豪飲

楚州多賢名。首推光祿君。譬如鷲在霄。矯矯離人羣。我來楚州甫三日。便向甘城訪遺逸。叔度能傳外史書。穎川曾進通侯秩。罇中酒滿座不空。酪漿傾出桃花紅。金砧緩切鹿頭鯉。銀匙細攪熊蹯菘。酒酣有佳客。清歌理蟋蟀。呼彼座下人。吹笙鼓瑤瑟。時襲三鼎箚攜善笙瑟者滿下座吹笙鼓瑟揚素歌。盤中瀉酒如懸河。大官庖廚久無餽。我愛樽前舊光祿。

河隍司馬吟贈王司馬

河隍司馬金閨客。家住蘭州大河側。人寒驚聞竹箭聲。沿門盡漾桃花色。東流近海瀉入淮。鹽溝鐵樹難疏排。龍隨九畫驗神術。魚山屢塞真奇材。臨淮千里慶平土。誰識陽平舊明府。蕩澤帆檣任往來。江都父老還歌舞。夫君係屬本右軍。嘗書白練羊欣裙。力持鐵帚埽輕霧。高懸銀榜如浮雲。霖曰。仙能妙書法。能授丈筆作丈許字。生平文酒過五絕。況復肝腸對冰雪。廣武城頭發浩歌。金城關外驅寒賊。我尋舊友淮水濱。慕君高誼高嶙峋。枚臯有里皆佳客。劉安滿座盡仙人。曉衙初啓幕。烏煖淮海相逢在。秋晚歲宴難聽越客

吟晨炊又值王孫飯。秋風瓠子天馬來。從君一上劉伶臺。大河積石從天下。河水東流亦壯哉。

楊童子歌有序

楊進士才瑰童兒九歲。文諷俊妙。玉膚色。持觴隨楊君後。相驚神也。坐語新叶。燦燦妙理。書鑿面長句。與之。思少時亦自見頭角。今就暮落故鄉。故人子李焜李曜。長大蹉跎。無復識知近狀。見童兒。不覺生有羨意。未請字。曰楊童子。

楊家童子方九齡。錦襜朱帽垂銀鈴。清神傲傲濯寒玉。眸子瞭若秋雲澄。常軒僂僂出拜客。騏驥銜花鳳。梳鬪滿堂一顧嗟。嘆生。出席驚看墮雙鳥。逡巡行酒有神矩。屬對吟聯盡好語。胸中了悟懸鏡光。言下相通似桴鼓。坐來咽項當酒后。欄邊羣嫵思攜持。羊欣未長衛玠小。何物生此寧馨兒。我聞關西楊伯起。學術能明號夫子。數世皆生倜儻人。皆與楊童妙堪比。又聞楊雄誦綿竹。有子童鳥出塵俗。楊童今日勝阿烏。況彼非烏總碌碌。禮泉有根草有本。進士楊君擅材分。奇文海內爭頌揚。事親庭下能溫問。宮袍初着春宴稀。高堂念切曾馳歸。三年重對董鼂策。至今侍養藏庭闈。楊君孝親宜有後。嘖嘖楊童豈常邁。銜君美酒復羨君。不惜長歌爲君壽。楊童子。真罕稀。手籠金鎖金花枝。他年把筆看花發。願寫毛氈座上詩。

彭城行送倪大之煌之徐州

彭城介芒山。中有歌風臺。倪子將往游。又值秋雁來。嘹嘹秋雁不可數。遠過雍門度河滸。漢帝宮前未敢行。豐人醉後猶能舞。枌榆舊社咨隱淪。嗟君本是聊城人。計然奇祕願興越。魯連浩氣能逃秦。河流馬頰下難返。遂去銅駝赴徐苑。卜宅長留伍相祠。同行尙與韓王飯。先人殺賊苦未封。藍田射獵曾稱雄。王孫

負薪久寂寞。納堪破產周。蒙茸吳釣渙。渙可截蛻。手把芙蓉散。冰雪況有新。詩似少陵長。趨短豔俱神。絕子居淮河頭。我居浙水涘。相思不相見。唧唧兩無已。相思千載秋。樹生今來見。汝淮陰城。娑羅百尺風。雨掣射陂千項波。濤驚午橋把瓊且脫幘。夜堂秉燭來吹笙。朝昏相對啓羅幕。一草亭前覆寥廓。時見墻頭。藤荔紅。幾陣風吹似花落。霖曰倪所寓名一草亭。前有藤荔墻。見濟南張孔繡記。青芻滿皂衣。滿簾聞君欲作彭城行。我持一樽勸君飲。當前況有王劉生。時劉漢中王弘昌在坐。劉生本任俠。王子未仙去。芒山日蕭條。豐沛不可住。君行豐沛我欲還。與君期遇東胸山。大風歌罷黃雲暗。記取千秋徐泗間。

西河文集

蕭山毛奇齡

字大可
又初晴稿

張文鸞風林較
蔣樞星旋較

七言古詩四

黃浦午日作

海榴花發日正長。我游滬濱逢端陽。朱絲乍綰艾符小。畫舫欲開蒲葉香。南風吹水水波動。簫鼓中流遠相送。入浦疑投碧玉壺。滿盤堆出黃金糗。連橈並纜宛結筏。驟見戈船遶堤發。橫矛舞槊戲鷗閒。紫旂紅旌映天末。須臾甲士振臂呼。盤旋五色蛟龍趨。拔幟似將驅海若。哀歌直欲驚天吳。主人徐幹發清興。況復風流對仙令。碧醕頻傾細瑣迴。紅船幾處新粧靚。當筵絲竹次第陳。沐蘭剪艾申江春。十年未續羈栖命。欲繫新繒愁煞人。

秋潦接友紀事二首

六月無雨河岸枯。七月雨水填居廬。牆頭巨樟低接葉。傍水但穴鼻與魚。錢唐潮水漲沙足。上潮不共下潮落。君今晚渡當晚潮。到門又值風蕭蕭。

積水在門月在水。主人明燈炤平地。僕夫倚壁馬嚙芻。相逢握手還歎歎。楚生遠游橘爲頌。杜若爲衣蕙

爲縫。主人酤酒榆作錢。出門三借蓮葉船。

抱鵓出門行答王兵曹

抱鵓出門苦無力。棄鎡欲鉏鉏不得。君家南面過百城。令我時時動顏色。前年就君觀祕書。秋霖十日仍空虛。茅山未許抽金篋。柿簾安能寫石渠。交交桑扈本食肉。有時食粟人不覺。謂我嘗甘薺菜香。此事從頭總教錯。君今舉我非尋常。敢方李杜高文章。山前曉幙秋風起。那得寒釭焰影長。
王贈詩云李杜文章光焰短。只因座上有毛詩。

題周昉畫楊妃調笙障子

宣州長史筆有神。貌花工貌丹州春。風神妖矯絕凡近。徐熙崔白非等倫。開元天子重傾國。曾把名花比殊色。清平三調倚玉笙。一唱沉香舊亭北。太真仙去上皇老。此事千年等枯槁。御苑秋風落紫槐。曲江春殿生青草。悠悠蓬島相見稀。名花再顧無光輝。宣州妙筆寫一捻。花樹龍葱映雙頰。恍若錦幔中。晴風繞蝴蝶。下坐妃子嬌似春。花間紅露寫朱唇。頭上金鸞釵。腰邊霞綺裙。手持玉笙思紛紜。便將釵腳子。挑入玉笙裏。炙簧塗蠟曲有方。竹管銅匙細堪理。不審寧王笛裏聲。與此參差又何似。三月三日洛水邊。我尋紅藥游晴川。凌波遺珮杳難續。姚黃魏紫空嫣然。誰展此圖向我前。名花傾國重新鮮。花繁映瑤席。障此蓬萊仙。比之號與秦。合坐爭嬾妍。只愁調笙度遲日。花萼樓頭呼不出。我欲重吟供奉詩。與慶昭陽總相失。崇禎待詔陳老蓮。妙筆往往傳人間。安得倩掃吳溪烟。頓使宣州三絕筆。寫作浣浦雙流泉。與之重對開元年。

題吳趨唐解頭畫贈四明周廣文山水幃子

灌莽日霏迷。晴雲共洄瀾。山亭故幽遐。惻惻人上慄。吳趨解頭唐六如。寫來贈作雙瓊瑤。四明無數佳山水。恍見東窗幾洞書。

畫竹歌有敘

崇禎中陳二待詔洪綬爲沈胤範畫鈎勒白竹。題云萬曆乙未法華山貌竹數種。在無用老人卷。李長蘅見之。嘆曰小淨名醉墨矣。後爲權要得去。關中人張道民脫白驪馬易之。是畫一種耳。西河毛甡觀畫采隱堂。咨嗟爲歌。

昔時蕭悅協律郎。曾畫白竹稱擅場。豈如崇禎陳待詔。別爲沈郎寫佳妙。分叢疊葉竹莖坼。剝粉漉青縱鈎畫。宛如塗隸手底枯。橫挂霜毫作飛白。翩躚逸落勢宛轉。玉櫛銀鈿素紗軟。淇女粧成一笑寒。湘妃雨後雙眉淺。當時記得住初地。偶借生綃寫幽意。拾去人誰等法王。年來自晒供豪吏。關中張生頗俠烈。八尺霜蹄易寒鐵。風梢勁鬣相估當。正與斯圖鮮差別。驕驕旣死健筆亡。迂兒蓮子盡摧藏。活禽生卉暫相見。青天碧色回花房。勸君展圖絳庭戶。白鳳雛雛掣毛羽。駿馬黃金何處尋。一望函關泪如雨。

鞦韆辭二辭凡數刻稍被改竄此從商兩臣抄本

東園紅繩百尺長。花竿繡版懸畫墻。春風鶯語吹綠楊。桃花飛映花竿傍。阿侯家本邯鄲倡。紅裙八幅裙帶颺。扶裙理鬢顧鮑郎。倩郎催上鞦韆場。東園有女藏曲房。拋絲擲帶盤繡牀。時當寒食呈新粧。曾來旋舞雙鴛鴦。于今相對羞頰頰。自憐不如繩上娘。初翻曲榭孤鳳翔。旋迴巾旃胭脂香。驚看欲墜低復揚。桃

花滿竿飛夕陽。

又鞦韆辭

北來小妓善懸綆。春風翻花弄花影。南人長裙掃塔除。依稀學得亦不如。少時曾看鞦韆戲。紅繩百尺遠垂地。此時正值桃花開。畫版斜懸擲繩妓。驚鴻舞燕花桁明。盤緋飛旆蛛絲輕。圍牆觀看頓成市。一時傾動蕭山城。十年兵革固陵口。寂寂東園散花柳。紅繩畫板不復存。此妓城南作人偶。春深三月猶坐家。腳能踏地手續麻。草青日出各不見。翩翩吹落紅桃花。霖曰：一時十年一語。是接對句。

來北沙有詩曰：誰賦鞦韆妓。桃根碧葉生。東隣嬌女在。無限故園情。
舊評曰：前辭邢尹相見時耳。後辭則潯陽對泣矣。情文之妙乃爾。

與朱山人飲

山人好飲耶溪濱。布袍角巾隨隱淪。有時入山採苓朮。白日過市歌荆榛。方春邂逅廣寧路。云返姚江百官渡。踏翻紅藥敬晚霞。傾盡青囊瀉朝露。耶溪溪水流復流。紫花初落丹花抽。何時製得長房酒。還飲龍山最上頭。

送駱復旦明府補任崇仁

橫秋官閣江日紅。三巖散瀑生微風。飄飄僊令挾黃綬。還乘彩鷁臨川中。臨川山前曉衙啓。橘樹蕉衣蔽塔屐。雲滿欒巴太守亭。人來謝客諸王史。關中曾食華水魚。丈夫四十專城居。長輿扶杖久將起。浮雲蒼蠓愁當車。黃金馬頭珠匣匣。直上天門撞雙闕。合浦仍還海上螺。巴亭又掛山頭月。義烏詞賦矜久傳。黃

□花樹猶新妍。揮絃夜坐琴。高石種玉春。耕蕭氏田。朋儔祖軼下江潯。相望相思似秋浦。他日人傳逸少書。盡是臨川墨池雨。

和張公子花驪嘆并序

全張公子飲康氏園。芍藥蔽晦。半萎藉地。花驪跼足避紅行。遇塞紅。乃長鳴不前。客有嘆者。

張公子騎花驪。踏花長向花下過。張家園裏舊有花。

遠公曰洛陽張家園棠棣坊諸處。唐時牡丹特盛。見洛陽風土記。

今來且醉康少家。青黃被地總難識。中有嫣紅好顏色。洛陽方春明。溱洧已渙渙。芍藥家家開。紅白互相眩。白花鬱鬱散千蝶。紅蕊輝輝映雙頰。一夜東風起上林。彷彿霜宵墮丹葉。康園邀客開錦卮。落花繞路生紅衣。客來迸作香車泥。車塵撲撲飛馬蹄。花驪入門獨遙顧。不走亭前落花路。筋力雖瘦成嬌好。視行步步來。嘗惜萎羅綺。恍惚扶風馬。蒐里土中鑿結香未零。石上連環碎難埋。初看散蓋不忍踈。繼見堆紅罷躑躅。誰將獵獵快燒珠。頓使深深見埋玉。頓使一抄作誰使。哀鳴駐隴上。有似王伯輿。茅山一嘆息。千載生躊躇。更如衛洗馬。愁心著江樹。視此春芒芒。流連不能去。客作仰天嘆。我爲蹋地歌。蹋地休蹋紅。我欲騎花驪。騎花驪。休蹋紅。可憐紅落汙泥中。汙泥落紅亦無幾。願騎花驪醉花裏。

淮上逢施少參閔章自京邑還任抒意

朔風吹雨短袂寒。都亭遊子加晨餐。皇華使官苦乘傳。前驅羸馬來長安。飛蓬索索墮遙梗。此地相逢最堪省。韓信城頭白雁飛。淮王宅畔銀牀冷。蕭條古驛絮語親。薄游同是隆冬人。百篇詩句驗予拙。十年宦跡愁君貧。臨江分守界西楚。閤皂山高望來苦。何意天涯對酒卮。前事今情又重數。君行當及休役車。我

留淮水還躊躇。追陪不忍暫相失。晝談竟及宵燈餘。重尋湖口渡湖磯。烟水蒼茫遞明滅。祇愁南去見梅花。驛使將歸遇冰雪。廬山翠嶽倒水青。相期還發清江舫。莫言知己重逢處。只在淮陰一飯亭。

喜逢南安趙司馬開雍入京率贈

去年渡馬湖。便欲登君堂。蹉跎入秋節。流浪過海陽。今來本欲下橫浦。爲訪湖西阻秋雨。不見芙蓉渡口船。空搖白鷺洲邊櫓。拒霜花發紅滿城。洲前白鷺爭飛鳴。涼天清霽日初出。忽聞司馬重還京。贛江浩浩向東瀉。馳驛相逢贛灘下。我爲湖海老逋人。君是江州舊司馬。天涯嘗苦相見稀。相逢各道長相思。丈夫愴慨爲知己。此地逢君感何已。梅花涼未開。春鶯又將語。承明定留君。爲君酌斗醕。匆匆斗醕恨未揭。萬里王程更前發。綵纜高牽贛水寒。相望秋山見新月。

人日途中登高作

去年人日馬上過。今年人日浮江波。沙頭草色又如此。故園柳條今若何。嵯峨江閣蔽江口。強起登高飲春酒。獻歲才看七日還。離家已是三年久。江城送客綵燕新。家家門戶沙頭春。誰裁百福銀花勝。還贈三年未返人。

古意

木波城北霜霏微。玉狼山下烏欲啼。黃榆蔽關落平渡。白月夜上高平西。高平少年騎游騎。仰視雲中雁來至。迴身卻射榆影中。忽睹刀環暗流涕。刀環鹿速東隴頭。霜清月白雁門秋。清霜秋下稷西寒。白月夜落城南樓。城南樓上落寒月。拂拭寒砧擣秋節。玉杵敲殘雁浦星。金雞唱盡交河雪。交河雁浦何處尋。銀

欄繡帳夜燈深。燈下綵鍼長嘆息。機中織素自沈吟。沈吟但坐露華濕。蕤磴瑳瓏珮環澁。四壁寒蟄聽去頻。重城哀角吹來急。去年遠寄到龍沙。脈脈黃雲去路賒。今來塞雁歸飛早。應見于闐秋草花。

柳花歌寓蕪城作

春風濯濯江南路。吹過邗關到瓜步。邗關三月春草長。市樓大道怨春陽。陽春初開日杲杲。大道花飛一何早。清明漸近細雨來。繞樹游絲墮縹緲。游絲縹緲繞如霧。綰入隋堤柳條住。隋堤柳色青瓏瓏。娓娓流鶯啼不去。流鶯啼處停玉鑣。依依拂面盡長條。揮鞭旣度紅欄曲。驅車還上綠楊橋。紅欄綠柳心斷絕。隋苑隋堤有離別。新聲三疊何處吟。弱線千條倩誰折。可憐草青及春暮。可憐綠柳低還仆。青樓曳翠綵酒壚。白馬連錢繫歸渡。低枝旣旣接長坂。高枝蓬蓬白花滿。茫茫飛雪繞去遲。冉冉輕綿冑來晚。翩隨晚蝶冑朱花。緩向春烟拂玉鴉。幾時飄飄落西苑。幾時流蕩去南家。南家西苑兩相棄。流蕩飄飄日顛顛。春風吹去不上天。春燕銜將復垂地。初翻積雨障輕塵。更度粧樓裊素茵。滿眼離披不知處。愁殺東西行路人。

小補陀畫幃子歌并序

紹興城東二十里許。曹山陶氏放生池。凌子天翰將更名此山小補陀。報母養佛。令楊明府作畫幃子。董孝廉爲歌。謂姓曰。翰母禱于佛母而生翰。翰痛母之亡。故擬報慰云耳。

君不見曹山巖巖東郭東。中有巨礪開琳宮。澄潭千尺插橫嶂。潭水澱滓潛魚龍。巖巖兩楹架巨石。石蓋倒水空玲瓏。踰波入石石四啓。小舟蕩漾穿當中。相傳神禹舊開鑿。手遣巨靈剷碧落。斷鼉剝臂拄水心。焚象抽牙倚窟角。風傾雨削如有神。清鐘梵磬交冬春。天花散綺布松壑。好鳥說法通雲津。會稽凌翰探

幽渺。記得前身竺童小。慈王抱送稱善才。仙姆留馨似阿保。淒然思報顧復情。青山碧水空冥冥。滄洲萬里巨波闊。靈伽一片蒼烟平。瀆淪海藏拔平陸。欲翳此山議修築。祇苑恆河到處名。何必蓮花坐暘谷。君不見宜興楊挺生。丹青妙絕無等倫。又不見常州董元愷。落筆超然起物外。一爲圖繪一作歌。披圖當奈清歌何。越州萬壑千巖裏。不信城東有補陀。

遊西施山園亭將歸題壁

山爲越王勾踐教美人歌舞處。卽土城山也。今爲商太宰別業。

西施山館倚東郭。曾住西施教歌樂。複閣還留翡翠香。前池自洗胭脂薄。我來醉酒正陽春。大琴小笙壓上津。春寒日暮欲歸去。一樹桃花思殺人。

上浙撫軍東巡詩

元精鐘嶽瀆。勳望聯台塔。分符專外關。授律尊中臺。雙旌白日映。六纛青雲開。雙旌六纛連天起。白日青雲繞江汜。虞廷九牧咨上公。唐世諸藩建長子。藩屏牧馭捍衛良。司麾正值東南強。斗牛區野拱神服。吳越都會躡輿疆。春潮初發固陵渡。二月東巡啓戎輅。錦纜新開龍鳳城。飛梁自駕鼉鼉路。金牙翠羽並沙轉。將指滄溟闢廣遠。樓船下瀨揚漢軍。弩石連山運秦輦。蛟門蕩蕩海上開。從行願賦東蓬萊。桃花飛作春前水。自有金鼉渡海來。

錢生行

送錢霍也。

黃槐花落堆路隅。錢生醉借東城居。翰林主人曾問字。朝餐還饋金盤魚。涼風團團逐雲走。白馬紅軒蔽高柳。秋霄健鶻思入雲。撇眼摩挲薊門口。薊門萬里薄塞城。此中那得留錢生。王侯邸第將軍幕。虛裁折

簡相逢迎大兒乘槎上天闕。小弟裝金使南粵。祇留屠狗抱關人。燕市悲歌看明月。春山西馳不可待。金馬門前歲星在。玉女空簪鸞頂花。蒼龍枉擢鱗洲菜。繪衣膩帔抱史書。欲行無翼難追趨。鴻飛冥冥附天末。弋人纂纂將何如。昔慚柳季漫相許。今愧錢生更超舉。兒童攔路牽錦袍。賓客當車致綺語。持柝挈榼送遠程。翻然竟逐錢生行。秋風淅淅秋雲散。江水東流空復情。

錦筵桃花歌爲周公子玉忠初度

桃花初發清江春。朱門又值懸弧辰。汝南公子瑤島客。長與桃花比顏色。庭前春酒一百盃。麻姑買向餘杭來。泠泠如玉白如水。願汎桃花獻公子。持之欲飲泪滿巾。先人曾作金華臣。鼎湖龍去叨侍從。留得丹砂滿銀甕。蕭然高寄四十年。綵衣又復桃花鮮。年年二月春風發。看折桃花上錦筵。

壽邗上王夫人

邗江激激連淮浦。有母賢名播江滸。弋雁晨炊隴上星。丸熊夜坐燈前雨。年來八十齒轉高。稱觴舞綵皆賢豪。西河游子懷芳節。猶望楊州廿四橋。

湘湖採蓴歌

鴨鳥山前春欲暮。阿子前湖採蓴去。藕根菱葉生滿湖。艇子灣灣不知處。畫竿十尺挑碧絲。香葦宛轉生華滋。山前山後人難遇。採得盈筐欲寄誰。

徐電發曰。宛宛儲古情。樂府之遺。

章天節曰。西河七古擅短調。要是初唐正宗。

單廣文初度

先生手挹仙盤露。早向南山拂烟霧。篋底新藏柳粲書。人間爭誦張衡賦。絳紗深處自傳經。久有安車詣伏生。堂下啣魚曾卜象。庭前綵鳳舊知名。今來喜共香山飲。通德門高到來諗。不信樽前奏綵衣。試看天邊散雲錦。時七月八日。

李日燿日焜同解省試有感

生平自恃鸞鳳姿。不與凡鳥同宿棲。所交老成皆特達。少年不敢爭雄雌。有友名高被謠詠。曾徙塞外二子遺。早驚夙慧肯委贄。敢云左挈而右攜。一朝顧盼刷毛羽。摩天拂日同時飛。自憐老大困車轍。兼之良友轉邊陲。轉因二子驟發跡。拭目不覺雙泪垂。上林飛飛有歸雁。春來繫帛嘗相追。他年扈從陪羽獵。萬一得傳使者辭。

赤毛行贈姜之琦公車

赤毛生神鷄。磔磔稱豪鷹。騏驎產洼渥。削耳杉竹成。會稽才子姜武孫。揮毫灑墨如翻盆。進賢八代好家世。垂老未入承明門。生兒晞髮甫就試。便向金臺獻名氏。內苑轟傳奇木文。草堂羞教侯芭字。古來傑物生有因。櫪邊老馬真英神。

壽王將軍

高牙百尺橫江啓。獨坐中樞繡幃裏。劇孟肝腸熱似雲。嫖姚風骨清如水。龍韜虎略轉戰開。男兒三十竄雄才。春江千頃桃花浪。瀉作軍前酒一杯。

青雀吟爲祁中丞德配商夫人壽

爛柯山前楓葉黃。西來青雀銜玄霜。翩翩神女雕錦裳。長懸玉珮寒花香。上堂拜母曰母疆。提壺願進青瑤漿。元英之始十月良。明飈暄日當春陽。黃金爲壘玉作觴。維予亦得瞻苾芳。伊昔司憲抒紀綱。夫人每預緘青箱。靈修浩蕩還帝闈。碧霞遽授刀圭方。遠公曰。顏魯公殉時。云陶八八授刀圭碧霞。仙去。舊作紫霞。誤。夫人偃蹇稱未亡。從容勉子爲范滂。況曾幼侍太傅堂。喜吟柳絮因風颺。只今願婦盈閨房。金箱玉篋分象牀。東方日出照杏梁。少者挾瑟中理粧。從來三婦成豔章。其中鮑妹尤非常。寒花燦燦錦帆張。滿堂應製天孫襄。微文乏彩慚飛鳳。願同青雀低相羊。

附西河越詩選例曰。若閨秀。則梅市一門。甲于海內。房中願婦。博學高才。庭下謝家。尋章摘句。其他巨室名姝。香奩綉帙。董陶徐鄭。詠覽頗多。玉映靜因。流傳最久。又西河詩評曰。忠敏公以大節自見。闔門內外。悉隔絕人事。以咏吟寄志。侍妾家婢。皆能詩。可盛事也。商夫人與子婦。楚纓趙璧。女修嫺。湘君卷。講究格律。居然名家。嘗見奕喜曰。近方共作選體。然已能彷彿惠連。道蘊非其比。

西河文集

蕭山毛奇齡字大可稿

遼公阿蓮較
姜燦英三較

七言古詩五

樂府新歌全伯兄大千擬謝功曹應教作

漢家伊洛本京畿。梁王樓閣擅閨闈。大道雕甍十二翼。曲房繡幔幾重圍。日出紅櫺疑鏡炤。雨飄翠網似絲飛。蘭牕玉女爭妖豔。雕鞍公子鬪輕肥。北里笙歌新宛轉。南鄰桃李舊芳菲。何悟流雲能作黛。判將新葉看成衣。鳥鳴私弄妖華瑄。花影重移帝女機。碧波欲漲眉痕淺。斑竹初生泪點稀。游童挾彈從教聘。蠶妾移筐始畏饑。才子五侯中第返。使君千騎上頭歸。不信羅衣半夜變。詎知華轂詰朝違。疇能結帶非雙縷。若箇沉釭無九微。團扇障聲猶障面。長琴連軫亦連徽。生兒年少爲盧婦。上客吟多是楚妃。拋繩舊事隨春電。覓鉤殘粧及晚暉。莫向屏前怨日出。自有花間歌露晞。

宋憲使雪中飲席

越王城頭白雪墮。宋公臺下朱旗翻。毛姓抱刺走滑滑。開懷交槩謁者煩。宋公望見倒屣出。後閣重開雪如織。瑤裾珠履填滿堂。共見毛姓動顏色。沈沈官舍止且留。恍疑身在蓬瀛洲。梁園賓客重嚴馬。鄴宮飲

讌來應劉。當杯卓犖論今古。睥睨如虹氣如雨。天人要妙多可陳。輓近紛綸少相許。青箱縹軸萬餘疊。世本從頭細標揭。韋相能傳楚傅詩。楊公自授關西碣。清譚滿座酒滿壘。當前誰是乘時才。嘆生五際大文。作歌成四壁。悲風來自憐。置身苦不早。世事浮雲總繚繞。未識南樓詠裏情。徒傷北寺車中草。公自題出北寺草嘆息。遂巡欲退轉蹶躡。何幸相依邁前哲。剡川早有戴安居。南郡將留仲宣轍。君不見宋公暫止會稽署。將赴臨安臬臺去。第五難遲浙上車。寇君不借江東路。寒風相對飲醇酒。朝發山陰暮湖口。東西相望去住難。一聽清歌一回首。君不見平臺飛雪賓客多。毛姓對酒呼如何。

維揚贈姜侍御圖南巡鹽并祝初度有詩

長淮浩浩出桐柏。上引江流下邗澤。揚徐舊地斥鹵遙。炙素熬波海濤坼。當年齊相計利開。吳王煮海雄齊臺。木華作賦無遺句。桓氏成書有軼才。蘭臺侍御掌文史。更作巡方繡衣使。巋然霜陸二三人。治此鹽官幾千里。高冠柱後平準書。豸頭豹尾懸商車。烏衣監部識門第。白簡彈人工走趨。此方懷舊得遺烈。漢代張綱棄車轍。君今攬轡頗有餘。況復從游盡英傑。良辰游讌載美酒。長向隋堤看楊柳。自笑毛姓淪落人。乘興還能廁奔走。蕪城草黃時苦寒。城邊游子衣裳單。多君理財日無已。天下未有如財難。東西繹絡征戍繁。可憐轉粟江淮間。書生開口理民用。不登要路言亦頑。男兒有才須早立。姜君侍御方四十。

須邪行有序

里中貴君金書幃子來。生卻之於其塊情。

須邪復須邪。巷裏生諠譁。瓦礫撇撇墮。烏鴉近前問何人。云是來生行歸家。寒風西北來。吹出衣中紗。入

門何所有石甌浮魚蝦。門內何所見不見蟲蠹鳥。與蝓蚪。但見滿壁綰結成秋蛇。東鄰有好女。本是邯鄲媼。練裙八幅不刺花。願生爲書之。生乃對此長咨嗟。西鄰有賈人。日暮載一車。美酒百甕黍千斛。爲我大書雲錦如朝霞。我乃前致辭。願君勿爲呀。君不見鹿幘堆左壁。飛蓬索索垂髮髻。又不見鹿鞞堆右壁。着履踏地胝紋斜。嗚呼須邪復須邪。

遠公曰。來盛夫善大小篆。工詩。尤好叔氏詩。時與游。然最貧僻。叔氏嘗曰。見盛夫。祇覺磊塊無平事。

將渡江贈日者過訪

道人過我青谿堂。荷花滿池白日長。我知凡事皆有命。君能縱譚我能聽。十年躍馬志未成。今來重向清江行。君歸若遇秋風起。莫問江東張步兵。

陳黃門台孫病中招飲賦贈

兩年兩至淮陰城。敝衣懷刺羞禰衡。幾回欲問元龍狀。百尺樓高那能上。今年我從中州來。清江未渡猶徘徊。元龍豪氣果無敵。況是文章老宗伯。我來此地不一逢。枉作梁王倦游客。平明挾帶到門遠。正值陳公病偃蹇。門生扶病籃舁前。深恨從前見來晚。青蘭繞屋芝滿堂。金壺玉椀傾寒漿。座中羽客傲五嶽。庭前佳子超諸王。斜陽冉冉拂高木。細雨牕紗度紅燭。擲塵揮杯總樂方。挾矢張弓坐追逐。夫君今作臺諫臣。當時曾宰春江濱。霖曰。黃門曾爲富春宰。春江江郭跨東越。萬里迴潮瀉飛雪。每到三秋水落時。一望西陵最愁絕。西陵游子去復來。逢君又是榴花開。病中記得觀濤處。愧少枚乘七發才。

宿山寺書壁

小溪浙浙覆草裏。大溪瀼瀼長松間。高崑雨聲落松葉。一夜冷徹桐君山。山中寂歷忘近遠。再宿始知路深淺。南朝寺僻春到遲。我來四月猶花飛。

黃姑取妻詞四章 有序

毛姓已渡江。與友飲馬洲城東村。村人兒贅前村家女。置婚儀。議離處數年。至是年七月六日。適合。姓見此。戲爲作此詞。有生倫比似者。稍稍諷解。

黃姑取妻美爪指。日倚天河織文理。取妻操作理固然。傷心只在天河水。河流秋清白如雪。爪指簇簇心腸絕。人間小女較優劣。嘗恐乞巧坐成拙。

黃姑取妻多綺緡。黃姑兩髀亦見骨。牽牛入市賣不成。歸坐營室泪如刺。當時被驅河水邊。祇少二萬青銅錢。取妻無儀不得前。從來天上亦使錢。遠公曰。荆楚歲時記云。嘗見道書。牽牛娶織女。取天帝二萬錢下禮。久不還。被驅在營室。

黃姑取妻。妻嘗在東。夫在西。妻立機上。晝夜啼。黃姑飯牛。牛不肥。七月七日河滿隄。呼車渡河。汨汨泥河深。無梁艇子遲。着履拂面坐低帷。簌簌隔河聞牛齧。天帝有命夜渡之。城頭烏鵲爭枝棲。銜唇結羽造履梯。露零機泣烏背歆。誰知天河今渡來。

黃姑取妻賣黃牯。七月七日洗頭雨。雨乾水枯黃牯乳。黃姑取妻共一處。黃姑上堂拜阿姥。

試茶歌

東吳種茶白石株。建州數處皆不如。漸西漸東總甘辣。會稽日鑄天下無。春雷殷殷雨花薄。瓜蘆小頭暗生肉。風吹枝亞甲拆長。鵲唇鶯嘴捎雲涼。我來試茶值社後。少婦入雲綠洗手。山頭爛石膏沐多。雪磔霜崖絕枯朽。青絲籠子翦香葉。箸裏焙成卷銀鬣。不需木槩共桑砧。何用銅匙并鐵鉢。相攜且試耶水濱。青黃黑白甘苦辛。粗柑細蘖似難較。雞蘇狗棘非其倫。須臾地爐活火起。沸向花塔石羅裏。半杓疑分乳窟泉。滿船剛載南冷水。傾來清瑩作冰雪。掃卻黃盞細瀉沫。分明眼底見幽蘭。驟使胸中斷消渴。昨年曾向顧渚回。一槍試後棠梨開。宣州瑞草雜紫芽。蒙山石花猶綠苔。會稽新茶真莫並。揚腹頓教肺腸靜。亭前風落增永搖。山頭日色皆清冷。今朝歸去踏葛蘿。明朝飢渴知如何。喉焦舌燥且勿苦。聽我開口歌茶歌。

逢姜九飲

昔年遇爾春城東。山前十里桃花紅。今年逢君值春雨。幾樹桐花落寒塢。壚頭汗漫傾酒卮。與君曾賦春游詞。夏王陵東南鎮西。紅粧灼灼如朝曦。朝行採花暮歸遲。綠楊鶯語春晝迷。可憐春晝鶯語澁。君欲行春待春及。君來能宿酤酒家。爲我且醉山桐花。

桐江王生長身幹一丈餘二尺遇于城東里有長句

君不見。伍胥挺然一丈身。猶能挾弓報楚人。又不見。王商八尺坐未央。單于仰視皆矍矍。君今一丈乃有餘。獨行道路垂衣裾。丈夫困窮亦時有。東方瑰奇挾兩肘。日棲金馬索升斗。不如侏儒飽食且醉酒。毛姓自視負七尺。仰頭看人乞衣食。有時春至戀春色。頽然將老終可惜。我今願君東到蓬萊山。山頭日上花爛爛。挾子兩鬪同追攀。又不然。驅車仗劍出天外。坐子車下吸沆瀣。與君俯仰且有在。焉能僂僂還曲鉤。

依時逐例爭封侯。食糠食肉兩不休。

山居庄家女種蓮子許粒小鉢歷日五銖隱然有鉢底忽花鴨啜去惜哉作蓮子

蓮子有心能作花。女兒採蓮先採蓮。分蓮擊花得蓮子。欲問所遺隔花市。若耶溪頭千葉蓮。風吹蓮葉葉田田。年年上巳自抽葉。不用栽根理雙檝。盆頭有水炤衣履。長洗釵魚作風雨。投將蓮子裹燕泥。囑子泥中發辛苦。團團小鏡貼波出。隱見荷根起抽立。風前捲鬢粧不成。雨下拋珠佩來澀。當塔花鴨睡花穩。竊入瑤欄覓新菌。不念紅衣晚歲稀。竟使朱顏早時損。耶溪五月麥葉涼。畫船兩槳艤橫塘。女兒只向東鄰坐。不採蓮花心自傷。

舊評曰緣情綺靡。隨其寶曲。一往愜愜。

蔡大敬評曰此以吳聲短歌爲輞川長句。

鎌麥詞

鎌麥鎌麥斷簪束刺來子歸家。初夏四月早起着犢頭。看田左右皆陸櫛。獨我滿田盡羊角。暮歸着接籬。看屋左右皆剝糝。獨我滿屋盡羊躡。三春風雨亦嘗有力。田卒歲難逢時。壠頭小鳥日呼叫。架架格格會何資。來子告我當鎌麥。恐歸如我鎌麥詞。君不見前村老翁收麥斛。一甌兩匙貯筐篋。官車粟陸爭載趨。尙揭空筐覆車軸。君不見少婦今朝鎌麥歸。明日下田食瓜菹。

湟川詞贈別

趙王城邊百粵臺。湟川渺渺連州開。羨君南上湟川渡。五月驅車嶺頭路。繁花滿縣雜荔枝。迎君勿訝君

行遲今年竹布裁五種。明年椒穗垂兩歧。紅亭酒香日炎午。五兩薰風動南浦。他日貽君陸賈書。莫向人間道新語。

長歌送顏泰殿北征

黃雀巡檐游不及。蒼鷹飛神虬。雖天蟠不若駿馬馳。丈夫慷慨負奇骨。左顧流沙右溟渤。手持寸莛插重關。足下浮雲蓋高闕。當年定交三市東。綠巾碧髮雙顏紅。輪心對面指山嶽。仰天噓氣垂霓虹。力持壇坫十年久。獨捧銅槃殺雞狗。飛蓋爭馳鄴下才。揮毫共集梁園友。倦游曾著亡是篇。世人拾得驚相傳。珍臺珠樹散霞綵。青霄白鳳翔雲烟。馳驅河洛結瑤珮。徘徊宛委搜瓊編。縱飲那知有時代。同舟便足稱神仙。橫行萬里渺難顧。奪得宮袍展雲路。卞玉誰教暗裏投。邢顏卻被宮中妬。子房豪氣不可除。一椎誤中秦王車。舉頭大笑跋衣履。清江細浪開芙蓉。倉黃萬里帝京道。挾册長安待明詔。幾疊黃金臺上雲。一羣冀北風中踔。丈夫相對意氣真。飛揚跋扈皆殊倫。晴郊一送顏光祿。思殺鏤金錯彩人。

送姜二承烈之都門

丈夫居家不遂意。翻然拔劍游帝京。滹沱萬里白雪盡。薊門千頃黃榆生。輕車揭揭走析下。燕市風雲起叱咤。懸金時上九成臺。挾册當來五侯駕。我從君行祇君轍。讀君雄文嘆奇絕。向使馮唐早濟時。魏郡蕭曹豈堪說。春風吹開楊柳枝。同舟元禮神仙姿。時與史尙轍進士同行會乘虎觀青雲去。莫忘龍山夜雨時。

訥齋詩題史四廷柏南園新居

訥齋先生好園居。前庭一池長種魚。垂幔或臨右軍墨。滿牀盡疊張華書。廬蝸車蠟苦未展。更闢南園重

修翦泥水空纏。下垣丘樊自衛。山中饑當。塔紅藥映虛牖。桂樹團團拂清晝。徑外爭看求仲來。牆東誰是君公後。君今弟子喜更彊。公超成市非虛揚。絳紗前後鬱相望。悠然絲竹彈深堂。堂中顧盼總芬潔。別榜一軒名煇雪。童子飢然土銕寒。袁安醉抱冰壺裂。南山敞廬空自憐。陸居非屋舟非船。難尋西瀼浣花去。僅留北幹松風前。從君願續小園賦。兼賦園中桂之樹。他日能同汗漫游。應記南園讀書處。

看月書事 有序

七月十五夜中元。偕吳二卿禎飲商太宰宅樓。酒酣望月。去廣寧橋。顧見龍華寺。說法事鬼食。漂燈流燎。幡幢鉞鐸。男女鱗脊如畫。便相走觀。卿禎躅足。顧予曰。子才士。需立賦所見。務其覈實。使人省得知。勿以虛叶。何如。予傲元白長句。蹋歌使商命說。徵說各記憶。書于篇。

七月十五天氣涼。酒酣浴罷單衫長。出門連臂看月去。同到廣寧橋下路。廣寧橋上坐萬人。項背軋札如魚鱗。廣寧橋下水波淺。大船小船波上轉。船中所有更奇絕。云是中元鬼時節。明燈灼灼浮水來。萬盞千甌乍明滅。初疑火樹蔽江渚。旋道流螢墮秋雨。橫波落石飛彩星。極浦銜珠散龍女。旌幢高引紙蓋揚。旋風吹蓋陰燐翔。吹螺擊鉞撞法鼓。迎炤當年淨飯王。飯王大坐正設食。盆供盂蘭有名色。龍華作法甘露殊。細灑楊枝散涓滴。橋邊婦女坐相待。各守亡人紙牌在。女爲爺母婦爲夫。炤食從教滌清漑。呦呦壯女向天哭。少婦羞人隱牌宿。苦無紈扇障燈紅。幸有珠旛裹頭綠。吳生顧此發長嘆。謂我長才屈柔翰。相逢若此賦不成。空復從前惜良旦。我歌數句月自來。終歌此曲纖雲開。廣寧橋上人無數。忽聽歌聲首盡回。雨中聽三絃子適女士王玉映將之吳下過宿蕭城西河里因作長句書感卻示

汝不聞三絃聲。最悲調。嚶嘶。誰所爲。天心雨。落風迸裂。坐客一時雙泪垂。三絃初開。彷彿鞀鼓。萬曆年來。重張甫。遠公曰。張甫。張聘甫也。父少塘。祖野塘。俱以三絃傳。曹剛不作。甫不傳。何處新聲到江滸。當前撥拉如訴說。

漂漂嘈嘈。漸相接。絃聲復雜。風雨聲。拍散音繁。語鳴咽。江東女士。當代希會稽。王氏留烏衣。著書不讓漢。時史。織素自憐機。上詩。清暉閣中父書在。綵筆長濡。舊螺黛。吟成紅雨。滴口脂。行得青藤。繞裙帶。王季重

兵憲所居有清暉閣。後玉映徙居青藤書屋。徐文長故宅也。所著初刻名吟紅集。風流遺世姿。獨殊。將從秦氏聽啼鳥。朝行

賈珠暮無粟。天寒袖薄涼。肌膚可憐。兵革滿衢路。欲望西陵過。江去崎嶇。宛轉進退難。祇恐行來且多誤。昨宵行李深巷宿。聞汝空奩脫車軸。今朝寂歷風雨來。令我停絃撫心曲。梧宮木落愁復愁。女墳湖畔今難留。君行渺欲向何所。長江浩浩還東流。蛾眉掩抑自今古。況復哀彈最淒楚。今朝自雨昨自晴。不盡三絃此中苦。從來出處難復難。願君絃絕勿再彈。

半面將軍歌贈陳左府。左府名之驥。西河別有陳將軍傳。

半面將軍年四十。南戰羊城北馬邑。歸來十載青門前。可憐立功尙少年。當時投筆出關去。萬里鳴沙暗雲霧。弭節曾留都護邊。連營不倚將軍樹。乘秋代馬向風發。烽火蕭關動京闕。判將陷陣入邊雲。誰道張弓效關月。長驅汗血仗螿弧。撒卻腰間金僕姑。論功較戰課先後。不讓唐李那讓吳。諸公書當時邊將。十年埋劍在田野。欲向蠻天洗花馬。嶺樹叢叢蔽眼來。瀧川浩浩當胸瀉。樓船南下共楊侯。射獵重教起軍曲。從燔礲火燎顛毛。不拊珠禪泣脾肉。焦頭滅耳志未成。獨留半面哀人情。誰憐射柳亭邊住。竟使垂楊肘後生。

汝陰蕭大行將赴闕東渡過訪扞筆贈別

君不見中牟丈人本負芻。與君並坐甍甍。又不見郢人墜鼻頗未潔。相對揮斤嘆奇絕。丈夫有才貴知己。伯樂鹽車兩依倚。何況蕭君司馬之鑑且無比。鸞鳳集門亦可喜。時殿頭二人出門下吾聞蕭君奉使持節南海頭。還鄉彤馬將淹留。忽當繩纒菅屨呼啾啾。迄今負土已成室。漢相三年將就職。我讀愁吟尙慘悽。況復哀號在疇昔。君家忠孝真莫當。趨庭又有烏衣郎。相隨千里學詩禮。在道一時稱驢驢。與之偕上謝安閣。洞口薔薇正花落。急返平臺拜紫泥。勿教同舍占烏鵲。陽春三月風雨多。離亭樽酒應高歌。胥江渺渺烟波裏。欲別蕭郎奈爾何。霖曰。愁吟。蕭著詩名。

書意贈西昌蕭伯升白鷺洲高樓

北風吹雪下江郭。白鷺洲長暗寥廓。蕭郎開幕燃桂枝。重飲洲頭最高閣。江天飛雪千古情。蕭郎意氣踰平生。清飈遙洗蜀江峽。流雲欲撼西昌城。連朝高會來鷺渚。爭躡湖西講堂履。我登傑閣望江河。君向空亭攷鐘鼓。荒洲相接千百人。東西十郡雙江濱。寒能予衣飢予食。悠然歌詠忘昏晨。丈夫誰不重意氣。揮斥千金偶然事。獨成良會向千秋。那羨平原與無忌。春浮園頭枯草香。雙江雪霽開春陽。奉常舊有好花竹。至今人說平泉莊。期君更作春浮醉。誰道雙江雪路長。

霖曰。孟昉爲今之四君。交滿海宇。春浮園。其別業也。時施愚山先生講學鷺洲。孟昉獨任值饋。給傳爲勝事。西河別有講學詩。見五古卷。

集曲水卽事

青山百屏向南郭。積翠橫開曲池曲。高樓一望秦山陽。流雲斷續梅雨涼。夜來布錦錯燈火。列坐庭深對歌舞。行童十二唱柘枝。招搖背袖低參差。酒酣微幔燭垂地。薌澤微聞墮環細。主人潦倒脫絳幘。尙引清樽炤容色。交盡海內爲名高。相逢不醉徒自豪。驪駒在門車在路。看殺庭前石榴樹。

送任雲蛟公車

九月芙蓉蔽江渚。孝廉船載江頭雨。金樽相把潮欲來。一曲離歌醉南浦。公車十載憐計偕。懷書屢上昭王臺。旗亭雪煖紫貂墮。薊門酒醒黃雲開。春官新制改書義。漢帝臨軒策奇祕。邠氏中林選一枝。平津東閣推高第。長安春轉花又紅。玉駟鞭落驚游龍。秋江潮上金魚美。盡在任公一釣中。

金鑑冰壺吟爲張推官作

金鑑挂高闕。百里無近光。冰壺貯前庭。徹底成清霜。龍山嵯峨起東府。別構蓮堂建鐘鼓。金鑑朝懸紫嶠曦。冰壺夜滴清江雨。冰壺金鑑絕世清。皐陶淑問稱明刑。外臺分節下神讖。朱花綠雀搖空廳。張衡機密棄文網。張釋寬平析民枉。從來張姓本連天。何必張星在天上。君不見張公金鏡獻宸聽。高鑒千秋著爲令。餘光并炤寒士廬。伏櫪長鳴解馳騁。又不見庭前綆綆朱絲繩。銀牀百尺縋寒冰。冰花并乳相映發。一時誰與同廉凌。持壺壽公公飲冰。

讀荔裳集安雅堂集感賦

當今作者誰擅場。山東趙王與萊陽。王公士楨趙進美。妙與萊陽正相峙。崇禎以還大雅絕。遠溯嘉隆紹前哲。總是山東李白豪。能使人間歌白雪。今來三子起方駕。不數風流舊歷下。幾回東岱互稱雄。一出中

原便成霸。黃河九曲到海難。東臨碣石流漫漫。天垂百折亂雲霧。風吹萬里迴波瀾。丹崖山前日初曉。真見蓬萊接瑤島。漢武看成朱雁來。秦王渡處丹龍繞。君文初著名荔裳。集成安雅斯爲堂。大文旣布錦貝息。黃鐘在御瓦缶涼。瑯琊天水渺難卽。惟見延清好顏色。到旣忻從御史游。王筠故受昭明識。每惜今人事工巧。大雅當前罕分曉。但道江郎雜擬工。誰言謝客新聲好。往讀衍波詞。輒思王禮部。長憲與大參。鬱若兩珠樹。可憐同體異工曲。白玉分沙桂分木。從教鳳羽蔽天涯。寧止鷹揚距河朔。于今大雅煩若林。鍾磔三品空沉吟。東看無數滄溟水。一望蒼茫何處尋。

別王恆

蟋蟀方在堂。倏忽歲云暮。窮冬雪霏霏。游子戒歸路。東亭酒煖草葉稀。臨行欲換征人衣。城南王恆負意氣。慷慨向予歌式微。躊躇上馬不能別。韓信臺前看飛雪。

將歸贈丘四象隨

昔飲江南伯通里。便記淮陰有丘子。我今轉作淮上吟。贈君愧乏雙南金。淮河蕩蕩淮水濁。丘子風流絕凡俗。一見應教勝郭生。再觀何必推羊叔。逢來三四是子淵。傾樽暢飲黃花前。道傍不數假王釣。城頭空覓甘羅錢。涼風蕭槭度秋暮。倏見寒冰滿江路。芳草萋萋春又生。愁殺王孫欲歸去。君家兄弟真不羣。元方曾侍金華君。在堂循吏未白髮。中閨金母搖青裙。最憐丘子本孝弟。欲渡廬江見毛義。問寢嘗踰世子篇。敬兄不辨鄉人至。況曾仗節急朋友。一死一生見要久。白馬南馳范巨車。炙雞遠酌橋玄酒。丘曾千里赴胡介喪。吁嗟友道不復持。東行杵臼將依誰。見君不忍辭君去。我欲從君那得知。

毛姓將行張公子弼禕贈姓踏冰行率筆酬之

我行淮陰非得已。不共王孫釣秋水。乞食潛行射澤間。避人還向珠湖裏。曲江才子好我奇。謂我落拓誠相宜。中秋高讌并重九。人前往往稱予詩。飛光如流歲如驚。淥酒黃花等閒度。火樹長留烟水寒。美人竟下蕪城路。嚴風朔雪旅食涼。倦游客子思還鄉。躊躇不忍遽分手。君還贈我哀歌長。窮冬孤客易生感。況復哀歌更繼卷。一曲秦青雁鶩飛。數聲羌笛關山遠。嗟君家世本曲江。趨庭得侍尙書郎。茂先有叔總博學。蒼梧無弟非文章。君才獨絕鮮儔侶。淮海相逢驟相許。曾來夢裏遇江淹。須使花前憶滄父。贈我長歌真有神。恍若寒宵對君語。對君語。感君情。此曲名作踏冰行。層冰皓皓環江城。踏冰我欲冰中度。慷慨徘徊百思生。

西河文集

蕭山毛奇齡

字春庄稿
又僧彌稿

沈宗熹師尹較
何任炎先民

七言古詩六

題畫

薰風乍起午夢長。石榴花發薔薇香。枝頭好鳥最宛轉。啼破一聲枕簟涼。誰持并翦翦江水。繪出青黃與紅紫。醉臥閒亭日墜時。幾度含毫思無已。

奉和葉掌院夫子亭下雜花原韻

先生有亭最爽塏。倚檻如坐春風中。況當三月豔陽發。夸條蔓枝匝地紅。絳纒不用金錯翦。鞞鞞豈與凡葩同。始知大匠貴自得。巧者不若拙者工。有時薄醉坐花下。門紗旒裂遜馬融。豈徒紛紛隔塔觀。宛若女樂填廂櫺。裊衣發藻光愈燦。搖砌擢秀神所鐘。寧題丹棘作野客。不使翠羽稱殊翁。論化羞比漆園蝶。吐飯偶集蒲盧蜂。情閒有觸便生興。道大于物何不容。長安花少客無賴。蒔場藝圃真難逢。但留階屐一顧盼。煌扈安辨澹與穠。子房門下多薦達。當時尙有東園公。

和理椽杙歌

并序

卓妣閩中僮。徽之曾與之渡湖。思不可得。王雙白言見在金陵儀鳳門。能寄之。徽之起製歌。令王歌。授名曰理椽杙。因而屬和言卓妣當理焉。

只在石頭城下住。莫過長干小橋去。但恐年年細草生。不識青溪舊時路。桐花綵綵夜雨多。三春又盡花如何。可憐同在買罌側。猶自城頭理椽杙。

雙珠篇有敘

穎川隣宣公晚喪子。哭之哀。然曾用佛蓮花經一奩供楣間。至是還經。姓以內家過慰。並爲文祈之。迨再過。公祿一兒攜一兒出拜曰。君記之乎。舉此六齡矣。

誰家老蚌生雙珠。大秦明月皆不如。圓泉璧水產有殊。老翁垂白多根株。前年恍逐隋侯趨。今年又入鮫女廬。小珠焜耀照里閭。大珠灼灼盤中居。暮年有子稱商瞿。我翁得此豈晚乎。畢逋共哺頭白鳥。龍門百尺孫枝扶。老人得子草得苓。況復老健彊肌膚。漢家禱嗣張玉弧。靈池百子宮臺孤。採蓮西海蓮未枯。蓮花今且開東湖。雨餘花底珠淒淒。

羅三行有敘

羅三百駢杭州教歌頭。有稱名。甲午集紹興東昌坊。羅三率變童十六人按歌。酒酣執酒起爲壽。慷慨言曰。羅三非優人。盍贈我長句歌。使人知羅三苦沉淪也。姓唯唯。乙未復集紹興九曲里。祁兵憲第。諸伎畢奏。羅三復引聲。乃悲懷激揚。顧笙笛絃索均失執。歌竟爲言。寧得憶贈句乎。姓時頗失意。聞其言。感動。驟起援筆。丐兵憲展絹。憶唐元和白居易與元稹作霓裳譜歌。惟恐湮失。歌句中且藏譜數。猶可

按切影響。今亦略湖緣要。便可尋按。故益多曼吟耳。

周秦以後古歌絕。漢代延年尙能說。逡巡魏晉中再亡。杜夔左驥徒倡狂。開元神武興法曲。高頭教坊譜相續。華原驃國雜塞胡。立部聲喧坐歌促。金元起創鬬舞辭。因之變伎歌參差。九宮分譜限南北。一十九韻音調微。明興一代本無樂。胡吹番謳苦交錯。優伶鬬弄習轉深。南曲浸繁北浸落。相傳南曲始吳下。梧苑風流宛如乍。吳儂創調絜古歌。翻出新聲美無價。當年絕唱稱崑山。松常折噪浙齒頰。張芸朱美魏亮父。至今嗣續猶艱難。杭州羅三重意氣。誓欲尋原奪高第。攝聰絕慧通鬼神。一雪從來品題異。依聲按律節奏奇。宮商相接復相離。涵融便捷鶯語溢。急決噉噉鷓鳴遲。聲沿板定寸爲掙。韻七字三前與後。新生故死黍粒分。迫度緩稽肌理轉。一聲將發坐客定。數變將終動神性。流離遷客涕泪傾。窈窕新娘怨思迸。擲箏摘阮徒自豪。吹師失管絃工逃。吳中譚如并張燕。到此不敢爭鳴號。譚如卿張燕筑數人著聲吳中東昌

坊頭合歌板。首坐毛姓泣何滿。哀吟失職貧士情。那問終趨共前緩。羅三歌罷拉瑤瑟。手把金卮揖姓出。自言不是尋常人。耻作當年李協律。生平好酒名酒徒。結交滿座皆屠酤。上之不屈古王者。其下詎嫌今大夫。千金散盡獨長嘯。故作歌吟雜啼噪。變童十萬蒲伏前。不足當子日調笑。毛公落筆能有神。悲能寫哭怒寫嘖。貌子令子使不朽。至今予作忘言人。昔年聽歌及寒食。桃花滿樹風前拆。歌來倏忽又一年。今夕聽歌是何夕。今歌既讙且復苦。坐者停聲立停舞。寒蟬數弄咽柳條。孤雁一聲墮江浦。洞庭秋風剛葉下。去春在畫堂。在夜霜繁露白月欲明。竹斷絃弛鼓初罷。宛如花底摘生葉。少婦綠絲自成節。嚴鋼鏗處銀鐐涼。冰甕開時水晶裂。又如石齒決金薤。剗核吹蘆擘風籟。屏高燭短坐嘆愁。昔日梨園近何在。蹉跎

相失淹歲月。非我能忘棄。前說我亦沉淪年。又年顛顛相看總離別。東昌坊裏九曲園。高車駟馬填前軒。聽歌滿堂勿相問。此中惟見毛牲冤。毛牲沉淪本無極。那復羅三又失職。羅三當復歌此歌。莫道聲繁歌不得。

憩螺川胡推官虞胄過訪因贈

策杖登嵩高。遙望天中山。羽翼不得前。薄暮空來還。南行入匡廬。逝將上衡嶽。浮舟渡螺川。途憩川上閣。螺川濯濯古司讞。山木清秋曉行縣。云是天中馳檄來。知我窮愁且來見。天中岞嶸產異人。振衣獨對清江濱。宛如嵩高上登日。鬱然相望真嶙峋。嶙峋萬仞動寒色。玉井冰花映天白。不向空廳列鼎書。長懸孤榻留行客。我曾讀君文。嘆君似長卿。金門獻賦後。當入承明庭。今來江上作司理。讞獄如君復有幾。伯始從教博似雲。胡威只是清如水。越人久作汗漫游。橫江又見紅螺浮。清秋一飲郇公酒。醉看朝霞江上樓。

題秋山讀書圖送舊京鄒山人還紫微兼詢沈耕窰徵君

晨星漠漠東陽路。斜傍雙溪晚來渡。耕窰何在高復高。云是秋山讀書處。秋山巖巖跨紫微。相看同着青荷衣。王孫遠道怨遲暮。春草欲生歸不歸。

題抱甕丈人濯足圖爲顧有孝徵君

君不見。彭城畫工有奇技。姜肱擁被終咨嗟。又不見。華陽高士善圖畫。籠頭嵬嵬空隨車。羨君孤處笠澤中。世人誰得窺君容。儼如岌岌千丈深。巖松置之茅屋長蓬茸。吳山之長水之冽。浩浩溪流白如雪。濛濛高隨萬里風。沿洒皎帶千山月。君來抱甕畜畦水。日傍清冷思無已。新蒲早薤紛渺瀰。碧芋青蔣覆溶瀾。

躊躇落日猶徬徨。頽然濯足清溪傍。觸埼激石共奔迫。浩歌睥睨投滄浪。瀟瀟隱見溪流長。

醉歌行同周司理令樹飲于廬陵作

北平于藻爲廬陵令

贛江冽冽吹朔風。司刑官艦沙棠紅。廬陵古署倚江郭。漉酒夜傾花樹中。中原才子薊城傑。佩劍爭看截鏐鐵。草屨牛衣共繡茵。銅槃獸火飛寒雪。司刑自言苦志乖。江高不道能重來。秋鷹脫臂朱電削。神鯨掣浪青天開。聞言坐客醉起舞。我亦哀歌勝梁父。紉紉城頭夜漏長。起視明星落如雨。

譙胡東崑被竊詩并序

甲辰首夏。胡子東崑從郡歸。夫何暴客者。伏隱東崑之室。竊費以奔西河。毛姓聞而笑之曰。東崑有十盜而無四封。向氏探其前而司厲不得揭其後。東崑殆困哉。雖然。銀船雖化。鐵公尙存。篋篋久罄。何曾予壁間之兒。杼柚其空。不能贈梁上之子。幸青氈之未亡。何赭衣之可問。所懼者。未揭篋而膝已絕。甫穿牖而垣已頽。竊裝者祇覆其書。懷璧者但看其舌。似茲寒士之形。將來主人之憎。于是慰其薄失而譙以放言。

東崑先生家四壁。夜有何人壁間匿。杼緯機絲總是空。餅麻罌菽悲無色。從來胠篋羞擔囊。野廬賓客徒相翔。但將國士虛無意。說與河東王彥方。

雨夜斷橋聞笛聲和丁起曹

楊花飛飛落江渚。蘇小墳前夜來雨。平船兩槳何處尋。東風吹落楊花深。前湖水滿欲歸去。草暗裙腰濕花絮。斷橋西上繫錦舫。何處一聲徹雲路。初疑江微吹胡笳。旋聽索索箏琵琶。野塘無復折楊柳。春山自

有落梅花。啞水面斷還接。反覆分明。訴天末。龍吟潭底水淺清。鶴唳寒灘雨鳴咽。紅樓高對十二重。夢回三峽流滢滢。隴頭萬里碧天外。武陵一曲清宵中。我聞桓伊夜吹笛。愁煞清溪赴都客。扶風夜聽洛下吟。尙在平陽里中宅。杭州千頃西水頭。新聲吹出伊涼州。樓船簫鼓日無盡。長笛一聲愁不愁。

贈商繪

商生太宰之幼孫。風流卓犖隨諸昆。珊瑚寶缺映明月。龍葱佳氣開朝暉。永恩樓高百餘尺。旦暮登臨藉遺澤。玉樹還榮謝傅庭。朱衣自繞韋公宅。生裁二十意惘然。蹉跎深悔終軍年。手持一編已了了。心中萬事空懸懸。自言少孤遘荼苦。鶴乳低飛羅網罟。析理難教兄子知。無才不爲家公數。輜駟冠蓋耻追逐。日對遺書冀能讀。池上需爲彩鳳吟。燈前私啓青箱哭。我之從游商兩臣。王孫矯矯其兄倫。慚予不盡柳下學。多君猶慕相如人。從來琥珀謝腐草。惟爾中情最堅好。縱使成連到海難。卻憐侯氏求玄早。君家兄弟定無敵。良友爲龍驥爲匹。荀文未獲侍諸宗。商子終當棄三術。丈夫有志百事能。少年何用哀無成。高樓百尺且長嘯。會看萬里風雲生。

留別劉瑄兄弟

昭華兄弟雄楚州。一時藉藉稱諸劉。論文偉麗過鮑謝。興酣意氣凌王侯。西陵游人看秋柳。邂逅逢君大淮口。拂塵高聽真長譚。刳匏直飲公榮酒。層冰落落解棹歸。嚴飈吹折黃綿衣。他時若問江南信。只看春鴻向北飛。

別戴大金黃大世貴

淮陰城南有飛雁。游子窮冬返鄉縣。雪滿孤舟戀戴逵。波連千頃思黃憲。寒風截截霜滿裾。臨行出入還躊躇。傾罇不盡此時語。開槭頻訂他年書。淮流一曲下江滸。渺渺長帆去西楚。何處思君最愴神。三月江南棟花雨。

送沈九胤范同姜啓赴都

紈綺游上京。翩翩盛裘馬。丈夫貴立名。飾志取相下。懷珠恐迷時。抱匱以待賈。所念在得朋。唱高和靡寡。徐樂論甲兵。歐陽策風雅。歐陽受詩章。句成上書欲。共嚴徐行。漢京力學五十士。惟此乃得當賢名。抵掌不爲辨士策。拂毛直作驚人鳴。三街九市五衢道。列轡聯車並驥褭。時向尙書省裏行。誰來丞相門前掃。我本羈遲子。羨君似飛鳥。橫雲一去幾千尺。送汝將行動顏色。江館留題夜火紅。揚州去路春衫白。桃花初開柳葉新。春江細草波粼粼。作歌當飲餞。欲別還逡巡。到京若問嚴生薦。勿道行歌朱買臣。

古歌調贛南嚴撫軍過訪

白羅無縙裙。白玉無赭釵。黃帝還鼎湖。尙見容成來。容成汗漫走荒谷。越女灘頭種山麓。衣懸貢楚春繭絲。目斷湘南舊叢竹。當年饗帝上鬱孤。至今越女聽啼鳥。

仲秋既望得蕭行人嗣奇訃。適向陽將歸。過別各投泪。哭以長句。并寄孝子荃。以使者行促。援筆煩亂。無所次序。

八月既望白日微。坐客向陽將遠歸。爲言夜夢頗凶惡。故人信音傍烏鵲。荆門剝啄野花墜。忽傳合肥訃書至。行人蕭君六月死。有子哀號數行字。白日在上客在前。分明絹素疑雲烟。星帽曾餞廣陵驛。迴颿寧

返浮槎川。詢之四月乃還棹。五月居廬病難瘳。太君先赴白玉樓。痛殺王戎死親孝。天平蕭君君果亡。行人更作修文郎。顧榮璧軫已摧絕。庾公玉樹真埋藏。生平有心感知己。邂逅曾逢故都市。鳴驢動地幾失聲。化鶴冲天恨無翅。遺書數篋過孔融。嘗唸君賦秋風中。桓譚自能惜遺軼。平原何用憂窮通。但道棘人漫哀毀。扶杖觀棋鎮爾爾。我欲貽詩寄慰言。使者旋行不移晷。中心煩亂寫無句。頃刻封將泪如注。欲斷當年知己心。更問將歸向陽去。

党太守挽詞

雍上露。一何晞。城頭望。烏欲飛。烏飛不飛叫將曙。月落城西白楊樹。不見車驅鎮海臺。但見旌搖汜橋路。汜橋西去江水清。翦錢懷送何爲情。

舒城黃母胡太君挽歌辭有箴

夫謳來斥苦。莊生引緇之章。歌在輓留。漢史吹簫之節。則辭銘未盡。藉以申哀。碑碣難忘。用彰遺德。無他。母儀已極顯融。史誦必開幽窳也。黃母者。龍舒黃畏菴先生之母。平子先生之大母也。閱閱攸傳。本嫺家訓。英華所鍾。餘及閨則。故謝家柳絮。詠之庭前。姬氏葛覃。習諸壺內。不惟扶風之誠。且晚堪型。抑且德曜之光。後先難紀。宜乎經貽子而有丸熊之風。硯與孫而具戴鼈之慶矣。乃當先生出宰西陵。憶太母咸來湘水。潘郎西去。共傳板輿御母之文。曹氏東征。猶有農野安民之句。雖萊蕪介吏。貧自生魚。奈潯陽哲幃。力能封鮒。以故人之稱之者。可謂使衆以慈。而已之推本之。必曰伊予有母。無如月蝕中閨。星流古署。玉棺降于鄴下。白帽裂之南徐。陶侃自亡母。潯陽二客欲沖天。安石未還山。江左遺民如

喪妣。故旣禮奪苴麻。節哀。邠國權移金革。屈職山濤。然而靈旗搖曳于江令之祠。丹紼牽援于許公之宅。龍門雖遠。芻前奠酒多人。馬鬣未加。石上留題有字。返舒江而曾葬。發哀者定多武昌名士之車。渡浙水而停綬。留殯者豈無杜曲驚人之調。況乎洛陽賈誼。久著膝前。江夏黃童。竝推孫子。歌鹿鳴而嗣服。聘龍駒于再傳。是則百藥因大母命名。文若以小孫起譽。猶且心摧洗馬。不育于母。而育于劉。腹痛元卿。不慈于親。而慈于祖。四齡哺育。口授毛詩。十載艱難。躬先顏訓。彼撫琴長慟。本多罔極之思。乃負柳將歸。又有陳情之請。則仁人孝子。安少蔡邕罔愧之辭。曉蓋晨輜。可乏袁子難行之唱哉。因作哀歌。各成長句。

塗車且勿行。芻馬且勿追。勸君搖大鈴。聽我歌輓詞。君不見。尸鄉從人惜朝露。白日娑娑郭東路。又不見。潯陽處士怨空木。湛湛春觴夜浮綠。人生修短安足知。芳名要在能留貽。不見舒城黃母今還歸。轎帷縹緲江之涯。江東士女咸哀思。不減伊吾執紼爲歌詞。問母何以竟得之。母之扶桐倚車者。曰蕭之父母躬導親輿蒞茲土。墨綬垂來掛綵涼。清泉煮就遺羹苦。方春山縣花滿堂。後庭有母來稱觴。冰魚自貯雕盤獻。綵鳳還銜紫誥翔。雕盤獻饈接晨暮。綵鳳飛來倏飛去。人云東海亡所師。我亦西州哭何怙。冢孫平子對我說。四歲慈幃舍呱。情苦難教李密陳。心慈早爲元卿竭。流離十載兵革間。旅茅斷舶荒烟寒。毛詩口授甫了讀。蜀帽手縫猶未安。我思太君初太息。更復聞言重唧唧。賢哉有母長若茲。萬載千秋似一日。君不見。將歸召父不可求。一時臺使爭相留。又不見。膝前孝廉最憔悴。不作陳情亦流泪。

爲商生贈吳太保詩西河代人詩俱不存此係商兩臣抄入

鑑湖八月秋水融。金塘十里青芙蓉。越中遺老盡耆俊。其中尤健推吳公。吳公少小射猛虎。羽獵曾經負
彊弩。奪得翹關第一入。望重燕城數千戶。金書鐵券累代傳。中朝司馬前名賢。紹衣兩世公再振。鉤陳羽
衛相盤旋。東宮出傅長宴見。至尊復召南薰殿。晚食嘗餐祗帳糜。朝陽親賜雕輪扇。予之內舅公難兄。同
官先作金吾公。公之難弟懸豹尾。侍御南臺掌文史。鳴珂舊里三棨列。相見還留半牀笏。悠然故國山澤
肥。共返金塘看新月。沉沉甲第繞鑑湖。花間畫戟垂朱弧。酒酣耳熱尙拊髀。青天白眼誰吾徒。生平負氣
喜壯節。每嘆袁絲少奇烈。信陵何處訪夷門。越石終教解繯綫。公家事業留史編。公家世緒長聯綿。獨難
志節永皦皦。秋霄健翮爭攀騫。君不見芙蓉八月鼓蘭棹。七十吳公似年少。

古薊門行

少年結束從邊游。腰懸寶帶金吳鉤。新隨彊弩出懷衛。躍馬欲行雙泪流。青天銀鶴渡榆水。昨日羽書來
薊丘。烽烟四起塞垣動。朔風一夜關城秋。燕兵索戰破紫嶺。漢將近前踰白溝。此去定追朱鬣馬。臨行不
換黑貂裘。但隨彊弩後。何日大刀頭。

羽檄起疆場。神兵下朔方。誰言無所恃。大將出中堂。驅車揚風沙。拔劍銷欃槍。北經月支窟。西抵樓煩王。
薄暮宿南亭。朝行過東光。戰陣踰驃騎。軍營作護羌。寒風效矢急。白日同沙黃。殺氣薄寒鐵。敵運猶枯楊。
可憐流蕩三城戍。復有招來六郡良。突騎不收司馬節。擒生羞逐羽林郎。採花判結于闐女。醉舞新成石
國裝。但教寒外春風發。那道城南秋夜長。

西河文集

蕭山毛奇齡

字齊于
行十九稿

姜之璜西禮較
姜之琦幼韓較

七言古詩七

此卷自巴亭放歌以後。舊刻入

第二卷。今復分此。刪若干首。

童園石評曰。西河詩。氣骨全似少陵。而妙麗精工。無美不備。體曹王之瓌瑋。抽徐庾之清新。如丹山鸞鷲。光彩陸離。如建章神
明。挾雲飛雨。又如匡廬之瀑。赤城之霞。標舉上出。絕無依倚。讀西河詩。益歎其高且遠也。此園石寄西河書中語。今附識此。

泛舟過秦園留贈秦翰林松齡有作

芙蓉湖上曉雲生。畫舫還爲湖上行。碧草千絲含日映。紅粧幾處照波明。平橋入路開朱榭。曲澗深深林
裏瀉。秦伯城隨南泝迴。春申祠在東峯下。祠前流水自年年。宛轉潏洄最可憐。不從梁氏花溪度。只在秦
家桂樹邊。秦家桂樹生烏子。文石爲池蕩秋水。別巷應通解玉坊。前關並築燒金壘。烏棹紫木夾層樓。大
府錢堆馬埽溝。北谷繩床春自偃。西園翠蓋夜爲遊。暗通瓴辟循環轉。細激連珠波面捲。出地疑分太液
來。去天不道承明遠。滄州自古惜沉淪。花底偏逢翰苑人。潘岳娛親推綠輦。謝公攜妓坐紅茵。風流盡日

開三徑。自笑多年隱名姓。門投張儉已還鄉。廡下梁鴻豈亡命。一自浮家願屢違。吳中築室故人稀。君家尚有清冷水。何日重來一浣衣。

鴛湖黃子錫自號麗農住茗南癸亭種瓜自給予在淮西道遙題此詩

黃公最愛菰城山。攜家避地嘗往還。自辭楚相不得意。荷鋤欲老青苔間。平田十畝啓幽壑。招客還留癸亭窟。春半閒炊松飯香。晝長臥看瓜花落。烏皮小几拂紫絲。興來每欲圖東菑。嚴關醉臥淮西客。爲汝題詩思復思。

息縣阻雪同諸公集何景韓梅花書院有作

我遊淮西三遇雪。雪酒一醉懸瓠池。今來雨雪阻新息。出門泥濘無馬騎。高陽好友漉清醕。爭道梅花發前洛。繞屋頻燒五木盤。捲簾邀看三花雨。辛蒸薰錯羅苾芬。豕臠蚶醢青羊臠。興來高詠和集叢。酒酣噓氣爲同雲。周燔獸炭澆酒熱。重見寒空攪冰冽。幾斛明珠撒瓦檐。萬條翦毳拋銀埒。相逢同是作賦才。夜深秉燭還登臺。洛陽縣令煩趨走。莫遣明朝掃雪來。

射獵歌爲金公子敬敷作

汝南公子好射生。天寒射獵城東行。申陽一關跨九塞。招來游俠俱有名。平原積雪滿叢薄。上蔡新羅縱搜索。黃帝祠前雉漸肥。白牙岡上桑初落。雙鞬壓臂掣皂雕。桃花叱撥嘶來嬌。銀翎割就穿珠簾。碧血凝將淬寶刀。鞭梢倒插如蘆管。新織罽衣偏後短。腰帶橫垂海貝寒。指環細夾霜貂煖。虛彎明月過雁驚。忽然箭落秋雲平。青天毛血灑如雨。韓盧宋鵠空營營。枯蓬燕肉當寒燒。地冽沙冰阻長道。望得黃熊驅不

前。擲卻瑠弓自調笑。斜陽入地馬若飛。懸禽帶獸盈金鞵。歸來但索駝酥飲。醉臥花前金地衣。

金公子射虎詞

蔡州城東夜飛雪。公子朝裝絡寒驥。錦柙抽將練影長。角弓開處霜膠折。平臯木落狐兔稀。風吹淺草蒼鷹飛。近前雪窖有猛虎。暮寒攫雀嘗苦饑。中原神物應樞運。樵採年年不相問。豈是將軍在北平。只因太守爲南郡。圍場突出公子豪。從來豸虎將終驕。同行雄帥伏強弩。獨遣健兒燔積毛。般般三獸起鬪格。吼入深林蟄雷坼。觀時朱亥尙倉皇。射得張昭動容色。長楊羽獵會有時。汝南公子真雄姿。請君暫息長鯨飲。聽我爲歌射虎詞。

送史尙轍進士過夏口兼寄丘學士

時學士爲武昌別駕。

晨裝欲動海鷄鳴。日出河橋相送行。繫馬未辭王粲宅。前旌先指武昌城。河橋日出輕攜手。爲食嘉魚過夏口。去窶秋翻北渚雲。啼鳥夜宿西門柳。故人遊宦滯江鄉。十載還辭白玉堂。共道秘書懷謝監。翻令別駕得王祥。從君昔在枚臯里。憐我貧依漂母傍。飲酒不嫌車下醉。逃名時就壁中藏。漂流歲月同虛棄。惻惻相思成往事。況汝春官舊主司。杏花開後慈恩寺。史禮闈出學士門下。官齋對酒洗征鞍。醉後應看江上山。若問行來何所見。但言遊子不曾還。

姜武孫評曰。純于意調綿邈中見神思悱惻。反覆數過。似便有唧唧不能已處。此豈徒優孟右丞者所能到也。

丹陽城下作簡郡司馬

丹陽郡裏秋楊綠。不見當時舊劉穆。鐵甕徒懸鶴鵲棲。金盤不貯檳榔肉。峴嶢雙闕古郡臺。丹陽司馬今奇才。方輿偶屈陳蕃坐。錦幘真看謝奕來。高牙傍海發葭鼓。萬疊寒濤散樓艖。典兵自昔重南徐。雄鎮只今推北府。江東遊子歸較遲。登樓賦罷將從誰。重來丁卯橋邊路。欲把垂楊幾度思。

過江南奉謁周侍郎值其行部留詩代訊

我懷周侍郎。愴慨不得見。手把三年袖裏書。漫字紛紛落如霰。盧碕夜走江路長。東浮淮浦西潯陽。侍郎久作南藩使。每過江南願投刺。踟躇側促終不前。將投叩隗行蠻天。姜生呼我汝南去。路出龍江幾回住。斯時正好謁侍郎。又當行部留維揚。我昨渡江來。巨浪高于山。天風萬里吹不定。烏雀飛飛空自還。前灘舳舻擁波白。獨駕孤航片帆窄。海豕江魚轉鬪爭。篙工柁女愁顏色。昔讀侍郎文。怪其有如此。浩蕩奔騰勢無止。直下如傾七澤濤。橫來不斷三江水。孤航相向宛如曙。恍與高齋覩晨暮。江邊況有蔣侯家。小村青溪舊曾顧。十年出處同嶮巇。懷人何必吹參差。倘尋結襪留歡處。只在乘船破浪時。

楊將軍美人試馬請賦

將軍航頭載美人。春行晚泊橫江濱。斜陽墮地草場闊。酒酣欲試紅麒麟。美人常服雙袴褶。青錦鴉欄紫絲結。蟬鬢當風捲似雲。馬毛散汗吹如血。金錢壓口玉袜膚。馬前細立秦羅敷。見人羞上還將墮。壯士驚前不敢扶。調鞍整轡坐不定。忽見桃花滿春徑。將軍似妬九華羈。在傍休視雙金鏡。明霞片片爭繞林。紅游落處桃花深。回頭失卻真珠櫟。春草蒼茫何處尋。

曹叡可舊評曰。以見人二語對仗成文。可謂入化。至若華鬢起妬。金鏡生嫌。幾于魂與。何止色授文至妙處。即偶然調笑。俱臻神境。

飲巴亭放歌并謝朱三驩元馮大之京王十文鼎王二漢

泥泥草頭露。不涸春桑枝。傷禽驚離弦。不解彈縵絲。可憐數載滯江滸。曾得相依駱明府。集木難教逐鳥
烏。當筵詎敢題鸚鵡。盤中食梅長苦酸。冰絲還結絺袍寒。誰攜美酒召我飲。居然高會巴亭山。金盤玉罍
勝三雅。兩兩醵鬢似審俎。小字曾爲明府知。清歌不在王郎下。行觴雜坐飲未闌。玉釵錯掛微臣冠。流離
之子久失意。那復斗酒能爲歡。從來聽樂惡哀嘆。我未聞歌已腸斷。嘈嘈絲竹空滿前。誰使飛鴉渡河漢。
三條裾子染竹黃。一雙素手如秋霜。擎將碧玉欄邊酒。傾出眞珠甕裏漿。傾漿重起歌結襪。渺渺愁心過
綠髮。座中可惜是毛姓。莫遣巴亭待新月。

巴山酒壚送王十孝廉北行

巴山秋市懸青帘。市中卻逢王孝廉。當壚十五洗栝杓。眉間撲粉如紅鹽。楓林百尺日初照。惱煞王郎尙
年少。五上公車十二年。碧髮重遮綠羅帽。巴山城下秋水清。壚頭醉送王郎行。明年我亦來燕市。看汝春
風馬上生。

將出巴城道寄徐十五緘

春風吹葛條。蘼萼被溪曲。巴城舊酒壚。又見雙幔綠。酒壚雙幔綠如草。將去巴山出東道。記得來時秋雨
零。我投蕭寺徐生行。秋雨淹寺門。徐生行且住。惜也三日留。仍向雨中去。雨中一去秋水寒。聞君久滯豐
城間。至今草青及春暮。不識君今又何處。十年奔走不得志。道路相逢偶然事。南北東西各自馳。誰復風
塵訊騏驥。我數游南昌。潦倒無一詞。羨君慷慨歷落千回思。去年雨中讀君句。恍捲長河向天注。一任秋

霖汨馬牛半入寒空散烟霧。登臨若此真可惜。何處天涯少蹤跡。但使能留高士亭。無須更作名王客。巴城二月春草薰。城頭黃鳥啼紛紛。我行記得君行日。欲出巴城轉憶君。

春夜飲就亭花下見施二公子彥懋當筵賦詩有贈

神龍墮地便生角。鳳雛出林成羽毛。不見宣城施彥懋。少年特達傾人豪。春花初開啓官舍。豪客當杯酒如瀉。錦袍綠髮衣帶紅。搖筆熒熒燭光下。燭光映筆筆花落。展卷生風動油幕。滿座咨嗟倒白波。一庭風雨翻紅藥。高陽舊里擅才子。元季雙慈近誰似。毛姓夙歲曾渡淮。但見楊家一童子。西河楊童子歌見前宣城文章將起衰。庭前卓犖真龍媒。毛姓自傷徒老大。見此不覺心爲摧。強顏捉筆擬酬和。舉手落蓋空徘徊。看花愁見新花開。

紫芝山歌有序

施公分司築亭于臨江城南之瑞筠山。忽紫芝數百本繞亭叢生。南昌李宗伯碑爲之記。且更名此山爲紫芝山。而標諸亭。越數年毛姓登亭而歌焉。

毛姓走天涯。歲歲厭春草。曾採三花不得還。空臥嵩陽歲將老。踟躕地上苦未閒。西游重到匡廬間。湖西丈人倚青嶂。宛若姑射難躋攀。丈人有佳興。云在城南山。城南山頭有亭子。紫蓋團團碧雲裏。背阜橫當古郡臺。前林直傍清江水。丈人築亭年復年。當時異事今還傳。紫芝本靈草。斯地瘠難種。亭前忽見湧銀甕。彷彿丹青間。九彩睹翔鳳。又如珠焰發丹穴。芝草之花滿丘垤。採之亦不窮。斲之亦不竭。如盤如椀。復如蓋。輪囷離奇。壓車載。悔不當時負未來。冷以當糧。紐當帶。以此呼此山。亦名爲紫芝。靈蹟嘉名又一時。

未須四皓返商洛。先看三秀生銅池。迄今採芝已不早。尙見山頭此亭好。毛姓慨然登此亭。幾度亭前聽啼鳥。清江初漲江水長。山風細拂林花香。游絲飛絮裊衣帶。遙天望眼空茫茫。我將舍之去。念此芝草芳。紫芝之草有時歇。芝山勝事無時忘。君不見紫芝山頭勒碑處。有客哀歌不能去。

姜承燁曰。有施愚山先生翻本見湖。

西倡和集。此紹原稿多六十一字。

陳柱國將軍期宿鎮山。遂汎舟集南塘。同張杉平津李章姜。峻商命說徵說兄弟作。

天星出地馬出關。將軍夜宿城南山。深林列火忽如晝。與我高會叢祠間。平明鼓吹結珠勒。毳帳重映波白。合艦同尋賀監湖。毛生真作平原客。湖亭日上林影疎。金刀自鱸秋湖魚。西園才子分彤管。南國佳人披錦裾。平山十里勝金埒。頻挽睢陽弄鵲血。獸炭燒成越嶠雲。駝酥點作燕山雪。歡娛短景苦難駐。秉燭還題樾臺樹。皎鏡東飛錦纜開。將軍夜唱迴舟句。時迴舟聯句陳爲首唱。十年長避追吏馳。還鄉尙咏平林詩。滕公豪氣真無敵。羞煞山陽衣褐兒。

西江送春曲

送春歸。春歸在何處。江草茫茫江水長。不識春陽去時路。楊花墮地吹復飛。草間蝴蝶沾人衣。游絲百丈。綰欲斷。平沙白日空遲遲。江邊酒壚十五女。不解春歸客心苦。紅帘日落炤眼明。猶唱陽春當金縷。陽春唱罷思復思。可憐又是春歸時。

漫歸復行書孔雀行關樓謝趙明府

趙棠溪先生時爲蕭宰。

孔雀披金花。南飛畏剝尾。白璧光芒受世疑。子長繆綆非其罪。東門拔劍不顧歸。十年還視桁邊衣。廳花結網無鶯度。戶草張置有隼飛。張置結網遮無路。欲渡蘆碕行又暮。趙相真看解印來。外黃重見擗兵去。南飛孔雀北度鴻。將垂巨翼乘長風。臨行不辨銜珠處。啄盡關前花樹紅。

沈華席上同張杉王鎬錢霍王元愷平津祝弘坊并憶沈九秘書時九月八日

吳興沈華宴賓客。毛姓晝逐朱家來。相逢衣褐把美酒。當筵意氣爲之開。連年變姓滯江表。衣上風沙不堪掃。高陽滿座相顧殊。只有沈郎顏色好。悄頭碧髮裹絲羅。銅鑿灑激傾金波。阿兄簪筆掌文史。方蓄新菱染麻紙。翱翔入作親近臣。家留賢弟能娛賓。紫薇院裏張紅幔。白玉堂前鋪錦茵。憶昔山陽度廣柳。曾別難兄醺杯酒。今來江上覓蘆碕。尙藉平原匿好友。平原好友真足誇。姜肱繡被平當家。時予留姜桐音平載問宅。玉椀甫看分碧藕。金錢又見拆黃花。黃花滿地中心苦。忽集華堂思如雨。明朝倘約採茱萸。莫負山陰柳家女。

予屢歸不得釋穴屢過湖西施公苦相留日留日刻留刻適就亭鸚鵡三脫三復返予刺傷于心
因爲賦鸚鵡還詞

鸚鵡還。鸚鵡還。相思只在隴西山。隴西萬里思歸去。休挂人間畫欄柱。畫欄雙柱玉籠垂。金鑲連環控紫綏。欄邊言語應憐汝。心裏分明卻訴誰。卻訴誰。應憐汝。早知苦。分明何如不言語。潛潛啄我紫絲縑。密密捐予金鑲條。潛潛密密終教去。金鑲紅縑何用住。且避玉椄林。且上石榴樹。初疑小樹上無力。既道長林遷不得。別苑猶牽紅兔羅。遙天只墮鵬蒼翼。蒼鵬紅兔走復飛。躊躇去此將安依。他鄉好主應難遇。故國

多艱那得歸。一去復一還。主人相對啓歡顏。相思仍向深林避。再去再還非主意。主人破柱且開籠。不道三回仍未逝。仍來逝。主且憂。尋殺欄邊紅石榴。石榴牆外行難測。手執紅縑淚沾臆。縑亦漸就促。鑽亦漸就短。一縑三續尙堪披。萬水千山何處返。鸚鵡還鸚鵡。願君仍住石榴間。石榴啄罷傷紅紫。願君仍住紅縑裏。紅縑臨繫翠衿住。主人淚落不能顧。

徐敘公曰。西河暮春在臨江思歸。愚山先生哀留之日。過寓相慰。且假以他意。捱日延月。不得已放歸。則又假他使護之行。豈歸而幾墮于隕。愚山強留有爲也。窮途賓主。流連可哀。三覆此詩。雖千秋萬歲後。猶應破涕。

姜垚招登香鑪峰絕頂同姜十七廷梧商二徵說

秋山翠窺海日紅。浮暉倒映金芙蓉。蒼崖負杖招羽客。攜我直上香鑪峰。楓林黃葉下幽壑。杖底風吹草衣薄。石屋高看洞鳥翻。橫梁斜度山花落。秋空望海海色飛。赤城萬里烟霏霏。越王臺上青烽起。夏后祠前白雁稀。玉函金簡探難得。況蹈嶇嶽未曾息。北谷空標承露臺。南還竟負凌風翼。蒼崖四顧意氣開。吹笙跨鶴真仙才。何年乞汝盈箱藥。共俟安期海上來。垚號蒼崖子。時修玄學。

霖臣招予汎舟三日夜

商霖好探奇。攜我汎青翰。日日南湖汗漫游。恍若乘槎度河漢。山橋畫柱溪洞門。夏王臺殿西施村。碧江開錦筵。綠草藉金尊。檣鈴榜吹雜柁鼓。朝日西飛暮來雨。五木燒殘江鶴飛。千花開處。雞舞。君家兄弟真絕倫。攜予一避桃源春。山中七。家應改。幾欲還家愁殺人。

聽流鶯歌

聽流鶯百轉在春城。宛如舊苑花枝裏。曙色將開弄曉晴。此時玉櫳猶未啓。此日金屏夜如水。夢中隱隱聽絲蠻。起見牆東映日斑。牆東映日花枝煖。睨睨絲蠻啼漸緩。乍穿錦葉暫停留。移到金牕更宛轉。可憐宛轉最多情。可惜閒關寫不成。秦女簫中三四弄。吳娘曲裏百千聲。今來百草翻紅色。今日聽鶯度錦陌。誰解參差遠趁人。自傷漂蕩還爲客。參差漂蕩逐流鶯。百變風前斷續生。金刀細剪流鶯語。依徙春城不忍聽。

和張夫人拜新月詩

拜新月。拜月出簾櫳。天際分蛾碧。花梢觸甲紅。拜新月。拜月粧臺側。覆斗鉤自懸。斜梳墮無力。拜新月。拜月暗傷悲。記得少年時。南園同伴侶。裙帶一垂垂。今看井桐及秋暮。燕子西飛鵲東去。夜靜花塔綠蘚間。羞向低低影邊顧。冰輪半掩當復明。嬾娑桂樹暗中生。那能拜得新生兔。長與金烏作隊行。一本題下有懷友作末那能二句。作如何月下紅閨嬾。歲歲長留木葉城。

董子長評曰。首寫新月入妙。低低垂垂。拜亦如畫。但寫情悱惻。諷之傷懷。

西河文集

蕭山毛奇齡字僧編
又初晴稿

張文蘊風林
樞星旋較

七言古詩八

杜陵蔣楛游淮曾讀予淮上舊詩有感今過枉不值蒙留長句見寄詞旨哀酸予適滯海濱率賦酬意兼示淮上故人以當一慨

憶昔避地淮陰城。吹簫乞食更姓名。山陽縣令爭認得。呼我車載還都亭。爾時秋風度淮水。高會名園在河嘴。入夜鐘鏞動地來。當筵詞賦驚人起。從茲日飲淮市傍。酒徒到處爭相藏。元王廟後杏花閣。駙馬巷邊葦荔牆。人生聚散等朝露。二十年來彈指過。醉裏難忘鼓瑟時。花開不記留題處。杜陵高士有蔣生。先後會同淮浦行。見予舊事每興感。貽來新句何多情。嚴冬結駟過江縣。柳下尋予不曾見。雙扉久閉綠蘿軒。千里尙投青玉案。但言時事多變遷。黃公壚下尤堪憐。稽劉已謝竹林去。臺館半傾河水邊。故人存沒久心惻。况讀君文洎浩臆。夜月彈爲海外琴。寒風吹送山陽笛。我今將欲尋杜陵。東西南北隨元卿。他時若溯長淮路。何處還攀桂樹生。

中秋山寺作

清風吹林當素秋。碧空灩澦金波流。可憐二七又三五。獨坐繩牀月當戶。初籠輕霧幃冰紈。旋破濃雲出翠巒。花壇斜倚青銅鏡。松葉高穿白玉盤。生平待月啓華帳。稍掩浮霾使惆悵。林表今來閉寺看。樓頭誰復開簾望。去年雪浦弄清暉。前歲溢城烏鵲飛。此日山中無可翫。夜深霜雪滿秋衣。

天馬行送崇仁吳孝廉公車

吳生本公孫。大道騁騏驥。云是天閑舊賜駒。我友孫陽識名字。金絲羈子玉花勒。將上燕臺振高策。大道相逢秋漸過。正好長安看春色。君家舊有黃閣臣。吳爲崇仁相公孫。閣前絡得生麒麟。後來開閣歌天馬。原屬公孫第一人。

奉贈顧將軍七十并呈嗣君澄

吾郡顧元嘆。少曾封遂鄉。讀書擊劍跨鞍馬。橫行絕塞驅賢王。歸來直棄雲中守。右臂茸茸生細柳。好學嘗經蔡伯稱。貧交但飲孫權酒。藜牀高臥七十年。過江子弟皆名賢。庭前多少烏衣客。最愛江東顧彥先。

守歲姜掌諫宅值太翁虞曹公上日初度酒酣有感因卽事成句并呈掌諫君書次幃末

連歲浮西江。三朔翦華勝。曾飲巴山山中夜。走郎官集車乘。今來守歲依諫公。猶藏複壁東垣東。堂前老都諫。愛我如孫嵩。輝輝夜燎徹銀靄。坐對銅槃儼晴晝。莫道椒花媚少年。須知柏子添長壽。雄雞叫罷閭闔開。招搖初轉蒼龍回。紈如嚴城打五鼓。諫公衣錦三進舞。須臾魚鑰啓重闔。萬里扶桑綴遙雪。云是三朝賜勝時。正逢七十懸弧節。當年都諫趨紫宸。仗前冠劍稱親臣。八風吹入金門曉。萬壽呼來玉殿春。忻承假沐留觀省。通德門高愛光景。上日陳筵紫氣生。元辰進誥黃絲迥。諫公披賜袍。銀青雜緋紫。丈人

本冬卿。珮履紛若水。諫公膝立親捧觴。鳴珂列戟盈華堂。越中四姓攀鱗紱。浙上諸侯侍雁行。相國持漿脩拜母。縣官負弩重還鄉。宛如張尉迎京邸。絕勝虞譚賀武昌。慚子流浪頗畏約。枉廁親朋把杯勺。戢鳳難傳祖德明。椎牛不逮親存樂。酒酣浩歎溯所始。七葉貂璫代相啓。太僕捐民賦。光祿匡儲君。尚書甘去職。要典持微文。始知申蟠本非罔。太丘何必名鉤黨。司隸忠臣應代興。虞曹竟嗣春垣長。春垣祿養世所稀。只憐座客言詞微。願持三朔銀幡勝。長傍千秋戲綵衣。

將遠行曲

將遠行。乃在西南阿。夔閬間。昆陽池外千重水。關索樓前萬仞山。我將爲沈犁之鬼。蒲刺之蠻蠻中轉。深曲乃與鄉井辭。天寒日暮行安之。仲尼居東海。莊躡留西夷。將遠行。無窮期。

王元愷將之巴山有贈

寒不披豫章絹。餓不食萊蕪魚。韓康范史日不足。誰能刺促分其餘。巴山令君本廉吏。自艾青葛作賓籬。敝井難浮花下鱗。空亭長擁車前篲。故人相誠勿復前。王生欲去仍流連。王生抱意氣。食力苦耕稼。長貧念同袍。千里將命駕。可憐命駕不得達。斗盎無糝衣無褐。集蓼終愁楚雀迷。橫江誰把枯魚沫。桃花乍發柳乍青。河橋一步三留行。毛姓進前願致語。座客紛紛醉起舞。君不見君家阿齡貧且饑。烏程陶令爭求知。滿船白粲收不得。願索窮交鎮西食。又不見毛姓乞米走江汜。賣卜王成暗相倚。豈少荆南幕下詩。但飲巴山署中水。解襦不敢衣。顧郎易衣并食翻尋常。生人苦饑值春節。黃花白絮填空倉。君不見毛姓南避入蠻部。萬里滇雲黯如霧。金馬關前無故人。竟逐王生過江去。

訪劉息縣并讀周櫟園侍郎所治文序因爲書贈

劉郎本是神仙姿。手揮五色春桑絲。中都偶爾作試吏。望之不見長相思。昔年曾逐湖西使。一訪廬陵老從事。命駕空隨曲巷車。留題無復高門字。躊躇東顧還蔣山。暫依櫟下官臺間。櫟翁老人出君句。爲君諷詠開心顏。秋鴻飛飛信羽翼。重向嵩陽看山色。桓良未獲遇浮丘。賈父何期在新息。長途宛轉思一顧。不道寒風薄冬暮。日落天低穎上城。朝來雪滿淮西路。夫君獻賦標石渠。尋常痛飲留柴車。吏歸自戀空倉雀。客到還烹掛壁魚。十年相憶苦紆結。相見忻逢歲寒節。息子墟邊嘆轉蓬。白公城畔猶飛雪。高談今古誇典墳。篋中所載方紛紜。君能不忘湖西客。且與同觀櫟下文。

過息夫人粧樓遺址有感

荆門不種章華樹。此地還留洗粧處。紅粉銷殘澗道花。翠蛾飛作山城絮。澗邊白日自悠悠。城畔粧臺秋復秋。回首故園長不語。鎮教淮水向東流。一抄作淮流千里一望長。誰家高閣映斜陽。故園相憶都無語。回首蓬萊空斷腸。

遊濮公山作

毛甡居息不得意。搢頤日望城南山。東甌夏君今贊府。策馬邀我遊其間。出城風日稍暄霽。朔風吹面而不寒。淮流本出自桐柏。到此漸覺橫來寬。前呼亭長先渡馬。幾曲淮流下如瀉。渡口方看載一航。道傍爭欲開三雅。須臾繫馬入櫪林。濮公仙洞難追尋。幽崑尙自留丹竈。過礪誰能採碧岑。相隨野鹿度空谷。便啓清樽坐蘿屋。紅樹彫時未放花。翠屏高處曾懸瀑。重披荒徑啓前路。策馬直臨峯頂住。長淮一帶渺如環。萬里蒼茫盡烟霧。從來黃白不易得。梅尉當前總仙客。況有張王諸孝廉。曾經出入蓬瀛宅。長林落日

客未歸。平田夜火光霏霏。巖城欲下葳蕤鎗。尙見山前烏鵲飛。

飲郭將軍竹下

萬竿修竹臨清流。竹中留客郭細侯。短簫橫笛向風發。居然身在蓬瀛洲。行廚斫桂煮芍藥。玉甕桃花泛清酪。近郭天低散馬牛。空亭雨過飛烏鵲。酒酣倒載折角巾。繡衣卸出紅麒麟。將軍本是蒼山客。不數悠悠世上人。

定情歌飲秦二保寅醉後作

數歲遊吳關。不逢臯伯通。長攜柝白少相識。獨行畏約何終窮。更衣夜起自擊筑。暫就梁溪酒人宿。深念秦嘉是麗才。久知王氏無癡叔。飄飄挾刺隨禰衡。風流學士相逢迎。未從隘巷窺孺子。便向東家訪步兵。東家桂樹生前路。秦氏從來桂中住。朝起金丸寫畫欄。夜來烏子栖庭樹。庭前列烏羅酒漿。酒徒相顧稱高陽。羈人辛苦易爲醉。午日欄邊只將睡。我昔歸明湖。誦君秋帆辭。愛君不得見。一日千回思。思君見君恨不早。悔見秋帆去縹緲。同時嚴忌最高才。況復君家仲容好。嚴蘓友與令侄留仙同爲詞。美人何在愁復愁。芙蓉開落經三秋。今來但泝春申浦。何意還登秦氏樓。請觀柝與白。與君指皎日。在上羅廣衾。在下蔽蓊席。與君戴笠還下車。相思莫惜加餐書。尙愁越國無歸雁。此地吳王善鱸魚。

汝南郡亭飲次贈譚八吉緯

汝南城上曉鴉啼。王粲宅傍春燕飛。故人千里一相見。越布單衣白如練。春陽艷艷汝水邊。桃花樹樹郡亭前。清明初看鞦韆戲。上已還吟芍藥篇。自憐蕩子多離別。愛汝中原遍車轍。彩筆能圖五嶽遊。金丹自

受三茅訣。伊昔相逢淮水頭。酒酣同過謝家樓。今來重憶當年事。手把金樽淚欲流。

廣文先生歌贈張學博

廣文先生讀尙書。客來有鳥嘗銜魚。花間促坐絳帳舒。不須歸去河汾廬。當時獻賦誇子虛。十年勾卒將公車。我今相遇沈子墟。春風冉冉吹衣裾。莫嫌高論與衆殊。此間已是張融居。

將過松江先寄朱大用礪使君

探書出林屋。放舟遊吳淞。欲觀海上袁公壘。不問雲間陸士龍。雲間勝地推吳下。有友驅車最瀟灑。劉毅嘗爲郡股肱。謝生今作軍司馬。風流司馬是何人。共識當年侍從臣。丹鳳樓邊攜綵筆。紫薇花下展紅綸。紅綸綵筆紛相映。侍女留題請名姓。起草時聞長樂鐘。整衣不避昭陽鏡。可憐厭處承明久。解玉坊南私縱酒。兩省通傳翰苑書。一麾竟佐江城守。江城千里蔽東吳。黃綬金章一大夫。嘯咏全爲方外客。從容分得郡中符。果然祖父爲三事。方信男兒長五湖。使君爲朱少師公冢孫大金吾子故云君到只如棲枳鳳。我來方欲覓尊鱸。已辭梁苑新車騎。況遇高陽舊酒徒。高陽夙昔輕相顧。梁苑從教聘辭賦。片輿何必假陳蕃。八俊山來重朱寓。陳蕃無事朱寓閒。題詩應滿干將山。秋高正值鱸魚美。我欲維舟三泖間。

湖上贈何生倬炎何伯興季子也

秋湖十里生芙蓉。湖邊卻逢何敬容。緋袍相對儼翔鳳。綵筆欲落驚游龍。廬江自昔嬾才子。前有司空後侍史。洛下清談宛舊時。元嘉樂府傳新體。秋花灼灼秋水清。道傍又見驂騑鳴。荀羊本是長瑜友。羨爾趨庭有令名。

送李生并序

乃歲屆祝淵。時當顛冥。甬東李生。岷源稅駕于都督李公之舊第。維時白日窮次。縞雪凝壁。長松倚崑其信芳。寒梅蔽扉而釋萼。仝人咸集。各贈以詩。志永懷也。原夫淇泉木李。本貯瑤情。灑上香蘭。互申縞結。故仲宣贈子。篤于飛鸞。正叔指河陽于逸驥。苟懷惻愍。豈乏呻吟。李生抱苦心之行。全儕起定情之什。以義而言。固其宜矣。乃戴逵入剡。未聞買山。阮藉當車。於焉就路。陳元龍淮海之士。梁伯鸞備貨爲生。將騎驢出門。惟其所之。牽舟上岸。亦無可住。王孫遊遠道。倦春草之萋萋。彼美在何方。誦山榛而掩涕。是伯陽適西戎而留字。文鸞遷斥丘以受言。凡屬親串之所經。誰勿咨嗟。其善誦。況李生沉淪之士也。家本閩閩。世濟開府。棄朱門而勿盼。甘白晝以長征。胸羅星漢。每推烏績之紬。節撫雄雌。潛識秭淩之擾。于是正基旋杖。辨才子之纈趨。發策兆機。啓靈均之浩蕩。定箕張而斗揭。任缺伏與鬻仲。則是帝女。睠蜀郡而抱石。大夫拜楚人。以獵冠。江南投老。應賦逢君。稷下談天。喜稱餐堦者也。夫心企東山。意傷南浦。蘭亭原倡。旣擅糠粃。海谷遙吟。當來璣壁。維茲軼士。預爲風漂。伯叔之詞。旣屬同人。應續雨雪。英瑤之句。

先生本是青丘子。直走塵埃過都市。脫履朝看圯上星。乘槎暮宿天河水。梅花初發雪滿襟。相逢醉臥東城陰。天涯淪落知無定。北斗南箕何處尋。

淮康行贈別

元龍百尺樓頭客。又向淮康奏嘉績。監郡能分五虎符。題輿不假雙熊軾。九重丹詔下青霄。十月黃鸞度

翠條朝日舉帷鹽澤雨。春風送艦射陽潮。開樽暫飲如淮酒。漸入天街見星斗。若問人懷峴首棠。但看鴉
栖掖門柳。

潼川歌有序

丹陽賀先生胤選。崇禎十六年。受資陽縣令。夫人請從。叱馭而行。李自成破成都。資陽不守。先生及夫
人慷慨就刃。自成怪之。命釋以俟。屢脅之。順畢不能屈。繫之別營。猶欲處焉。越二年十月。賊敗于南鄭。
懼中有應。乃指而嘆曰。留此輩爲梗矣。殺之。同行十七口。並日死于潼川州。越十二年。先生二子雲會。
雲舉。俟西道通。尋之不得。有彭君退庵。備述其事。復詢之資人蔡文學。語與相合。號啕而歸。雲會爲司
馬。與予善。予乃作潼川歌。

鹽亭何高高。梓水何連連。四座且莫喧。聽我歌潼川。潼川州南射洪渡。天柱雲封七盤路。不見潼川繞地
來。但見南津上天去。南津令君負奇節。夜泛桃花暗流血。桃花江上草初青。一夜寒風白如雪。相傳此地
殲令君。招魂萬里呼南雲。睢陽齒落白崖裂。萇弘血墮高梁焚。令君家世本吳楚。北固山頭射猛虎。興酣
聚米劃地殊。愁來投筆長心苦。縣官續食計車發。便請長纓繫南越。嚴助三年厭舊廬。龐公百里懷新割。
驚聞盜賊出巴下。玉壘珠江廢耕稼。白帝終成躍馬王。紅巾時起鳴狐詐。慨然請行一星入。夢中曾見三
刀集。崎嶇九坂誰肯前。忼慨王尊赴何急。閨中有婦孟氏賢。從征作賦同車駟。解綿繫樹苦食芋。封魚滌
釜長生蠶。倉皇烽火接城野。急繕亭障料牛馬。轉戰空聞笛裏哀。升陴誰是塞旗者。天心不解遂人志。入
事良難勝天意。縱教南八是男兒。難免西川盡捐棄。丈夫死官久不屈。春磨碧邊自強立。完城蔓子刎已

遲斷頭嚴將生難執。霜刀環視驚罕希。誘以好爵啖以糜。赤繩馬頭熟有待。無如南鄭傷還歸。天陰雨凍地冰裂。乙酉之冬月初缺。令君罵賊身死亡。正在潼川此時節。君不見。令君同死十七口。全行死盡皆無有。彭子退庵眼見知。長望桃花酌春酒。又不見。令君二子遠相失。十六年來尙尋入。難持齒髮向天涯。疾走潼川自悲泣。潼川潼川西近秦。桃花水落青春新。我今歌罷潼川曲。還想潼川赴死人。

西河文集

蕭山毛奇齡

字春遊
又大可稿

文輝充有較
遠宗姬漢

七言古詩九

寒食直史館奉和同年李漁村太史兼呈同館諸公

春城日出鷓尾紅。下馬入直東華東。忽言今日是寒食。愁入萬條新柳中。陽春初過一百六。日趨車塵苦追逐。大道時聽賣野餚。宮門無復傳官燭。溝頭水漲花尙稀。早寒猶着春前衣。庭槐幾見火新改。故國六年人未歸。同儕相顧起愴忱。此地前經設東廠。今史館卽前朝東廠地。李太史是日有詩。故云。斷烟祇爲惜亡臣。殺竹何堪謝鉤黨。鄉園日夕風雨賒。沿門幾樹春桐花。明朝畫舫門邊住。好人春山焙早茶。

送同年尤侗南歸

東堂著作誰擅聲。一時並讓尤先生。羣公隔舍爭問字。天子殿前長喚名。今來慷慨賦歸去。家在東湖最深處。堂上重栽薜荔衣。門前自種垂楊樹。吳中築室志未成。集賢坊下還留行。堪憐五載追隨意。頓有千秋萬古情。

予向渡湖時更名王士方宿竺蘭聖宣二上人房去今二十年後予過上海聖宣貽書兼索書舊

日所題詩句感生於心賦此志謝并呈蘭公代訊

昔有王士方曾經擾精舍。雨後潛行菰葉中。病來借宿蓮花下。其時高座有聖宣。上人佳句繇來傳。烹葵時餉白雲塢。拂軫夜彈流水篇。秋風一別過湖去。從此天涯隔晨暮。歲月難教古寺留。夢魂猶向長橋度。蘭公垂老能著書。不知舊客非文殊。毛珪廿載尙淪落。時代士方傳起居。只今海上望雲日。欲訪巢雲舊禪室。常恐紅顏今昔殊。對面相看總相失。蒙君貽我綠綺琴。并邀一寫蘆中吟。愁心欲記當時事。幾度含毫泪滿襟。

宣德窰青花脂粉箱歌爲萊陽姜仲子賦

君不見。宣皇宮中脂粉箱。青花素盜出上方。陶模范埴好形像。燒胚燻膊非尋常。曼身穴腹判兩截。一道坎中周四旁。融脂淪粉恐膠結。洄漩複壁流溫湯。宛若麗華鬪粧罷。宮溝淺膩縈苑牆。何年此物坐棄擲。竟置姜郎硯塘側。隔盎微聞金粉香。開奩尙帶騰脂色。摩挲日劇但把弄。未審甄人定何用。賈胡欲認不辨名。盧女相看宛如夢。連昌宮監老不堪。落花時節來江南。見此忽爾驚嘆息。云是先朝舊承值。曾賜昭陽繫臂紅。玉函脂粉在其中。盤間花貯甘泉露。鏡裏衣穿仁壽銅。良人少使望春樹。百子池前早祠去。額畫銷珠點量重。指尖碾玉當窩處。由來摘掃最煩紆。惟此當臆好勻注。紫水開唇恍瀉丹。紅錦撲粉如飛絮。因之瓦甌獨見親。珠械寶押皆非倫。履箱銀鑰擎奴子。鈿合金釵付貴嬪。誰知世事頗難測。金狄銅仙雨中拆。拾得皇孫繡襪錢。拋來魏后細紋尺。昭華翠瑄摧井榦。道傍團扇遮彌寒。庫名宜聖總散失。獨留金盃傳人間。承恩當日授佳器。前後紛綸尙能記。花箱雖好何代貽。知爲宣德年間事。我來吳會當歲除。

東湖水落西流魚。姜郎酒後出示我。令我抱之長歎歎。黃鐘土釜不反覆。幾見桑田變成谷。半世紅顏委道途。上陽白髮誰膏沐。箱空脂盡粉未調。當前若個真娥媧。君家陳寶世無算。爲汝一歌宣德窰。

汪主事以藍羅裙子束纖腰畫卷索題

紅羅衫子身材窄。裹得長裙楚絲織。麴末飛爲海上塵。蔚藍染就春潮色。闌邊楊柳空拂衣。手中紈扇斂頭璣。請看雙帶迴環處。長抱纖纖知不知。

錢編修所藏司馬相如玉印歌

漢庭司馬梁園客。早歲爲郎晚馳驛。因慕邯鄲舊相賢。借取高名註屬籍。當時原有幕璽書。大者礪石小琢珣。螭首龜膊總啣帶。碧文綠籀皆施朱。相傳解玉刻小記。四角中央搆名字。檄使填將喻蜀文。酒徒印作當壚挈。于今相隔年又年。不虞此物留人間。土衣苔繡半斑駁。銀鉤玉筯還新鮮。截肪徑寸覆玦紐。何必黃金大如斗。錢郎得此真罕希。每與秘書通繫肘。會當天子好古文。相如已是同時人。尙書給札令繕賦。落筆殿前如有神。遂登著作入金馬。名在何須更相假。對策姑令董仲先。容才久爲廉頗下。長安秋盡寒欲來。驅車一上昭王臺。酒間出示爭把翫。令我懷古生徘徊。前人意氣不長在。況復微文等光怪。何物雲英護此符。歷劫千秋不曾壞。龍門遺冊爛未收。圖書堆堞能生愁。我今欲借文闈篆。一惹桃花紙上油。

雪中陪益都相公請沐善果寺卽事奉和原韻

長安佛寺稱最麗。洛下伽藍鮮殊異。請沐長從丞相游。祇惜香山遠難至。上冬十月大飛雪。禁苑層層凍雲結。捲幔驚看花絮飄。點衣化作細紋縵。朔風吹攪勢轉濃。特尋古剎烟嵐重。封將塔上千尋荔。寒到門

前幾樹松。香廚設饌飯尊客。啼煞慈鴉日將夕。更上毘盧閣上觀。萬里山門一時白。晚來積水甘露盤。椒蘭被體能忘寒。何期太子浴堂內。竟作春風沂水看。我今逝欲埽塵幘。到處追隨傍車轍。縱使宵深歸路迷。敢道足寒傷馬骨。

題袁孝子負母看花圖

東園花發好顏色。白髮欲看行不得。負母能傳江革心。娛親自竭曾參力。春花已落不再攀。高堂老去扶來難。只今負手花前子。長把斯圖帶泪看。

葉主事歸黃州有贈

宮槐初落秋雲飛。天街雨來塵漸稀。金門待詔苦寥寂。索米欲炊饑復饑。黃州進士子高後。十載通籍猶鞿遲。郎令丞博許就薦。高文足勾聖主知。誰審司事去取異。清河轅固翻令歸。長安苦寒兼苦熱。走馬流汗食不肥。炎歊退後喘稍定。頓覺晨氣侵絺衣。綠楊橋畔有故館。雪堂竹樓皆莫幾。逝將去此作請泮。後會重與春明期。人生出處資快意。出賢急決處莫疑。何爲鬱鬱守冰坎。天寒日暮空嗟咨。時呼翰林爲一條冰故云。

陪益都夫子游怡園假山奉和原韻

佳日雪乍霽。倍侍游名園。到門翠巘列。入徑蒼雲翻。蒼雲翠巘蟲千仞。靈掌丁牛較難認。拔地神虬挾霧騰。攫人健鶴摩天迅。何須占業沁水頭。啣杯且作南山謳。他時春漲沙棠發。巖下重爲汗漫游。

寄祝興化李映碧先生廷尉初度

少聞東李司李神鑒儼若海上日。越州比士借校文。取子兄萬置第一。子時六歲勝婢肩。斯事已在崇禎年。久傳司李作名諫。既進廷尉猶犯顏。石頭初下大航渡。曾使章安出東路。浮海長爲蓬島游。還家羞著蕪城賦。彤廷策舉郡國賢。忝予捧檄來長安。先生掉臂塵埃外。與客放情山水間。卽今史館辟遺獻。尙向通門集羔雁。符使親求司馬書。蘭臺終藉安陵傳。獨慙兄仕止廣文。子亦老大非青春。先生華髮尙強健。有子早爲東觀臣。從來皇覽重初度。欲寄清觴展遐慕。不知柱下一星明。但誦兩關五千數。

題方田伯躬耕養母圖

先生把筆如把鉏。擷芻負米行江湖。偶因嚙指得心痛。幡然歸去南山廬。春田過雨綠初漲。隴上炊烟喜相饒。叔豆應披王霸衣。耘瓜尙荷曾參杖。高堂白髮負日暄。江魚水荇堪承歡。抄書過市常晚讀。綸閣近山防早寒。廬江孝行本千古。他日登堂拜賢母。重展斯圖對酒看。莫望南山慙辛苦。

相逢篇爲李公子作

豪不馳玉勒馬。俊不挾金彈丸。所貴結交重然諾。久要不負平生言。錦袍燦燦振長袖。李子相逢宛如舊。肝膽嘗傾劇孟前。聲名不在劉生後。當年把臂意氣遙。酒酣同射西陵潮。追隨燕客且擊筑。歸來吳市還吹簫。只今奔走困前路。謝爾清光展雲霧。解得吳刀持贈子。價值千金不相顧。世人交友只在錢。舊游散盡心茫然。隴西公子幸無恙。與之共賦相逢篇。

題曹石庄滌硯小影

吳中高士曹石庄。建安詞賦超劉王。條然植杖坐林麓。尙着秦人舊時服。書成欲換道士鵝。春池澗澗環

清波小童持硯灌波去。清影滿前如影何。

送同年范太史還吳門

秋風颯颯南雁翔。昭文才子還全昌。橫門一道軟塵發。令我黯然懷故鄉。軒車數隊駐柳下。野祠設幙留供張。啣盃徐起贈鞭策。意氣歷落不可當。華廳分草登左榻。山池賜羹出上方。況握竹管記前事。高踞柱下稱三長。其如溫飽非所志。曼倩日餓東郭僵。亦知史局本異量。兼荷制舉羅非常。璽書曾答太子令。侯相爭道申屠剛。縱令种郤使覆對。猶拔仙室冠望郎。而乃掉轡古薊野。從此覓路秦餘杭。我家東浙鮮剗宅。回憶北山空草堂。他時得返越州去。爲汝一停吳市傍。花飛渡口遇慧曉。草深墓下尋真娘。買鄰縱未近樂園。訪友定能通野航。朝霞幾縷開上谷。流水百道傾高梁。故人分手自茲別。繫馬欲行看綠楊。

書馮二世兄學正卷子

稽莼結葉蔓河渚。曉露啣衣當秋雨。爲子欲取茂陵人。同看城南賣薪女。長林嘶去驪馬嬌。百金裝出珊瑚梢。揮來代作定情物。相門之子真賢豪。明將人學教國子。年少能傳四門史。昭遠從來善解經。公超所至應成市。子方就飲學戴崇。閒游重覓山桃紅。不疑老作金門客。仍在成都酒肆中。

翁司馬之任黃州以詩留別有贈

橫江館前江水清。臨臯亭畔春花生。黃州司馬甫到郡。八縣一州官吏迎。都亭飲餞策去騎。爭羨當塗好騏驥。人如仲舉入官時。都是東坡舊游地。天涯邂逅意氣真。相看本是同鄉人。多君惜別留賦詠。愧我出游忘隱淪。昨聞巴水大破賊。萬里江流盪胷臆。倘能汎艇過黃州。便可相期在赤壁。

詔觀西洋國所進獅子因獲遍閱虎圈諸獸敬製長句紀事和高陽相公

古皇慎德開四譯。內被綏侯外蠻貊。貢物區爲王會文。共球載在賓庭冊。河鏐吠翟獻上方。兜離僂佻陳
明堂。三靈旣應百神洽。般般之獸皆翺翔。康熙戊午十七載。神武聲名播遙海。五時從教白澤來。千門眞
見黃龍采。鴉翎習習負矢飛。鷄斯之乘歸林支。諸方執贄儼相列。東漸溟渤流沙西。于中有國名古里。曾
渡瀾滄作海市。魚眼看波射水紅。蛟絲織浪翻雲紫。地當申未產獸雄。金精傑出毛羣中。啣繚絺組獻天
子。裁貝作章辭禮恭。從容檻致射熊館。不爲珍禽爲懷遠。虎落時看接上林。鷹房秋到移南苑。廷臣侍從
欲賦詩。皇恩有詔徐觀之。圓目昂鼻有筋力。懸星掣電無雄雌。獨憐髯髮未卷曲。曳尾繼繼若散絲。衣被
欲成鞠色見。牙齧不使鉤形施。爾時羣檻押諸獸。木壘槍樊列前圍。熊羆避路不用當。虎豹攀欄有時吼。
青鸞赤雀相對栖。豪豬野馬爭游嬉。張昭見此不動色。朱亥在傍何所思。聞之有熊狩。嗚谷獲得狡狴比。
牛畜漢時安息亦獻斯。形似麒麟但無角。從茲郊祀播樂章。射鳥格鹿非尋常。鏡吹已陳朱鸞曲。徵狀還
及白狼王。何如儲儲未完緝。詔遣求賢共來集。東堂甫布網羅成。西域剛逢旅獒入。招搖乍啓禁籞開。白
麟有對皆奇才。請看太保卷阿賦。恍見文王靈囿來。

朱運副七十

南陽朱季絕凡俗。曾破黃巾苑河曲。車葦題來錦字紅。商船載去滄波綠。居平忼愾能任天。但行直道歸
林泉。洛陽若有蒼英會。誰謂張燾非少年。

玉璫篇爲黃母作

鹿門先生好讀書。百年之範圍中居。手披文史衣佩琚。穿針不纈雙蜘蛛。當年太僕扣闔閭。夕陽亭下悲歎歎。黃瓊終爲黨錮誅。曾贊夫子呼階除。迄今講學河汾廬。練裳木屐相巨儒。席門猶過王公車。餅有美酒盎有魚。時當初度獻玉璫。攬之日月同居諸庭前。又見丹花舒。

醯雞篇贈藍蓮

閩江豪士藍公漪。白晝踞牀啣酒卮。有時裸袒抱銀甕。翻糟蹋滓眠清醅。生人慷慨貴行樂。百歲促刺能幾時。不見東鄰有王者。罔誕擬作劉安辭。西家小侯亦何用。拔山驅土填海涯。以茲感激俱作達。日事鋪漱唯恐遲。長恨書篋非釀具。欲使畫簾當麴衣。良朋總在履道里。妙地絕勝高陽池。醉來倚壁且塗墨。興發對人長賦詩。一花兩葉倍精爽。千言萬字皆離披。高堂名父過八十。口能啖肉手不蓁。閉戶尙作擘窠字。小如畚鍤大若箕。承罌捧缶作甘旨。前花月下恒娛嬉。子父相對指白薄。八斗一石何足奇。顧視越客忽大笑。甕傍那得來醯雞。

山中再宿

小溪淅淅覆草裏。大溪瀼瀼長松間。高岩雨聲到松葉。一夜冷徹桐君山。山中寂歷無近遠。再宿始知路深淺。瀟瀟衣露若散絲。松牆日出歸來時。

中秋後風雨連日蒙馮老夫子賦苦雨吟見懷依韻和答

毛錐處囊不立見。空道南金與東箭。日上師門苦未通。況復相違比牆面。憶昨三五侍帷幄。酒花燭樹紛歷亂。那知月沒鬢髮生。豐隆屏翳起鬪戰。衢巷水大車馬沒。檐溜衝階有泥濺。連朝瀝漉喜甃霽。尙有絲

雨似機線。安得東海天鷄鳴。攜我飛騰到日觀。秋高雲隙收斷虹。風急崑前送歸雁。忽讀夫子苦雨吟。令我口齒重漱盥。情親恍續謝客愁。調警似聞楚女散。晴雨燥濕亦恒事。讀書所費在合變。只慚才劣和轉難。不及劉楨賦公讌。

奉贈李公子鄉舉入試長句

海上五旒鳥。三日生絳毛。鷄斯有良駒。蹋地騰雲霄。廬江才子擅宿慧。數歲能通秘書字。人世驚看豹彩生。兒時不好鳩車戲。雙瞳皎皎鸞鳳姿。精神宛濯秋河湄。攀檻早著鷗鳥賦。對客自吟梔子詩。行年十五舉進士。獨對春秋解微義。擢科不藉賈董名。上殿竟隨楊億試。黃紋袍子短稱身。紫駟騎作紅麒麟。君家弈葉掌詞翰。玉堂仙李嬌青春。從今直上紫霄去。萬里風雲起前路。欲問慈恩誰少年。但看春官乞詩處。

又和益都夫子雪中游園口號原韻

雪飛滿園夜若繡。誰云夜雪不到晝。況有季彥後來秀。追陪几杖四座春。招攜總是平臺人。抽牘授簡真良辰。冰凌結花不卽謝。入林恍坐萬花下。祇訝入夕花未夜。斜陽陡射雲隙開。傍檐鳥雀啾啾來。坐花肯向花間回。

奉和益都夫子雪中游祝氏園林原韻

三輪出游忝陪從。燕山一夜雪成凍。遙尋古寺塔樹深。近見平林酒旗動。孰期名苑環木坪。幾曲層軒繞松棟。欄邊花竹娛晚晴。盤內蔬蒲攝午供。寒鳥偏教谷外啼。冰凌故作枝頭弄。酒傾百杓輸阮宣。裘敝多年過平仲。墮地陽鳥欲射難。有月如弦那能控。

戴公子生兒適大理君遷京兆信至

秋風瑟瑟玉露滋。庭前桂樹生新枝。朱欄噪去烏鵲侶。錦堂抱出麒麟兒。執手命蘭已擇日。探丸拜麻當此時。筵開湯餅雜三雅。滿座朱衣正瀟灑。有客能傳京兆書。阿翁已走章臺馬。男兒倜儻似長文。儼然頭角生風雲。當筵況有清都信。不試啼聲使識君。

過宗藩輔國將軍邸第留飯兼蒙賜詩賦謝長句

擁彗不入齊相門。挾刺不謁長史宅。紛紛花柳看滿城。那有停車道相識。掖門東去蘭坂長。五王舊第環宮牆。平臺遠屬諸國邸。復道自連興慶坊。瑤林玉樹蔽階屨。帝室名駒總千里。講易龍蹠沛獻賢。好詩不減元王裔。風流大雅真絕羣。愛子曾誦子爲文。每稱子詩文皆成誦。相逢倒屣宛如舊。入座縱譚驚未聞。金

杠壁帶掛珠幔。日射牕螺恍流電。百軸牙籤夾畫欄。一庭花影翻書案。繁肴錯核難具陳。紅肌紫翼青絲鱗。湖筍盈杓如切玉。山梁作飯似傾銀。遂巡授簡發毫素。示我新篇出雲霧。麗句曾開瑪瑙屏。清音漸啓金笳路。長吟短詠皆有情。黃鸞罷舞鸞停聲。西園徒廁賓客履。梁苑竟慚枚馬名。御溝春水晚鳴咽。暝色重重暗林樾。惟恐漁舟難再尋。坐對桃花不能別。

夜飲梁尚書宅有贈

宣平門前吹朔風。大車小車如轉蓬。纓冠挾刺向何所。爲謁鉅鹿司農公。司農文賦早名世。高啓龍門似司隸。七序傳爲梁氏詞。一臺寫出尚書字。藝林雄視四十年。走趨幕下多豪賢。愛才不減天倉粟。列屋曾無月獻錢。見子倒屣設餐飯。竹席蓬屏坐來晚。燈前分牘避逡巡。酒後高談驚近遠。山茶花發紅滿牆。夜看賜劍皆文章。司元本是中樞宿。欲返天街一望長。

西河文集

蕭山毛奇齡

字初晴
行十九稿

郭鍾機石城
孫眉光嘯夫較

七言古詩十

戲贈徐曼倩畫扇

徐生妙筆似魏華。又似趙昌能畫花。東家嬌女白團扇。乞畫牆東落花片。紛紛蛺蝶趁滿林。我亦見之生愁心。故人有子得如此。何用滿籬純是金。

紫庭篇奉贈張庶子史館總裁初度

自昔至人生有爲。河游龍蔡山出雲。紫庭五象不恒見。含華苞德離人羣。清河夫子本峻閥。戶排三戟門十輪。況揚世德誦芬烈。絲綸入掌推金昆。檀傳烏策結碑版。字譯馬馱增典墳。館草詳略總新意。庭花燦爛皆奇文。伊子薄學恥操瑟。外郡不知枉薦纁。入都挾刺但局促。登堂納履爭紛綸。盈椀飯落塵尾屑。列鼎氣函嚙膳焄。微言要旨均有會。窮蒐極檢真難聞。恭逢天子重文學。議修前史藉討論。首推東觀作楷式。如平有準直有紋。又如杞梓食裁割。一一得施大匠斤。憶昔浙省論鄉秀。曾發策問如所云。明史諸按互得失。對者不若問者神。爾時予以避人去。恨未考辯似向歆。今膺編纂得主者。宛然弟子師河汾。長贏

既至遶皇覽。天門日出烈若焚。張星儼在翼軫列。公子時見倉琅根。但識四矢冒綵箴。那知三鳥掩青裙。江左舊族本最重。淮南有文當自尊。千秋得志苟長在。世人安用徒紛紛。

贈王舍人赴常州幕

去年同詣公車門。有司藉藉推公孫。雄文博藻騁偉辯。開牘殿前驚至尊。須臾授職令著作。不及郎官並丞博。獨憐垂老軼清河。但入中書詠紅藥。天街對酒冬復春。高梁柳色侵衣新。師門相倚頓分袂。令我黯然傷遠神。蘭陵酒熟野花發。此去江南好時節。那堪羸馬夜歸來。空望金臺一輪月。買田陽羨心自閒。莫嫌蓮幕春風寒。他時憶我新詩好。應在荆溪水榭間。

奉和崑山葉掌院夫子題翰林院壁用東坡清虛堂韻

翰林院前堆北沙。翰林院裏通南衙。填廳衆制但分草。列館一區長種花。崑山夫子秉文府。授易遠探七。十家日繙縹冊傍。銅鶴幔挈鈴索驅饑鴉。敕令掌筆定前史。美刺不雜萎與葩。祗慚諸子濫藉氏。响紕收穢煩鉤爬。從來道潤鮮塵渴。菊苗蘆葍不換茶。況傳五教警聾聵。隻手肯卸懸田撾。秋風院落久積場。驟見補苴翻嘆嗟。時新修院成。學人績學有如是。請看壁上揮丹霞。

輓歌詞送盛廣文櫬旆還里

君不見。潁川陳仲弓。公卿會弔縗麻同。又不見。南州徐孺子。獨抱生芻走千里。由拳夫子學術明。早年兄弟同成名。漢家應辟推楊震。秦代通經重伏生。偶然曳杖歌延佇。遂賦雄文玉樓去。堂上鱣魚躍未能。棠傍大鳥歸何處。生平感慨不得誦。空吟華屋還西州。天寒執紼錢唐路。滿目江濤涕泗流。

金匱仙人歌贈陳子太士有序

陳子太士與予共文會者將二十年。曾登選樓。甲乙諸試帖墨義雜文示天下。天下人爭奉爲金科玉律。羶估藉之起市門利。旣而擲去。得葛洪金匱術。遨遊長安。予被薦就試。試之前三日。右手病癢而潰。于熨腕脹如長瓠。五指僵蠹。告吏部不聽。告監臨掌院不聽。隔試一日。將夕矣。遇太士于途。驚曰。何不早示我。令至此。急市藥二升許。灌之。令濯。自溫至涼。再灌之。指漸有文。至漏一下。又灌之。漸斂。次日赴試。泰和殿。腕仍發痛如艾烙。暗下。而指詘可書。因勉書完卷。出。出則病亦減。是雖天固厄之。然太士醫療之神。何可沫也。踰月。予從諸君後。蒙聖鑒取中。且用古制科例。授館職。因感太士術。作金匱仙人歌謝之。詞頗不敝。致其意。

昔者葛洪得神術。著書金匱稱仙人。千載以後鮮繼起。肘後有方空復陳。潁川才子擅文藝。月旦時賢等操契。海內皆知伯玉名。樓頭只許元龍憩。學深二酉通九淵。夢隨鴻術游鈞天。長桑與客意氣合。種橘啖人淮海間。天街二月花正發。忝詣公車向高闕。斲手徒令拙匠嗤。寸心久爲貧交竭。時當召試人玉除。大官將賜蓬池魚。九重前箸欲借挾。一時左手難空書。公乘交臂頓有省。迎鳳坊邊酒初醒。養藥惟燒玉質薪。滌肌不用蘇耽井。深慚手指重五斤。非時能詘還能伸。多君九折作良宰。惠我一劑真有神。上醫醫國本恒理。況有高文比秋水。他時金匱獻書成。當復逢君杏花裏。

送吳農祥徐林鴻二徵君南歸戲傲宋人體詩兼示王二內史徐二布衣

由來徵士仿劉漢。雖經制策無去留。唐宋以還較文賦。大科異等區其尤。國家貢舉三十載。未有博異入

計郵。天子下詔舉文學。外責大郡中列侯。忽當選引及亭左。魚龍鵠雀紛啾啾。不才捧檄固辭謝。微車疆
載豈自由。同時得謁丞相府。王吳兩徐世莫友。念我宿好頗相愛。十日五日登酒樓。秋蒲冬菜及春韭。爛
醉倒坐驢馬頭。豈知聚散各有數。孟夏殿試當螭蚪。尚書給札大官饈。雜席簾陛稱博搜。諸子落筆似颯
發。吳徐六論尤最優。丞相執卷三嘆息。已置祕閣第一流。予值臂瘍縮秋蚓。斥落不敢仰與儔。黃封既進
微御鑿。倏移後乘加前矛。臨拆帝命索名下。猶執數卷爭獻投。何期屢獻總不得。遂令殿後成懸疣。韓愈
三別名。豈惡蘇轍四等文。更逾獨有空疎陳彥古。進退不識汗面羞。春風初斷夏雲熱。長安塵土如蒸燂。
沿街呼賣紅芍藥。榜檐倒插黃石榴。江南四月下雀雨。道左一望成鼠憂。況逢二子欲還里。執手相對雙
泪漉。我有草堂在東郭。垂老亦欲居優游。久別但使猿鶴怨。還歸不厭花木稠。豈可據地久淹此。駕言受
事濫纂修。潞河百里掛帆去。慷慨不得同方舟。猶幸將歸王內史。適與徐仲行且休。丈夫偃蹇就遲暮。得
失間出如水漚。此行莫怨得復失。天下豈有援臂侯。文章千載自難沫。世事百變何所求。臨岐對酒且復
酌。看君腰下雙吳鉤。

何葦藏書詠

王修畜經數百卷。張華載文三十車。自從舉士不好學。人間無復藏書家。廬江萬軸比册府。時藉鈔黃較
魚魯。日映籤頭五色紋。風飄篋下雙垂組。從來善後慎所遺。籙金有盡還周饑。我今枵腹願早計。莫笑借
書無一鴟。

送吳明府超遷觀察之閩

溟魚十歲不掉鬣。一掉直上天門間。從來神物有異量。豈與世數同往還。夫君百里本寄跡。要使殊才破
唐格。司隸何妨拜茂陵。通侯久已稱褒德。一朝治行天下開。果然第一推番君。聲名特達播閩闔。頓令平
地生風雲。丈夫入世貴倜儻。攬轡登車氣何爽。望去雙旌擁轡輪。行來八察加廉訪。東風二月度七閩。溪
花海樹郎官春。嚴生自足開甌越。何必平津解笑人。

慰尤司法喪婦作悔庵初爲永平司理

秦嘉垂老上計車。閨中無復紅羅襦。長卿獻賦不歸去。那得有婦留空居。笄笄白兔走且顧。南北東西隔
長路。挽鹿難追司隸驄。隨鴻先傍要離墓。金刀劃水斷不成。悼亡賦罷顛毛生。從人但道婉婉節。使我頓
增伉儷情。當年司法北平右。共識使君自有婦。今來被召入帝京。不道寒房夜炊白。桃林關前桃樹新。東
風吹作灤河春。相尋倘認盧龍路。應遇金臺夢裏人。

項學士招沐益都相公萬柳園同諸公卽席

朝上金商門。暮宿永寧里。翠帔結烏頭。黃塵障驢耳。同鄉先達項囊師。鬼鬼副相居黃扉。見予落托頗矜
惜。往往引手相扶持。連朝待漏趣入侍。看倚金鑿判封事。御籩盤分錦菜羹。宮衣袖惹硃花字。旋從請沐
呼飲間。便尋杜曲城南端。紅泉舊有昇平宅。綠野新開裴令園。長樊介隴辟廣畝。種得垂垂萬株柳。九列
頻教汁染衣。三眠不用枝生肘。青絲碧縷布作帷。今來正值東風吹。珠軒玉勒請載過。名賢豪客紛追隨。
紅橋初度入礪曲。木末空亭接林隩。平原慢衍馬埒長。旄澤蒲移覆朱屋。霜摧雪壓葉漸疎。猶然鬱鬱園
中居。官渡城邊朝繫馬。永豐坊裏夜藏烏。藏烏繫馬兩不見。短榦長條拂人面。翁薹難分灞上營。風流那

滅靈和殿。閒堂四座傾酒卮。行廚炙鹿還烹蠶。庾公撤幔欲理詠。潘岳隔筵將賦詩。寒飈襲袂日馭短。重向枝頭覓睨睨。澤在何愁玉醴枯。情深頓覺霜裘暖。先生意氣豪且真。相從彷彿游雲津。他時得返柴桑去。望爾還尋柳下人。

冬日過上海署故人任明府製衣我感賦

丈夫生豈易衣食。終年在道披練裳。朔風吹林下寒葉。垂老欲住江湖傍。故人爲宰在滬上。呼我再過聽緗桑。薛城留客有布被。萊蕪滌釜無舂糧。顧此短褐不至骭。惻然爲念范叔僵。自視兩袖頗飄薄。但看七尺真昂藏。割氈何足贈江革。解襦不敢衣顧郎。冰絲急付凍女翦。鈿尺便向當身量。生平旅食就仁祖。前歲婦禪辭豫章。惟此繭爲伯夷種。況逢衣自膠東牀。貧士被服允無斃。良友致意安可忘。只憐連衽坐相對。反于官服加輝煌。少小誦讀并不出。嘗恐行路分左羊。十年衣褐蔽廣柳。一雙葛履投嚴霜。多君力學早通籍。脫麻更着宮錦黃。今來爲吏解衣我。宛如當日東書堂。陽和乍轉稍暄煖。我當刺擢還故鄉。入林服此快游飲。落花滿袖春風香。

答贈湯右曾長句

嵯峨閭闔平旦開。馬蹄撲撲飛黃埃。湯生年少好容髮。與之相遇長安街。雙瞳炯炯負意氣。手挾干將甫磨礪。鉅器知爲王儉才。請纓未遂終軍志。他鄉各恨相見遲。贈子長句如哀絲。酒徒慷慨和未已。令我聽之心骨悲。從來知己老彌寡。擊鐘無聲且擊瓦。感君任俠過季心。空道微文似司馬。宜秋門前霜葉黃。解衣但醉當壚傍。吳姬十五正年少。新滴玉槽蘭水香。

孫侍讀初補學士復將還養于其生日歌以贈之

射州學士孫叔然。早年草詔蓬池邊。乞歸養父三十載。登朝綠髮方鮮妍。山池宴罷出就舍。二月含桃摘盈把。倚案羞裁五色書。當街且控三花馬。綵弧初絙還養鄉。鬱洲山色仍相望。臨行欲致留君意。鄧水坊南酒正黃。

寄黃州向君予修史時錄史監生向在江之父也。

石陽城西江岸春。龍丘高士方山中。讀書蘭浦水長碧。把酒雪堂花似銀。金門獻策路中斷。綠髮紅顏有時換。華頂難同禽慶遊。柳邊且共稽生鍛。趨庭皦皦白玉姿。燕臺石鼓來題詩。文章久爲成均重。筆札新從翰苑知。圓冬史館每入直。輒向芸牕見顏色。因道家公舊有心。能使羣賢遠相憶。楚江東下繞臨臯。赤壁于今戰未消。誰解此中閒歲月。有人家住綠楊橋。

送趙郎中權使揚州

曩者始元舉文學。盈廷辯難惟推商。茂陵魯國各持說。但欲摺拄桑弘羊。今來待詔給筆札。方值征輸事遏伐。大夫文學相見疎。誰敢著書論鹽鐵。司庾覆錦稱望郎。懷香握草趨明光。延清詞賦韋氏學。二妙有誰能抵當。星軺奉使推邗上。畫舫紅橋截春漲。豹尾朝懸估客巖。鼉鳴夜度官艚餉。揚州此去風景殊。繞朝不用攀行車。關門紫氣時時見。爲我重詮道德書。

題暢心閣册子王二光祿別業。

王生本是烏衣郎。家藏司馬金翦章。草堂開向衆山裏。高閣下臨湖水傍。春雲出軫入帷幔。朝雨盈塘接

南岸檻外長町裂。葦衣門前漲水浮。花片沿湖東上一堤遙。跨向湖心有畫橋。唼嗜波間翻雁鷺。參差沙面長蘭苕。種來隔浦荷千頃。看去當風柳萬條。晴光繞樹烏雀噪。縛得芒針好垂釣。載酒嘗過阮緒家。到門總是王猷棹。談經抽牘并論文。山根紫筍方穿雲。斷還烹就雜茶薺。玉帶有泉天下聞。相傳此地卽蘭渚。上已曾經集王許。千秋尙憶稷賓年。三月定傾留客雨。今來同作京國臣。高梁屢見桃花春。敝衣但濯龍池水。解帶難揮馬棧塵。夢中攀得鄉井樹。欲賜官湖乞歸去。狂客新祠久未成。務觀舊宅知何處。十年奔走無宦情。相期空負南山耕。多君猶有逍遙館。每欲題詩三嘆生。

蒙內府席學士高軒見過隨于報謁時留飲感賦三十五韻

帝城春暖柳漸舒。烏裘百結懸柴車。王門何處堪曳裾。徒然懷刺隨屠沽。北宮才子金馬廬。曾披錦字紅綾書。從龍起自豐沛墟。虛懷善下愛腐儒。春行漸訪干木閭。自慚十載沉江湖。浪隨嚴助思上書。惟恐操瑟非所須。欲行還住多趨趨。到門挾帚但掃除。俯首不敢繫履絢。何期門吏禁走趨。居然倒屣迎王符。鼈扉宛轉關綺疏。邀予並坐紅氍毹。清談揮麈閒有餘。腰間尙掛雙玉魚。御河流水烹滿壺。攢盤苑核兼山蔬。楚苗之食隴阪蘇。間寫馬酪傾乳酥。宛如水底蟠珊瑚。酒間誦我文未疎。芻蕘曾探東園株。鸞鳳五色狎野雛。從來薦達稱子虛。枉稱予賦同不如。方今築館招燕都。千里共披駿馬圖。丈夫知己無處無。醉醒何必懷孤虛。

送趙棠溪歸西江

棠溪趙子真天才。千里馳騁如龍媒。曾因借箸宰吾邑。滿城萬戶皆嬰孩。今來相遇薊州路。早向長門賣

詞賦黃塵撲面風捲衣。醺墨揮毫有神助。春光初動柳拂波。故園花發思如何。掛帆通潞欲歸去。酒徒市上還悲歌。天涯去住總爲客。請飲杯中壯行色。此去無愁良會孤。前路何人不相識。

益都師相請召同館生西堂讌集用陳檢討卽席原韻命和

從來珠履羨黃歇。好客高風久淪沒。但道公卿善下人。有誰肯結王生機。況予落托久不前。那得簸揚似糠粃。何期夫子亟引手。不使出官請六螭。坐令蓬蘽僂僂人。頓入玉堂造金闕。季秋望日日將卒。諸生講論燭未跋。突開絳帳通酒漿。恍爲戴崇設肴核。炙肉分膻入豆新。霜葵軟齒嫌匙滑。當筵酌斗如挽河。那顧中宵有星孛。須臾銀箭落如雨。帝闈已閉絕鬼謁。第恣雄談未肯降。轉使深盃不停罰。我今納履將欲發。世事紛紛慢相許。人生好會能幾時。日月東西嘆倏忽。不見貧兒甫釋褐。使得登壇仗旄鉞。何須把定三寸豪。只賦天心與月窟。朝來爽氣滿西山。吾且支頤拄牙笏。

西堂讌畢仍用前韻擬宮怨詩益都師相詩先成命予援筆立和其後

長信宮中秋雨歇。昭陽殿裏星初沒。秦女朝來未卷衣。班姬夜久將弛機。憶陪阿母學針線。頗厭小郎食糠粃。第向欽頭綴玉蟲。幾曾臂上填朱蜎。誰知一旦選良家。遽絢黃羅赴天闕。才人下比廝養卒。永巷隨行覆足跋。每開溫樹使探花。但食金桃便藏核。我今欲織龍袞裳。桑壇浴繭如脂滑。祇恐綠成五色絲。朱紫青黃變爲李。古爲九嬪掌婦儀。不使三宮盛女謁。同車宜謝壁門行。退養甘蒙掖庭罰。況當邢尹甫見憐。豈有昭儀敢相許。春花秋月如等閒。暮雨朝雲總翕忽。菲服華桂拜鬪茵。何須繡黼提章鉞。莫道飛蛾善築牆。莫言狡兔能營窟。官家如點上陽人。恐有佳名再書笏。

膠東道中寄周生六十初度

拒霜花發紅滿枝。畫屏金鳳雙差池。汝南高士遶花甲。弧矢在囊酒在卮。迴思夙昔擅聞望。藝苑鷄壇屹相向。第五名垂驟騎間。中郎文在司徒上。閉門高臥三十年。東堂有弟留花輒。潯陽自負達人譽。洛下共稱之子賢。與予意氣頗相得。論議當前快冰釋。榮蕨猶存澹泊心。鱉鱸不費推移力。周生每談名理故云。自憐歲暮淮海行。馬前挹水長清清。只因早向膠東路。時見長庚徹夜明。

宛平相公初度奉贈七月八日

往者開國主文教。前有宗伯後七兵。燕許一時得父子。袁楊數世皆門生。伊余被詔待官邸。親謁尙書集賢里。堂供先皇舊賜書。園通後夜新添水。春雲繞屋花繞牀。豈期絲竹還東庄。翟公在籍甫終制。曹相就家趨辦裝。槐廳入坐署堂押。百職班迎敢相躡。鼎耳環看總赤文。詞頭待判加黃帖。自來策拜重報昨。況復新參本名輔。題冊重思母后恩。探符特赴陵園路。三年橐筆爲史官。私書不敢投任安。感公冰鑑炯相照。使我墨花寒未乾。始知元宰受帝稟。手摘星辰類菽荏。不信試看河漢間。昨夜天孫布雲錦。

西河文集

簫山毛奇齡

字僧開
又名姓稿

沈宗熹師尹較
郭鍾機石城

七言古詩十一

吳興太守行

吳興太守本仙吏。早題姓字慈恩寺。興來豪客坐滿牀。數斗烏程不知醉。拂衣歸去無一錢。攜家住任闔門邊。從事作詩好合集。吏部出行那有船。當年相過慧曉宅。對客揮毫似飛翮。天半流霞總失妍。閨中刺繡皆無色。夫君自是園季倫。採芝處處忘冬春。肯將商洛山中客。還作留侯門下人。時太守方辭薦辟故云。

昔日篇送任令南還上海兼示王十六舍人

昔者結髮共文硯。王韓及君成一龍。王舍人先吉、韓孝廉日昌、任上海辰旦、與予同學于先教諭門下。舍人孝廉久通籍。君亦爲令開吳淞。予以龍尾不得意。索食兩入泖浦中。會當天子召文學。郡吏已仕皆令從。通經應詔孔子夏。長史被徵黃次公。炎風暑雨一就道。逡巡獻賦明光宮。爾時賜宴接袵袂。猶記拜箸分脆膿。何意詞業入祕閣。旣取復落神物工。遂令李邵生感激。抗書欲上不得通。春明碧柳盡拋絮。太液露荷將放紅。徵車南返各祖帳。使我泪滴樽盤空。制科自古雖縝重。歷代沿廢難盡同。之官魏相自能達。留京鄭昉常

安庸不觀退之試宏博。三試三卻無報容。獨憐子友各散處。仕止輾轉如轉蓬。予復遲暮滯京邑。南望獨立心忡忡。吳淞潮上海雲起。君應報最入奏功。明年舍人儻就判。爲君佇望雙飛鴻。

夏杪集宋大司馬宅觀諸名伎偕同館諸子卽席

長安六月手獵蠅。西堂午琢銀牀冰。花梢捲出雲棚敞。桃竹鋪來夏簟清。尙書朝罷理杯罍。彷彿當年飲河朔。護索彈將塞上聲。參差吹遍江南樂。金槽軋札銅椀鳴。五絃三調傳新聲。段師曹保賀懷智。供奉御前皆有名。雕闌雜坐列彝鼎。佳客滿城紛召請。門下通居白玉堂。後來總住紅蘭省。卸衣還脫袖中麻。據席不窺輒上影。石枰玉局鬪樂方。挫糟漱酪呵涼漿。釣魚作鱸供仙史。籠餅加蔥有侍郎。看蔬錯列擬公譙。對榻抽毫弄文翰。鄴下方看楨粲來。梁園未許賓朋散。葵根度日暑漸收。登臺月上金波流。平沙水落玉河堰。雲起夜封宣武樓。華燈影裏呷鵝管。遙望西山正蠓蛭。倚檻平垂斗帳斜。開軒坐對譙門晚。自憐臣朔長苦飢。短轅輾轉如鷄栖。何期暫與蓬池會。頓使涼風生葛衣。

上高陽相公詩有序

予以康熙戊午應召入都。蒙高陽相公日揀予舊文。繙閱由繹。獎引過當。感而爲之詩。

國家安攘三十載。台階藉藉稱高陽。兩朝首輔越廿襮。青瞳綠髮齒未央。峩峩當軸領政事。海內于今號長治。但向詞頭判綵毫。不須敕尾添花字。年來晨夕苦黽勉。日上黃扉駐小輦。食案朝垂簾。宿寒火城夜照沙。堤煖祇緣親近贊。密勿每佐皇威遏。回通當機不使殿外知。祕旨長教閣中出。卽今江漢將洗兵。王師撻伐還連營。已平昭義盧從史。須討荆南劉漢宏。以茲克詰煩廟算。況復中原甫安奠。借箸重爲策治

安求衣自台分宵旰。恭逢聖主方好文。將尋干羽銷兵氛。詔書五色自天下。徵車四集如雲屯。東堂發策未親試。預聆諸儒使談議。晁錯難傳誓誥文。賈臣未解春秋義。相公明哲本神授。矧向天人早窮究。管通墳典作蟲書。豈止山經辨禹獸。顧斯末學類蠛蠓。肯爲申韓較優劣。不道元臣總萬幾。翻從下士求三哲。嗟予出處兩未全。懷文獻賦悲徒然。樊川空挾阿房賦。崔顥徒多輕薄篇。其如河海誅蕩蕩。能問春流細無恙。裴令優容不可名。謝公齒頰真難量。紛紜册府未引逸。猶自燃藜照緹裘。書因都護剖蘭筋。賦使相如解盧橘。固知名教自有主。致治何須誦論語。功德方看過富韓。文章早已歸燕許。煌煌景運啓未遲。要令相業傳康熙。明年收復湖湘路。願上元和聖德詩。

飲次書梁陶侶世兄便面

陶侶爲司農夫子從子。豬市卽夫子邸里。

幽蘭在谷芝在田。謝家子弟多名賢。朝陽門外騎馬去。爲汝一停豬市間。紅顏綠髮將佩組。腰下羅囊不曾賭。衛瓘書名擅北堂。野王畫法跨東府。臙脂河上流水新。酒家舊賣中山春。幾時同返恒陽路。重醉金門飢死人。

西臺先生行奉送臨海馮少司寇葬親請假歸里

西臺先生似威鳳。早上金堂拂雲棟。閱闕高于桐柏山。房櫳蓋在桃花洞。當時司法蒞永昌。博南開後通瀾滄。九龍不擾銀生地。五聽長臨金齒傍。自言家世嬪駿烈。兩見高堂秉奇節。劉毅冬啣祖母芹。楊憑少吮慈親血。陳情久已痛烏烏。獨迎萬里潘生輿。東征賦就白蠻樹。南郡辭將青海魚。中丞入告賜表揭。章安城邊擊雙闕。五花錫命珈帔殊。剛在裴家建坊節。無何移守石鼓城。阿儂盜弄潢地兵。歸朝欲表鄭虔

志道梗頓達徐庶情。踉蹌回任遘母疾。路蹶天遙哭相失。誰能辛苦賊中來。鑒此孤忠晉華秩。都官力贊廟算行。樓船潢浦檣昆明。三巴六詔喜盡滅。孤櫬一舟悲未迎。因之解組叫闔闔。天子隆恩降優答。嶢然忠孝具能全。況復妻孥此時合。秋花初發繞玉街。離亭欲別還啣杯。故鄉墳墓望何許。令我惻惻徒傷懷。大江東下數歸驛。天姥嵯峨下窺窑。窳戶封來繡閣雲。壇碑啄出寒山石。偉元廬墓歲月閒。謝公舊墅難追攀。何年丹穴歸棲羽。仍向瑤臺縱翮還。

徐母邵夫人壽詩

徐繼恩之配汾之母也。

往與徐汾父子友。比之阮藉交二王。夫人令妻併壽母。既賢且哲能文章。最憐老友入林去。遠向寒山憩雙樹。許邁徒傳阿閣書。梁生不在臯橋住。我昔從行恨未力。甘載相違苦相憶。今來堂上拜女師。尙見芳樽照顏色。清秋明月出每遲。玉臺皎鏡光離離。若嫌祝誦無佳句。自有庭前孝穆詩。

徐二將歸暫寄湖南周開府里第過別有贈

徐樂上書不得意。將乘款段歸南山。黃金用盡敝裘裂。何計得還烟水間。長安四月方苦熱。日飲冰漿類沃雪。鹽車欲駕去住難。忽遇孫陽泪如泄。菖蒲酒暖梔子香。新裁越布單衫長。湘南節度如堪倚。且住城西舊草堂。

題文待詔雪圖奉送高少司寇還般山

何年蒼筆寫顯景。鹽花刻作山谷春。孤懷灑澗洞當洗淪。兩目豁達開風塵。伊誰蓄此作寶祕。般山先生得真意。圖畫恒留處士吟。烟嵐不待官家賜。當時出入金馬廬。蓬丘瀛海連江湖。夢游已聽鈞天樂。草詔還

呈紫府書集賢學士乞歸去。家近南山傍雲霧。溪上啣將陶沔杯。園中種得於陵樹。最憐良馬卸鞵鞞。偏借都官坐赤棘。柳惠焉能作士師。曾參未許落刑辟。西臺高臥對白雲。還家久已忘冬春。始知羞行喪。有守誰謂侍郎難得人。聖明下詔策災異。執法承顏舉遺棄。咸道先生風概殊。能使頑廉懦立志。先生應召披敝裘。寄居蕭寺翻經樓。馬芻一束苦戀棧。蠶紙半牀兼覆甌。修容靜與巖壑暝。論史決若江河流。思以祗德代請讞。勝彼木鐸警庶郵。長官當白不當白。豈向斯世爭沈浮。清秋遙夜雨初歇。正遇棠村授師說。時司農夫子招飲。下直沿街燈火紅。高軒到座星辰豁。翛然相對澹欲忘。後譚莊列前羲皇。宛如鄭繁負驢背。宵行風雪滿滄滄。不然湏上借書去。冒雪一詣張君房。纖埃不起林落淨。奚啻澆水滌繒囊。斯時祗恐絆鞅轡。霜深露滑增徬徨。何期聖明轉浩蕩。特許還山遂微尚。白雲出岫本無心。黃鶴摩天總難量。長洲待詔筆法精。雪圖千載光芒生。寒冬把此欲歸去。瑤天粉地千山明。山前有人騎馬行。

大雪陪益都夫子游善果寺歸燈下同夫子和陳檢討詩一人呼韻一人給寫信口占叶不許停刻時王二舍人胡徵君在旁知牀後舍人亦有和詩紀其事

天將大雪早作霰。譬如拆木先拆芽。須臾拋落若柳絮。細細剪出天工葩。既非車下撲塵土。復異柁底揚風沙。祇覺雙林萬枝亞。一望簇簇若枳枒。是日本欲詣初地。後車將發興有加。寺門石幢掛秋草。俟我白首雙垂髻。毳羽漫空不遽墮。瓊瑤在地豈敢挈。驟臻方丈恍突室。一燈黯黯圍舊紗。堂中鐘鼓響還寂。令我冥會成無遮。伊蒲作供飯未罷。午鴉啼過啼晚鴉。重登高閣遠眺望。共驚銀海翻龍蛇。雁王一塔藏貝葉。獅子雙脊馱僧伽。彼此相峙總難辨。就中密織如亂麻。況當說法散花雨。豈有錫米能膠牙。浴堂煎作

功德水。銅盤灑。激傾流霞。淙淙積盥發。細響不數隔。水彈箏瑟。卽此享受亦已過。世間何用矜豪奢。揮灑
既畢重就坐。寺僧復進龍乳茶。南泉旣遠趙州去。不須齒舌相勾爬。歸來暝色暗前路。出門惘惘同天涯。
誰知夜半燭牕發。依然落筆風雨斜。

胡鵬明曰。益都落筆原如湧泉。茲有意作擊鉢刻燭諸豪舉。而西河追之。不先後一字。至鴉蛇二韻後。夫子大聲稱賞。自遜莫及。次日王舍人亦有和韻。餘見西河詩話。

寄贈淮安王君七十并示令子文學

少年曾作淮陰游。伍胥廟傍尋酒樓。此時酣飲鮮雜客。座上往往來王猷。繁花當牕午雲熱。醉餘隔院聽
楚謳。因之登堂拜獻老。有若健柏凌嵩丘。迄今廿載憶朋舊。夢回月出清淮流。但聞市少已漸散。縱有亦
復非黑頭。昨來徵車稅城下。欲入不得爛兩眸。猶幸同館盡相識。淮市三子居最優。其中李生與王氏。
李編修也。實爲羊鄧深綢繆。況當獻老年七十。秩閣將復傾庶羞。彥方高志但居里。逸少愛閒長汎舟。那
能侍杖效憲乞。一觴捧出丹霞浮。長安雨歇鴻雁發。蓬池水落芙蓉秋。千年碧藕欲攬寄。凍瀋三挫成一
甌。人生得歲饗適意。爲我寄語且縮簪。不信但看服綵者。在家亦已扶鳴鳩。時令子亦五十初度。

此日行寄祝益都夫子八十

當年召試入帝京。中書門下曾投名。益都夫子典詞業。手把繩斗彈墨絃。並言朝右方倚芘。眷此黃髮爲
民正。其時正值授杖歲。將進三列作五更。盈庭憲乞予敢後。因之扶服獻鼎鏹。無如東望起歸興。一日三
疏乞解程。天子特詔宴禁籟。中使扶侍周遭行。題籤書絹并篆石。宸賜優渥如雨傾。遣官持節送還里。長

安車馬填郊垌。不期此事已十載。子亦南畝三耨耜。曾因請急過通德。佳山治水風光并。佳山堂治湖皆益都佳處。凌晨啜茗聽笙瑟。傍晚種竹量雨晴。出郭相訪誰氏叟。將車剛及子門生。曾幾何時忽彈指。賜杖復得中壽稱。三公雄健過伯始。九老繪畫比武城。生人聚散有定數。矧子遲暮非壯齡。再拜不得親獻杓。一心終自同搖旌。東方花木及春發。南狩鑿馭將時乘。醲醑滿甕漫斟酌。烟霞萬里須丁寧。非熊八十儻還載。此日正逢渭水清。

寄祝姚少保六十初度

大鵬搏扶越九萬。林間斤鷄猶決搶。丈夫致身亦有會。安能刺促粉榆傍。當予少小擅文賦。卽聞上國壇坫張。衣冠輻輳徒輦集。鐘鏞在序鼓在房。譬則齊晉大九合。下士受約如江黃。中間較文試帖括。猶然領解在帝鄉。一朝烽火遍南服。夜起趨躍加騰驤。傾裝買鐵募死士。叩馬一謁沛獻王。左手草檄右殺賊。遂平甌越恢閩疆。習書請兵張仲武。麾扇克敵謝彥章。天子嘉嘆邊錫命。驟令開府建羽幢。破蜀竇軌授神策。平吳杜預封當陽。論功不下大將列。銘德乃過元舅行。至今溟海凜威惠。環瀛萬里無波揚。予忝梓里就史職。橐筆往往書旗常。況當弧矢罍綵。道遠亦欲進一觴。幸願金匱誓秦礪。將標銅柱凌扶桑。臨風何以致稱祝。神山巖窈海水長。

烏栖篇爲晉江范貞姑作

青陵臺畔清霜飛。秦家桂樹烏獨栖。餐茶茹藥三十載。石闕久啣悲復悲。春花秋月宛然在。辛苦攜雛羽毛瘁。撤饌長依庾約兄。寒房只坐張玄妹。姑依兄鄭山公選郎故云。慈烏反哺尾畢逋。膝前有子傳詩書。他時

六翻翻雲去。始信人間有鳳雛。

題董都護記年圖兼送其軍鎮萬州

江都弄環日。能賦梔子詩。庭下五色雀。相視非常兒。移時學字擅八體。鵠反鸞驚并鷹跂。偶寫烟巒點拂奇。畫地步天餘技耳。因挽楊葉射枝戟。遂入天階獻高策。設騎分垂都尉符。驚文自草參軍檄。從容渡海征斛羅。盧循遠徙藏流波。明廷加節授督護。開府正當儋耳河。賜衣不着但緩帶。徐步蒼林石塘外。野人相遇誰得知。試看當年好圖畫。書生意氣本自奇。虎頭豈是尋常姿。留形丘壑無不可。爲龍還復爲蛟螭。青門設祖請祓軾。一展斯圖壯容色。他日功成倘鑄金。碧帶青羣尙能識。

送梅庚赴江南田使君幕和其留別原韻同陸大卽席

昔年曾作蘆中人。蓬萊幾度看揚塵。但逢東海孫賓石。不遇南昌梅子真。長安忽遭載文軸。把筆如櫺幘。如屋入座皆嫌倒屣遲。當筵但道揮毫速。年來好酒惡水淫。醉歸敲醒街頭砧。蘭成自有閒園賦。李勉原無戀闕心。同時大陸本舊識。謂陸冰修也。曲巷茹蘆日相卽。久知豪客自情親。堪笑世人皆耳食。才大驚疑

總在胸。官貧薦引全無力。金臺名駿服輓多。宮中誰肯憐姪娥。誰知幕下得賢主。頓如尺水生微波。時冰

修同落筆見幕下句驚曰何以合波字及得此句遂擲筆嘆絕雙橋相對草堂近。澄江一望迷林柯。高旌前導畫熊虎。

屬車後載環馬騾。南行有客辨車鐸。相逢莫使然疑作。發冊應過玉笥山。聽鐘猶在昇元閣。只愁良友去

薊門。每上河橋輒作惡。陸生預道蕭山毛。臨行一曲唱且高。不虞漏盡雞三號。珊瑚鞭欲揮心轉勞。金繩墮

地玉壺罄。願君還聽歌聲豪。

陳明府選之遇于長安街飲次索贈

朔風吹凍塵不飛。道傍車馬如鷄栖。天安門外柳條短。回首一逢薜荔衣。清姿濯濯負意氣。我友陳生好難弟。挾管長從鳳闕游。揮金不計蠅頭利。行年剛及強仕辰。將紆墨綬拖黃銀。陳遵自昔能驚座。孺子由來不厭貧。獨言賦性愛山澤。每向蘭亭探遺蹟。太守祠邊醜酒紅。柳姑廟後翻魚白。今來偶寄碣石宮。有人獨坐還書空。何時解組賦歸去。與君把臂深林中。長安邂逅值冬節。幸對旗亭酒初冽。腰下雙鉤解照人。且看春明杏花發。

送林使君督學河南

東家拾明月。傳視不能識。青黃蔽前林。誰能辨容色。晉安才子林使君。文章翕霽如蒸雲。與予同館者曹子。借過泰山爲主文。聖人大悅加獎譽。旋使中原視學去。劍氣長飛龍子灘。鹽車早辨羊腸路。春風二月柳滿街。御河水當行杯。南行已及清明後。少室山前花正開。

陸生赴蘇州幕

陸倕名在沈謝間。垂老被召來燕關。龐嚴李益不敢薦。三年將返支硎山。蘇州使相甫開幕。便展干旄導情慄。臨海還招鮑照歸。渡江且逐陳琳去。吳中故舊多隱淪。草堂仍築東湖濱。浣花不厭主賓晚。種菊愛看鄰井春。只愁曲巷鮮憑軾。石鼓遺文倩誰識。韓愈曾言空馬羣。一顧燕臺泪霑臆。

送家太史假歸新安

長安朝暮送行地。西有張掖東沙河。每臨祖席發歸思。曰歸不歸思若何。憶昔徵車乍來赴。本欲還山乞

歸去光宅先教宿李蟠。直言必欲留裴素。吾宗就試得數人。林間二阮叨同倫。雲陽舊令舉復罷。謂祥符令會侯也。

叔氏妙才人盡聞。揆天徹地藻思闢。嘗見揮毫趁飛翮。國子通傳虎觀文。獻王親受京房易。太史

爲伊勒免親王授經。集賢載筆入丹地。便遣方平撰前記。制舉從來待異材。史書豈是尋常事。嗟予落托百不成。長沙舊譜依泉明。霜前銅獸當廳列。日跨疲驢遂隊行。如何叔氏掉頭早。鎮自陳情痛烏烏。嫠女瞻來橘嶂寒。客星歸傍桐江曉。予于去住願總違。豈難遽着青羅衣。慙于史局未能了。覺與世數終相岐。秋林柿熟菊初發。此去蘆溝看新月。詘指明年還院時。仍在清商戒寒節。軟塵着雨衣未乾。滄浪自昔推新安。冠纓濯罷如相望。知在天邊風露間。新安有天邊風露樓。

啣魚篇贈廣文盧先生

先生本是麟龍姿。偶來提領宣聖祠。鄉書早展冠國士。臯比坐擁爲人師。翛然高舉蘊飛翮。羞向長安再投策。魏世文章重子欽。漢儒學行推盧植。秋花開發絳帳寒。閒堂撤牖襟懷寬。青氈不用翟兪布。美饌長揮苜蓿盤。生平月旦重閩里。冰鑑當胸似清泚。不教魚目混明珠。誰抱寒桐對流水。蕪文好我如嗜癖。天涯汗漫知音稀。願爲堂上啣魚鳥。長傍秋花遶遶飛。

西河文集

蕭山毛奇齡

字春暹
又春庄稿

何倬炎卓人較
沈宗熹師尹較

七言古詩十二

題松下芝萱圖

謝庭暈暈產紫芝。北堂叢樹生華滋。長洲畫師解幽意。畫師盧逸長洲人。翩翩寫傍青松絲。金冠玉鞮間朱芾。翠羽紫翹橫碧枝。一種能釋壯士怨。九莖堪作商山思。煌扈在庭集衣履。繽紛滿座饒文辭。要知石上松鱗長。便識人間歲月遲。

暮春二十六日張弘軒刺史宅牡丹初開預作催花小集歡讌竟日同馬廣文朱郡丞周孝廉楊

生絃索女較書玉烟陳婉

春風吹日上畫牆。名花倚檻將生香。張家舊種嬪洛下。丹州越州難比方。蓓蕾初發一相見。油壁重重捲嬌面。游子將爲贈芍吟。主人預啓催花宴。瑤牕琢石前後通。青娥雜坐雙顏紅。綺羅試着甫開襖。臙粉薄施如未融。須臾雨至灑幃幙。翠幃雲屏裹來薄。小沐愁看髻攏分。新粧恐激唇脂落。高歌幾疊夜色移。當筵爭瀉黃金卮。妖絲曼筦次第作。傾城相顧猶顰眉。城頭吹角忽雨霽。蠟椀膏毬置花裏。赧面羞從泪洗

餘醉眠嬌。倩人扶起。姸娜前後。互相映。中坐雙鬢典觴政。燈前恍鬪晚粧新。閣下莫嫌春漏靜。名花從此當漸開。主人邀客還重來。雨餘不忍辭花去。更向花前醉一回。

答和沈東園贈別作兼示王西園

我來游滬城。便思梅花源。梅花開時不得見。行見蜀葵開滿園。西園王子爲我說。維此園東有人傑。築塢能留黃浦雲。長陂每泛藍田雪。良朋高會如永和。花間載酒常經過。到門私喜無題鳳。落筆還驚好換鵝。相思久欲贈瑤草。況與君家翰林好。錄別愁看夏雨寒。何期晤對申江曉。木叉庵前紅藕陂。圖來爲汝方題詩。長帆初掛海潮上。握手反嫌相見遲。薰風拂拂起前路。寄語西園道歸去。他日相思倘卜隣。當造梅花最深處。

紅橋酒散別曹明府

東京名士曹叔通。讀書磊落稱文雄。十年相憶始相見。載酒只看花樹紅。平泉莊南啓高閣。倚檻曾經度黃鶴。石磴空垂四面羅。珊瑚欄新種千年藥。當時試宰在睦州。青簾高掛滄江流。懷組入官本慷慨。角巾歸第何優游。迄今相對理疇昔。每向嚴灘泝潮汐。況我長爲灘上人。解纜將行泪沾臆。榴花初發開錦筵。美人雜坐彈朱絃。欲知他日相思處。只在紅橋綠樹邊。

春夜飲趙舍人宅同諸公作

春城飛蓋度南陌。夜聽歌鐘啓華席。世族原推宣孟家。滿堂尙坐平原客。烹椒和芍斫巨鱗。披襟共醉蘭陵春。主人意氣拔雲漢。是誰雄辨翻河津。重門夜久待擊轅。手把深杯莫教卻。醉看當筵月上時。便見階

前放紅藥。

青雲辭奉呈益都相公書事

皇帝踐祚一十七。詔遣求賢重經術。廷臣內外交薦揚。惟恐蒐羅有遺失。堂堂公府推益都。泰階早建元。臣樸星辰照地啓遙矚。仁壽格天開令符。闕門撤牖進巖穴。每遇縫衣肯折節。一時名士歸杜淹。無數高文過張說。嗟予詘處東海濱。十年奔走忘冬春。少爲吳市吹簾客。老作安丘賣餅人。何期閭里甫偃仰。北府南司遞相獎。蒯徹佯推東郭生。鍾君誤薦西亭長。秋風颯颯九月寒。布衣草屨來長安。挾書欲上苦局促。懷刺未投空往還。縵胡短後走落拓。時向天街問寥廓。掃去知爲丞相門。望中何處公孫閣。先生大度括九有。日布弘幃被廣畝。迎來田竇不下牀。卻爲王符倒屣久。鳳味龍鬚不易攀。置身疑在青雲端。虛懷祇覺渤海淺。溫語頓令寒谷暄。逡巡瞻拜嘆遲暮。折簡重邀酌青醕。釜熟能傳鐘傅銘。筵前許借蕭何筯。方園濕燥左右排。就中鏹鼎加鹽梅。佳魚總向天廚出。美酒多從賜膳來。殷勤厚意轉相屬。百福千祥慢教祝。啣澤深於灑激杯。餘光炤向參差燭。獨憐布被甫覆踝。日捲黃綿裹寒者。庭前隙地僅馬旋。翻爲儒生貰高廈。只此闔惠非偶然。授餐適館昭前賢。杜陵果慙萬間志。姬旦豈徒三握傳。況當天子念寒士。先料徵車給廩秭。時徵車到都者朝廷喻度支議給廩米水部分將主父錢。金門預受東方米。聖君賢相邁一時。嗟子後至猶逢之。謂予瑣瑣倘不信。請看今日青雲辭。

淮陰李貞女詩

春城狹巷種烏漆。秦氏樓頭閉朝日。碧葉垂絲斷未連。紅襟小燕飛難匹。長淮嬌女年甫笄。當牕便詠其

姜詩行廬拖帳早相失。單帳復衿誰與施。淮流活活向東去。三十春風等閒度。若問城南陌上桑。但指山前女貞樹。

瞿山畫松歌和施學士

生年不識慈仁松。曾觀三鬣圖畫中。今來習見轉蹙縮。何如尋向雲門峰。宣州學士顧我說。柏枹山人負高節。能于指下作怪形。跛虎攢龍互吞嚙。祇須捉鼻誘其畫。墨瀋膠漿雜鵝炙。但吟小句綠牕間。便寫高枝碧山下。時瞿山以畫松易詩。營丘作畫不贈人。空畫五葉長等身。豈如蘸筆換詩句。詠歌倍覺生精神。大荒柅格有老幹。一幹發作千年春。第恐地窄絹牀短。手捫腳蹴非其真。學士索畫強自呻。我亦竊效東家顰。他年築居儻與鄰。連予寫入青溪濱。溪傍一松千萬鱗。

雪中集梅庄主人何使君邸第有贈

朔風習習海雁鳴。燕關千里同雲生。會稽太守本廉吏。歸卻一錢舊有名。蕭條獨上郡國邸。將挾新書獻天子。隘巷雙輪駐若雲。當軒一榻清如水。相從對酒并論文。門生故吏還紛紛。題詩不讓杜老句。妙筆欲寫羊生羣。珠繩宛轉傍東壁。玉琯吹葭動寒色。何處相看雪最多。禁城西去梅花白。

題喬侍讀侍直圖

天開闔闔鳴首明。宮鴉初噪朝烟生。侍臣入直每問夜。路白便催騎馬行。龍旗未辨槍壘色。雞樹但覺枝柯清。至尊臨御恍日出。左右羅列當星熒。東華奏啓六曹贖。南下立傍雙柱橫。終日橐筆但記事。有時顧問還呼名。偶瀕丹詔識機密。誰捧黃匣如橋衡。我友少擅司馬賦。當時曾遇甘羅城。比之鸞鷲戴九羽。飛

集牖下相顧驚。嘗寄鸞閣掌書命。儼塾牛紉難升騰。一朝召試得高等。遽膺著作承明庭。對策固知卻詵善。賜璽獨言李絳能。東堂草制白麻淨。北向課冊金版精。內坊封罌瀉綠水。便殿賞帶加紅鞵。胸襟開來山月豁。面藥傳去盤露傾。每因進講入籓宿。幾度課藝留延英。春風吹吹苑花發。宮門輪入隨班迎。良工繪圖寫容色。觀者有若睹曙星。予忝同籍共筆札。明將歸去呵尊羹。臨行開卷一展覲。令我感激雙泪零。丈夫生世貴特達。安能縮結同寒蠅。不見黃衣斧根下。有人戴纒從左升。

題松岩撫琴圖

長松嵯峨幾千尺。斜傍深林倚危石。中有高人抱膝吟。雙顏尙駐桃花色。當年任俠游兩河。紛紛趙李相經過。劍光淬落若流水。筆陣橫掃成陂陀。東歸萬里謝侯幕。散盡千金復垂囊。醉向金華驅石羊。閒從海上看雲鶴。我來把臂滬水濱。畫圖相對清心神。感遇不吟楚妃嘆。知音要與鍾期親。手揮綠綺卸巾幘。何物長康好筆力。寫置松崑片石間。相見何人不相識。

題松鶴圖爲一開師壽

高松百尺臨溪邊。上有松子垂千年。團團紅日松頂出。照來萬里滄江烟。翩躚林際舞一鶴。遠駕長風度寥廓。篩翅常疑白雪消。低頭乍恐丹砂落。閒來自得杳不飛。不臨金闕隨瑤池。幽崑松下起長嘯。但見綠陰生素衣。

題燕市酒人圖歌

酒人曾向燕市過。玉缸銀海長婆娑。興來殺賊且摩盾。時去看雲還枕戈。荆南十載等閒度。肘後黃金棄

不顧。但垂絳帳授生徒。羞向長門賣詞賦。生平曳裾苦未能。酒徒散盡仍追陪。草堂並道盱眙好。與汝行歌歸去來。將築歸來草堂于盱眙故云。

留別張中憲錫懌有感

曲江先生負文望。氣攝江湖有餘量。好學長疏左氏書。高才不讓河間相。當年厭處金馬門。泰山太守由來尊。拂衣歸向春申浦。種樹營成裴令園。我游海上漫投刺。把臂雄談快人事。戶外千迴過客車。懷中十載相思字。方春初發桃李枝。踢青挑菜時相攜。筵前張子碧山榼。簾捲夏侯紅妓衣。鄴宮高宴具四美。雜坐中間有史妘。長調笙笛共箏箏。不問清明兼上巳。聽殘鷓鴣日漸長。葛輅未試蒲葵香。西陵草暗欲歸去。頻把玉盃看夕陽。平船將趁暮湖上。爲唱離歌轉惆悵。綺席重開惜過情。布帆此去應無恙。謝公東墅一望遙。何年相憶還相招。當前欲別思何似。不見垂楊幾萬條。

甲寅九月廿七日同任青嵩張百修訪放菴蛤庵兩和上復過楊雲士齋看菊漫賦

青嵩招我訪雲水。偕之同看東籬花。高底錯出似攢錦。紅白間開如翦紗。自憐秋老嘆遲暮。每見秋花便相顧。佛頭樓子開最先。今來不數黃金錢。

何使君壽

天生申甫必有爲。世人咸望嵩高山。況兼賢哲多瑞應。蒼龍紫宿居人間。廬江夫子越州守。治郡能使一郡安。鳥棲獸宿偃平野。魚符虎竹通嚴關。九日開宴別父老。黃童白叟號且攀。礪石鐫文臥道左。負筥擔囊留轍環。惟予投壁遭按劍。夫子爲我抽泥蟠。晏嬰不責越石傲。逢人薦引齒頰繁。去年長至值初度。飢

驅吳會曾修翰。今來攝提又看指。登堂獻酒琥珀殷。生人有心能感激。鏤膺刻胃豈冥頑。若言仁者壽何算。請看春晝方漫漫。

過益都相公三世兄躬賢賦贈

從來雲閣推世德。東京楊鄧西金張。況當賢相饒令嗣。八龍三虎雙鳳皇。就中林立並皦皦。能繼難兄佩刀早。縣浦從教白璧殊。盈箱不羨黃金好。但看簡抑似韋布。只與詩書共晨暮。門生故吏趨滿前。食脆乘堅恥相互。卽予落拓寓京邸。長過高齋被優齒。下士能尋商洛儒。殘編搜及開元禮。始知家學自有真。寒風相對怡心神。牕前草木陽和動。坐見花開滿地春。

雲間張公孫伎席作

清河主人好趨府。頃蓋相逢道肺腑。顯氣能傳趙勝名。高門開向春申浦。暮春三月桃樹紅。單衫試着臨春風。罇前鼎食儼魚鳳。巷邊車馬如游龍。東西捲幔覆花葉。日上牕紗撲蝴蝶。名士同披白蛤巾。美人競薦烏絲屨。蘭膏樺燭入夜陳。當筵舞作尋橦新。畫裙繡帶盤旋處。滿地花陰思煞人。

馮守同四十索贈

敬亭初發聚花碧。陵陽自煮丹砂紅。持之欲獻者誰子。宣城高士馮守同。行年四十負意氣。嘗與干將較銛利。相逢茂苑最有情。當塗鬱鬱青雲生。

入春庭梅未開偶爲桐城姚士重孝廉作畫梅蒙以畫梅長歌見贈中憶西園看梅事率筆賦答朔風冽冽冰皚皚。雪花倒地捲作堆。人春一月雪未霽。庭前未有梅花開。樅陽才子客湘水。最愛毛甡畫

花卉紙上從教見。早梅枝頭故復添。新蓄停毫宛轉思美人。一枝恍寄江南春。誰知相顧起感慨。翹首放歌如有神。江南千里遶春月。閣下梅花正當發。獨立方傳章相詩。同游爭結王生襪。君家世胄不可當。一門羣從超諸王。春風吹度鳴呵里。芳草生當朱雀航。東觀禹穴渡江沚。官閣相鞫偶然耳。但藉荒廚對步兵。時寓其叔氏蕭山署中何須古驛逢梅使。春空一望生羽翰。君將獻賦游長安。薊門亦有梅如雪。願把斯圖雪後看。

祝來叔荀王夫人夫婦六十偕壽

少與叔荀共文酒。市樓大道彈陽春。今來漸覺毛髮改。看君玉杖扶鄉人。山庄花發秋正曉。最喜閨中得偕老。開徑方逢羊仲來。齊眉轉覺鴻妻好。錦筵雙進金屈卮。後來年少推烏衣。採薇斲木總閒事。但見滿庭開紫芝。

送同年陸義山編修歸當湖

春風吹簾草色青。蓬池日暖猶寒冰。陸郎斑駁想南去。開軒爲倒雙玉餅。連年同館少適意。時向西山望朝氣。筆妙爭題海嶽圖。史成快補河渠志。時補草河渠志完始行當湖新水碧似烟。君歸正值荷花鮮。慚予日誦張鷹賦。羨汝先登賀監船。平帆載去雙黛綠。并折靈泉產名玉。義山觀于得子一姬各產一男一女百年行樂能幾時。萬事于今已差足。潞河春漲下溜遲。高飛黃鵠還啣雌。玉堂後夜如相憶。但記雙添半臂時。

林官歌喜趙侍衛弟還里

趙郎束髮上計車。圮橋親受張良書。殿頭對策首稱旨。特令交戟環周廬。林官赫赫近天仗。外府飲飛遠

相向羊祜方班七萃中。劉洪已冠千牛上。宮門人佩大橫刀。節宿園邊有賜貂。領護早攀丹禁柳。思親還渡浙江潮。鳴珂舊里宴嘉客。堂上朱衣未頭白。驕馬仍來踢鞠遊。緋袍看作斑斕色。連江烽火動甌蠻。時見戈船瀨上還。莫道書生使東越。便教射虎向南山。

越州太守行爲許使君夫子作

越州太守賢且明。分銅領竹稱專城。門排五馬總神駿。江浸一錢清復清。高懷皎皎似裂帛。手把殘編對賓客。印篋虛涵海日紅。書床斜映山花碧。江東八邑留畫圖。過江誰不知夷吾。上林久已翔丹鳳。大府方應見白鳥。卽今荆楚播撻伐。尙有萑苻想竊發。但藉顏裴撫凍飢。不須嚴助平甌越。龍門教授感所私。恩同掩骼兼埋醜。誰言黃雀啣花日。只在雙熊書軾時。

過張吳曼草堂兼讀其所著梅花詩集有贈

先生好學恥漁獵。不向枯毫鬪結捷。作賦眞能嗣南京。記書何啻亡三篋。梅花開落江水濱。聯詩宛與花相親。我來讀詩憶花好。疎影暗香如有神。草堂斜啓延海曙。云是先生著書處。萬軸緗幃幾樹梅。慷慨留題不能去。

客吳門喜遇金副使巡驛感贈

春風吹花度湖水。畫船搗鼓橫半塘。江南副史早行部。正當乘傳來吳閫。西河遊人武丘客。醉後重尋鄭莊驛。都尉新從龍里還。梁生適在皇橋側。當年大雪辭蔡州。使君雙旆移文樓。邗江釣艇不能上。墮苑柳枝空自抽。春鶯朝啼暮還徙。又見開衙白門裏。此地相逢非偶然。一望烟波汨如水。

輓甬上齊士虎

營丘兄弟皆負奇。兩龍並起無雄雌。僧彌既死法護在。與之相對長歎歎。高天熒熒日晶晶。恍見當年好容貌。氣盛時傾稷下談。興來每向蘇門嘯。讀書萬卷絕簡編。決機俄頃如流泉。許之管樂已不媿。肯與稽阮相因緣。無如遭逢嘆不偶。幾度高齋種楊柳。市門挾瑟且哀歌。墟下攜錢快飲酒。修文有召不得違。著書未就將從誰。但惜周嵩尙有母。那知伯道竟無兒。先生之季與予善。每話難兄泪披面。若過山陽歌此詞。落日寒冰尙相見。

讀何使君夫子渡曹娥江哭父卷子書後

南昌亭邊日色黃。伯倫臺畔環枯桑。哲人乘風歸吳閩。上爲列宿揚星芒。遠溯家世本汜鄉。廬江之後來山陽。先生早歲秉令望。名同第五饒文章。當時四友稱荀羊。于今遺策隸太常。太丘有嗣誇二方。長者早駕天閑驥。南驅閩嶠東越疆。已經獎異稱循良。將迎鳩杖啣霞觴。忽然日蝕東壁傍。越人聞之心感傷。有如秦相五殺亡。童子出涕春不相。方行四制挽轡纒。山公起復義不妨。使君哭之心轉傷。試看東渡曹盱江。長歌一字一斷腸。從來虞殯能導喪。哀吟不復調宮商。我今欲和徒徬徨。歌聲欲絕哀未忘。

烏菟歌爲雙壽作

金烏熠熠顧菟驕。東公丹棗西王桃。當筵進獻祝貽背。不用鼓琴歌綠腰。蟠根仙李舊閱閱。曾擅文章跨東浙。爲訪林泉憶素游。因思高蹈追前轍。閨中偕老同古稀。賓朋扶杖相攜持。庭前兒竹當風長。嚙下孫枝帶雨肥。雙飛黃鵠舞秋節。正值重陽酒盈榼。欲識朱顏對面紅。且把黃花滿頭插。

雙壽詩

君不見扶桑日出海月明。東西相望相隨行。中山有鳥自啣羽。每借顧菟幽高生。弘農丈人乘高蹈。篋籥魚竿有同釣。龍里由來重朗陵。鹿車自昔推桓少。東湖花發水滿堤。湖邊日日生光輝。種將綠竹能棲鳳。採得青荷好製衣。只今初度共皇覽。錦帆還同繡弧展。書借簾鬚裊篆雲。花從酒面生螺盃。清秋良日佳氣新。門前流水如車輪。笑他瑤島偷桃客。卽是金門索米人。

爲沈表兄題夫婦行樂圖

吳興丈人年古稀。齊眉尙有衣巾綦。東公西母共行樂。一時爭看雙鸞棲。丈人胸懷坦如矢。上友黃農作知己。初住東江花港中。移在西湖藕塘裏。沿湖十里種夏蓮。紅蓮倒影清波間。閨中畫入非無意。好比湖波作鏡看。

李太夫人大壽

昔者魯國上母壽。宋宗坐賜朝堂中。武昌太君就饗列。丞相下拜王茂弘。惟我夫子職副相。暫筭稼計留司農。高堂碧髮久迎養。誥進五色祿萬鐘。圓冬大臘獻花餽。錦帆當筵覆琬琰。蝶勝先春集絳幡。獸籛着地闌紅毯。登堂齊捧金屈卮。門生故吏盈前墀。添籌不用蕭何箸。舞綵還披羊續衣。獨憐庭下秀玉樹。年少曾經入鼂署。繞膝時從東觀還。懷鄉正值江南去。江南萬里風物清。王師況復收昆明。西來紫貝雙函發。南望彤雲百疊生。春陽將至日皦皦。綵齒啣翹拂青鳥。但看天邊下玉書。便起塔前拾瑤草。

西河文集

蕭山毛奇齡

字僧彌
文簡開稿

凌紹顯
字維滄
郡匡時
秉中較

七言古詩十三

飲金十四燈園看草花同姜九廷幹呂四洪烈羅大坤吳大棠禎張二錕卽事

櫻桃初熟梅子酸。花草爛熳開東園。叢叢日下好顏色。青黃紫白藍綠丹。燔炁盈盤酒盈罍。履舄紛紛集前榭。龍澗何曾在洛陽。辟疆不復稱吳下。當筵插得花數枝。短簫橫笛吹參池。最憐垂老看花客。醉倒花前花不知。

奉謝分巡許元功使君夫子薦舉抒意

康熙歲午之一月。朝廷下詔求俊良。幕門蓬壘有佳士。不惜中外交推揚。大臣御史中執法。爭捧徵書覆黃牒。江東節度文教優。璧馬千旌日三接。殷勤但問章句儒。兼諮著作通羣書。上鋪聖德下華國。束帛誤投窮巷居。蚊虻翕翅傍椳樞。只羨鴻飛度遙海。礮石難將白璧求。鴛胎不用黃金買。使君獎士多過情。品題一過增聲名。滕公按劍知韓信。文舉封章薦禰衡。軺車旁午詣縣舍。再拜徬徨謝車下。主父無錢那入關。王良多病難隨駕。結髮受書通一經。安思載酒窺書城。手讎三豕久不定。胸貯五龜全未能。弱歲出門

覓衣食。老大還爲道傍客。吹簾半世罕見聞。解缺三彈有誰識。方今聖主真好文。東觀學士如雲屯。朱鷺作歌奏司馬。白麟有對來終軍。以茲荒謬廁其後。毋乃強合櫛與薰。郡國限年恐致詰。安平進賞將焉存。生平忼愾感知已。挺刃願報國士恩。祇求厚地掩薄劣。莫使庸材負賢哲。不然甞豈石隱人。何必躬耕待三節。菖蒲花發伏枕餘。病中猶改金銀車。倘能鑒此陳情疏。豈敢還呈卻聘書。

別馬廣文作

龍門百尺中天啓。迴視天孫碧雲裏。藻影翻成北海魚。桃花瀉作申江水。傳經自昔推馬融。果然絳帳來扶風。當年賦笛已擅絕。只今秉鐸猶稱雄。春風吹花遶書屋。長啓清罇倒醴醪。香飯晨炊苜蓿寒。菘羹夜汎芹絲綠。檐榴初發紅滿枝。歸舟欲渡千回思。龍門多少溯從意。半在鱣堂對酒時。

桐城姚孝廉文焱見贈感賦

皖江才子系有虞。十年獻賦升公車。虛懷早授京費易。健筆欲著梁陳書。名高四海久推重。到處人爭識。麟鳳袁氏通侯半在門。王家雋士皆羣從。秋風吹潦江水清。畫船遠渡來西陵。但知花縣看常棣。時訪其弟明府蕭山。那道橫江採杜蘅。新詩璀璨似珠玉。不惜閒題寄羅屋。車下還招季布魂。酒酣重擊高離筑。鄉人刺促去住難。整將短景投吳關。高軒在望欲御晚。翹首半天珠斗寒。

介丘吟爲姚明府作

生平不敢入燕薊。金臺空復求乘黃。潛登太行苦服輓。道傍何處逢孫陽。從來美好善謠詠。啼缺一聲墮衆芳。誰知負局有弘量。鎔成冰鑑如秋霜。攝之日月且增耀。照見瓦垆皆有光。皖口舊家聯譽望。吳興才

子多文章。漢儒初試考功法。唐相自饒應變方。壠草春耕勸田叟。隣烽夜靜降甌王。試淬干將欲鳴匣。爰收竹箭方在房。世人誰可與儕伍。惟此乃得當門牆。清秋銀漢甫灑斂。新蒲獵獵生野塘。乳燕學飛爭去壘。枯螢垂死猶棲囊。泰山巖嶧倚天半。梁父介丘羅四傍。結根萬仞得所託。浩然一顧天風長。

湖西將軍歌

秀江橋下春水生。綠橋幾曲春花明。燕山大將開幕府。千里不聞枹鼓驚。當年挾策上金殿。幸奪翹關走飛電。仗下看披鵬錦衣。宮門卻賜花菰箭。十年宛馬塞上騎。親隨部曲漁陽兒。桑乾風雪控弦去。猶聽阿鞬當橫吹。龍驤南下定三蜀。遂駕樓船遣楊僕。湖東既鎮後湖西。每見投壺理軍曲。從來名將不嫌老。羨汝當年立功早。躍馬雖稱矍鑠難。擒生終逐嫵姚好。揮戈橫槊二十年。生纔四十春風前。桃花叱撥紅照眼。擁麾江畔疑神仙。宜春臺高秀江綠。時共登臨看黃鵠。記得前年江上亭。共點醅酥倒醞醑。是時春雨細如注。幸與將軍倚庭樹。落絮游絲濕馬蹄。正在袁江最深處。袁江草長花復開。清江水漲空徘徊。思君重憶亭前飲。那得紅船載酒來。

戊申三月旅亭夜讀東原宗元鼎所著新柳堂集中有三詩專賦予瀨中事觸境生感因爲長句
寄去隨筆無敘

憶昔行瀨中。曾經射陽渡。欲託東原宗鼎家。風雨江關暗前路。從茲奔走二十年。每過隋苑心茫然。名山不厭少文病。破浪只思元幹賢。前年白下遇難弟。謂鶴問因宿街西瓦棺寺。龍躍雙垂海內名。雁行單作天邊字。思君但讀君著書。因之遙識東原居。芙蓉一畝共兩畝。楊柳千株復萬株。深堂楊柳想佳句。初日

芙蓉豈虛譽。如何念及瀨中人。不道瀨中從此去。當時鼓篋渡水鄉。蘆中無復傾壺漿。孔融兄弟遠難覓。道傍獨立空徬徨。潛行宛轉過江右。記得湖東鄧老秀。擊絮偏逢水漲時。裝衣正值花開候。遂巡流落淮汝間。酒徒死盡誰能傳。感君記事最忼慨。使我泪流如涌泉。春深三月返江沚。垂柳紅橋夜低起。爲讀東原詩一編。三乞隣燈酒家裏。

陳掌院夫子生日作

在昔郡國應制舉。集賢學士居殿傍。已徵詞業進祕閣。尙未程試留東堂。執經曾向馬帳度。遙見天邊白雲暮。龍沼桐扶和嶠遠。鼇峯土負山濤去。只今三載彈素琴。紫芝產地烏棲林。立朝久動荃宰戀。移孝遠邀宸眷深。芸臺重掌入親近。詔遣黃門賜存問。玉案親書第一班。金華坐進登三論。當年兩省薦拔。今來倖步清都塵。分將黃紙當廳展。擷得紅蘭滿座春。老成端作後來式。守正時時見容色。進賢必欲璘。黃斥僞何曾雜。儒墨文章能起明。宋衰昌黎之後無雄才。請筵高出陶虞上。草制全從典誥來。圍冬暢月設弧矢。正值王師渡滇洱。六詔軍書奏玉除。三雍文教開金齒。大臣嘉績動簡編。秦符高映蓬池邊。第看天紀回星斗。安用崧高誦歲年。

南山篇奉祝平太翁年伯七十初度

載問次山尊人也。

君不見。南山之高高入雲。上連闔闔開天門。仙人環珮紛錯落。日月光景相網緼。阿翁七十好容貌。欲與南山等嶠峭。名法能傳章慶成。高懷不數岑公孝。牆東寄跡追少微。行游管着青荷衣。風生南塢椒蘭發。日出東園烏鵲飛。卽今初度誦皇覽。矢絙寒蓬射來遠。神授方函啓綠文。賓隨曲巷開朱轡。華鐘綺席次。

第陳清秋八月眞良辰。邀來閣下彈箏女。舞罷庭前戲彩人。庭前戲彩皆神駿。千里聲名遠尤震。馬氏由來重五常。江東自昔推三俊。南山巖嶼高復高。稱觴進履多賢豪。欲知綵紱垂麟角。但看趨庭有鳳毛。

李方伯生日

黃星熠熠臨江陽。漸東漸西瞻景光。鳴葭疊鼓樹六幢。云誰開幕今藩方。三韓家世遼海長。從龍舊澤傳芬芳。蟠根仙李枝葉揚。惟公策仕肇龔黃。分司偉伐留西江。晉階總憲肅紀綱。三河萬里百辟良。羣推觀察非尋常。嘉名特達書御旁。帝將簡之補袞裳。惟此吳越稱巖疆。東南克詰撻伐張。非公不足領上襄。只今羽檄猶旁皇。軍需自給廣武糧。伊昔蕭相當漢昌。關中餽餽連戎行。中原開府杜與羊。嘗恢宛洛屯江湘。矧茲甌越空陸梁。不煩朝食揮機槍。自慚垂老依梓桑。猥蒙薦達登帝閭。車箱盈轡馬曳纒。持觴不前應見諒。高天尙見青鳥翔。願隨青鳥同相祥。

一聞上人畫鶴索題

自笑生來有仙骨。年年相對鸞鷲棲。談經拂塵擁高座。儼若仙驥橫天梯。竹林鸚鵡靜無語。寶塔雁王他自飛。不隨丁令較去返。豈與支遁相因依。閒堂落筆起長嘯。此尚亦有凌霄姿。

金學使曾陷賊中歸命途次感寄

浙河東下海濤坼。曾啓龍門浙河側。取士能如嘉祐年。論文不數元和日。機衡在望鮮軼才。諸生並得乘雲雷。醫師雜採及馬浮。孫陽一顧皆龍驤。誰知世事多反覆。倏見烽烟起南服。楊僕方隨下瀨軍。趙佗幾篡番禺牧。王威赫濯恢七閩。杜陵陷賊埋風塵。青天見日撥雲霧。今來重會三江春。文昌熠燿動銀漢。長

夜漫漫有時旦。百里相過不得前。遙望雙旌泪如霰。

暮潮行別朱公子簪原

春潮初漲曲江邊。游子乘來申浦船。水上桃花新帶雨。城頭柳色正含烟。主人邂逅忻相見。邀我南樓啓
歡讌。黍酒傾餘綠玉盤。芹羹汎作黃金線。逡巡入夏歸去遲。宛如家室相因依。林鳩喚婦循檐下。海燕攜
雛出幕飛。長帆欲掛轉鐵鹿。將向江頭別朱穆。幾行愁雨爲君傾。一曲離歌倩誰續。嗟君家世本畫輪。聯
翩華閬傳來新。伊子何幸託杵臼。廡下定交如有神。吳淞東去極海涘。一望錢塘正瀾瀾。他日相思欲寄
書。但看西陵暮潮起。

奉謝何使君夫子有感

從來治郡稱第一。廬江太宰何敬容。卽今於越踵良牧。軒軒五馬如游龍。山前文簿啓來碧。花下印牀開
去紅。竹符初發罷征調。誰謂東山有羣盜。傍邑先傳諭寇書。明庭且下求賢詔。龍門高峙渺百尺。頓集平
原舊時客。自慚塔草漸飄零。羞向園桃比顏色。負芻長自困泥塗。豈料終逢晏大夫。白壁儘教三獻去。黃
衣啣得一環無。當時乞食渡淮浦。無數淮流漑肺腑。結機交爲國士歡。投竿只道王孫苦。十年側促懷舊
心。使君千騎方駿駸。天涯壯士今還在。仰視滕公泪滿襟。

桂樹生玉芝歌爲姜定菴京兆作

君不見庭前桂樹發素秋。連蜷偃蹇枝相糾。蟾蜍原向根底宿。鸞鷲儼從花下游。忽然華幹產芝實。玉筍
漸看膚裏出。三秀煌煌映列星。六英燦燦承朝日。豐脣麗肉白雪姿。靈根翠羽生華滋。墜露空濛如雨散。

吐雲繚繞似烟絲。嗟君奕葉挺奇秀。謝氏當庭燿清晝。夾道朱輪有嗣英。高堂白髮方長壽。當年左掖曾
草麻。甘泉前殿揚朱華。芝房一歌未絕響。函德九蒸還薦葩。今來子舍奉甘旨。暨借商山斲仙餌。流膏沆
瀣成酒漿。瑞彩斑斕作金紫。弧南一宿秋更明。下應瑤草相敷榮。不信但看桂樹上。團團唯有玉芝生。

崑山徐母顧夫人壽

青鯛奇修鱗。不復生凡魚。丹山產鸞鷲。迥與羣鳥殊。卽今東海擅華胄。有母賢名比仁壽。徐藻原傳內子
文。顧家本是閨房秀。清洋江畔采綠遲。春能濯繭秋鳴機。教兒嘗秉和熊志。相士仍吟弋雁詩。以此諸君
奮皇路。各向長安獻詞賦。上苑爭傳花一枝。當軒種得珠三樹。慈恩寺裏曲江春。兄弟皆爲領宴人。散籜
羹遺東閣早。留輒日愛北門新。今來錦悅懸高闕。畫齒重重加綠髮。但看殿帔賜朝霞。儘使宮衣舞秋月。
君不見。雍丘宋氏兒。臚名相讓還相追。娛親江夏遺綵服。到今湖橘猶含緋。又不見。閩中陳堯叟。兄弟三
人兩殿首。其一曾爲知制臣。尙恐慈親杖橫手。倚嗟我母年六旬。居然邁宋兼超陳。且隨吳下稱觴客。還
慶庭前戲綵人。

贈襄平李廣寧司馬赴兗州

任城司馬襄平豪。腰懸鹿速金寶刀。英年妙筆擅文史。脩然意氣干雲霄。鳳毛燦燦成五色。遠向丹山趁
飛翮。望嶽重登杜甫臺。題詩應在匡衡宅。淮流浩浩到海廻。雙旌南下蒼雲開。他時載酒行春處。無數桃
花傍澗來。

相望篇送陸少參督餉江南

從來執法推鯁直。前有陸杲後目山。相臣初避道路去。內戚不上街樓看。何者參政儼宗。爲使直指爭往還。將施赤棒先白簡。此事乃在順治間。先皇駐蹕御南苑。親召副相連臺班。特令出衆宣。謂此不負柱後冠。方州節鉞久未振。請借高峻風人寰。中朝豈是厭汲黯。出刺乃欲重辭宣。鼎湖龍去。翁歸臥江楓。寒今來循次游長安。殿中多薦識面官。五都列岳未爲薄。六路轉餉將誰爛。東南饑饉。民力天子乃遣專事權。公整往足肅吏治。清廉不用支官錢。我今相送思贈鞭。臨風如汎丹陽船。長子醜酒與自遠。西浦輸粟心長閒。計臣應受鵠袍賜。賓從但從牛首觀。莫言是地少風憲。曲巷舊有王僧虔。太微南下四星闕。相望儼若居臺端。到官莫厭芻粟廩。待君仍在螻坳邊。

鍾繼曰。少參舊著風采。後以惑于左道致敗。聞西河贈是詩時。少參讀至曲巷二語。忽失色。後彈之者王學士也。山陰張繼隱爲予言。繼隱以入少參幕。過西河別。西河適作是詩。見繼隱。遂着賓從一句。後連翩相接。即西河亦不自解。詩誠之可畏如此。

王二光祿生日夜飲有作

先生矯矯秉大節。弱歲論文在於越。薄宦朝看海上雲。層樓晚掛山頭月。京門對酒連歲年。醉來長向樓前眠。愛閒不畜雙鬢婢。上義能輕五庫錢。只今內府待入直。門下還留孟嘗客。況有當前羣從賢。王家子弟烏衣宅。樓頭開宴值早春。燭紅酒煖春盤新。恍然禹廟看花後。夜雨停舟鑑水濱。

甬上段長史枉過闕候值其初度奉寄此詩

甬江樓畔花樹明。灌門有路通蓬瀛。慶元使君曳黃綬。行部雨中來永興。單車緩軸去呵雜。肯爲牆東繫朱鬣。解珮慚無呂氏刀。荒亭未設休源榻。君家仕宦多似雲。鳴珂舊里聲相聞。鳳毛已布庭前綵。驥足還

留海上軍。清和四月。值初度。弧矢應懸郡庭樹。一觴欲獻未能前。但望金峨海傍路。

題畫

君不見、丹山之穴千仞高。上有朱鳳聲嗷嗷。八方攬德久不下。一朝奮翮求其曹。朱光向日耀五采。翠羽順風揚九苞。低昂宛轉起雲表。萬里相過向蓬島。華池阿閣何處棲。但見將雛舞來好。春花滿岫露滿枝。啾啾百鳥爭羣棲。不分夏鳩并春扈。後羅孔雀前山鷄。簫韶不作至者鮮。穎上金臺望中遠。種得梧桐蔭未成。採來竹實香猶淺。高堂展絹采色新。就中威鳳當麒麟。誰將東海仙人宅。寫作瑤臺天上春。

題周斗垣先生採芝圖

商山漠漠環清溪。溪邊輪囷產紫芝。丹柯翠羽滿林谷。絕勝三秀生銅池。丈人採之嗅逾馥。飢可餐之比梁肉。獨坐幽岩白日長。時見松陰下山麓。洛中遺老百歲餘。春來曾釣磻溪魚。煌煌壘壘山前錦。盡是當年綺里書。

王生之雲中

白羊城邊白雪飛。桑乾河上黃塵稀。丈夫拔劍不得意。西入塞垣何所依。當時相遇共文酒。朝向蕭江折新柳。爲君送作錦官遊。同上溪南一回首。淹留劍外春復秋。更從嶺表尋羅浮。木棉花發樓紅寺。椰子盃寬汎白漚。今來燕市負意氣。屢上金臺聘騏驎。拊篋誰憐樂毅來。哀歌能使荆卿避。貂衣短後纓纒胡。重逢擊筑隨屠酤。層冰千仞方浩浩。雁門千里跨飛狐。自言碣石館難再。將逐蒙恬望榆塞。射虎從教太守驚。椎牛尙有將軍在。薊門歲暮雪未乾。嗟予索米留長安。青門欲餞苦不得。天街柳葉誰堪攀。從來臘盡

會春曉。況復高名播來早。若過新興肯望鄉。鉛粉樓前有春草。

寄祝江南方伯生日

芙蓉初發清江澗。曉看天星照平楚。關內蕭何本近臣。徐州荀羨將開府。前時鵬奮湖水濱。西陵相望多烽塵。但瞻武庫歸南省。並道文昌近北辰。今來甲子喜新遷。正值長庚轉秋宿。方岳能吟史克詩。在朝共進申公壽。秣陵九月佳氣新。大功坊底羅嘉賓。清罇欲獻無由達。思煞秦淮對酒人。

送孫孝廉還里

去年八月桂子黃。看君雕鷲爭翱翔。今年秋節又三五。慷慨送君還故鄉。君才卓犖世所羨。曾在含元膺召見。司馬高文有賜金。王褒出使嘗乘傳。芙蓉十里江岸長。將歸且醉當壚傍。滄江暫見蟄龍臥。雲興霧捲旋飛揚。河橋衰柳不堪折。月滿當頭白如雪。他日相逢杏苑中。仍向花間看明月。

汪錚選郎善事母。值典試闕中得壽萱二字碑。洞摩勒以歸時太夫人八十。遂預製扁額。臨二字

于堂以爲慶案爲此歌

潘居色養重鼎鼐。況入東曹倍謹凜。秩閣頻遣赤館羹。彩衣時覆仙郎錦。驅車試士出渭橋。秦碑漢冢關中遙。色絲未得譜雙纈。綠字宛如啣九苞。北堂日永秋尚早。滿砌丹萱正姣好。石闕呈來古籀殊。畫梁標出旌簾曉。蒼龍乍轉花滿欄。銀幡未賜開春筵。稱觴長跪進壽考。恩綸照映相鮮妍。養堂不用啓京邸。紫帔金章錫來喜。瑤島翠華詠白雲。宛向中庭奉甘旨。曾參見肉思養親。從來孝感偏能申。請觀額上丹砂字。好慰堂前白髮人。

桐城方栲舟又申父子枉贈簡和

北風梢械銀杏黃。寺門雙樹塗嚴霜。龍眠高客作寒旅。回首一看江路長。當年地甲冠雲額。門十朱輪戶三戟。舊業金張總墜貂。君家兄弟真連璧。十年獻賦厭計車。會膺監郡占刑書。天時人事忌太盛。好女善謠能嫉子。浮雲曖曖水沈木。孔雀割金不辭辱。遠戍嘗經紫塞還。穹廬慙就黃花宿。今來訪舊游永興。將車季子方趨庭。嚴城蕭寺苦寥廓。有鶴帶雛梳羽翎。翱翔千仞下視小。況當鳴和臨秋曉。章賢父子一經傳。徐氏詩篇六朝好。謂予失職志不平。天涯一見旋留情。同爲斯世沉淪客。那惜臨觴感慨生。長歌贈我最斐媿。揮毫書滿元興紙。愁心百折和來難。把卷踟躕不能已。

范母錢夫人輓歌詞

夫人家本錢王裔。閱閱崔嵬紹蘭沚。紫燕長廻朱雀航。丹輪時度鳴珂里。閨中日出臨繡牀。刺來黼黻多文章。因吟柳絮過庭下。爲採葛覃歸道傍。錦屏初啓射鳥雀。正值當塔覆紅藥。司馬譚公實我私。侍郎修饗曾爲灼。于歸帝里舒綵函。尊章簽判來淮南。在堂相繼赴幽室。苦捐珠釧埋金蠶。夫君文譽播禹甸。十載登壇領羣彥。自脫牛衣上計車。每啣鶴牘升金殿。慨然攬轡佐惠文。命留司法南康軍。日周外狃有紅粟。私顧在房無綺裙。但聞平反始置酒。況復平漕并履畝。綰綬恒兼盱水符。分章遂佐新安守。鸞湖鹿洞講席開。曾同論秀掄奇才。經傳韋母朱帷下。文似曹昭東觀來。最憐大澤釀遺蘖。道蘊抽刀白如雪。能令降鹵偃前矛。那道歸藩擁高節。戈船北發經險灘。軍輜下瀨浮來難。長年四顧督郵怒。先生掉臂歸林間。蕭然一望復何有。餉餼如賓在隴畝。井畔新栽阿母花。橋頭再種先生柳。趨庭繼起皆鳳毛。烏衣子弟真

